

Vol. 1
P. 1
E. 1
S. 1
T. 1
U. 1
V. 1
W. 1
X. 1
Y. 1
Z. 1



महाभारत कथा

(डोगरी)

Mahabarta Katha

मूल लेखक

चक्रवर्ती राजगोपालचारी

author

Chakravarti Rajgopalcharny

अनुवादक

श्यामलाल शर्मा

Tr

Syam Lal Sharma

१९६७

1967

Leltakla Sanskriti tea Sahitya Jammu - Kashmir

ललितकला, संस्कृति ते साहित्य अकादमी जम्मू—कश्मीर, जम्मू ।

Acc. No 28603
Cos Rs. 2.85
Date 15. XI. 67

Shri Pratap Singh
Library
Srinagar.

D24-5
R 14m

C अकादमी
सन् १९६६

891.43

प्रकाशक

ललितकला, संस्कृत ते साहित्य अकादमी जम्मू—कश्मीर, जम्मू ।

H 294.5

छापने आले

R 14M

आर० सी० प्रिंटिंग प्रेस, अप्पर बाजार, जम्मू ।

पहला पुज्ज

पंज सी

मूल्य १० रपे ५० पैसे

2

महाभारत

भूमिका

वैसे ते हर जुगै दी ए टकोदी लोड़ रई ऐ पर अज्ज सेई होआ करदा ऐ जे जुगै दी सारें कशा बड्डी लोड़ ऐ जे मनुक्खता दी महत्ता मनोऐ ते ओदी कदर बधै । अपने समाजै दा ढांचा इयां बनै, इक नेआ बातावरण निर्माण होऐ जेदे इच मनुक्ख अपने सुभा ते जोग्यता दे स्हारै उच्चा चकोऐ । ओ शड़ा अपने आपै गी गे सब किश नई समझै । मानव भाईचारे गी पशानै ते कन्ने परमात्मा गी बी नई बिस्सरै ।

नेई सिख्या देने गितै ए बड़ा जरूरी ऐ जे अपने उन्नै ग्रन्थें दा पचारि होऐ जिन्दे च भारत दी आत्मा दे दर्शन हुन्दे न । जेड़े शड़े भारत दी गै नई सारे संसारै दी, मनुक्ख मातरै दी अन्दरली ते झूंगी ताड़ समझने च मदत देन । ओ झूंगी ताड़ ऐ—

(ग)

सर्वे भवन्तुसुखिनः सर्वे सन्तु निरामयः

सर्वे भद्रानि पश्यन्तु माकश्चिद्दुख माप्नुयात् ।

मनुक्ख इक दूए गी समझना, इक दूए दियां त्रुटियां जरना, ते इक दूए गी सहारा देना ते सिक्खै ।

रामायण ते महाभारत नेए दौं ग्रन्थ न जिन्दे च भारत ते भारत दी आत्मा दे दर्शन हुन्दे न । इन्दे पढ़ने कन्ने भारत दे हिरदे दी धड़कन मसूस हुन्दी ऐ । रामायण ते महाभारत दे पात्तर साढ़े गै भाई-बन्ध ते रिश्ते नाते न । सीता दी पति परायणता, कुन्ती द्रोपदी दा कष्ट जरना, युधिष्ठिर हुन्दा धर्मपालन, भरत लक्ष्मण दा भातृप्रेम, अर्जुन भीम दी बीरता, हनुमान हुन्दा सेवा भाव अज्ज बी साढ़े हिरदे गी सन्दोख ते सहारा दिन्दे न । ए पिच्छें इयां गै सहारा दिन्दे आये न ते अग्गे बी दिन्दे रौडन ।

रामायण ते महाभारत अनसम्भ खजाने न । इन्दे च आत्मा दियां उच्चियां डुआरियां ते डूगियां सोचां, मनुक्ख हिरदे दे हिरख सोग, जिन्दगी दे सुख दुख, श्लैपा ते करूपता, महत्ता ते पतन सब किश ऐ । महाभारत दे सर्वन्धै इच आखेदा ऐ—एदे च सब किश ऐ । जेकिश एदे च नईं ओ संसार इच बी नईं ।

महाभारत “गीता” नेआ अनमोल उपदेश संसारै गी दित्ता ऐ । अपनी प्रकृति दे अनुसार ते निष्काम भाव कन्ने कर्तव्य पालन करने दा कृष्ण जी दा उपदेश अज्ज बी करोड़ें लोकें गी सचाई दी बत्ता पान्दा ऐ ।

गिल्लुएं गी गोदे इच खडान्दे होई ते सुआलदे होई दादी अम्मां ते नानी अम्मां रामायण ते महाभारत दियां कथां सुनादियां हियां । अज्ज ओ कथां बिस्सरें करदियां न । ए कथां सनाने करी अपनी संस्कृति ते अपने इतिहासै दा पर्चार हुन्दा ऐ ।

चक्रवर्ती राजगोपालाचार्य होरें महाभारत दा सार १०७ कहानियां लिखिये समुद्र गी कुज्जे च पाई ओड़ेया ऐ । ए कहानियां बड़ियां सरल ते रोचक न । कलचरल एकैडमी नै इन्दा डोगरी

अनुवाद कराया ऐ । डोगरी भाषा चाली लख डोगरें दी मातृ-भाषा ऐ । ए कहानियां मातृभाषा राहें उन्दे तोड़ी पजाने दा पुत्र कार्य एकैडमी नै कीता ऐ । बड़ा सरहाने जोग कम्म ऐ ।

अंग्रेजी थमां डोगरी च अनुवाद करने च डोगरी भाषा दा स्वातम बी भलकै एदा जतन कीता ऐ । इक जीन्दी जागदी ते साहित्यिक भाषा दे रूपै च डोगरी बकास ते उन्नति दी बत्ता उप्पर बंधदी जा करदी ऐ । वाक्य रचना जां व्याकरण दे कुसै पर्जोगे दे वारे इच कुसै साहित्यिक बन्धु दी सोच, ओदा बचार मेरे थमां बक्खरा बी होई सकदा ऐ । पर जियां उप्पर आखेया ऐ इक जीन्दी जागदी उन्नति पासै गै बधान्दी भाषा इच 'इकरूपता' औन्दे हबे बी पंजी बरे लग्गी जाने कोई बड़ी गल्ल नई । डोगरी दे साहित्य दा जिन्ना पर्चार बधग भाषा गी बर्तने दा जिन्ना जोग देगे उन्नी गै इकरूपता बी निश्चत हुन्दी जाग । फी बी अपने साहित्यिक बन्धुओं अगगें बेनती ऐ जे भाषा सर्वन्धी ते पुस्तक सर्वन्धी सुभा जरूर देन । इयां गै विद्वानें दी परखे दी घसवट्टी उप्पर असलीयतें दा पता लगदा ऐ । ते खुट्टु सोधन जन्दा ऐ । लेख ते लेखक दौनें दा कल्याण हुन्दा ऐ ।

१९५, विजय गढ़ जम्मू

श्यामलाल शर्मा

ब्योरा

गणपति होर लखारी बने	१	बाजी	१२६
देवव्रत	६	द्रोपदी दी वेदन	१३३
भीषम जी दी पतिग्या	११	धृतराष्ट्र दी घबराट	१४०
अम्बा ते भीषम	१६	कृष्ण जी दी पतिग्या	१४६
देवयानी ते कच	२२	पाशुपत	१५०
देवयानी दा ब्याह	२६	मसीबतै दी कहानी नमीं	
ययाति	३६	गल्ल नईं	१५६
बिदुर	४०	अग्रस्त्य ऋषि	१६१
कुन्ती देवी	४४	ऋष्य शृंग	१६७
पाण्डु हुन्दा सुर्गबास	४७	खेचल : यवक्रीत दी	
भीमसैन	५०	तपस्या	१७३
कर्ण	५३	यवक्रीत दा नास	१७६
द्रोणाचार्य	५६	शङ्गी पढ़ाई करनी गै काफी	
लाखा मैहूल	६४	नईं हुन्दी	१८०
पाण्डव बची निकले	६६	अष्टावक्र मुनि	१८३
बकासुरै दा चाण्डाथाप्पा	७५	भीमसैन ते हनुमान	१८७
द्रोपदी दा स्वंबर	८३	अऊं बगला नेईं जे तुस	
इन्दरप्रस्थ	८६	दिक्खिए गै भस्म करी	
सारङ पक्षी	९६	ओड़गेओ	१९४
जरासन्ध	१०२	दुष्टें गी कदें सन्दोख नईं	
जरासन्ध दा बध	१०६	हुन्दा	१९८
पहला मान कुसी ?	१११	दुर्योधनै दी बेज्जती होई	२०२
शकुनि दी चाल	११६		
सादा	१२१		

कृष्ण जी दी भुक्ख	२०६	युधिष्ठिर जी गी शीर्वाद	
माया (जादू) दा तला	२११	थोआ	३२१
पाण्डवें नौकरी कीती	२२०	जुद्ध दा पहला दिन	३२५
आखर धर्म दी गै जीत		लड़ाई दा दूआ दिन	३२८
हुन्दी ऐ	२२६	जुद्ध दा त्रीया दिन	३३२
मत्स्यदेस दी रखेया	२३२	चौथा दिन	३३७
राजकमार उत्तर	२३८	पञ्चमा दिन	३४०
बचन तोड़ चढ़ेया	२४४	छेमां दिन	३४५
राजे विराट दी गलत फैहमी	२५०	सतमां दिन	३४७
सलाह मश्वरे	२५६	अठमां दिन	३५२
अर्जुन दे सारथी	२६३	नौमां दिन	३५६
शल्य होर अपने भनेएं		भीष्म हुन्दा काल	३५६
दे बरुद्ध	२६६	कर्ण ते भीष्म पितामह	३६२
वृत्र	२७१	सैनापति द्रोणाचार्य	३६६
नहुष	२७६	युधिष्ठिर होरें गी जीन्दे	
राजदूत सञ्जय	२८२	पकड़ने दी चाल	३६८
सूई दे नक्के जिन्नी धर्त		बारमां दिन	३७२
नई देनी	२८७	शूरवीर भगदत्त	३७७
राजदूत श्री कृष्ण जी	२९१	अभिमन्यु	३८४
मोह ते फर्ज	२९८	अभिमन्यु दी मृत्यु	३९०
पाण्डवें दे सैनापति	३०२	इक्र पिता दा दुःख	३९३
कौरवें दे सैनापति	३०५	सिन्धु राज जयद्रथ	३९८
बलराम	३०७	दुहारा कवच	४०३
रुक्मनी	३१०	युधिष्ठिर हुन्दी चिन्ता	४०८
मिगी के ?	३१४	युधिष्ठिर हुन्दी कोरी हीखी	४१३
कृष्ण जी दा उपदेश	३१८	कर्ण ते भीमसेन	४१६
		पतिग्या पूरी होई	४२१

(ज)

सोमदत्त दी मृत्यु	४२५	युधिष्ठिर गी दम-दलासा	४७१
जयद्रथ दी मृत्यु	४३१	ईर्ष्या	४७४
द्रोणाचार्य होर बी चलदे		उत्तंक मुनि	४७६
होए	४३५	आटे दा सेर	४८३
कर्ण दी मृत्यु	४४०	युधिष्ठिर हुन्दा राज	४८६
दुर्योधन	४४५	धृतराष्ट्र	४९२
पाण्डवें गी द्रण्ड फटकार	४५१	त्रौन्नै बुड्डे दा सुर्गबास	४९६
अश्वत्थामा	४५६	कृष्ण होर बी बैकुण्ठ	
बदला मुक्केया	४६१	धाम गे	४९८
कुन सहारा देऐ ?	४६३	युधिष्ठिर हुन्दी आखरी	
युधिष्ठिर हुन्दी बेदन	४६७	परीक्षा	५०१

गणपति होर लखारी बने

भगवान ब्यास होरें गी कुण नईं जानदा ? ओ वेदें दे मन्ने प्रमन्ने दे लखारी न । उन्दे पिता दा नां महां ऋषि पराशर हा । ईऐ वेदव्यास न जिनें संसारै दा कल्याण कीता ते महां भारत जनेया दिव्व ग्रन्थ रचया ।

पहलें उनें महां भारत मनैइच बनाया । फी सोचन लगे ए कथ दुनियां गी कियां पुज्जै ? उनें जगत बनाने आले ब्रह्मा जी दा ध्यान कीता । ब्रह्मा जी उन्दे सामनै प्रगट होए । उनें ब्रह्मा जी गी मत्था टेकेया ते जौले हथें बेनती कीती ।

महाराज ! में इक बड़ी शैल कहानी सोचीऐ पर मिकी कोई नेआ नईं लबदा जे अऊं बोलदा जां ते ओ लिखदा जा ।

ब्रह्मा होरें व्यास जी गी बड़याया ते आखन लगे—
 “ऋषि जी, तुस गणपति गणेश हुन्दा आह्वान करो। ते उनें
 गी आखो जे ओ तुन्दे लखारी बनी जान।” ए आखियै ब्रह्मा जी
 लोप होई गे। व्यास जी ने गणपति हुन्दा ध्यान कीता। गणपति
 जी प्रगट होए। व्यास होरें उन्दा स्वागत कीता, पूजा कीती
 ते गल्ल सनाइयै मद्दत करने दी बेनती कीती। गणपति होरें
 ग्लाय़ा—“खरा ! जियां तुस आखदे ओ उम्रां गै अऊं करंड। पर
 इक शर्त ऐ जे लिखन पेदे मेरी कान्नी नईं रुकी लोड़चदी। इस
 करी तुस बिना रुकावटे ते संकोचै दे लखान्दे जाओ। अऊं इस्सै
 शर्तें पर लिखी सकनां।”

व्यास होर मन्ती गे। पर उनें बी अपने वचा गित्तै इदे
 कन्ने गै शर्त लाई दिती—

“ईम्रां गै सई ! पर जे किश अऊं लखां ओदा अर्थ तुस
 लिखनें थमां पहलें समझी लैनां होग।”

गणपति होर मुस्कराए ते शर्त मन्ती गे। व्यास
 होरें महाभारत दी कथ रम्भी ओड़ी। बिच बिच ओ नेए
 पलेचदार श्लोक बोलन जे गणपति होरें गी अर्थ समझने गित्तै
 बिंद रुकना पेई जा। इन्नें चिरै गी व्यास होर कईं श्लोक मनै
 इच रची लैन्दे। इस चाली वेद व्यास होर बोलदे गे ते गणपति
 जी लिखदे गे।

अदूं छापेखाने नईं हे हुन्दे ते विद्वानें दे दमाग गै पोथिएं
 दे भण्डार हुन्दे हे। व्यास होरें सबनें थमां पहलें ए ग्रन्थ अपने
 नामी पुतरै गी, सिरी सुकदेव होरें गी पढ़ाया। फिरी उनें होरें
 ऋषियें अगे ओदी व्याख्या कीती। ओ इयां नईं करदे तां
 अगलियें पीढ़िऐं गी ए ग्रन्थ नईं थोन्दा।

इक परम्परा इयां ऐ जे नारद होरें ए कथा देवतें गी सनाई

ते शुकदेव होरें गन्धर्वें गी पढ़ाई । ए ते सारें गी पता ऐ जे वंशम्पायन होरें, जेड़े बड़े गुणी ते विद्वान हे, ते व्यास हुन्दे नजीकी चलें विच्छा हे, लोकें दे कल्याण आस्तै इसी प्रगट कीता ।

महाराजा परीक्षत दे पुत्तर, जनमेजय होरें इक बड़ा जग रचाया ते जगै विच वंशम्पायन होरें गी महाभारतै दी कथां बाचने दी बेनती कीती । पिच्छुआं सूत रिशी होरें नैमिष वने इच शौनकादि ऋषिएं गी ए कथ सनाई । ए कथ इन्नमिन्न ऊंघ्रां गै ही जियां वंशम्पायन होरें जनमेजय गी सनाई ही ।

सूत होरें ऋषिएं गी सनाया—

“मेरे बड़े भाग हे जे में व्यास हुन्दी रची दी महाभारत दी ए कथ सुनी । ए कथा सारे संसारै दे लोकें गी धर्म ते होने जीने दे उपा ते फल सखान्दी ए । अऊं तुसें गी ए कथा सनानां ।” ए सुनियै सारे ऋषि सोगे होइयै, उन्दे चक्करी किट्टे होई गे । सूत होर सनान लगे “जिस बेल्लै महाराजा जनमेजय ने जग कीता तां में महाभारत दी मुख कथा ते ओदे कन्ने होर कई कथां जेड़ियां वंशम्पायन होरें सनाइयां हियां, सुनियां । फी अऊं तीर्थें टुरी गया ते बड़े तीर्थ कीते ते जुद्ध खेतर बी दिक्खेया जित्थें महाभारत होआ हा । हुण अऊं तुसें सारें गी मिलन आयां । फिरी उनें सारे ऋषिएं गी महाभारतै दी कथा सनाई ।

महाराजा शान्तनु हुन्दा काल होई गया तां चित्रांगद हस्तनापुरै दे राजा बने । उन्दे पिच्छुआं बिचित्रवीर्य होरें गी गद्दी थोई । उन्दे दौ पुत्तर होए । धृतराष्ट्र ते पाण्डु । धृतराष्ट्र पलोठी दा हा पर जमान्दरू गै अन्ना हा । इस करी गद्दी लौके भ्राऊ पाण्डु गी थोई । पाण्डु कछा किश परद्ध होआ ते उसी बनबास भोगना पेया । ओदियां दमै लाड़ियां कन्ने हियां ते उस मता चिर बनबास भोगेया ।

बनै इच रौन्दे होई पाण्डु दियें दमैं लाड़ियें पञ्ज पुत्तर होए जेड़े अग्रे चलिये पाण्डवें दे नां कन्ने बिख्यात होए । अजें बनबास चलै दा गै हा जे पाण्डु हुन्दा काल होई गया ।

ऋषि लोकें उन्दी बनै इच पालमा कीती । इआं पञ्ज पाण्डव मठोन लगे ।

जिसलै सारें कशा बड्डा जागत युधिष्ठिर सोलें बरें दा होआ तां ऋषिलोक उनें गी हस्तनापुर लई आये ते उन्दे दादा भीष्म पितामह गी सौंपी गे ।

पाण्डवें थोड़े चिरै इच गै वेद पढ़ी लैते वेदान्त सिक्खी लेया ते राजकमारें दे सिक्खने जोग सारे कलाकौशल सिक्खी लैते । अन्ने धृतराष्ट्र दे पुत्तर कौरव उन्दे दोक्खी होई गे । ते उनें गी मती चालीं दुख देन लगे ।

भीष्मपितामह कुलै दे बडेरे हे । उनें बिचवचा कीता ते दौने पक्खें बिच सुलह सफाई कराई ओड़ी । इस चाली पाण्डव इन्द्रप्रस्थे इच ते कौरव हस्तनापुरै इच बक्खरे-बक्खरे राज करन लगे ।

किश समे परैन्त कौरवें ते पाण्डवें जूआ खेडेया । उस समे राजा लोक जूआ खेडना बड़े मान्ने दी गल्ल समझदे हे । कौरवें पासेया शकुनि खेडेया ते उस युधिष्ठिर गी हराई ओड़ेया । एदा नतीजा ए निकलेया जे पाण्डवें गी तेरां बरे बनबास भोगना पेया । उनें राजपाट छोड़ेया ते अपनी धर्मपत्नी द्रौपदी कन्ने बनै गी गे उठी । खेडै दी शर्त च शर्त ही जे बारां बरें बनै इच रौना ते तेरमां बरा छपिये गजारन । बनबासा कट्टिये जिसलै पाण्डव परतोए तां दुर्योधनै कोला अपना राज मंगन लगे । दुर्योधन इन्ने चिरै इच उन्दा राज सांभी बैठा दा हा ओ उन्दा हिस्सा परताने थमां इन्कारी होई गया । नतीजा ए निकलेया जे जुद्ध छिड़ेया । पाण्डवें

दुर्योधनै गी हराया ते अपना राज परतिऐ लई लैता ।

पाण्डवें कोई छिन्ती बरे राज कीता । पिच्छुआं उनें राज पोतरे परीक्षित गी दित्ता ते द्रोपदी कन्ने बनें गी उठी गे । सारे बस्तर तुआरी उड़े ते बृवखें दी छाल लाइए गजारा करन लगे ।

ए महाभारतै दी कथा दा सार ऐ । ए साड़े भारत वर्षे दा बड्डा ग्रन्थ ऐ एदे च मतियां कथां ते उच्चा चुक्कने आलियां सिक्खां मत्तां न । ते कन्ने गै पाण्डवे दे सुख-दुखै दी कहानी ऐ । महाभारत ते सच्चें मुच्चें दा इक समुदर ऐ जेदे इव अनसम्भ मोती न, जवाहारात न । जियां रामायण साड़ी मातृभूमि दी संस्कृति ते नीति दा सुम्ब ऐ ईआं गै महाभारत बी संस्कृति ते नीति दा सदा बगने आला भरना ऐ ।

०००

देवव्रत

“अड़िये तूं भामें कोई बी एं, पर में थुआड़े कन्ने ब्याह जरूर गै करना ऐ।” ईआं राजा शान्तनु नै गंगा देवी गी आखेया जेड़ी मनुक्ख देह धारण करिये सामनै खड़ोती दी ही । राजे दा अंग अंग नुआड़ी दिब्व सुन्दरता कन्ने मस्त होआ दा हा ।

राजे आखेया—“अड़िये मन्नी जा, थुआड़ी प्रीतै गित्तै मेरा राजपाट धन दौलत मेरी जिन्द बी हाजर ऐ।”

देवी गंगा बोली—राजा ! अऊं थुआड़ी धर्मपत्नी ते बनी जा पर किश शर्ता न । न तुस ते न होर कोई मिकी ए पुच्छग जे अऊं कुण आं ते कुत्थुआं आईआं । में चंगा मन्दा किश करां तुसें नईं टोकना ते न गै माढ़े उप्पर रोहें होता । मिकी खिञ्ज

चाढ़ने आली कोई गल्ल नई करनी । जिसलै तुसें इनें गल्लें बिरुद्ध
किश कीता में उर्थें ते उससै बेल्लें गै तुन्दे कशा टुरी जाना ऐ ।
तुसें गी ए शर्ता कबूल न ?

राजा आत्तर होए दा । सगन्ध खाइयै आखन लगा मिकी
सब किश मन्जूर ऐ ।” देवी गंगा रानी बनी गई ते समां बीतन
लगा । अपने नेक गुणें, नम्मर सुभा ते पक्के प्यार कन्ने गंगा जी
नै राजे दा मन बसस करी लैता । जीने दा नन्द पूरा हा ते समां
बीतदा सेई गै नईं होऐ ।

रानी दे किन्ने गै जागत होए पर जिसलै जागत होऐ तां
रानी उसी लइऐ गंगा प्रवाही आवै । ए करिए बी बिन्द २ हासा
नुआढ़े ओठों पर खेड़दा गै रवै ।

गंगा दे ईआं करने करी शान्तनु दे कालजे गी बड़ा सल्ल
लगै ते इस राकशी कम्मै गी दिक्खियै मन त्राही जा ; पर बुहासरे
किश नईं, चुप चपीता गै जरी जा । बचन गै नेआ दित्ता दा हा ।
राजा मते आरी सोचै ए ऐ कुण ? कुत्थुआं आई दी ऐ ? ते नेआ
कसाइयें आला कम्म की करदी ऐ । फी बी बचनै दा बद्धा दा,
ते नुआड़ी प्रीतै इच डुब्बे दा कोई लॉमा नईं देऐ ते न गै बरोध
करै ।

इस चाली गंगा नै सत्त जागत मारी ओड़े । जिसलै अठमां
जागत होआ ते गंगा उसी बी रढ़ान चली । तां शान्तनु कशा नईं
गै जरौआ । उन्न आखेआ रूकी जा, बसकर । तू अपने मसूम
जागतें गी मारने दा मनुक्खें शा ओपरा ते भयानक कम्म करनीं
ए ? ईआं उनें गंगा गी इस कम्मै शा रोकी ओड़ैया ।

गंगा बोली—महाराज ! तुसें अपना बचन बसारी ओड़ैया
ऐ । तुन्दा मन अपने पुत्तरै इच लग्गी गेया ऐ । हुण तुसें गी
माढी लोड़ नईं रई ।

अऊं चली आं । में इस जागत गी नईं मारड । मेरे बारे इच किश निर्णा करने थमां पहलें मेरी गल्ल सुनी लौ । मिकी नेआ नखिद्ध कम्म जे करना पेआ सो बसिष्ठ जी दे श्राप मूजव हा । अऊं भगवती गंगा आं जिसी देवता ते मनुक्ख सारे पूजदे न । बसिष्ठ जी नै अट्टे बसुएं गी श्राप दित्ता जे संसारै इच जाइयै मनुक्ख जून भोगो । बसुएं मिगी बेनती कीती ते में तरस खाइयै उन्दी मां बनना मन्नी लैता । ए सारे तुन्दे जागत जेड़े में जम्मे हे वसु हे । ते तुसैं इन्हें अट्टे बसुएं दी जेड़ी सेवा कीती ऐ ओदा तुसैं गी चंगा गै फल थोग । तुसैं गी बड़ा उच्चा दिब्ब लोक प्रापत होग । अऊं तुन्दे इस छेकड़ी दे जागत दी किश चिर पालमा करड ते फी तुसैं गी सौपी ओड़ड । ए तुसैं गी माढ़ी बकशीश होग । ए गलाइयै ते जागत गी लइयै गंगा जी लोप होई गइयां ।

ए ओ जागत हा जेड़ा अगो जाइयै भीष्म नां कन्ने पसिद्ध होआ ।

बसुएं गी बसिष्ठ होरें की श्राप दित्ता ओदी कथा ईआं ऐ । इक दिन बसू लोक अपनिए लाड़िएं कन्ने सैल स्पाटे गी निकले ते फिरदे फरान्दे बसिष्ठ हुन्दी कुटिया कोल आईगे । मुनि हुन्दी गौ नन्दिनी चरा'रदी ही । इक बसू नै नेई दिब्ब-मूर्त गौ दिक्खिए सारिएं गी तुआईं सद्देआ । बसुएं दियां लाड़ियां गौ दिक्खिए बड़ियां पसिन्न होइयां ते तरीफ करन लागेयां । उन्दे चा इक अपने खस्मं गी आखन लगी ए गौ मिकी लइ देओ । ओ आखन लगा,—“असें देवतें गी गवै दे दुद्ध दी के लोड़ ऐ ? ए बसिष्ठ मुनि हुन्दी कुटिया ऐ ते उन्दी गै गौ ऐ । मनुक्ख ते नाढ़ा दुद्ध पीयै अमर होई जाडन । पर असें गी के लाह ? अस ते अगें गै अमर आं । ते कन्ने बिन्द सारी गल्लै पिच्छें बसिष्ठ होरें गी कैत रोहें करना ?

पर जिह् पइ दी जनानी कशा कियां खलासी होऐ ?

ओ आखन लगी—“मनुक्ख लोकै इच माढ़ी इक स्हेली ऐ । ए गौ मिकी ओदे गित्तै लोड़चदी ऐ । बसिष्ठ हुन्दे औने थमां पहले पहले अस गौ खस्काई लई जन्नेआं । तुसं गी एकम्म ते जरूर गै करना पौग—माढ़ी इच्छेया पूरी करनी गै पौग” । आखर पति होरें गी मन्नना पेया । सारे बसू किट्टे होऐ ते गौ ते बच्छे गी लइऐ टुरदे होऐ ।

जिसलै बसिष्ठ होर आस्रमै गी परतोऐ उनें गी गौ बच्छा नई लब्बे । उन्दे बिना मुनि जी दा पूजा पाठ गै सम्पूर्ण नई हा हुन्दा । उनें जोग ध्यान लाया ते सारी गल्ल सेई करी लैती । उनेंगी रोह चढ़ेया ते उनें बसुएं गी श्राप दित्ता । “जाओ-जाइऐ मनुक्ख जून भोगो जिसलै बसुएं गी श्रापै दा पता लग्गा तां पशतान लगे । समझ आई पर पिच्छुआं । मुनि हुन्दे पैरें ढट्टे ते माफी मंगन लगे । बसिष्ठ हीरें आखेया—श्राप ते नई टली सकदा । प्रभास बसु जिन गौ चराई ही मताचिर मनुक्ख लोकै इच रौग—मान जस्स पाग । बाकी जम्मदे गै श्रापै थमां मुक्त होई जाडन । श्रापै गी इन्नां गै नरम करी सकनां । बसिष्ठ मुनि होर फी तपस्या करन लगे । रोहै कन्ने तपस्या दा असर किश खीन होई गया हा । जिनें गी तपस्या करी श्राप देने दी शगती औन्दी ऐ औ श्राप देने करी तपस्या गी खीन बी करदी ऐ ।

बसुएं गी किश सहारा होआ । ओ भगवती गंगा जी कोल पुज्जे ते बेनती करन लगे । हे भगवति तू साढ़ी मां बन । साढ़े उप्पर किरपा कर । साढ़े गित्तै धरती उप्पर आ कुसै मन्ने प्रमन्ने दे मनुक्खै गी बर । असें गी जमदे गै पानी इच रढ़ाई ओड़ियां ते ईआं अस श्रापै थमां मुक्त होई जागे ।” भगवती गंगा नै उन्दी बेनती मन्नी लैती । धरती उप्पर आई ते शान्तनु हुन्दी रानी बनी गई ।

जिस लै गंगा टुरी गई ते अठमें जागतै गी लइऐ लोप होई
 गई तां शान्तनु होरें बी भोग बासना त्यागी ओड़ी ते राजकाज
 तपस्या समझियै चलान लगे । इक दिन ओ गंगा नदी दे कण्डे
 बाखोरी करा दे हे जे उनेंगी इक जागत लब्बा जेड़ा देवतें दे राजा
 इन्दर आडू सुन्दर हा । ते गंगा नदी इच दबोदब तीर चलाने दी
 खेडा लगगे दा हा । ईआं लगदा हा जे जागत मौरी कन्ने लाड
 ला'रदा होऐ । राजा इस नजारे गी समाधि जन लाइऐ दिखने च
 मस्त हा जे गंगा देवी प्रगट होई ते आखन लगी ए लो महाराज
 अपना पुत्तर । ए अठमां जागत जम्मेया हा । हुण तोड़ी में नाड़ी
 पर्वस्ती कीती ऐ । एदा नां देवव्रत ऐ । इस खूब शस्तर विद्या
 सिक्खी दी ऐ ते भगवान परसराम हुन्दी बरोबरी करदा ऐ । इन्न
 बसिष्ठ हुन्दे कशा बेद ते बेदान्त पढ़े न । ते शुक्राचार्य होरें गी
 जिन्नियां बिद्या औन्दियां न, सिक्खी दियां न । ए बड़ा भारी
 योधा ते धनुखधारी ऐ ते राजकाजै दी विद्या इच सिद्ध ऐ । हसों
 अपने कन्ने लई जाओ ।

गंगा जी नै जागतै गी लाड लाया, सीस दित्ती राजा शान्तनु
 गी सौपेया ते फी लोप होई गई ।

०००

भीषम जी दी पतिग्या

देवव्रत जनेआ राजकमार थोआ राजे दे कालजे बी ठण्ड
पई ते पर्जा नै बी अपने भाग सराए । दौने दी खुशी दा ठकाना
नई हा । राजे नै देवव्रत गी गद्दी दा बारस बनाई ओड़ेया ।

चार बरे बीती गे । इक दिन राजा होर जमना जी कण्डै
टहलकदमी करा दे हे जे बाऊ इच कशबोई दा मुहाका आया । ए
कशबो किश नेई दिब्ब ते मिट्टी लग्गी जे राजा होर नुआड़ी सू
लान्दे लान्दे इक थारं जाई पुज्जे जित्थें इक सुर्ग परी मटयार खड़ोती
दी ही । ए सगन्धि नुआड़े कशा आवा दी ही । उसी इक ऋषि
होरें बरदान दित्ता दा हा जे नुआड़े शरीरै थमां दिब्ब सगन्धि
आवा करग । इस सगन्धि कन्ने सारा बन महका दा हा ।

महाभारत

रानी गंगा दे जाने परैन्त राजा होरें अपनिएं इन्द्रिणं उप्पर बड़ा संजम रक्खे दा हा पर इस दिव्व गोरी गी दिखदे गै उन्दे संजमै दे बन्न त्रुट्टी गे ते बासना मकी उठी । राजे नै गोरी गी आखेया—व्याह करी लै ।

उस ग्लाया—अऊं मछेरन आं । मछेरें दे सर्दारै दी धी आं । व्याह सर्वन्धी गल्ल तुस माढ़े बापू कन्ने गै करी लौ । नुआड़ा ग्लानी नुआड़े श्लैपे आडू गै बड़ी प्यारी ही ।

नुआड़ा बव्व बड़ा काइयां हा ।

आखन लगा :—राजा जी कुडियें व्होना गै हुन्दा ऐ । इस बी वोही जाना ऐ । तुस ते सब्बै चाली जोग ओ । फी बी व्याह करने कशा पहलें तुसैं गी इक बादा करना पौग शान्तनु होरें आखेया—गल्ल मन्नन जोग होई तां बादा करड ।

“मछेरें दा सर्दार बोलेया—इस कुड़ी शा जेड़ा जागत होग ऊऐ तुन्दे पिच्छुआं राजा बनग ।”

राजा काम बासना कन्ने बतोआ जन करदा हा पर नेआ बादा कियां करै ?

एदा ते सिद्धा अर्थ हा जे देवतें सतुल्ल गंगा दे पुत्तार देवव्रतै गी गद्दी दी वरास्तैं थमां भेठा करी ओड़ना ए ते बड़ी नमोशी आली गल्ल ही । ए कीमत नई चकान हुन्दी । ओ अपनी राजधानी हस्तनापुरै गी परतोई आये । पर ताड त्रुट्टने करी निम्मोभानी बड़ी ही । उनें कुसै कन्ने बुहासरी नई । चुप्पगै होई गे । उत्साह मरी गेआ । इक दिन देवव्रतै अपने पिता गी पुच्छेया :—

पिता जी ! तुस जे किश इच्छा करो सो हाजर हुन्दा ऐ । फी तुस निम्मोभान की ओ ? ईयां बभ्मोन्दा जे कोई गुज्जा गम तुन्दा मन कोआ करदा ऐ ।

राजा बोलेया—बेटा, तू ठीक गै स्याता ऐ। मिकी किश मानसिक चिन्ता ते क्लेश दुख देऐ दे न। तूऐं माढ़ा इक मात्तर पुत्तर ऐं। थुआड़ियां हीखियां बड़ियां उच्चियां न ते सदा फौजी कारणामे इच रुज्जा रौनां एं। इस ससारै इच जिन्दू दा कोई बसाह नईं ते जुद्धे दा कोई ऐन्त नईं।

परमात्मा नईं करै जे तुगी कोई हर्ज मर्ज होई जा तां साढ़ा बैन्स ते मुक्का। ए ठीक ऐ जे तू इक्कला गै सौ पुत्तरें बरोबर एं। फी बी शास्तरें दे जानकार ते पणतें दा ग्लाना ऐ जे इक्कला पुत्तर जनेआ होआ जनेआ नईं होआ। मिकी किश मनासब नईं बभोन्दा जे साड़ी बैन्स परम्परा इक्कै जिन्दू स्हारै टुरै। मेरी बड़ी मर्जी ऐ जे साढ़ा बैन्स बधे फलै फुलै। मेरी चिन्ता दा ईऐ बड्डा कारण ऐ। पिता नै पज्ज पाइऐ गल्ल बनाई दस्सी ओड़ी। पुत्तरै गी सारी सच्ची गल्ल सनान्दा बी कियां ?

देवव्रत समभदार हा, ताड़ी गया जे पिता दे मनै दा गुज्जा भेत किश होर ऐ। उस राजे दे सारथी गी पुच्छेया। उस थमां पता लगा जे जमना जी दे कण्डे राजे दी मछेरन कुड़ी कन्ने गल्ल बात होई ही। ओ मछेरें दे सरदारै कोल गेआ ते आखन लगा जे कुड़ी राजे गी ब्याही दे।

मछेरे नै बड़ी धीनगी कन्ने पर पक्कें पैरें आखेया—मेरी धी राजे कन्ने ब्होनें जोग ऐ ते फी ओदा जागत राजा होने जोग की नईं ? गद्दी दे बारस तुस ओ। तुस टिके ओ। पिता पिच्छुआं तुसें गै राज सांभना ऐ। बस इन्नी गै गल्ल अड़चन बना दी ऐ।

देवव्रतै जबाब दित्ता—अऊं बचन दिन्ना जे थुआड़ी कुड़ी दा जागत गै राजा बनग। अऊं गद्दी बौने दा अपना हक्क दिन्ना। ए आखियै उन्न सगन्ध खादी।

मछेरें दा सरदार बोलेया—तुस भारतै दे कुलै इच सारें कशा उत्तम ओ। तुसें नैई गल्ल कीती ऐ जेड़ी राज बैसै इच अजे


कुसै नईं कीती । तुस सच्चें गै शूरवीर ओ । तुस माढ़ी धियू
गी आपूँ राजा हुन्द कोल अपने पिता कोल लई जाओ । फी बो
माढ़ी गल्ल सुनी लौ । अऊं कुड़िया दा बब्ब आं । मिगी बिन्द
शक्क नईं जे तुस अपना बचन नईं नभागेओ । पर तुन्दें धियें-
पुत्तरें अपना गद्दी बौने दा हक्क थोड़ा छोड़ी ओड़नां ऐ ? तुन्दें पुत्तरें
तुन्दे नेऐ गै शूरवीर होना ऐ । जे उनें ध्याई लेआ जे राज असें लैना
ऐं तां उन्दा मकाबला कुस करनां ऐ ? ए शक्क मेरे मनै गी चैन
नईं लैन दिन्दा ।

कुड़िया दे बब्बै दा नेआ पेचदार सुआल सुनिए देवव्रतै
सबनें थमां उच्चा त्याग करने दा निश्चा कीता । उस पिता दी
इच्छा पूरी करने दा पक्का संकल्प करी लैता । उस दवै बाह्वां
चुक्कियै मछेरें दे सर्दारै गी आखेआ अऊं कदें ब्याह नईं करड ।
अऊं सदा ब्रह्मचारी रौड । जिसलै उन्न इयां ग्लाय़ा तां देवतें
फुल्लें दी बरखा कीती । ते गास 'भीषम' 'भीषम' करियै गुंजी
उठेया । भीषम दा अर्थ ऐ नेआ व्यक्ति जिन्न एडी बड्डी सगन्ध
चुक्की ते उसी तोड़ चाड़ियै दस्सेआ । अद्दू थमां देवव्रतै दा नां
भीषम पई गया ।

देवव्रत सत्यवती गी लइयै पिता कोल आई गया ।

सत्यवती बिचा शान्तनु दे दौ पुत्तर होए चित्रांगद ते विचित्र
वीर्य । पहले चित्रांगद गद्दी उप्पर बेठा फिरी विचित्रवीर्य ।
विचित्रवीर्य दे दौ पुत्तर होए—धृतराष्ट्र ते पाण्डु । धृतराष्ट्र रानी
अम्बिका दे ते पाण्डू रानी अम्बालिका दे पुत्तर हे । धृतराष्ट्र दे
सौ पुत्तर होए जिनें गी कौरव आखदे न । पाण्डु दे पञ्ज पुत्तर
पर्सिद्ध होए । उने गी पाण्डव आखदे न ।

भीषम जी मता चिर जीन्दे रहे । आर्ये दे टब्बर टोर उन्दी
पूरी मानता करदे रहे । भीषम जी कुरुखेतरे दी पर्सिद्ध लड़ाई दे
ऐन्त तोड़ी जीन्दे रहे ।



०००

अध्याय १६

अथ शान्तनुः पितृव्यं विचार्य तं विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्

अथ शान्तनुः पितृव्यं विचार्य तं विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्
 तं विद्मन् विद्मन् विद्मन् विद्मन् विद्मन् विद्मन् विद्मन् विद्मन्

अध्याय १६

अम्बा ते भीषम

कुसै गन्धर्वे कन्ने लड़ाई होई ते सत्यवती दा पुत्तर चित्रांगद मरोई गया । ओदी कोई लुआद नई ही इसकरी नुआड़ा भ्रा विचित्र वीर्य गै गद्दी दा बारस बनेया पर ओ नबालग जाना हा इस करी नुआड़े बड़्डे होने तोड़ी भीषम होर गै हकूमत चलान लगे ।

जिसलै विचित्रवीर्य जुआनी इच पैर पाया तां भीषम होर नुआड़े गित्तै केई लाड़ी तुप्पन लगे । उनें गी पता लग्गा जे काशी दे राजे दियें धियें दा स्वम्बर रचोये दा ऐ । उस जमाने इच राजें दियां कुड़ियां ईआं गै बर चुनदियां हियां । भीषम होर भ्राऊ गित्तै लाड़ियां लैन उत्थें आई पुज्जे । कोसल, बंग, पुण्ड्र, कलिंग, ते होर

कई थारें दे राज राणे स्वम्बरै गितै काशी आई दुक्के । उन्दियां पशाकां दिक्खने जोग हियां इक कोला इक बधिया । राजकमारियें दे श्लैपे ते गुणें दियां वड़िया धुम्मां पेदियां हियां । स्वम्बरै च मकाबला बड़ा जोरदार होने आला सेई होआ दा ।

भीषम सारे राजें इच बड़ा मन्ने दा योधा ते अस्तर-शस्तर धारी पसिद्ध हा । पहले ते सारें समझेया जे भीषम ईआं गै स्वम्बरै दा जलसा फलसा दिक्खन आये दा ऐ । पर जिस लै उनें गी पता लगा जे ओ वी मकाबलै इच ऐ तां सारें दी मच्च मरी गई ते बड़ा बट्ट खान लगे । उनें गी इस गल्लै दा पता नईं हा जे भीषम अपने भ्राऊ विचित्रवीर्य आस्तै स्वम्बर जित्तन आये दा ऐ ।

राजा लोक भषिम गी ताने मीने दन लगे । दिक्खो जी भारत वंसै दे चाननी चराग बुड्डे बारै स्वम्बर लड़न आये जे । किश अपनी चिट्ठी दाड़ी ते ब्रह्मचारी रौने दी सगन्धा दा गै ख्याल करना हा । इनें गी स्वम्बरा दा चा के आखदा ? चिट्ठा भाटा ते आट्टा खराब ।

राजकमारियें बी जिनें स्वम्बर करना हा भीषम हुन्दे पासै नजर पुट्टियै नईं दिक्खेया ते अगणें लंघी गइयां ।

भीषम होरें गी अग्ग बली उट्ठी । उनें किट्टे होए दे राजें गी ललकारेया मर्द वच्चेओ तां आओ मकाबला करो ते सारें गी अम्बरै दे तारे दस्सी ओड़े । त्रौनें राजकमारियें गी रथै उप्पर बहालेया ते हस्तनापुर लई चले । ओ मती दूर नईं हे गे दे जे राजे शल्व नै उनें गी रोक़ी लैता ते जुद्ध गी ललकारेया । शल्व सौबल देसै दा राजा हा ते राजकमारी अम्बा गी चान्दा हा । राजकमारी नै बी उसी मनै थमां पति धारी लेदा हा । बड़ा घोर जुद्ध होआ । शल्व हारी गया । भीषम हुन्दी बरोवरी दा कुन तीर चलाने आला हा । राजकमारी ने शन्दा कीता ते भीषम होरें शल्व दी जान बकशी करी ओड़ी ।

राजकमारियें गी लइयै भीषम होर हस्तनापुर पुज्जे ते विचित्रवीर्य हुन्दे ब्याह दियां तयारियां रम्भी कड्डियां । जिसलै सारियां बेदी च किट्टियां होइयां तां अम्बा किश मुस्कराई । ओदी मुस्कराटै इच बड़ी बेरुखी जन ही उस भीषम होरें गी ईआं गलाया :—हे भगवती गंगा जी दे पुत्तर ! तुगी भलेयां पता ऐ जे शास्तरें इच के आखेदा ऐ । में मनै थमां राजे शल्व गी जेड़े सौबल दे राजा न पति धारण करी लैता दा ऐ । तूं मिगी जोरा जबरी इत्थें लई आयां एं । शास्तरें दा जानकार एं जे मनासब समझनां एं सो कर ।

भीषम होरें ओदी जोरदार दलील ते आपत्ति सुनी । किश नगरान कन्ने लाइयै उसी राजे शल्व कोल टोरी ओड़ैया । लौकियें दौनें भैनें अम्बिका ते अम्बालिका दा ब्याह विचित्र वीर्य कन्ने विधि मताबक होइ गया ।

अम्बा खुशी खुशी राजे शल्व कोल गई ते उसी सारी होई बीती दी गल्ल सनाई । “में मुण्डा थमां गै तुसैं गी अपना पति धारण कीता दा ऐ भीषम होरें मिकी तुन्दे कोल भेजी ओड़ैया ऐ । हुण तुसैं शास्तरें दे अनुसार मिगी ब्याही लौ ।

शल्व नै आख्या :—भीषम नै मिगी सारे राजें दै सामन हराया । ते तुकी खोई लई गया । मेरी ते बड़ी भद् होई ऐ । हुण में तुकी अपनी लाड़ी दे रूपै इच अंगीकार नई करी सकदा । तू उन्दे कोल गै परतिए जा ते जियां हुकम दिन्दे न ऊआं कर । ए गल्ल ग्लाइयै शल्व होरें उसी भेजी ओड़ैया ।

ओ हस्तनापुर आई । उस भीषम गी जो किश गल्ल होई बीती ही सनाई । भीषम पितामह नै विचित्रवीर्य गी आख्या जे नाढ़े कन्ने ब्याह करी लै पर विचित्र नीचे नै आख्या जे इसदा मन दूए कन्ने लगा दा ऐ । ऐसी इस्तरी कन्ने अऊं ब्याह नई करदा ।

अम्बा भीषम हुन्दे पासै परतोई ते आखन लगी तुसै मेरे कन्ने ब्याह करी लौ । होर कोई रस्ता नई रेआ ।

पर भीषम होर अपनी सगन्ध कियां तरौड़ी ओड़न । उनेंगी अम्बा दी दशा पर दुख ते बड़ा होआ । उनें फिरी विचित्र वीर्य गी समझाया पर ओ नईं गै मन्नेया । उनें फी अम्बा गी आखेया तू शल्व कोल गै जा ते उसी परतिऐ आख जे ओ ब्याह करी लै । ओ बी बड़े मान्ने आली ही । नईं गई । ते किन्ने गै बरे हस्तनापुरै च रई । छेकड़ नराश होइऐ ओ फी शल्व कोल गई । पर ओ कत्तई राजी नईं होआ ।

छे बरे बचारी नै बड़े कौड़ै घुट्ट पीते । नुआड़ी हीखी ढई गई ही । ते हिरदा दुखै कन्ने बतेह होई गया हा । ओदे मनै इच जिन्नी मिठास ही जहर बनी गई जे भीषम गै ओदी जिन्दगी जुआड़ने दी जड़ ऐ । उसी भीषम कन्ने घोर घृणा होई गई । उसनै सारे राजें अगें बैन पाये जे भीषम कन्ने जुद्ध करियै उसी मारी ओड़ो ते मेरा बदला चकाओ पर भीषम हुन्दे सामनै औने दी कोदी हिम्मत ही ? कुसै औदी फर्यादू पासै ध्यान नईं दित्ता । आखर उस घोर तपस्या शुरू करी दित्ती ते भगवान सुब्रह्मन्यम हुन्दी राधना शुरू करी दित्ती । भगवान ओदे सामने पतंख होए ते उसी फुल्लें दा इक सदाबहार हार दित्ता । उनें आखेया जेड़ा बी ए हार पाग ओ भीषम दा शत्रू बनी जाग ।

अम्बा ओ हार लइऐ हर इक राजे कोल गई ते आखन लई छे मुहें आले भगवान सुब्रह्मन्यम हुन्दा हार साम्बो ते मेरा पक्ख करो ।

पर भीषम हुन्दी दुश्मनी कुन मुल्ल लें ? आखर ओ राजे द्रुपद कोल गई ते बेनती कीती पर उस बी गल्ल नईं मन्नी । उसनै ओ हार द्रुपद राजे दे मैहलै उप्पर टंगेया ते आपू बनै गी टुरी गई ।

उसी किन्ने गै तपस्वी मिले । उन्न सारें गी अपनी बिपता दी गल्ल सनाई ।

उनें सलाह दित्ती तू भगवान परसराम हुन्दे कोल जाइऐ बेनती कर ।

अम्बा नै उन्दी सिक्ख मन्ती ।

परसराम जी नै कहानी सुनी तां उनें गी बड़ा तरस आया ।
उनें आखेया अऊं थुआड़ी के सहायता करां ? जेकर थुआड़ी मरजी
होए तां में शल्व गी आखां जे ओ थुआड़े कन्ने ब्याह करी ले ।

अम्बा आखन लगी नईं, हुण मेरी कोई मरजी नईं । मिगी
ब्याह दी, घरै दी, खुशी दी कोई लोड़ नईं । में अपनी जिन्दगी
इच इक्कै चीज चाहनी आं ओ भीषम कन्ने बदला लैना ऐं । मिकी
इक्कै बरदान चाही दा ऐ—भीषम दी मौत ।

परसराम होर नुआड़े दुखै कन्ने बड़े तपे, उने गी राजें कन्ने
बी कैड़ ही उने नुआड़ी गल्ल मन्ती लैती ते भीषम कन्ने जुद्ध छिड़ी
गेया । ए बड़ी लम्मी ते बरोबरी दी लड़ाई ही । अपने समें दे दोऐ
इक्कै नेए शस्त्र धारी हे । पर आखरकार परसराम होरें गी
हार मन्नती पेई ।

उनें अम्बा गी आखेया :—

में अपना सारा जोर लाई ओड़ेया ऐ पर सफल नईं होआ ।
हुण तूं भीषम हुन्दी शरण गै जा । तेरे आस्तै ईऐ इक्क मात्तर
रस्ता रई गेदा ऐ ।

ओ बचारी दुख ते रोहै कन्ने भुज्जी गई । शड़ा बदला लैने
दी भावना करी जीन्दी ही । अम्बा हिमाला पर्वत गई ते घोर
तपस्या करियै शिवें दी राधना करन लगी । की जे मनुक्खें दी
सहायता कन्ने ते किश बनेया नईं । शिव जी पर्वक्ख होए ते उनें
उसी बरदान दित्ता जे दूए जन्मै इच तूं आपू भीषमै दा रेड़का
मकाई ओड़गी ।

अम्बा कोला हुण जरौए नईं । ओ काहली पवै जे कदूँ ए
जून बुड़कै ते ओ नमां जन्म लइऐ मनै दी ताड पूरी करै । उस
चिख चिनी ते ओदे च पर्वेश करी गई । चिखा दे लोरें कशा
ओदे मनै दे भांबड़ मते तत्तो हे ।

शिवें दे वरदान मूजव अम्बा राजे द्रुपद दे घर । ओदी धां होई जम्मी । किश मठोने उप्पर उस्स दिक्खेया जे सदाबहार फुल्लें दा हार जेड़ा ओ महलै दे दवाजे उप्पर टंगी गई ही ऊंआं गै उत्थै टडोए दा हा । डरै मूजव कुसै उसी ब्रूता नईं हा । ओ हार उस अपनै गल पाइ लैता ।

राजा द्रुपद कुड़िया दे अति साहस कशा डरन लगा जे ए भीषम कशा मरवान्दी ऐ । उस धियु गी वनें भेजी ओड़ेया । उत्थें उस तपस्या कीती ते जनानी थमां मर्द बनी गई । ते नुआड़ा नां शिखण्डी पेया ।

कुरुक्षेत्र दे जुद्ध च शिखण्डी गी सारथी बनाइयै अर्जुनै भीषम हुन्दे पर हमला कीता । भीषम गी पता हा जे शिखण्डी जमांदरू जनानी ऐ उनें अपनी जुद्ध नीति दे अनुसार नुआड़े कन्ने कदें बी लड़ना नईं हा । सो होआ ए जे शिखण्डी गी सामनै रक्खिऐ अर्जन लड़दा रेआ ते उस भीषम होरें गी जित्ती लैता भीषम होरें गी आगम होई गेया—जे हुण ऐन्त समां आई गेया ऐ । इस दुनिया थमां टुरना गै ठीक ऐ । खीरी जुद्ध च जोड़े तीर भीषम होरें गी लग्गे ओ दसदे हे जे ए तीर शिखण्डी दा ऐ ते जिस झंगा घा कीता ओ अर्जुनै दा ऐ । ईआं इस महान जोधा दी मौत होई ।

०००

देवयानी ते कच

बड़े पराने समें दी गल्ल ऐ, देवतें ते राकशें दा घोर जुद्ध होआ । परई त्रौनैं लोकें दा स्वामी कुण ऐ । लड़ने आले दौनैं पक्खें दे गुरू बड़े मन्ने प्रमन्ने दे हे । देवतें दे बृहस्पति जी हे । जेड़े बेदें दे गूढ़ जानकार हे ते राकशें दे शुक्राचार्य जी जेड़े अकली दे खजाने हे । राकशें कोल ए बड़ा वादा हा जे उन्दे गुरू जी गी संजीवनी बिद्या औन्दी ही ते ओ मोए बे गी भट जीन्दा करी लैन्दे हे । इसकरी देवतें कन्नें लड़ाई इच ओ किन्नें बारी गै मरोए पर शुक्राचार्य होरें परतिंगे जीन्दे करी लैते । ते उन्नें देवतें कन्नें जुद्ध फी शुरू करी दिता । ए लड़ाई मती लम्कोई गई ते देवतें गी ए बड़ा घाटा हा ।

देवते बृहस्पति हुन्दें पुत्तर कच कोल गे जे साड़ी मद्दत कर । उन्नें आखेया जियां हुन्दा ऐ शुक्राचार्य हुन्दी किरपाट्टि अपने पासै खिच्च ते उन्दा चेला बनी जा । ईआं उन्दे कन्नें इक मिक होइऐ उन्दा जिगरी ते विश्वास पात्तर बनिऐ ते भामे चंगा मन्दा किश

बी हीला करना पवै शुक्राचार्य जी कोला संजीवनी बिद्या दा भेत कड़ी आन । देवतें गी जेड़ा इक बड़ा घाटा रौन्दा ऐ पूरा होई जाग ।

कच होरें प्रार्थना मन्नी लैती ते शुक्राचार्य जी गी मिलन ठुरी पे । शुक्राचार्य होर राकशें दे राजा वृषपर्व हुन्दी राजधानी इच रौन्दे हे । कच उन्दे घर गया, चरण बन्दियै बेनती अर्ज करन लगा—अऊं महाऋषि अंगिरस हुन्दा पोत्रा ते बृहस्पति हुन्दा पुत्तर कच आं । अऊं ब्राह्मण आं ते तुसैं गी गुरु धारिऐ बिद्या सिक्खन आयां ।” उस समै दा निजम हा, जे कोई स्याना बिद्यार्थी बिद्या पढ़न आवै तां गुरु उसी नां नई हे करदे । शुक्राचार्य होरें प्रार्थना मन्नी लैती ते आखेया—बेटा कच ! तू बड़े कुलीन घरानें दा ऐं । औं तुकी बिद्या पढ़ाड । बृहस्पति हुन्दा मान करना सबनैं दा कर्तव्य ऐ ।

कच किन्ने गै बरे शुक्राचार्य हुन्दे कछ रेआ । आश्रमै दे सारे कम्म पूरी चाली नभान्दा रेआ । शुक्राचार्य हुन्दी इक बड़ी प्यारी धी ही, देवयानी । उसी ओ बड़ा गै प्यार करदे हे । कच उसी नच्ची गाइयै परसिन्न करदा रौन्दा हा ते इयां उस नुआड़ी प्रीत जित्ती लैती पर अपने ब्रह्मचर्ये दे बरतै थमा डिगेया नई ।

जिसलै अमुरें गी इस गल्लै दा पता लगा तां उनेंगी बड़ी चिन्ता होन लग्गी । उनेंगी शक्क पेई गया जे कच शुक्राचार्य हुन्दे कशा सञ्जीवनी बिद्या खिच्चन आये दा ऐ । ओ नई हे चान्दे जे नेआ नर्थ होऐ ।

इक दिन कच गुरु हुन्दियां गवां चारा दा हा असरें उसी फगड़ी लेया । नुआड़े टोटे कीते ते कुत्तें गी पाई ओड़ेया । सभा लै गवां परतोइयां । कच नई आया । देवयानी गी बड़ी चिन्ता होई । ओ रौन्दी कल्पदी पिता कछ गई । आखन लगी—दिन चरोकने दा घोई गेया ऐ । तुन्दी सभा आली पूजा बी मुक्की

गई ऐ । पर हबे कच नई परतोआ । माल बी चौनेयां आपूँ गै घर आया ऐ । मिकी डर ए कच गी किश होई गया ऐ । में नुआड़े शुट्ट कियां रवां ।”

ओ बब्बै दी बड़ी लाडली ही । उनें सञ्जीवनी विद्या बरती ते कच गी सद्देया । कच जीन्दा होई गया ते हसदा हसदा आनियै गुरु होरें गी चरण बन्दना करन लगा । देवयानी पुच्छन लगी चिर कियां लग्गा ? उस दस्सेया—गवां चारा दा हा चानचक्क असुर आये, ते उनें मिगी बड़ी ओड़ेया । हुण परतियै कियां जिन्दा होई गयां ए मिकी पता नई । पर जीन्दा होई गयां ते आई पुज्जां ।

इक बारी फी के होआ जे कच देवयानी गित्तै फुल्ल चुनन गया । परतियै असुरें फगड़ेया ते जीयें मारी ओड़ेया । उनें नुआड़ी जिन्दूँ दा मलीदा बनाया ते समुद्र दे पानी इच रोड़ी ओड़ेया । जिसलै मता चिर होन लगा ते ओ नई परतोआ तां देवयानी फी पिता कोल गई । उने सञ्जीवनी दा प्रयोग कीता ते कच गी जीन्दे करी ओड़ेया । कच नै उनें गी सारी होई बीती दी सनाई ओड़ी ।

त्रिये आरी असुरें कच गी फगड़ेया, मारेया ते फूकियै नुआड़ी मर्तूँड शराबे इच पाइयें शुक्राचार्य होरें गी पल्याई ओड़ी । गुरु होर पी गये उनें गी के पता हा । फी गवां परतोइयां पर कच नई आया । देवयानी परतियै बब्बै कोल गई । कच गी सद्दी देओ ।

शुक्राचार्य होरें बड़ा दमदलासा दित्ता पर कुत्थें ? “में किन्नै बारी गै कच गी जीन्दा कीता ऐ पर असुर लोकें उसी मारी ओड़ने दी गै ध्याई दी लबदी ऐ । चलो, के करना होआ । मौत ते सारें गी गै आन्दी ऐ । थुआड़े नेई स्यानी कुड़ी नै इयां दुखी नई होआ लोड़चदा । तुगी के ऐ ? सारी उमर पेदी ऐ, जुआनी ऐ, श्लैपा ऐ, सारें दा लाड प्यार ऐ । जा, नन्द कर ।

देवयानी कच गी बड़ा गै प्यार करदी ही । दुनिया दा निजम ऐ जे उपदेसैं कन्नैं बजोगै दी पीड़ नई चुकदी । ओ आखन लगी—कच अंगिरस ऋषि हुन्दा पोत्रा, ते बृहस्पति हुन्दा पुत्तर केडा चंगा जागत हा । ओ साड़ी कियां दिन रात सेवा करदा रौन्दा हा । अरौं उसी किन्ना प्यार करदी ही । हुण ओदे मरने परैन्त के जीन रेआ । सारी उमर गै बरान ते बेस्हारा होई गई ऐ । अम्मी मरी जन्नीं आं । देवयानी फाकें पेई गई ।

धियू दा कष्ट दिखियै शुक्राचार्य होरें गी बड़ा सल्ल होआ । असरें उपपर बड़ा रोह आया । आखन लगे—तुसैं ब्रह्महत्या कीती ऐ । तुसैं गी बड़ा भारी पाप लगनां ऐ । उन्नैं सञ्जीवनी विद्या कन्नैं कच गी जीन्दा कीता ते सदेया कच शराबै इच पइयै शुक्राचार्य हुन्दी नाड़ियें इच पुज्जी गेदा हा । जीन्दा ते होई गया पर शुक्राचार्य हुन्दे ढिड्डे इच होने करी बाहर कियां आवै । इस करी सद्ने उपपर शड़ा जबाब गै दई सकदा हां । शुक्राचार्य होर बड़े हरान होए ते उन्नैं गी मता रोह चढ़ेया, आखन लगे—भलेया लोका तू माढ़े ढिड्डै च कियां जाई पुज्जा ? ए बी असरें दी करतूत लबदी ऐ । ए ते बड़ा माड़ा होआ । मन करदा ऐ सारे असरें गी मारी ओड़ां ते देवतें कन्नैं मिली जां । खरा ! अपनी सारी कथ सना । कच ढिड्डै च हा जियां कियां औखे होइयै उस सारी होई बीती सनाई ओड़ी ।

वंशम्पायन होर ऋषियें गी कथा सनादे हे—

शुक्राचार्य होर बड़े महात्मा ते पुज्जे दे ऋषि हे । उन्दी मैहमा बेअन्त ऐ । शराबै कन्नैं उन्नैगी धोखा होआ । उन्नैं लोक दी भलाई गित्तै आखेया—जेड़ा हूढ़मत्त करियै शराब पीग ओदे गुण नष्ट होई जाडन । सारे लोक उसी थुकडन । सारे संसारै गी माढ़ा ईऐ उपदेश ऐ । ए शास्तरें दी कथा ऐ ते सारें इसी मन्नेया लोड़चदा ऐ ।

फी ओ अपनी धियू गी आखन लगे—बेटी ! इक गल्ल तुम्मी सोची लै । जे कच नै जीन्दा होन। ऐ तां ओ माढ़ा ढिड्ड पाड़ियै गै बाहर आई सकदा ऐ । एदा मतलब ऐ जे में मरड । ओदे परतिए जीने दा टकोदा अर्थ माढ़ी मौत ऐ ।

देवयानी रोन लगी—“माढ़े गित्तै ते दक्खी गै मौत होई । तुन्दे दौनें चा कोई बी मोआ तां अऊं कदें नईं जीड ।

शुक्राचार्य चान्दे हे जे इस समस्या दा किश हल निकलै । ओ विचला अर्थ ताड़ी गे । उनें कच गी आखेया—बेटा ! तू बृहस्पति हुन्दा गै पुत्तर एं । मिकी सेई होई गया जे तू किस गल्लै गित्तै आये दा एं । तू गल्ल ते सिद्ध करी लैतो ऐ । देवयानी गित्तै में तुगौ जीन्दा करन लगां । पर ओदे गित्तै गै में मरना बी नईं चान्दा । हुण इक्कै रस्ता ऐ जे अऊं तुकी सञ्जीवनी बिद्या दस्सी ओड़ां । जिसलै तू माढ़ियां आन्दरां पाड़ियै बाहर आवें ते अऊं मरी जां तू मिकी जीन्दा करी लएं । अऊं तुकी सञ्जीवनी बिद्या दा ग्यान देन लगां तू मिकी जीन्दा करी लेयां । देवयानी गी साढ़े दमें चा कुसै गित्तै बी रोना नईं पवै । ईयां शुक्राचार्य होरें कच गी सञ्जीवनी बिद्या सखाई । कच उन्दे ढिड्ड चा ईयां निकलेया जियां बदलें चा पुन्नेया दा चन्न बाहर आन्दा ऐ । महान गुरु हुन्दा ढिड्ड फटी गया ने ओ मरी गे ।

पर कच नै बाहर आन्दे गै अपनी नमीं सिक्खी दी सञ्जीवनी बिद्या कन्नें शुक्राचार्य होरें गी जीन्दा करी लैता । कच उन्दे पैरें नोआ ते आखन लगा—“गुरु जेड़े आनें गी ज्ञान सखान्दे न उन्दे पिता हुन्दे न । तुसें ते मिकी अपने शरीरै बिचा कड़ियै जीवदान दिता ऐ तुस मेरी मां बी ओ ।”

कच होर किन्नें गै बरे गुरु हुन्दे आश्रमै इच रेआ । जिसलै जोदी बिद्या प्रापत करने दा समां मुक्का तां ओ देवलोक परतोने

गित्तै आग्या लैन गुरु हुन्दे कोल गया । जिसलै जान लगा तां देवयानी नै बड़ी धीनगी ते नम्मरता कन्ने आखेया—

हे कच ! तुस अंगिरस ऋषि हुन्दे पोत्तरे ओ ! कुलीन ओ ! तुसें अपने वेदाग ते पवित्तर जीवन कन्ने मेरा मन जित्ती लैता ऐ । तुसें बड़ी विद्या प्राप्त कीती ऐ । अऊं मते चिरै थमां तुन्दा प्यार पालै करनी आं । तुस ब्रह्मचर्य आश्रमै दा पालन करा दे हे । अऊं चुप रई । हुण तुस बी माढ़ी प्रीतू दा मान करो ते माढ़े कन्ने ब्याह करियै मिकी प्रसन्न करो । अऊं बृहस्पति हुन्दी ते तुन्दी सेवा करड, मान करड ।

उस जमाने इच पढ़ी लिखी दी ते समझदार ब्राह्मण इस्तरिये गी हक हुन्दा हा जे ओ अपने मनै दी गल्ल खुल्ले डुल्ले पर मान्ने कन्ने आखी लैन ।

कच आखन लगा—हे देवयानी ! तू सारे गुणें दी खान एं । पर तू मेरे गुरु जी धी ए । ते मेरी मन्नन जोग एं । थुआड़े पिता दे शरीर थमां मिकी जीवदान थोआ । इस करी अऊं थुआड़ा भ्रातरी थोआ । तू मेरी भैन होई । भैतू कन्ने ब्याह करना कोई ठीक गल्ल थोड़ी हुन्दी ऐ ।

देवयानी नै बड़ी बेनती कीती, जोर पाया पर ओ नई मन्नेया । ओ आखन लगी—तुस बृहस्पति हुन्दे पुत्तर हो । मेरे पिता दे थोड़े ओ । में तुसें गी परतियै जीन्दे कराया तां इस करी जे अऊं तुसें गी प्रेम करदी ही । सच्ची गल्ल ते ए ऐ जे में तुसें गी मुण्डा थमां गै पतिरूप कन्ने प्रेम कीता ऐ । हुण ए ठीक नई जे तुस मिकी ईयां तज्जी ओड़ो । में पूरी चाली तुन्दी गै भगत आं ते निर्दोस आं ।

कच ने जबाव दित्ता—अड़िये ! नामनासब गल्ल करने गित्तै जोर नई पा । तू बड़ी मनमोहनी एं । रोहै दी लाली कन्ने

थुआड़ा श्लैपा होर बी उगड़ा दा ऐ । पर औं थुआड़ा भ्रा आं ।
हुण तूं मिकी बिदा गै होन दे । मेरे गुरु जी दी, शुक्राचार्य हुन्दी
पूरी चाली ते सदा गै सेवा करेयां । ईयां आखियै कच नै मसां
उत्थुआं छुट्टी लैती ते देवलोक गी दुरी पेया ।

शुक्राचार्य होर धियू गी दमदलासा देन लगे ।

०००

देवयानी दा व्याह

देवयानी ते असुरें दे राजा वृषपर्व दियां राजकमारियां स्हेलड़ियां हियां । बनै इच खेड़दियां रौन । इक दिन खेड़ा लग्गे दे दवर होई गई । धुप्प भखी तां बनै इच बगदे नाड़ू पर न्हौन लगियां । टल्ले कण्डै तुआरे ते पानी इच बड़ी गइयां । बा जे जोरेयां चली उन्दे टल्ले रली मिली गे । ते जिसलै ओ न्हाइयै बाहर निकलियां तां टल्ले लाने इच किश टपलोई गइयां । के होआ जे राजकमारी शर्मिष्ठा नै देवयानी दे टल्ले लाइ ले । देवयानी किश रोह जन चाड़ियै पर हासैं हासैं आखन लगी—“अड़िये तूं भली एं ! जजमानै दी धी होइयै गुरु हुन्दी धियू दे टल्ले लाई ले नी ।”

गल्ल ते मखौलें आली ही पर राजकमारी शर्मिष्ठा गी बड़ी कौड़ी लग्गी ते बड़े गमानै कन्ने आखन लगी—“थुआड़ा बब्ब ते रोज मेरे पिता अग्गे मत्था टेकदा रौन्दा ऐ । ते साड़े दुगड़ें उप्पर पलदा ऐ । तूं ते इक मंगते दी कुड़ी एं । थुआड़े कुलै शड़ा

मंगना गै सिकखे दा ऐ। अऊं राजे दी धी आं। तू मंगती होइऐ माढ़े अग्रे ईयां बोलें ? शर्मिष्ठा बोलदी गै गई ते उसी मते थमां मता रोह चढ़दा गया। खीरी उस देवयानी गी चपेड़ां मारियां ते इक खूऐ इच धक्का देई ओडेया। खूऐ इच पानी नईं हा। राजकमारी ते स्हेलड़ियें समझेया जे देवयानी मरी गई ऐ। ओ मैहलें इ परतोई आइयां।

देवयानी खूऐ इच ते डिग्गी पेई पर मोई नईं। नुआड़े कशा उप्पर नईं हा चड़ोन्दा ते बड़ी दुखी ही। भारत बैन्स दा राजा ययाति बनै इच शकार खेडन आये दा हा। ओ तरयाये दा पानी तुपदा तुपदा उस थार आई पुज्जा। जिसलें उस खूऐ इच भातेया तां चिट्टी २ चीजें दा भलाका लगा। धरोइयै दिक्खेया तां इक सुन्दर जनानी खूऐ इच पेई दी लब्बी।

उस पुच्छेया—भलिये लोके ! तू कुण एं ? थुआड़े कन्ने इच बालियां न, थुआड़े नैह रत्तड़े न, तू कोदी धी एं ? कुस कुलै दी एं ? खूऐ इच कीआं डिग्गी पेई एं ?

ओ बोली—“अऊं शुक्राचार्य हुन्दी धी आं। उनेंगी नई पता जे अऊं खूऐ च डिग्गी दी आं। मिकी बाहर कड़ो। ए आखियै उस बावां उबड़ियां कीतियां। राजे ययाति नै नुआड़ा हत्थ पगड़ेया ते उसी खूऐ चा बाहर कड़ुया।

देवयानी दी हुण शहर परतोने दी मरजी नईं ही। ओ असुरें दी राजधानी दा मुंह नईं ही दिक्खना चांदी। उसी शर्मिष्ठा दी गल्ल चेतै औन्दी ही ते डर बभोन्दा हा। उस नै ययाति गी दस्सेया ते आखेया—“तुसैं इक कुआरी कुड़ी दा सज्जा हत्थ पगड़ेया ऐ। तुस मेरे कन्ने ब्याह करी लौ। तुस हर चाली मेरे पति होने जोग ओ।

ययाति होरें आखेया—तुन्दी गल्ल ते बड़ी प्यारी ऐ। पर अऊं क्षत्री आं ते तू ब्राह्मण कन्यां एं। अऊं तुकी कियां ब्याही सकनां ?

कुत्थें जगतगुरु शुक्राचार्य हुन्दी धी ते कुत्थें इक ममूली क्षत्री अऊं ।
ए व्याह कीयां होई सकदा ऐ ? भलिये लोके ! तूं घर परतोई
जा ।”

राजा ए ग्लाइऐ अपने नगर उठी गया । परम्परा मूजव
इक क्षत्री कन्या ब्राह्मण कन्ने व्याह करी सगदी ही । पर इक
ब्राह्मण कन्या दा इक क्षत्री कन्ने व्याह नईं हा होई सकदा । बड्डी
गल्ल ए ही जे इस्त्री दा दर्जा नईं घटेया लोड़चदा । इस करी
लौकी जाती दी इस्त्री बड्डी जाती दे मदैं कन्ने व्याह करी सकदी ही
इसी ‘अनुलोम व्याह’ आखदे न पर उच्ची जाति दी इस्त्री गी हेठली
जाति इच व्याह करनें दी जाजत नईं ही । ईऐ नेआ व्याह होई
जा तां उसी “प्रतिलोम व्याह” आखदे हे । शास्तरें दी ईऐ
आग्या ही ।

देवयानी दा घर परतोने गी मन नईं कीता । ओ उत्थें
वनै इच बूटे हेठ दुखी होइयै बई रई ।

शुक्राचार्य होर देवयानी गी जिन्दू थमां बी मता प्यार करदे
हे । उनें मता चिर बल्गेया कुडी राजकमारी कन्ने खेडन गई दी
ही परतोई नईं । के गल्ल ऐ ? उनें आश्रमै दी इक इस्त्री तुप्पन
टोरी । ओ तुपदी तुपदी मसां उत्थें पुज्जी । देवयानी नमोशी च
बैठी दी ही । रोइ रोइयै ते रोहै कन्ने नुआढ़ी अकखीं लाल
सिमरख होई दियां हियां । इस्त्री पुच्छत लगी—“के गल्ल
होई ऐ ?”

देवयानी बोली—“तूं भट जाइयै माढ़े बापू जी गी सना जे
राजे वृषपर्वे दे नगमरै इच में पैर नईं रक्खना ।” उस इस्त्री गी
शुक्राचार्य हुन्दे कोल टोरेया ।

उनें गी धियू दी दशा सुनियै बड़ा दुःख होआ । ओ भट
नुआढ़े कश द्रौड़े । उनें उसी लाड लाया, प्यार कीता ते समझान
लगे—“ए मनुक्खें दे अपने कमें दा फल ऐ जे कदैं सुख हुन्दा ऐ ते
कदैं दुःख हुन्दा ऐ । दूए दे गुण जां दोष साड़ा न किश सुआरी

सकदे न ते न किश बगाड़ी सकदे न” । उनें होर मतियां सिक्खां मत्तां दित्तियां ते दम दलासा दित्ता ।

ओ बड़े दुखै च सी, रोहै कन्ने आखन लगी “बापू, माढ़े गुण दोष बक्खी रौन देओ । ओ माढ़े न ते अऊं भुगती लैड । पर मिकी ए दस्सो जे शर्मिष्ठा नै मिकी की आखेया जे थुआड़ा बब्ब भण्डे आड़ू राजे दे जस्स आन्दा रौन्दा ऐ । उस मिकी मंगते दी कुड़ी बनाया ते आखेया जे तुन्दा कम्म ते कशामतां करियै भिवख मगना ऐ । इन्ना किश ग्लाइऐ बी सबर नईं होआ तां उस मिकी चाण्टे मारे ते कन्नोआं दे गत्तै इच सुट्टी गई । अऊं नुआड़े बब्बे दे राजै इच कुतै बी नईं रई सकदी । ए आखियै देवयानी फुटी पई ।

शुक्राचार्य हुन्दा मान जागेया । उनें आखेया—देवयानी ! तू राजे दे भण्डे दी धी नईं । थुआड़ा बापू कशामती दे टुकड़े सोर नईं । थुआड़े बापू गी जग्ग पूजदा ऐ ते इस गल्लै दा देवतें दे राजे इन्द्र गी बी पत्ता ऐ । ते ए वृषपर्व मेरे हसान कियां भुल्ली गेया ? चलो अपने मुएं मियां मिट्ठू की बनना । असें गी लोड़ बी के ऐ ? उठ, तू ते इक ज्वाहरात ऐ, जेदी बरोवरी दा कोई नईं तू ते अपने कुलै दा मान बधाने आली ते बाद्धा करने आली ऐ । सबर कर चलो घर चलचै ।

इस प्रसंगे गी लइयै भगवान बेद-व्यास जी नै शुक्राचार्य हुन्दे कोला सारी दुनियां गी ए उपदेस दुआया ऐ—

जेज्ज अपने गुंआण्डी दी गल्ल सहारी लैन्दा ऐ ओ दुनियां गी जित्ती लैन्दा ऐ ! जेड़ा अपने रोहै गी काबू करी लैन्दा ऐ जिआ इक रथवान मुंहजोर घोड़े गी बस करी लैन्दा ऐ ऊऐ हुशियार रथवान मनोन्दा ऐ । शड़ियां बागां पगड़ने करी कोई रथवान नईं बनी जन्दा । घोड़ा भामें मुंह जोर होइयै जित्थे मरजी जा उठी । जेड़ा अपना रोह त्यागी ओड़दा ऐ जियां सप्प अपनी सपकंज तुआरी

ओड़दा ऐ ऊऐ सच्चा वीर बहादर हुन्दा ऐ दूए भामें किन्ने कष्ट देन पर जेड़ा थिड़कै नईं ऊऐ अपनी गल्ल तोड़ चाढ़ी सकदा ऐ । जेड़ा रोह नईं चाढ़दा ओ उस कर्म-काण्डी थमां मता चंगा ऐ जेड़ा शास्त्रें इच लिखे दे जगग सौ बरे करदा रवै । क्रोधी मनुखवै गी नौकर-चाकर, दोस्त मित्रार, भैन-भ्रा लाड़ी ते पुत्तार सारे गै त्यागी ओड़दे न । स्याने लोक जागते ते ज्यानें दिये गल्ले दा रोह नईं करदे ।

देवयानी बड़ी धीनगी कन्ने आखन लगी “ए ठीक ऐ जे अऊं लौकी नेईं कुड़ी आं पर नेईं ज्यानी नईं जे तुन्दिये सिक्खें मत्तें दा फेदा नईं ठुआं । पर फी बी अऊं ग्लानी आं जे उने लोकें च नईं रौनां जेड़े मान मर्जादा गै नईं जानन । जेड़े कुलै गी भण्डन उन्दे कश ते कदें नईं वस्सना चाही दा । केडें धनवान की नईं होन पर दुराचारी चण्डाल गै हुन्दे न भामें उन्दी जात नईं हुन्दी । भले लोकें उन्दे कन्ने रौन-बौन नईं रक्खना चाही दा । वृषपर्वा दी कुड़ी नै जेड़े मिकी तान्ने मारे न रोहै कन्ने मेरा कालजा बली उट्ठे दा ऐ । फट्ट भलोई जन्दे न, जले दे डूरी औन्दे न पर जीभै कन्ने ग्लाई दियां गल्लां मरने तोड़ी नईं भुलदियां ।

शुक्राचार्य होर वृषपर्व कोल गे ते उसी आखन लगे—राजा, भायें कई पापें दा फल कन्ने गै नईं थोई जन्दा पर बेर-सबेर ओ कुलै दा बी तोड़ी मारी ओड़दा ऐ । बृहस्पति हुन्दा पुत्तार कच ब्रह्मचारी हा । उसी अपनिएं इन्द्रिएं उप्पर संजम हा । उस कदें कोई पाप नईं कीता । उस बड़ी भगती कन्ने मेरी सेवा कीती । ते कदें करस्तै नईं चलेया । थुआड़े लोकें उसी जीयें मारने दे जतन कीते, में सब किश जरेया । मेरी धा बड़े मान्ने आली ऐ । उसी थुआड़ी धियु नै कवचन बोले न । इन्ना गै नईं उस माढ़ी धियु गी खूऐ इच रलकाया ऐ । हुन ओ थुआड़े राजै इच नईं रौन लगी । ओदे बिना अऊं बी इत्थें नईं रई सकदा । इस करी अऊं थुआड़े राजै गी छोड़ियै चलेआं ।”

ए सुनियै असुरें दे राजा दी ते खानेया दा गई । ओ आखन लगा—महाराज ! मिकी ते कक्ख पता गै नई । ते जे तुस मिकी छोड़ियै दुरी जागेओ तां अऊं चिखा चढ़ी मरी जांड ।”

शुक्राचार्य होर बोले मिकी ते अपनी धियू दी खुशी दी लोड़ ऐ । थुआड़ा ते थुआड़े असुरें दी किस्मतू दा ठेका नई लेदा । ऊऐ इक मात्तर माढ़ी धी ऐ । अक्खीं दी लो ते जिन्दू थमां प्यारी । जे तू उसी पत्याई लें तां खरा नई ते अऊं ते चलेया ।”

राजा वृषपर्व ते सारे दर्बारी उस बूटे हेठ पुज्जे जित्थे देवयानी खड़ोती दी ही । ओ सारे नुआड़े पैरें डिग्गी पे ते माफी मंगन लगे ।

देवयानी भला कुत्थें मन्नै रोह शण्डन लगी—शर्मिष्ठा आखै दी ही तू मंगते दी धी ऐ । हुण ओ माढ़ी नौकरानी बनै ते जित्थें अऊं ब्होआं उस घरै इच मेरी बान्दी बनिए रवै ।”

वृषपर्वें गल्ल मन्नी लैती । उस नौकर भेजियै शर्मिष्ठा गी सदेया ।

शर्मिष्ठा नै अपनी गलती मन्नी ते फैसले अगगे सिर भकाई दिता । आखन लगी “जियां मेरी स्हेली देवयानी आखदी ऐ मिगी मन्जूर ऐ । मेरी गलती दा नतीजा मेरे पिता गी नई भोगना पवै । गुरु शुक्राचार्य होर मेरे पिता गी छोड़ियै नई जाडन । अऊं देवयानी दी बान्दी बननी आं ।” देवयानी दा रोह ढलेया ते बब्बे कन्ने अपने आश्रमै गी परतोई ।

फी इक मौके उपपर देवयानी दी राजा ययाति कन्ने मलाटी होई । उस राजे गी परतियै प्रार्थना कीती जे तुसें माढ़ा सज्जा हत्थ पगड़ेया हा ब्याह करी लौ ।

ययाति होरें मुड़ियै ऊऐ अड़चन दस्सी जे में क्षत्री होइयै ब्राह्मण इस्त्री कन्ने ब्याह नई करी सकदा । खीरी ओ दमै शुक्राचार्य हुन्दे कोल गे ते ब्याह करी लैने दी जाजत मंगी । उनें

दई ओड़ी । ए प्रतिलोम ब्याह दी मसाल ऐ । कदें कदें ते कुसै खास मौके उप्पर गै हुन्दा हा । शास्तरें दा कम्म ते ए दस्सना ऐ जे के चंगा ते के मन्दा ऐ । पर इक बारी ब्याह होई जा तां फी ओ व्रुटदा नई ।

ययाति ते देवयानी होरें मता चिर नन्दै कन्ने गजारेया । शर्मिष्ठ उन्दी बान्दी बनियै कन्ने रई । इक दिन शर्मिष्ठ ययाति गी बक्खरे मिली ते आखन लगी मिकी बी ब्याही लौ । राजा नै नुआड़ी बेनती मन्नी ते ब्याह करी लैता । पर देवयानी गी नई दस्सेया ।

पर नेई गल्ल छप्पी गुज्जी थोड़े रौन्दी ऐ । देवयानी गी पता लग्गा । उसी रोह चढ़ना गै हा । उस अपने बब्ब गी सनाया । उनें गी रोह चढ़ेया ते उनें ययाति गी श्राप दित्ता जे तू समें थमां पहलें गै बुड्डा होई जागा ।

राज भरपूर जवानी इच्च बुड्डा होई गेया । बड़ा दुखी होआ शन्दे करन लगा ते माफियां मगन लगा । शुक्राचार्य होरें बी सोचेया ज इससै देवयानी गी खूऐ चा कड्डेया हा ते जान बचाई ही । किश ढिल्ले पे ते आखन लगे राजा—जुआनी शान हुन्दी ऐ जड़ी थुआड़े कश नई रई । दित्ता श्राप परतोन्दा नई । पर इच्चा करी सकनां जे कोई तुगी अपनी जुआनी दइयै बढेपा लेई लै तां ए गल्ल तोढ़ चढ़ी जा ते तू परतिऐ जुआन होई जायें ।”

उनें ययाति गी शीर्वाद दित्ती ते बिदा कीता ।

०००

ययाति

महाराजा ययाति पाण्डवें दे इक बड़ेरे हे । उनें कदें शत्रु थमां हार नईं खादी । ओ शास्त्रें उप्पर चलदे हे देवतें गी पूजदे हे, ते बड्डे बड़ेरें दी बड़ी भगती कन्ने मानता करदे हे । ओ पर्जा दी भलाई गित्तै मगन रौन्दे हे ते बड़े पसिद्ध हे ।

पर तुसें सुनेया जे ओ अपनी लाड़ी देवयानी कन्ने बेन्याईं करने करी ते शुक्राचार्य हुन्दे श्राप देने करी समें थमां पहलें गे बुड्डे होई गे हे । महाभारत दे कवि ईआं लिखदे न—ययाति गी बड़ेपा आई गेया । श्लैपा मुक्की गया । ते मसीबतां आई पइयां । इकदम जुआनी टुरी जा ते बड़ेपा आई जा तां इस मसीबतें दा के बखान करना ! सब किश टकोदा सेई हुन्दा ऐ । ते कन्ने बीती जुआनी दा चेत्ता पच्छै उप्पर लून लान्दा ऐ ।

ययाति उप्पर बड़ेपा ते इकदम आई गया पर ह्वे काम बासना ते नन्द भोगने दी मरजी मनै चा नईं निकली । उन्दे पञ्ज पुत्तर हे सारे गै पढ़े लिखे विद्वान ते गुणी । ययाति होरें

उनें गी सहेया ते उन्दी भगती ते श्रद्धा दी दुहाई दइयै आखन लगे—“तुन्दे नाने शुक्राचार्य हुन्दे श्रापै करी अऊं समें थमां पहलें बुझा होई गेयां । पर जिन्दगी दे नन्द भोगने दा चा नईं चुक्केया । मी के पता हा जे नेआ भाना बर्तोई जाना ऐं । में ते हवें तोड़ी सञ्जम गै सिक्खेया ऐ ते भोगने आले नन्द बी नईं भोगे । तुन्देचा कोई ए बढेपा लई लो ते बदले इच अपनी जुआगी देई ओड़ो । जेड़ा ए गल्ल मन्तग ते मिगी जुआनी देग ऊए मेरे राजै दा बारस होग । जुआनी दे नन्द भोगने दी मेरी बड़ी मरजी ऐ ।”

सारें कशा बड्डे जागतै गी आखेया तां उस जबाब दिता—जे में तुन्दा बढेपा लेया तां सारे नौकर चाकर ते जनानियां मिगी हसडन । ए नई माढ़े कशा हुन्दा । माढ़े लौके भ्रायें गी आखो ओ तुसें गी प्यारे बी बड़े न ।

जिसले दूए गी आखेया तां उस बी बल्लें नेऐ नां करी ओड़ी । आखन लगा—“बापू जी ! तुस बढेपा लैने गी आखदे ओ । ए ते शगती खीन करी ओड़दा ऐ । श्लैपा बगाड़ी ओड़दा ऐ बुद्ध बी भृष्ट करी ओड़दा ऐ । मेरे कशा ए गल्ल नईं होई सकदी ।”

त्रीए जागतै आखेया—बुड्डे कशा न घोड़े दी सुआरी हुन्दी न हाथी उप्पर चढ़न हुन्दा । जीभ थथ्यान लगी पौन्दी, नेई हालती च अऊं के करी सकनां । ए गल्ल नईं मनोन्दी ।”

राजे गी रोह चढ़ेया ते नमोशी बी होई जे त्रौणें जागतें नुआड़ी गल्ल नईं मन्ती । उस सोचेया चौथे गी बी पुच्छी दिक्खनां । खबरै मन्ती गै जा । आखक लगा—“अड़या ! तूं माढ़ा बढेपा लइ लै । अपनी जुआनी मिगी दर्ई ओड़ । अऊं तुगी जुआनी परताई ओड़ड । ते बढेपा जेदा मिगी श्राप लगगा दा ऐ, लई लैड ।”

चौथे ने बी माफी मंगी, ने आखन लगा—ए गल्ल नईं सरी औन्दी । बढेपे इच ते दूए दा गै सहारा लैना पौन्दा ऐ । अपना

शरीर बी साफ नईं करन हुन्दा । ए ते बड़ी दीन दशा ऐ ।
अऊं तुसें गी प्यार करनां पर ए गल्ल नईं हो सकदी ।

चौनें जागते हामी नईं भरी तां ययाति होर बड़े नराश
होए । उन सोचेया मन्नना ते इस बी नईं पर पजमें गी बी आखी
दिक्खो । उनें उसी बी आखेया इस कदे राजे दी गल्ल नईं ही
परताई । राजा आखन लगा—“अड़ेया तूं मिगी बचाई लै ।
अऊं बड़ेपे दिये भुरियें, नसती, ते चिट्टे बालें कशा बड़ा दुखी
आं । ए शुक्राचार्य होरें भला श्राप दई ओड़ेया ऐ । ए बड़ा
औखा इम्तयान ऐ । जेकर तूं किश चिरै आस्तै मेरा बड़ेपा लई
लें ते कष्ट जरी लें, तां अऊं किश चिर जिन्दगी दा नंद भोगिए
तुगी जुआनी परताई देड । ते सारे दुक्ख बी पाई लैड । तुम्मी
अपने भ्रायें आडू नां नईं करी ओड़ेयां ।”

ए पुरु सारें कशा निगड़ा पुत्तर हा ते बब्बै गी बड़ा प्यार
करदा हा । आखन लगा—बापू जी, अऊं तुसें गी अपनी जुआनी
दिन्नां, ते तुन्दी बड़ेपे दियें मसीबतें कशा खलासी करानां । राजै
दी खेचलै कशा बी बेल्ले करनां । तुस खुश होई जाओ ।

ए सुनियै राजे ने उसी घोटियै गलें लाया हत्थ लान्दे गै
ययाति होर जुआन होई गे । पुरु, जिस बड़ेपा लेया, राज काज
चलान लगा । ओदी बड़ी मैहमा होई ।

ययाति होरें मता चिर नन्द भोगेया । रज्ज नईं होआ तां
कुबेर हुन्दे बागें जाइये इक अप्सरा कन्ने मौजा मारन लगा । इस
काम बासना दी अग्गी इच जिन्ना घिओ पान्दे जाओ ए मकदी गै
जन्दी ऐ । एदी तृप्ती हुन्दी गै नईं । आखर उनें ए सच्च
पशानी लैता पुरु कोल आये ते आखन लगे—

“बेटा, कामबासना भोगिये शान्त नईं हुन्दी । घिओ पौने
करी हवनै दी अग्गी आडू मकदी गै जन्दी ऐ । ए में पढ़े दा ते
सुनेदा ते था, पर तजर्वा नईं हा कीते दा । नाज, सुन्ना, पशू ते

बिदुर

ऋषि माण्डव्य हुन्दा मनोबल बड़ा हा, उन्दा शास्त्रें दा ग्यान बी बेसम्भ हा । उनें बड़ी तपस्या वीती । ओ बड़े सत्तवादी हे । ओ नगरे दे बाहर बनै इच कुटिया इच रौन्दे हे । इक दिन ओ अपनी कुटिया इच इक बूटे हेठ समाधि लाइयै बैठे दे हे किश चोर तुआईं द्रौड़दे आये । उन्दे पिच्छे पलीस आले लगे दे हे । उने दिक्खेया जे आश्रम नकेवला ते बक्खरा नेआ थार ऐ इत्थे छप्पी जन्नेआं । उने चराये दा माल मत्ता कुटिया इच इक नुक्करै च रक्खेया ते आपू छप्पी मे । श्पाही उन्दा पैरा दिखदे दिखदे आश्रमै इच आई पुज्जे ।

पुलीस दा कुटवाल माण्डव्य होरें गी दाबा दइये पुच्छन लगा । (माण्डव्य हुन्दी समाधि लग्गी दी ही) “तुकी ताईं दा जन्दे डाकू लब्बे न ?” ओ कुआईं मे न ? तौले दस्स जे उन्दा पीछा करिये उनेंगी भटपट पगड़ी लैचै । महात्मा होर ते समाधी लीन हे । उने के जवाब देना हा कुटवाल किश खिञ्जी पेया ते बदजवानी करन

लगा पर महात्मा होरें समाधी करी कवख नईं सुनेया ।

इन्हें चिरै गी श्पाही कुटिया च जाई बड़े ते उनें गी चोरी दा माल पेदा लब्बा । उनें कुटवाल होरें गी रपोट कीती । सारे अन्दर गे ते छप्पे दे डाकू बी पकड़ोई गे ।

कुटवालै सोचया—अच्छा ए गल्ल ही ! ताइएँ महात्मा होरें मौन धारे दा ऐ । ईऐ असली डाकुएँ दा सर्दार लबदा ऐ । इसै डाका पुआए दा ऐ । उस श्पाहियेँ दा पहरा लाया ते आपूँ महाराज हुन्दे कोल जाइयै रपोट कीती—महाराज माण्डव्य ऋषि माल मत्ते संमेत पगड़ोई गया ऐ । राजे गी बड़ा रोह चढ़ेया—ए चोरें दा सर्दार बड़ा बदमाश ऐ, ऋषि दा भेस धारियै कम्म करदा ऐ । दुनिया गी भला धोखा दिन्दा ऐ । राजे नै छान-बीन बी नईं कीती ते महात्मा गी पराधी आखियै सजा दित्ती—‘सूली चाढ़ी ओड़ो’ ।

कुटवाल परतोआ । महात्मा गी सूली चाढ़ी ओड़ेया । ते मालमत्ता खजानै जमा होई गया ।

महात्मा गी नेजे उप्पर सूली भायें दई ओड़ी पर ओ मोआ नईं । उन्दी समाधि लग्गी दी ही इस करी जिसलै उनें गी सूली बी चाढ़ी ओड़ेया तांमी ओ जोग शक्ति करी मोए नईं । बनै इच रौने आले वाकी सारे ऋषि उन्दी कुटिया च आये ते थागन लगे जे ए नर्थ कियां होआ ?

माण्डव्य होर बोले—राजे दे श्पाही पर्जा दी रखवाली गित्ते हुन्दे न, पर उनें गै मिगी सूली चाढ़ेया ऐ । होर कुण नेई गल्ल करी सकदा ऐ ?

राजा बड़ा चर्ज करन लगा ते डरेया बी जे जिस महात्मा गी सूली दित्ती ही ओ मोआ नईं । ते बाकी सारे ऋषि उन्दे कोल किट्टे होए दे न । ओ अपने अमले फैले गी लइऐ बनै च पुज्जा । महात्मा गी सूली परा तुआरेया । ते उन्दे चरणें च डिग्गा ‘महाराज ! पराध खिमा करो, अनभोल गै होई गया ऐ । जानियै नईं कीता ।’

माण्डव्य होर राजे कन्ने रोहें नईं होए । ओ सिद्धे धर्मराज कोल गये । धर्मराज त्रौणें लोकें दा न्यां करदे न । ओ न्यां दी कुरसी उप्पर बैठे दे हे । माण्डव्य होरें पुच्छेया—“में के पराध कीता जेदा मिकी ए डन्न थोआ ऐ ?” धर्मराज माण्डव्य हुन्दा जोगबल जानदे हे, धीनगी कन्ने आखन लगे—महात्मा जी । तुसैं पक्खरूँ ते भौरे दियें मक्खियें गी दुःख दित्ता दा ऐ । तुसैं गी पता गै जे चंगे मन्दे कम्में दा भायें ओ लौके होन ते भायें बड्डे, चंगा मन्दा फल हुन्दा गै । ते ओ फल भोगना गै पौन्दा ऐ । माण्डव्य होरें गी धर्मराजे दा उत्तर सुनिये बड़ा चबात होआ—ओ पुच्छन लगे—ए पराध में कदू कीता ? धर्मराज बोले । जदूँ तुस अजें जागत हे । माण्डव्य होरें धर्मराज गी श्राप दित्ता—ए इक मसूम जागत कोई खुज्ज करी ओड़ी, ओदी एड़ी सजा बड़ी ज्यादा ऐ । तुम्मी संसारें च जाइये मनुक्ख जून भोग ।” माण्डव्य ऋषि हुन्दे श्राप करी धर्मराज होरें बिदुर हुन्दे रूपे इच अवतार लेया । ओ विचित्र वीर्य हुन्दी रानी अम्बालिका दी दासी दे घर जम्मे ।

ए सारी कथ सनाने दा मनशा ए हा जे बिदुर होर ‘धर्म’ दे अवतार हे । सारे संसारें दे विद्वान मनदे न जे बिदुर होर महात्मा न, धर्म शास्त्रें दे ग्यान, ते राजनीति इच उन्दी बरोबरी दा कोई नईं । उनें क्रोध ते मोहममता भाखी गै नईं । अजे बिदुर होर बीहें दे खल्ल-खल्ल गे हे जे भीष्म-पितामाह जी नै उनेंगी धृतराष्ट्र हुन्दा बड्डा सलाहकार बनाई ओड़ेया हा । व्यास जी आखदे न त्रौणें लोकें इच गुण ते ग्यान इच बिदुर हुन्दे कशा बड्डा कोई नईं । जिसलै धृतराष्ट्र होरें जूआ खेडने दी जाजत दई ओड़ी तां बिदुर होर उन्दे परें डिगो ते इस गल्लै दा बरोध करिये आखन लगे :—महाराज ! अऊं इस्स गल्लै कन्ने सहमत नईं । एदा नतीजा तुन्दे पुत्तरें इच लड़ाई लग्गी जानी ऐ । जूआ खेडने दी जाजत मत दिन्दे होवो ।”

धृतराष्ट्र होरें मते चाली अपने पुत्तरें गी समझाया ते जूआ

खेडने कशा रोकने दा जतन कीता । उनें आखेया—ए खेड नईं खेडो । बिदुर होर बड़े ग्यानवान न ते साढ़ी भलाई चाहने आले न । इस जूए दी खेडै करी आपसी घृणा दी अग वधनी ऐ ते उस इच साढ़ा राज ते असें भस्म होई जाना ऐ ।”

पर दुर्योधनै कोई सिक्ख नईं मन्त्री । धृतराष्ट्र गी पुत्तरै दा मोह हा ओ पुत्तरै दे हठै अगै भुकी गे ते उनें युधिष्ठिर होरें गी जूआ खेडने गित्तै साढ़ा भेजी ओड़ेया ।

०००

हिंदी गीत

एक दिन एक राजा ने कहा कि मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है

मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है
। मैंने एक राजा को मारा है । मैंने एक राजा को मारा है । मैंने एक राजा को मारा है

कुन्ती देवी

श्री कृष्ण जी दा नाना शूरसेन यादवें दा मन्नें प्रमन्ने दा बडेरा हा । उन्दी इक धी ही पृथा । बड़ी श्लैपे ते गुणें दी खान । शूरसेन हुन्दे भ्रा कुन्तिभोज दै कोई लुआद नई ही इस करी शूरसेन होरें पृथा गी कुन्तिभोज हुन्दी गोदै पाई ओड़ेया । अदू थमां पृथा दा नां कुन्ती प्रसिद्ध होई गया । की जे धर्म पिता दा नां कुन्तिभोज हा ।

कुन्ती हजे लौकी नेई कुड़ी ही जे इक बारी दुर्वासा ऋषि होर आये ते ओदे पिता दे मैहलें इच इक बरा टिके रहे । कुन्ती नै पूरा बरा बड़ी श्रद्धा भगती ते मन लाइय उन्दी सेवा कीती । दुर्वासा ऋषि होर बड़े प्रसन्न होए ते उनें कुन्ती गी इक मन्तर दस्सेया । उनें आखेया—ए मन्तर पढ़िऐ तू कुसं बी देवते गी सदगी ओ थुआड़े सामनै सामर तक्ख होई जाग ते अपने नेआ शूरवीर पुत्तर देग । उनेंगी पहलें गै आगम होई गया जे अग्गें

जाइयै कुन्ती दे पति उप्पर किश भाना बर्तौना ऐ इसकरी उनें कुन्ती गी ए मन्तर दस्सेया ।

जुआनी बड़ी शोहली (उत्सुक) ते काहली हुन्दी ऐ । उस सोचेया हुण इत्थें गै पतंख करी दिखनी आं । सूरज भगवान् गासै चमका दे हे । उस उन्दा गै आह्वान कीता । उस्स लै अम्बर घनोई गया ते डिगलें ओल्लै सूरज देवता कुन्ती कोल आई प्रेम जतान लगे ते नुआड़े श्लैपे दी तरीफ करन लगे । कुन्ती उन्दे दिब्ब तेज कन्ने किश सहमी गई ते पुच्छन लगी—“हे देवता जी, तुस कुण ओ ?”

सूरजदेव होरें जबाब दित्ता—अऊं सूरज आं । तू पुत्तर कामनां आला मन्तर पढ़ेया इस करी अऊं मन्तरै दा सद्दे दा अई गेयां ।

कुन्ती डरी गई ते आखन लगी—में ते कुआरी आं । पिता पालमा करदे न । में हजे मां बनने जोग नई । ते न गै मेरी मरजी ऐ । दुर्वासा ऋषि होरें बरदान दित्ता हा ते में ते छड़ा परीक्षा लैनें गित्तै मन्तर पढ़या हा । तुस परती जाओ ते माढ़ी गलती खिमा करी ओड़ो । पर मन्तरै दे जोरै करी सूरज देवता परतोइ नई हे सकदे । कुन्ती दी जिन्द निकलन लगी जे ओ ते सारी दुनिया च भण्डोई जाग । सूरज देवता नै किश दलासा दित्ता—“तुगी कोई बट्टा नई लगग । माढ़ा पुत्तर जम्मिए बी थुआड़ा कुआरपन बनेया रौग ।”

ईयां कुन्ती नै दुनिया गी लो ते प्राण देने आले सूरज देवता हुन्दे पुत्तरै गी जन्म दित्ता । ईऐ नेए दिब्ब जन्में गित्तै नौ महीने गर्भ धारण करिये कष्ट नई भोगनें पौन्दे । कुन्ती नै कर्ण जम्मेया जिस जमान्दरू गै कवच ते कुण्डल पाये दे हे ते, जेड़ा सूरज भगवान् आडू गै सुन्दर ते तेजवान हा । समां पाइयै ओ दुनिया दे सारें कशा बड्डे सूरमें इच इक होई गया । इस पसूता दे पिच्छुआं सूरज भगवान् हुन्दे बरदान मूजब कुन्ती परतिए कुआरो बनी गई ।

हुण ओ सोचें पई गई जे जातकै गी के करै? अपना दोष शैलने गितै उस जातकै गी इक बन्द सन्दूकै च पाया ते नदी इच रढ़ाई ओढ़ेया । इक सारथी गी ओ सन्दूक तरदा लब्बा । ओदै कोई लुआद नई ही, उस सन्दूक पुट्टेया तां बिच्चा इक बड़ा गै शैल जागत लब्बा । उस जातक अपनी लाड़ी गी दित्ता । उसी मसां घाली पुत्तर थोआ । उस अपनी सारी ममता ओदे उप्पर बारी ओड़ी । ईआं सूरज भगवान दा पुत्तर कर्ण इक सारथी दे घर पल्ल मठोल लगा ते सारथी दा पुत्तर खुआन लगा ।

जिसलै कुन्ती दे ब्होने दा मौका आया कुन्तिभोज नै आसे पासे दे सारे राजें गी सादा भेजियै सदेया ते स्वंबर रचाया । किन्नै गै ब्होने दे शकीन हाबड़े दे पे । राजकमारी दे गुण ते श्लैपा जगत प्रसिद्ध हे । कुन्ती नै जैमाल राजे पाण्डु दे गलै इच पाई ओड़ी । ओ भरत बैसे दे गहने हे । उन्दे तेज अगगै सारें राजें दा बल फिक्का पई गया जियां चन्नै गी ग्रहण लगदा ऐ । फी बिधि पूर्वक ब्याह पढ़ोआ ते कुन्ती अपने पति कन्ने हस्तनापुर टुरी आई ।

भीष्मपितामह हुन्दी सिक्खेया मताबक ते उस समें दे रवाजै मूजब पाण्डू नै मद्र दे राजे दी भैंन माद्री कन्ने बी ब्याह कीता । उनें दिनें राजे दौं दौं त्रै त्रै ब्याह करदे हे, पई बैन्स जरूर चलै । काम बासना पूरी करने गितै मते ब्याह नई हे करदे ।

०००

पाण्डु हुन्दा सुर्गवास

इक दिन पाण्डु होर शकार खेडन गे । इक ऋषि ते उन्दी लाड़ी बनै इच हरण ते हरणी बनियै काम क्रीड़ा करै करदे हे । पाण्डु नै हरणै गी बाण मारी ओड़ेया । उसी के पता हा जे हरण दे भेसै इच ऋषि होर न । ऋषि नै मरदे होई पाण्डु गी श्राप दित्ता । पापिया ! तू जिसलै बी भोग करगा उससैलै थुआड़ी मृत्यु होई जाग" । इस श्रापै करी पाण्डु बड़े दलगीर होए । राजपाट भीष्म-पितामह ते बिदुर होरें गी सौंपियै आपूँ दौने रानियें कन्ने बनै इच आई गे ते पूरे संजमै कन्ने रौन लगे । कुन्ती नै दिक्खेया जे राजे गी लुआदू दी चाह ऐ पर श्रापै करी ओ लुआद पैदा नई करी सकदे । उस दुर्वासा हुन्दे कशा थोए दे बरदान ते मन्तरै आली गल्ल पाण्डु होरें गी दस्सी ओड़ी ।

महाभारत

उस कुन्ती ते माद्री दौनें गी मन्त्रै दा प्रयोग करने गी आखेया—ते ईयां कुन्ती ते माद्री नै पञ्जे पाण्डवें गी जन्म दिता । ओ बनै इच जम्मे ते ऋषिएं इच पलन लगे । पाण्डु होर किन्ने गै बरे दौने लाड़ियें ते पुत्तरें कन्ने बनै इच रे ।

होनी दी गल्ल कुण परतै ? रत बदलोई बसन्त आया । खिड़दे फुल्ल, पलचदियां बेल्लां, ते कलोलां करदे पक्खरू, मिट्टी २ बा किश नेआ समां बज्जा जे पाण्डु ते माद्री अपने सब दुख दर्द भुल्ली गे ते किश मस्ती दे लुआरे इच आई गे । माद्री नै बड़ी बेनती कीती, बरोध बी कीता पर बसन्त ऋतु नै बतेरी ओढ़ेया । पाण्डु हुन्दा संजम ढिल्ला होई गया । पर ऋषियें दे श्राप खुञ्ज नई करदे । भोग करदे गै पाण्डु हुन्दा काल होई गया ।

माद्री कशा ए दुःख नईं भलोआ । उसी बभोआ जे इस मृत्यु दा कारण ओ आपू गै । उस कुन्ती गी आखेया जे नुआड़े जागते दी बी सम्हाल करै ते आपू चिखा उप्पर चढ़ियै पाण्डु दे शरीर कन्ने सती होई गई ।

ऋषि लोक कुन्ती ते पाण्डवें गी हस्तनापुर लई आये ते भीष्म होरें गी सौपना करी गे । उसलै युधिष्ठिर होर मसां सोलहें वरें दे हे ।

जिसलै हस्तनापुरें इच पाण्डु हुन्दे काल होई जाने दी गल्ल पुज्जी तां सारे पासै सोग होई गया । बिदुर, भीष्म, ब्यास ते धृतराष्ट्र होरें किरियाकर्म कीता । सारे राजै इच सोग ते दुख मनोआ ।

ब्यास होरें दादी सत्यवती गी आखेया—जो बीती गया सो भला । अग्गे औने आले समें इच पता नई के दुख मसीबतां लिखी दियां न । जुआनी दा समां ते चंगे सुखने आडू बीतदे पता नई लगा पर गेडा समां बड़ी कठनाई दुख ते मसीबतें दा औने आला ऐ । समां बड़ा डाड्डा हुन्दा ऐ । अपने कुलै उप्पर औने आलियां

ब्रिपतां तुसें कैत दिक्खनियां न ? इस करी तुस नगरी छोड़िये कुस
वन जाइये कुटिया इच नवास करो ।”

सत्यवती मन्त्री गई ते अम्बिका ते अम्बालिका गी लइयै वनै
गी टुरी गई । इने त्रैनें रानियें अपने बढेपे च तपस्या कीती ते
मरने परेन्त सुर्गवास थोग्या । उनें अपने कुलै दियां मसीबतां नईं
दिक्खियां ।

000

येन विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।
 न विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।
 न विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।
 न विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।
 न विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।
 न विद्वान् विद्वत्तुः । न विद्वान् विद्वत्तुः । न विद्वान् विद्वत्तुः ।

भीमसैन

पञ्जै पाण्डव ते धृतराष्ट्र हुन्दे सौ पुत्तर हस्तनापुरै इच हसदे
 खेडदे मठोन लगे । जिन्दु थमां भीमसैन सारें कशा तगड़ा हा ।
 ओ दुर्योधनै गी ते बाकी कौरवें गी बड़ा सतान्दा हा । उनें गी वालें
 दा घसीटदा ते मार चाढ़दा । आपुं ते बड़ा भारी तारू हा उनें
 गी जप्फी मारियै पानी इच चलोबी लाई ओड़ें । आपुं ते बड़ा
 दम रक्खे ते ओ पानी इच गोते खाइ खाइयै फाह्में होइ जान ।
 ओ कदें बूटे उप्पर चढ़न तां इस हेठ खडोईए बूटे गी एडे जोरेयां
 भुनकना जे ओ बूटे परा पक्के दे बैरें आडू डिंगी पौन । भीमसैनै
 दे मखौल होई जाने ते उन्दियें जड़े वामें ते पिण्डें उप्पर नील गै
 नील ते फट्टन पई जन्दे हे । इस करी निक्के हुन्दे थमां गै धृतराष्ट्र
 हुन्दे सारे पुत्तर भीमसैनै गी दिक्खी नई हे सखांदे ।

जिसलै राजकमार मठीए तां कृपाचार्य होरें उनें गी धनश
 बिद्या सखाई । हथ्यार चलाने दस्से ते होर मतियां बिद्यां पढ़ाइयां ।

दुर्योधन भीमसैन कन्ने बड़ा खैरदा हा । ओ बड़ा दोखी हा ते कई, आरी नामनासब गत्तां बी करी ओड़दा हा ।

दुर्योधन बड़ा दुखी रौन्दा हा । ओदा बब्ब अन्ता हा । इस करी राज पाण्डु करदा हा । नुआड़े पिच्छुआं युधिष्ठिर नै गै वारस बनना हा । ऊऐ जुवराज हा । दुर्योधन समझदा हा जे नुआड़ा बब्ब ते वेबस ऐ । उस सोचेया जे युधिष्ठिर गी गद्दी नई थोऐ इस गित्तै जरूर ऐ जे भीमसैन दा कण्डा कहुँया जा । उसी मरवाई ओड़ेया जा । उस भीमसने गी मरवाने दा पक्क पका करी लैता । उसी जकीन हा जे भीमसैन दे पिच्छुआं पाण्डवें दी ताकत कक्ख नई रौनी ।

दुर्योधन अपने भायें कन्ने मिलियै स्कीम बनाई जे भीमसैन गी गंगा जी इच डोबी ओड़ो, अर्जुन ते युधिष्ठिर गी कैद करी लौ ते ईयां राज खोइयै जबरदस्ती कब्जा करी लौ । दुर्योधन इक दिन सारे भायें गी गंगा न्हौन लई गया । खेडां करियै हुट्टी गे तां ओ अपने तम्बुए इच सई गे । भीमसैन मता खेडया हा, कन्नं ओदे भोजनै इच जहर पाइ ओड़दा हा इस करी ओ नदी कण्डे गै बसुत होई गेवा ते घूक नींदरा पड़ गया ।

दुर्योधन उसी सुब्बे कन्नं वन्नेया ते गंगा इच सुट्टी ओड़या । उस थारै विच दुर्योधनै किश बछियां गडाई दियां हियां जे पौन्दें गे भीमसैन उन्दे कन्ने त्रमोई जा, ते मरी जा । पर जित्थें भीमसैन डिग्गा उत्थें बछियां नई हियां, विसले सप्पें उसी डंगेया । जहर कन्नं जहर कटोइ गया । भीमसैन गी किश नई होआ । गंगा दी भौड़ें उसी बाहर कण्डे सुट्टी ओड़या ।

दुर्योधनै सोचेया जे भीमसैन बछियें कन्नं त्रमोइयै ते सप्पें कशा डंगोइयै मरी गया होग । ओ खुशी खुशी बाकी साथियें कन्नं राजधानी परतोआ ।

जिसलै युधिष्ठिर भीमसैन दे बारे इच पुछेया तां ओ आखन लगा जे ओ पहलें शहर दुरी गेदा ऐ । युधिष्ठिर बसाह करी लैता

ते घर आइयै माऊ गी पुच्छेया जे भीमसैन पुज्जा जां नई । उस आखेया जे ओ ते नई आया । युधिष्ठिर गी खतोला होआ जे भीमसैन कन्नै किश छल होई गया ऐ । ओ भरायै कन्नै परतियै बनै गी गया ते तुप्पन लगा । पर भीमसैना दा कोई थौह नई लग्गा । ओ बड़े निम्मोभान होएदे परतोए ।

जिसलै भीमसैन दी नीन्दर खुट्टी तां ओ बल्लें २ टुरदा घर पुज्जा । कुन्ती ते युधिष्ठिर उसी घोटियै गलें लाया ते बड़े खुश होए । जहरै दा ए असर होआ जे भीमसैन अगें थमां बी मता तगड़ा होई गया ।

कुन्ती नै बिदुर होरें गी सद्देया ते बक्खरे सनाया—“दुर्योधन बड़ा दुष्ट ऐ ते जालम ऐ । ओ भीमसैन गी मरवाना चान्दा ऐ । उसी राजै दी बड़ी अग ऐ । मिगी बड़ी चिन्ता ऐ ।”

बिदुर जी आखन लगे—तुस जो किश आखदे ओ सच्च ऐ । पर ए गल्लां मनै इच रखेयो । जे दुर्योधनै गी पता लग्गा जां असें इलजाम लाया तां उस मता भड़कना ऐ । ईखद्विष मते बघने न । तुन्दे पुत्तरें दी बड़ी आबला ऐ । इस विशे इच तुस चिन्ता नई करो ।

युधिष्ठिर नै बी भीम गी सतर्क कीता ते ठाकेया—चुप रवेयां, ते गल्लै गी पी जायां । अगों अस बड़े खबरदार रौगे ते अपनी रक्खेया करगे ।

भीमसैनै गी जीन्दा दिक्खियै दुर्योधनै गी बड़ा चर्ज लग्गा । ओ होर मता दोखी होई गया ते नफरत करन लग्गा । उस बड़ी सूक सुट्टी ते बड़ा दुखी होआ ।

०००

कर्ण

पाण्डवों ते कौरवों शस्तर विद्या पहलें ते कृपाचार्य हुन्दे कोला ते फी द्रोणाचार्य हुन्दे कशा सिक्खी । इक बारी उन्दा मुकाबला निश्चित होआ भाई कुस किन्नी योग्यता प्राप्त कीती ऐ । सारे राज पर्वार ते जनता गी बी ए तमाशा दिक्खने आस्तै सहेया । सारे अपने राजकमारें दे कर्तब दिक्खने गित्तै किट्टे होए । अर्जनै अपने शस्तरें दे दिब्ब गै कर्तब दस्से । सारे किट्टे होए दे लोक चर्ज करने लगे ते बाह-बाह करत लगे । दुर्योधनै दा मुंह ईर्खा ते घृणा कन्ने काला जन फिरी गया ।

दिन घरोन लगा । तां जे उस मदानै इच कुसै दी गर्जना आडू बाज आई । कोई शस्तरें दी टनकारै कन्ने मुकाबलै गित्तै ललकारै दा हा । सारे तुआईं पासै दिक्खन लगे । सारें दिक्खेया जे कोई पिड़ै चा अगें आवा दै । भीड़ रस्ता देन लगी । औने आला कोई दिब्ब गबरू लबदा हा । शक्ति ते तेज दियां किरणां नुआड़े पिण्डे थमां निकलादियां हियां । उस चक्खी दिक्खेया ते

कृपाचार्य ते द्रोणाचार्य होरें गी बगाटड़ा चरण बन्दना कीता । ते सिद्धा अर्जनै सामनै जाई खड़ोता । भागें दी बडम्बना दिक्खो दमैं भ्रा, इक्कै खून ते इक दूए दे मकाबले पर आई गे । ए कर्ण हा ।

कर्ण नै बहलै आडू गर्जिए अर्जनै गी आखेया—तू जे किश कर्तब दस्से न अऊं उन्दे कशा ज्यादा कर्तब करी दस्सनां । द्रोणाचार्य होरें जाजत दित्ती ते कर्ण अर्जनै आले कर्तब बड़े सहज सुभा कम्मे करियै दस्सी ओड़े । दुर्योधनै दी नुहार फिरी । बड़ा खुश होआ । ते कर्ण गी घोटिए गलें लाया । आखन लगा—

“साड़े बड़े भाग न जे थुआड़े नेआ शूरवीर असें गी थोआ ऐ । अस सारे कौरव थुआड़ा स्वागत करनेआं । कर्ण आखन लगा—
“अऊं कर्ण आं । महाराज ! मिकी दौं गै गल्लां लोड़चदियां न, इक तुन्दा प्रेम ते दूआ अर्जनै कन्ने टाकरा” दुर्योधनै फिरी उसी जप्पी पाइयै छाती ने लाया—ए मेरा राजपाट सब थुआड़े गित्तै हाजर ऐ ।”

दुर्योधनै दे मनै इच प्रीतै दा सागर मौजां मारन लगा । तुआई अर्जन रोहै कन्ने बली उट्टेया । उस बड़ी नमोशी समझी । उस बलदियें अक्खियें कन्ने कर्ण गी दिक्खेया । कर्ण पहाड़ आडू दड़ खड़ोता दा हा । ते कौरव नुआड़ा स्वागत करा दे हे अर्जन बोलेया—कर्ण, अऊं तुगी हूण गै जमलोक पजान लगां, बिन सद्दे ते बिन बलाये दे खौदल पाने आले गी इऐ सजा दिन्दे न ।

कर्ण गल्ल हस्सियै गुआई ओड़ी । पर्वह गै नईं कीती ।

ए मकाबले दा मदान ऐ । सारें गित्तै खुल्ल ऐ । छड़ा थुआड़े गित्तै रजब नईं । राजै दी नीं शक्ति हुन्दी ऐ, ते इऐ कनून बनान्दी ऐ । पर गल्लें दी के लोड़ ऐ । गल्लां ते कमजोर लोकें दा शस्तर हुन्दियां न । तू फौड़ां नईं मार, तीर चला ।

ईआं ललकार सुनियै अर्जनै गुरु द्रोणाचार्य हुन्दे कशा जाजत

मंगी, भ्रायें दे गलें लगा ते मकावले गित्तै आई गया । तुआई कर्ण बी कौरव भ्रायें कशा जाजत लइयै ते अस्तर शस्तरें कन्नै मकावले पर आई गया ।

इनें दोनें दे दिब्व पिता बज्जर धारी इन्द्र ते अनसम्भ किरणें आले सूरज भगवान अपने अपने जागत गी हौसला देने गित्तै ते ए प्राण लैनै आला जुद्ध दिक्खने गित्तै गासै उप्पर प्रगटे ।

जिसलै कुन्ती नै कर्ण गी दिक्खेया तां पशानी गई जे ओ नुआढ़ा प्लोठी दा जागत ऐ, उसी गशा आई गई । बिदुर होरें दासी गी नुआढ़ी टैह्ल करने गी आखेया । किच्चरें उस सुत फिरी । ओ बचारी सुन्न होई गई । कोई थौह नई आवै के करै ? जिसलै दमै लड़ने गी सोह्गे होए तां कृपाचार्य होर दोनें दे बशकार आई खड़ोते । ओ जुद्ध दे निजमें दे बड़े भारे जानकार हे कर्ण गी आखन लगे—“भाई ! ए राजकमार जेड़ा लड़ने गी तयार होआ दा ऐ पृथा ते पाण्डु दा पुत्तर ऐ, ते कुरु बन्सै दी लुआद ऐ । तुम्मी बड़ा भारा जोद्धा एं । अपने माऊ बब्बै दा नां ते कुलै दा नां दस्स । कुलै दा नां पता लगवै तां गै अर्जुन तेरे कन्ने लड़ी सकग । उच्चे कुलें दे राजकमार इयां जने खने कन्ने जुद्ध नई करन लगी पौन्दे ।”

कर्ण ए गल्ल सुनिऐ किश भित्था पई गया । जियां बर्खा दी बाछड़ै कन्नै कमल नई जन्दा ऐ ।

दुर्योधन उट्टी खड़ोता ते आखन लगा—जे जुद्ध शड़ा इस मूजब नई होई सकदा जे कर्ण राजकमार नई तां ऐदा लाज ते सौखा ऐ । अऊं कर्ण गी अंग देसै दा राजा बनानां ।” उस भीष्मपितामह ते धृतराष्ट्र हुन्दे कशा मनजूरी लैती, जरूरी रस्मां पूरियां कीतियां, ते अंग देसै दा राज कर्ण गी सौपी दित्ता । कर्ण दे सिर मुकट लाया ते राज चिन्ह दई दित्ता । ठीक उस मौकै जिसलै जुद्ध शुरू होन लगा बुढ़ा सारथी अधिरथ जेड़ा कर्ण दा धर्म पिता

हा उत्थें आई गया । ओदे हत्था इच चौकीदारी दा डण्डा हा । ते डरै कन्ने कम्बा दा हा ।

कर्ण हुणै २ अंग देसै दा राजा बनेया हा । जियां इक पुत्तरै गी बब्बै दा सतकार कीता लोड़चदा ऐ उसी दिखदे गै कर्ण नुआड़े पैरें इच नींदा होई मत्था टेकन लगा । ओ बुड्डा उसी बच्चुआ, पुत्तरा आखिये ते अपनियें लिस्सियें बाहें कन्ने कलावा मारियै गलें लगन लगा । नुआड़ी अक्खीं च खुशी दे अत्थरुं हे । अपने हिरखै दे अत्थरुं कन्ने उस कर्णै दा राजमुकट लाये दा सिर गिल्ला करी ओड़ेया ।

ए दिक्खियै भीमसैनै गड़ाका सुट्टेया ते आखन लगा—ऐ ते भई सारथी दा पुत्तर ऐ । तूं चाबक थाम ते अपना खानदानी कम्म चला तूं अर्जुनै हत्थें मरने जोग नईं । नां गै तुगी अंग देसै दा राज करना चाही दा ऐ ।

नेई बेजती आली गल्ल सुनियें कर्णै गी बड़ा सन्ताप होआ । नुआड़े ओठ फर्कन लगे । निम्मोभान होइऐ उस डुबदे सूरज भगवान पासै दिक्खेया, सूंक सुट्टियै चुप्प रेआ ।

दुर्योधन रोहै कन्ने भड़की उट्टेया—ओए भीमसैना, ईआं आखना मनासब नईं । बीर क्षत्रियें दा गहना उन्दी शूरवीरता हुन्दी ऐ । बड्डे बीर बहादरें ते दरयाएँ दे मुण्ड कोई नईं तुपदा । अऊं तुकी सैंकड़ें मसालां दस्सी सकनां जित्थें लौके कुलै इच जम्मने आले बड़े महापुरुष होए । जे भात्थां गै कड्डुनियां होन तां थुआड़े जन्मै बारे च नेईं के कड्डुन हुन्दियां ? इस बीर जोद्धा पासै दिक्ख । एदी दिब्ब नुआर दिक्ख । एदे अस्तर शस्तर ते कन्ने दे कुण्डल ते शस्त्र चलाने दी कला पासै ध्यान कर । एदे इच जरूर कोई भेत ऐ । हरणी दे घर शेर नईं जम्मी सकदा । तूं आखना एं ए अंग देसै दे राजै जोग नईं । अऊं समभनां जे ए सारी दुनियां उपपर राज करने जोग ऐ ।

दुर्योधनै कर्णं गी अपने रथेँ उपपर ब्हालेया ते लई गया ।

सूरज अस्त होई गया । भीड़ बी छण्डोई गई । रौला जन पेई गया । दिये दी लोई लोक टोलियेँ इच गल्लां करदे जान लगे, कोई अर्जुनै दी बड़याई करन कोई कर्णै दी ते कई पक्खपात मूजब दुर्योधनै दी गै बड़याई करन ।

इन्द्र होर ताड़ी गे जे शेकड़ै दी लड़ाई अर्जन ते कर्ण दी गै होनी ऐ ते ए टली सकदी नईं । उनें ब्राह्मणै दा भेस धारेया ते ते कर्ण कोल आये । कर्ण अपनी दानवीरता करी मशहूर हा ।

ओदे कशा कवच ते कुण्डल दान मंगन लगे । सूरज देवता नै कर्ण गी पहलें गे सुखनैँ इच दस्सेदा हा जे इन्द्र इस चाली धोखा देग । फी बी कर्ण मंगी दी चीज देने थमां इनकार नईं करी सकेया । उस अपने जमान्दर कुण्डल ते कवच तुआरी दित्ते ते ब्राह्मणै गी दान दई ओड़े ।

देवतें दा राजा इन्द्र बड़ा हरान होआ ते प्रसन्न बी बड़ा होआ । ओ दान लइयै कर्ण दी बड़ी महमा गान लगा । नेआ कम्म दुनियां इच होर कोई नईं करी सकदा । ए दान लइयै किश शर्म आई तां कर्ण गी आखन लगा—“भई, तुम्मी कोई बर मंगी लै ।”

कर्ण आखेया—“मिकी अपना शस्त्र शक्ति दई ओड़ी जेड़ा शत्रुएं गी मारी ओड़दा ऐ । इन्द्र नै बर ते दई ओड़ेया पर इक शर्त लई ओड़ी । उस आखेया—ए शक्ति तूँ इक शत्रु उपपर बरती सकगा । ए शक्ति उसी मारी देग ओ भायें कुण बी होग । पर उसी मारने परैन्त ए थुआड़े कोल नईं रौग । ते माढ़े कश परत्ति औग ।” ए आखियेँ इन्द्र होर लोप होई गे ।

कर्ण परशुराम हुन्दे कोल जाइयै उन्दी सिक्खेया लैन लगा । आखन लगा—अऊं ब्राह्मण आं । उस उन्दे कोला ब्रह्म अस्तर चलाने दा मन्तर सिक्खेया । इक दिन परशुराम होर कर्णै दी गोदा सिर रखियै सुत्ते दे हे जे इक कीड़े नै कर्णै दा पट्ट थूई खादा ।

लहू बगन लगा ते पीड़ बड़ी सख्त होई पर कर्ण सी नईं कीती ते जरी गया । हिल्लेया तक नईं । कुतै गुरु हुन्दी नीन्दर नईं खुञ्जी जा । तत्ता तत्ता खून लगा तां परशुराम होर जागे । उनें दिक्खेया जरुमै थमां खून बगा दा हा । उनें आखया—हे बिद्यार्थी, तूं ब्राह्मण नईं । शरीरै दी इन्नी जातना इक क्षत्रिय गै जरी सकदा ऐ । मिकी सच्ची गल्ल दस्स ।”

कर्ण मन्नेया जे अपने आपै गी ब्राह्मण आखियै उस भूठ बोलेया ऐ । दरअसल ओ इक सारथी दा पुत्तर ऐ । परशुराम होरें रोहै इच उसी श्राप दित्ता—“तूं गुरु गी धोखा दित्ता ऐ । जा तुकी ब्रह्म अस्तर ऐन मौके उपपर कम्म नईं देग । जिसलै मौका होग तुगी मन्तर गै भुल्ली जाग ।”

ईऐ कारण हा जे अन्त समै बेल्लै अर्जुनै कन्ने लड़दे कर्ण गी ब्रह्म अस्तर चलाने आला मन्तर गै भुल्ली गया । उस खिनै थमां पहलें उसी ओ भलेयां चेतै हा ।

कर्ण दुर्योधनै दा सच्चा मित्रर हा ते उस शेकड़ै तोड़ी कौरवें दा साथ मानदारी कन्ने दित्ता । भीष्मपितामह ते द्रोणचार्य हुन्दे पिच्छुआं ओ कौरवें दा सेनापति बनेआ । ते दो दिन बड़ी बहादरी कन्ने लड़ेया । अन्त इच ओदे रथै दा पहिया भुआ खुब्बी गया । उस मता जतन कीता पर ओ नईं निकलेया ते नां गै रथ चलेया इनें थत्थोबत्थे इच पेदे गी अर्जुनै मारी ओड़ेया । कुन्ती गी बड़ा दुख होआ । ए घा बड़ा झूगा हा जेड़ा बचारी गी उसलै श्पेलना पेया ।

०००

द्रोणाचार्य

द्रोणाचार्य भरद्वाज ऋषि हुन्दे पुत्तर हे । वेद ते वेदांगों दी पढ़ाई पूर्ण करिए उनें धनुष बिद्या पासै गै रुचि लाई ओड़ी ते ओदे उस्ताद होई गे । पञ्चाल राजे दा पुत्तर द्रुपद उन्दे कन्ने आश्रमे इच पढ़े दा हा ते ओ गुरभाई हे । उन्दी गूढ़ी दोस्ती होई गई । द्रुपद अपनी दोस्ती दी तरंगै इच आखदा हुन्दा हा जदू अऊं राजा बनड तुगी अद्धा राज दई देड ।

पढ़ाई खत्म करने पिछुआं द्रोणाचार्य होरें कृपाचार्य दी भैन ब्याही ते ओदे चा अश्वत्थामा जम्मेया । द्रोणाचार्य अपनी लाड़ी ते जागतै गी मता चान्दे हे ते उन्दे गित्तै, उन्दियां लोड़ा पूरियां करने गित्तै उनेंगी धनै दी लोड़ सेई होई । पहलें उनें इस पासै कदें ध्यान गै नईं हा कीता । उनें गी पता लग्गा जे परशुराम होर ब्राह्मणें इच धन बण्डा करदे न । ओ उन्दे कोल गये पर चिरें पुज्जे परशुराम होर सब किश बण्डी बण्डाइयै बन जाने गित्तै

तयारी इच लग्गे दे हे । उनें आखेया भई हुण धन ते है नई ।
तुगी शस्त्र बिद्या सखाई ओड़नां ।

द्रोणाचार्य होर मन्नी गे । धनुष बिद्या दे अगों गै उस्ताद
है । हुण ते सारी शस्त्र बिद्या दे लासानी जानकार होई गे । बड़े
बड़े राजघराने उनें गी शस्त्र बिद्या दा गुरु धारण करने गितौ तयार
होई गे । ओ बड़ा जुद्धे दा समां हा ।

अदू गै पञ्चाल राजे दा सुर्गवास होई गया ते द्रुपद गद्दी
उप्पर बैठा । द्रोणाचार्य होरें गी दोस्ती दा ख्याल आया जे द्रुपद
ते अद्दा राज देने दी गल्ल करदा हा । ओदे कोल चलनेआं ।
उनेंगी बड़ी मेद ही जे ओ खूब खातरां करग ।

उत्थे जाइयै पता लग्गा जे द्रुपद ते ओपरा गै होई गेदा ऐ ।
ओ जमाती ते मित्तर भाव आली गल्ल गै नई रई दी ही । द्रोणा-
चार्य होरें परानी मित्तरता दी गल्ल जगाई तां द्रुपद खुश होने दी
थां भड़की उठ्ठेया । उस ए मित्तर भाव आली गल्ल नई जरोई ।
आखन लगा—ओ ब्राह्मणा—तुगी एडी हिम्मत कियां होई जे मिगी
मित्तर करिये सहें । इक गद्दी उप्पर बेठे दे राजा ते लूर लूर फिरने
आले मंगते दी दोस्ती के होई सकदी ऐ ? तू बड़ा मूर्ख ए जे कदे
कालें दी पाठशाला दी मित्तरता दी गल्ले उप्पर इक राज कन्ने
दोस्ती पान आई गया एं । इक भिख्या मंगने आला धनवाने दा
कियां मित्तर होई सकदा ऐ ?

इक मूर्ख ते गवार मानु विद्वाने दा मित्तर कियां होई सकदा
ऐ ? इक ड्रौकल आदमी वीर जोद्धा दा मित्तर कियां होई सकदा ऐ ?
दोस्ती ते म्हेशां बरोबरी आलें इच हुन्दी ऐ । इक मंगता गद्दी उप्पर
बौने आले राजे दा दोस्त नई होई सकदा ।

उस द्रोणाचार्य गी मैहलें चा बाहर कड्डी ओड़ेया । द्रोणाचार्य
हुन्दे कन्ने इच ओ कौड़े बोल गूंजन लगे । उन्दे हिरदे इच नफरत
दी भावनां जागी ते क्रोध बलन लगा ।

उनें मनै इच पतिग्या कीती जे इस घमण्डी राजे गी जरूर

दण्ड देड । इस जेड़ी वेज्जती कीती ऐ ते मित्तर भाव गी ठुकराया ऐ एदी सजा जरूर देड । ओ नौकरी दी तलाश करदे हस्तनापुर आई पुज्जे । किश दिन अपने साले कृपाचार्य दे घर रे ।

इक दिन राजकमार शहरा बाहर खिन्नू खेडा करदे हे । खेडदे खेडदे ओ खिन्नू ते युधिष्ठिर दी डूठी दमें चीजां खूऐ इच डिग्गी पईयां । सारे खूऐ दी मण्डेरै परा भांकन लगे । डूठी निर्मल पानी इच चमकदी लब्दी ही । पर ए निकलै कियां—कोई थौह नईं आवै दा हा । उनें ध्यान नईं कीता इक काला नेआ ब्राह्मण उनें गी दिक्खा दा ते मुस्करा दा हा ।

जिसलै उन उनेंगी कुआलेया राजकमारो । तां ओ हरान होईऐ उसी दिक्खन लगे । उस आखेया—“तुस भरत दे बीर कुलै चा ओ । शस्त्रबिद्या दा माहर कोई बी ए खिन्नू बाहर कड्डी सकदा ऐ । आखो ते अऊं कड्डी देयां ।”

युधिष्ठिर होर हस्सन लगे ते मखौलै आखन लगे—ब्राह्मण महाराज । जे तुस खिन्नू कड्डी देओ तां तुसें गी कृपाचार्य हुन्दै धाम खलागे । द्रोणाचार्य होरें इक तीला लेया मन्तर पढ़ेया ते तीर बनाइऐ खूऐ इच मारेया । ओ तीला सिद्धा खिन्नू गी जाइयै लग्गा । फी उनें उप्परो तली कईं तीले सुट्टे ते इक संगल जनेई बनी गई । द्रोणाचार्य होरें खिन्नू बाहर कड्डी दित्ता ।

सारे राजकमार चर्ज करन लगे ते बड़े खुश होऐ । आखन लगे “डूठी बी कड्डी देओ । उनें इक तीर लेया कमाना उप्पर चाढ़िऐ मारेया । ओ सिद्धा डूठी दे बिच गै गेया । तीर परतिये आया ते कन्ने गै डूठी बी आई गई । ब्राह्मण द्रोणाचार्य नै मुस्करान्दे ओ डूठी राजकमारें गी दई ओड़ी ।

ए कर्तव दिक्खियँ राजकमार बड़ा चर्ज करन लगे । उनें आखेया—“महाराज अस तुसें गी मत्था टेकनेआं । तुस कुण ओ ? अस तुन्दी के सेवा करी सकनेआं ? असेंगी हुकम करो ।” सारें उनेंगी मत्था टेकेया ।

द्रोणाचार्य होरें आखेया—“तुस भीष्म हुन्दे कोल जाओ ।
उन्दे कशा पता लग्गी जाग । उनें गी पता ऐ अऊं कुण आं ।”

राजकमारें जियां हुलिया दस्सेया भीष्म होर पशानी गे जे ए
ब्राह्मण प्रसिद्ध धनुषधारी द्रोणाचार्य गै न । उनें सोचेया जे कौरवें
ते पाण्डवें गी अस्त्र बिद्या सिखाने गित्ता ए सारें कशा काबल गुरु न ।
भीष्म होरें उनें गी सही भेजेया—उन्दा बड़ा स्वागत कीता ते शस्त्र
बिद्या सिखाने गित्ता रक्खी लैता ।

जिसलै कौरव ते पाण्डव शस्त्र बिद्या बिच माहिर होई गे तां
द्रोणाचार्य होरें दुर्योधन ते कर्ण गी भेजेया जे राजे द्रुपद गी कैद करियै
लई आओ ते माढ़े सामने पेश करो । गुरु हुन्दी आग्या दा पालन
करो । ओ गये पर कम्म तोड़ नई चढ़ेया । फी द्रोणाचार्य होरें
अर्जुन गी ए कम्म करन भेजेया । अर्जुन द्रुपद कन्ने जुद्ध कीता,
हराया, उसी ते नुआढ़े मन्तरी गी कैद करिए लई आया ते द्रोणाचार्य
हुन्दे सामनै पेश कीता ।

द्रोणाचार्य होर मुस्कराये ते आखन लगे—महाराज ! तुस
बड़े बड़े राजे ओ ! तुन्दी जिन्दू गी कोई खतरा नई पजाड । अस
निक्के हुन्दे किट्टे पढ़े हे पर तुसें गी चेत्ता गै नई रेआ । ते तुसें मेरी
बेज्जती कीती । तुसें आखेया—इक राजा गै राजे दा दोस्त होई
सकदा ऐ । में थुआड़ा राज जित्ती लैता ऐ । हुण अऊं राजा आं ।
फी बी अऊं तुसें गी मित्तर मिथनां । ते ए सारा राजा जेका इसलै
मेरा ऐ, एदे चा अद्धा तुसें गी दिन्नां । तुन्दी धारणा ऐ ज दोस्ती
बरोबरी आलें इच गै होई सकदी ऐ । हुण अस बरोबर होई गे
अद्धा राज मेरा ते अद्धा तुन्दा ।”

द्रोणाचार्य होरें सोचेया जे द्रुपद नै जेड़ी बेज्जती कीती ही
ओदा बदला चुक्की गया । उनें द्रुपद गी छोड़ी ओढ़ेया ते मान
पूर्वक बिदा कीता ।

द्रुपदै दा मान ते त्रुट्टा पर बदला चकाइए घृणा नई मुकदी ।
होर चीजां भायें भुल्ली जान पर मनै गी जब लग्गी दी कदे नई

विस्सरदी । द्रुपदै दे मनै इच द्रोणाचार्य हुन्दे प्रति नफरत ते बदला
 लैने दी गल्ल रड़कदी रौन्दी ही । राजे ने बड़ा तप कीता । बड़े
 बर्त रक्खे । जग कीत्ते ते देवतें गी प्रसन्न कीता जे नेए पुत्तरै दा
 बरदान देओ जेड़ा द्रोणाचार्य होरें गी खत्म करी ओड़ै, नेई धी देओ
 जेड़ी अर्जुनै कन्ने ब्होए । ओदी तपस्या पूर्ण होई । उन्दे घर
 धृष्टद्युम्न नां दा पुत्तर जम्मेया जिन्नै कुरुक्षेत्र दे बड्डे जुद्ध इच
 पाण्डवें दी सेना दी कमान कीती ते जिसलै समां आया ते नेए हालात
 बने उस बेल्लै द्रोणाचार्य हुन्दा सिर बड्डी ओड़ैया । नई ते
 द्रोणाचार्य होरें गी कुण जित्ती सकदा हा ।

राजे दी धी द्रोपदी होई जेड़ी पाण्डवें दी रानी बनीं ।

०००

लाखा मैहल

भीमसैन दा बल ते अर्जुनै दी चतराई दिक्खी २ दुर्योधन बड़ा सड़न लगा । कर्ण ते शकुनी दुर्योधनै दे साथी बनी गे ते कमत्तां देन लगे । ए चण्डाल चौकड़ी खतरनाक स्कीमां बनान लगी । धृतराष्ट्र आपूँ ते चंगा हा, अपने भ्राऊ दे जागते पाण्डवें गी प्यार बी करदा हा, पर लौके जिगरे दा हा ते अपनी लुआदू गी मता चान्दा हा । जिसलै अपने पुत्तारें दी गल्ल आवै तां उसी मन्दी गल्ल बी चंगी बभोन्दी ही । ते कई बारी जानी बुज्जिरे करस्तै पौन्दा हा ।

दुर्योधनै पाण्डवें गी मारी मकाने दे बड़े जतन कीते । महात्मा विदुर होर नईं हे चान्दे जे कुलै इच नेआ नर्थ होऐ । उने पाण्डवें गी गुह्ज्जी मद्दत कीती ते बचारे सम्में सीने जिन्द बचाइयै निकली गे ।

दुर्योधनै दी नजरी इच पाण्डवें दा सारें कशा बड़ा दोष ए हा जे हस्तनापुरै दे लोक सामनै सामनै उन्दियां तरीफां करदे हे ते

हर बेल्लै आखदे रौन्दे हे जे युधिष्ठिर गै राजा होने जोग ऐ । ओ किठ्ठे होइऐ बैहसदे रौन्दे हे । धृतराष्ट्र ते राजा होई नईं सकदा, की जे ओ अन्ना ऐ । हुण पता नईं ओ की राजै गी जप्पी मारी बैठा दा ऐ । भीष्म बी राजा नईं होई सकदे, की जे ओ सच्चे सुच्चे आदमी न ते कन्नै उने सगन्ध चुक्की दी ऐ जे राजा नईं बनड । इस करी युधिष्ठिर गी गै राजतिलक थोआ लोड़चदा ऐ । ऊऐ कुरु बैसै गी ते राजै गी चंगी चाली टोरी सकदे न । ईऐ गल्लां चवक्खी हुन्दिया रौन्दियां हियां । ए गल्लां दुर्योधनै गी बड़ा जहर लगदियां हियां । ओ बड़ा कुढ़दा हा ते ईखा कन्नै सड़दा हा ।

ओ धृतराष्ट्र हुन्दे कोल गया ते शकैत करिए बुहासरन लगा—
बापू जी ! पता नईं ए लोक जे मुंह आया बकदे रौन्दे न । नां उनें गी भीष्म हुन्दी इज्जत ऐ नां गै तुन्दी । ओ आखदे न युधिष्ठिर गी भटपट राज देओ । ईआं ते अस मरोई जागे । तुसें गी राजगद्दी नईं ही थोई की जे अक्खीं थमां रेहूत हे । तुन्दा आ राजा बनेया । हुण जे युधिष्ठिरै राजगद्दी साम्भनी ऐ तां अस कुत्थे गे ? साढ़ी लुआदै दा के बनेया ? युधिष्ठिरै पिच्छुआं ओदा पुत्तर, फी पोत्रा ते फी ओदे पड़ोत्रे चड़ोत्रे राज साम्भना ऐ । अस ते शड़े उन्दे मथाज साक नाते रई जागे । उन्दे दुगड़ें उप्पर पलने आले । नेए जीने थमां नर्क चंगा ।

धृतराष्ट्र ए सुनिए सोचें पई गया । आखन लगा—गल्ल ते थुआड़ी सच्च ऐ । युधिष्ठिर सचाई थमां कदे नईं फिरकदा । ओ सारे कन्नै प्रेम करदा ऐ । ओदे इच बब्बै दे सारे गुण न । लोक ओदी तरीफ करदे न । ओदी मदत करदे न । राजै दे सारे मन्तरी ते सैना दे सदारि ओदी पिठ्ठु दिन्दे न । पाण्डुनै अपने उच्चे चरित्तर ते बर्ता कन्ने उनें गी जित्ती लैता दा ऐ । ओ ते हुण युधिष्ठिरै दा गै साथ देडन । जित्थुं तोड़ी लोकें दा तल्लक ऐ ओ ते युधिष्ठिरै गी देवता करी पूजदे न । उन्दा बरोध करिए

असैं गी सफलता नई मिली सकदी । ते जे अस बेन्याईं करचै तां लोक साढ़े खलाफ भड़की उठडन । जां ते असैं गी जीएं मारी ओड़डन जां देसा बाहर कड्डी देडन । असैं गी नमोशी ते नरादर गै थोग ।

दुर्योधनै जबाब दिता—नेआ डरने दी गल्ल नईं । बड़ा बी माड़ा होग तां भीष्म होर कुसै बक्खी नईं होडन । अश्वत्थामा माड़ा भगत ऐ । उस करी नुआड़ा बब्ब द्रोणाचार्य ते मामा कृपाचार्य साड़ी बक्खी गै होडन । विदुर होर खुल्लिए बरोध नईं करी सकदे । उन्दे कोल बरोध करने दी शगती गै नईं । पाण्डवें गी भटपट बरणावत भेजो । अऊं धमें कन्ने ग्लानां जे मेरे कशा होर नईं जे जरोन्दा । मेरा कालजा फटदा जे । मिकी नीन्दर नईं पौन्दी ते हर बेल्लै जी धुखदा रौन्दा ऐ ।

पाण्डवें गी बरणावत भेजने परैन्त अस अपनी पार्टी गी मजबूत करी लैगे ।

किश चिरै परैन्त होर कई राजनीति दें खडारी दुर्योधनै बक्खी होई गे ते धृतराष्ट्र गी सलाह मत्तां देन लगे । शकुनी दा मन्तरी कणिका उन्दा लीडर हा । ओ धृतराष्ट्र गी समझान लगा—“महाराज ! पाण्डवें कशा बचियै रवेओ । उन्दा असर रसूख बधने कन्ने तुसैं गी खतरा ऐ । तुन्दी लुआदू गी खतरा ऐ । पाण्डव थुआड़े भ्राऊ दे जागत न । शरीक जिन्ने गै कोल होन उन्ने गै खतरनाक ते माड़े हुन्दे न । ओ बड़े तगड़े न ।” ओ फी समझान लगा—“माढ़े उप्पर रोह नईं करेओ । अऊं सच्ची गल्ला ग्लानां । जेडा नां बड्डा होए ओडे कम्म बी बड्डे कीते लोड़चदे । लोक ताकत तां गै मनदे न जे ताकत दस्मी जा । राज दे मामले गुज्जे रक्खे लोड़चदे न । चंगी गल्ल उस्सै लै कड्डनी जिसलै ओ करिए दस्सनी होए । बुराई गी भट भेठा मारेया लोड़चदा ऐ । कण्डा तडी जा ते पिण्डे इच गै रवै तां नसूर बनी जन्दा ऐ । ताकतवर शत्रु गी खतम करना चाही दा ऐ । कमजोर

शत्रु पासै बी लापवाही नईं करनी चाही दी । ध्यान नईं देओ तां इक चिंग्याड़ी सारा बन फूकी ओड़दी ऐ । ताकवर शत्रु गी चाल चलिए खतम करना चाही दा ऐ । ओदे उप्पर देया करना ते बड़ी भारी मूरखता ऐ । ए पाण्डव बड़े बलकारी जे । इन्दे थमां खबरदार गै रवेओ ।

दुर्योधनै धृतराष्ट्र गी दस्सेया जे उस मते साथी बनाई लैते न । आखन लगा—में मान बड़याइआं दइयै ते बकशीशां बण्डियै पाण्डुयें दे मन्तरी ते सैनापति अपने कन्ने करी लैते न । ओ हुण साढ़ा पक्ख करडन । इसलै जेकर तुम चतराई कन्ने पाण्डवें गी बरणावत जाने गित्तै मनाई लौ तां सारा नग्गर ते सारा राज साढ़ा पक्ख देग । इत्थें उन्दा इक बी मित्तर नईं रौग ।

इक बारी राज साढ़ा होन देओ फी ओ असैं गी नकसान नईं पजाई सकडन । फी अस उनें गी परतिऐ औन बी नईं देगे ।

धृतराष्ट्रै दी बिच्चा दा मरजी ते ईऐ ही ते जिसलै मते लोक इस्सै चाली आखन लगे ओदा मन डोली गया । ओ अपने पुत्तरें दे आखे लग्गी गया । हुण शड़ा स्कीमै उप्पर अमल करना गै बाकी रेई गया । मन्तरी लोकें बरणावत दियां तरीफां करनियां शुरू करी दित्तियां । इयां गल्लां करन जे पाण्डवें दे कन्ने इच बलेल पवै । आखन लगे—बरणावत च बड़ा भारी उत्सव होना ऐ । पाण्डवें दे मनै इच ते किश है नईं हा ओ मन्नी गे खासकर जिसलै धृतराष्ट्र होरें बड़े लाडं कन्ने उनें गी आखेया जे तुस उत्सवै उप्पर जरूर जाओ की जे ओ दिक्खने जोग ऐ । उत्थुआं दे लोक तुसें गी बड़ा चान्दे न ते तुन्दा स्वागत करडन । पाण्डव गल्लें इच आई गे ते भीष्म हुन्दे कशा ते बड़ु बड़ेरें कशा जाजत लइयै बरणावत गे उठी ।

दुर्योधन बड़ा पसोआ । उस कर्ण ते शकुनी कन्ने रलियै साजश बनाई जे कुन्ती ते पाण्डवें गी बरणावतै इच खतम कीता

जा । उनें पुरोचन मन्तरी गी सद्दी भेजेया । आया तां उसी गुज्जियां हृदायतां दित्तियां । उस वचन दित्ता जे अऊं कम्म तोड़ चाढ़ड ।

पाण्डवें दे बरणावत पुज्जने थमां पहलै पुरोचन उत्थें अगगें गै जाइ पुज्जा ते जियां उसी हृदायतां दित्ती दियां हियां उस पाण्डवें दी रिहायश ते स्वागतै गित्तै इक बड़ा शैल मैह्ल तैयार करी ओड़ेया । मैह्ल बनाने इच तौली अगग पगड़ने आले मसाले सन, लाख, ते घ्यो तेल ते चरबी आदि पाये । जिस मसाले दा प्लस्तर कीता ओ बी तौले अगग पगड़ने आला हा । मैह्ले दे कई हिस्से इच उस सुक्कियां भनट्ट चीजां रक्खी दित्तियां जे इक दम गै अगग पगड़ी लैन । जिने थाए उप्पर बड़ी गै तौली अगग लगी सकदी ही, उत्थें सौने गित्ते बड़े शैल बिस्तरे बछाई दित्ते । हर किस्म दा सुख पजाने आला बन्दोबस्त करी दित्ता जे पाण्डव शहरै इच सुखै कन्नै ते रमानै कन्ते रौन । कोई डरै आली जा शक्कै आली गल्ल नई होनी दित्ती । स्कीम ए ही जे जिसलै पाण्डव इस लाखा मैह्लै इच रौन लगी पौडन तां कुसै रातीं मैह्लै गी अगग लाई ओड़गे । ओ सुत्ते दे गै जली जाडन । जिस चाली उन्दा स्वागत कीता ते खातरां कीतियां लोकें गी शक्क गै नई होग जे ए कोई साजश ही । सारे ईऐ समझडन जे सैभन अगग लग्गी ते इस दुर्घटना इच पाण्डव जली गे । कौरवें गी कौई दोश नई लाग ।

०००

पाण्डव बची निकले

बड़े बड़े दे पैर बन्दियै, जाजत लइयै ते साथियों दे गलें
लगियै पाण्डव बरणावत पासै चली पे । शहरदार किश बता
कन्ने २ गे । मरजी ते नईं हे पर परतोइए शहर आई गे । बिदुर
होरें शारें कन्ने युधिष्ठिर गी समझाई ओड़या । ए शारे इक राजा
गै समझी सकदा हा । उनें ग्लाय—

“खतरे थमां उऐ बची सकदा ऐ जेड़ा चलाक शत्रु दी चाल
पहलें गै ताड़ी जा । फलादी शस्त्रें कोला तेज शस्त्र बी हुन्दे न ।
ते जिस स्यानै मनुक्खै उन्दे कशा बचना होऐ उसी उन्दे थमां बचने
दे तरीके आये लोड़चदे न । डौ जेड़ी सारा जंगल फूकी
टकान्दी ऐ ओ उस चूहे गी नईं मारी सकदी जेड़ा रुड़ी इच बड़ी
जन्दा ऐ । स्याना आदमी अपने ग्रह दिक्खियै बचा दे तरीके कहु
लैन्दा ऐ ।

ए गल्ल उनें शड़ी युधिष्ठिर गी गै इक्कले समझाई । ए

दुर्योधनै दी गुज्जी चाल ही जेड़ी उनें युधिष्ठिर गी समझाई ओड़ी ते बचने दा लाज बी दस्सी ओड़ेया ।

युधिष्ठिर होरें ग्लाया जो ओ गल्ल समझी गे न । उनें ए गल्ल कुन्ती गी सनाई । ठुरदे बेल्लै ते निम्बल हा पर पैण्डे पे दे गास घनोई गेआ । खुशी दे गासै उप्पर चिन्ता दे डिगल आई चढ़े ।

बरणावत दे लोकें पाण्डवें दे औने दी खबर सुनी तां बड़े खुश होए ते स्वागत करन गे । किश चिर दूएँ घरें च बसोए ते जिसलै मैहल तयार होई गया तां पुरोचन उनें गी उस मैहलै च लई गया । इस मैहलै दा नां रखेया हा 'शिवम्' जेदा अर्थ हुन्दा ऐ कल्याण पर जिसी मौती दा पिजरा बी आखदे न । युधिष्ठिर होरें सारे मैहलै गी भलेयां धरोइयै दिक्खेया, बिदुर हुन्दी सिक्ख चेतं कीती । उनें गी बिन्द बी शक्क नई रेआ जे ए मैहल अग लगी जाने आले मसाले दा बने दा ऐ । युधिष्ठिर होरें भीमसेनै गी दस्सेया—ए मैहल साढ़े गित्तै मौती दा पिजरा ऐ ।

पर पुरोचन गी सिर नई होन देओ जे असें गी ओदी साजशै दा पता लगी गया ऐ । असें गी ऐन मौके उप्पर इत्थुआं खिस्की चलना लोड़चदा ऐ । पर जे शक्क कीता तां इत्थुआं नस्सना मुश्कल होई जाना ऐ ।

ओ उस मैहलै इच टिकी गे । उनें पुरोचन गी जां होर कुसै गी सिर नई होन दित्ता जे उनें गी पता लगी गेदा ऐ । उनें कोई चिन्ता नई प्रकट होन दित्ती । इन्ने चिरै इच बिदुर होरें इक सुरङ्ग खोत्तरने आला भेजेया । ओ युधिष्ठिर होरें गी चोरिया मिलिया । आखन लगा “भेरो वाकफीयत आस्तै तुस बिदुर हुन्दी गुज्जी गल्ल चेतं करी लौ । मिकी उनें तुन्दी रखेया गित्तै भेजेया ऐ ।”

उसै बेल्लै उस चोरिया कम्म शुरु करी दित्ता ते किन्ना चिर गै करदा रेआ ।

पुरोचनै गी सिर होन दित्ते बगैर उस भुजा दे हेठ लाखा मैह्ल थमां बाहर निकलने गित्ती इक सुरङ्ग बनाई ओड़ी । ओ लाखा मैह्ल दिये कन्धें ते खाई दे हैठोहेठ बाहर निकली जन्दी ही ।

पुरोचनै अपनी रिहायश मैह्ले दे बाहरले दवाजि कोल रक्खी दी ही । पाण्डव रातीं शस्तर लइऐ पैहरा दिन्दे हे ते दिनें शकार खेडने दे पज्जे जंगलै इच जन्दे उठी हे ईयां ओ जंगलै थमां बाहर निकले दे रस्ते दिक्खी आन्दे हे । अपनी जिन्दू दे खलाफ साजश उनेंगी पता ही पर उनें इस गल्लै दी भिस्क नईं निकलन दित्ती । अपने पासेया पुरोचन बी शक्क नईं हा पौन देना चान्दा । ओदी मरजी ही—ईयां होऐ जे अगगी सैभन ते चानचक्क गै लग्गी गई ऐ । ईयां बलगदे उसी इक बरा बीती गया ।

आखर पुरोचनै सोचेया जे बलगदे मता गै चिर होई गया ऐ । युधिष्ठिर होरें गी सू लग्गी गई जे औखा मौका आई गया ऐ । उनें सारे भ्रायें गी सद्देया ते आखेया जे निकलने दा मौका ईऐ जे । नईं ते कदे नईं निकलन होना ।

कुन्ती होरें इक बड्डी भारी धाम कीती । उनें सोचेया जे नौकर चाकर रज्ज मारियै खाडन ते खूब धूक सौडन ।

अद्वी रातीं भीमसैनै मैह्ल दे इक हिस्से गी अगग लाई । कुन्ती ते पाण्डव आ तौले तौले सुरङ्ग आले रस्तै न्हरे इच बत्त तलोफदे बाहर निकली गे । सारे मैह्लै इच अगग मकी उठी । डरे दे लोक मैह्ले दे चवक्खी हराने होऐ दे खडोते दे हे । बचारे रोन कलान पर पेश किश नईं जा । कइयें अगग स्हालने दा जतन कीता पर के होई सकदा हा । अगग नईं बुज्झै । बचारे रोन बुहासरन लगे—मन्दे भाग ! ए दुर्योधनै गै पाप कमाया ऐ । बचारे मसूम पाण्डवें गी जीयें मारी बेठा ऐ ।” मैह्ल ते ठण्डोई गया । फक्का नईं बचेया । पुरोचनै द कमरे गी बी अगग लग्गी उस थमां निकलन नईं होआ ।

कन्ने गै फकोई गया । अपनी साजशै दा आपूं गै शकार बनी गया । सारें आखेया खरा होआ । बरणावत दे लोकें हस्तना-पुर ए स्नेआ भेजेया—पाण्डवें दे रौने आला मैह्ल फकोई गया ऐ । कोई जीन्दा नई बची सकेया ।

व्यास होरें धृतराष्ट्र दी मनै दी हालत खूब दस्सी दी ऐ—
“जियां झूगी नदी दा जल हेठ ठण्डा ते उप्पर उप्पर किश कोसा हुन्दा ऐ ईआं गं धृतराष्ट्र बिच्चा खुश ते उप्परा बड़ा बसोस करन लगा ।

धृतराष्ट्र ते ओदे पुत्तरें दर्बारी पशाकां तुआरियां ते सोगी टल्ले लाई ले । उनें समझी लैता जे पाण्डव फकोई गे न । उनें सोगी टल्ले लाये ते नदी उप्पर पानी देन ते तर्पण करन गे । उनें ईआं गै जाहर कीता जे उनें गी बड़ा दुःख होआ ऐ । ते सारा किरियाकर्म कीता ।

कईं लोकें दिक्खया जे बिदुर होर इन्ने दुःखी नईं होए । फी उनें सोचेया जे बिदुर होर साधु महात्मा ग्यानी पुरुष न इस करी दुःख नईं करदे । पर बिचली गल्ल ए ही जे उनें गी सेई हा जे पाण्डव सम्मे सीने निकली गे दे न । जिसलै कुतै दुआस सेई हुन्दे हे उसलै ओ दरअसल पाण्डवें गी जंगलें इच भस्सड़ पान्दे दिखदे हैं । ओ नजारा उन्दी नजरी सामनै औन्दा हा । भीष्म होरें गी बड़े दुःखी दिक्खियै उनें चोरी नेऐ दस्सी ओड़ेया जे पाण्डव इस साजशै इच कामयाबी कन्ने निकली गे दे न ।

भीमसैन होरें दिक्खेया जे माता कुन्ती ते आ जगराते करी करी ते फिरै कन्ने फामें होई गे न । उस माऊ गी कन्हाड़े चुक्केया ते नकुल सहदेव गी मूढ़ चुक्की लैता । ते हत्थें कन्ने युधिष्ठिर ते अर्जुन गी सहारा दित्ता । ईआं भार चुक्के दे ओ जंगलें इच ईआं जादा हा जियां मस्त हाथी धुस्स दिन्दा ते भूडें बूटें गी ताईं तुआईं भन्नदा अगे बददा जन्दा ऐ । कोई चीज नुआड़ा रस्ता नईं ही रोकी सकदी । जिसलै ओ गंगा दे कण्डे पुज्जे तां

इक किस्ती तयार ही । उस मलाह गी उन्दा भेत पता हा । उनें न्हेरै न्हेरै नदी पार कीती ते जंगलै इच ठुरी गे । रातो-रात गै उनें जंगल टप्पेया । रातीं दे न्हेरे दे कम्बलै दी बुक्कलै इच बड़े दे लब्दे हे । गिट्ठे दे हुआंकने ते जंगली जानवरें दे रौले कन्ने बन बड़ा भयानक लगदा हा । आखर ओ हुट्टिए चूर होई गे । ते बई गे । त्रे कन्ने बतेह होन लगे ते हुट्टने करी भोकां औन लगियां । कुन्ती आखन लगी—हुण भायें धृतराष्ट्र दे पुत्तार आनियै फगड़ी बी लैन में ते लेटन लगी आं । ओ भुआं लेटी ते लेटदे गै धूक नीन्दरा पई गई । भीमसैन प्लेचदार भाड़ियें चा लंघदा ते पानी तुपदा तुपदा इक भीलै कण्डे पुज्जा । उस अपना कुर्ता तुआरेया, कमल पत्तारें दे डूने बनाये ते मौरी गित्तं ते भ्रायें गित्ते पानी आन्दा । ओ त्राये दे फड़कन लगे हे । ते जिस लै बाकी सारे गूढ़ी नीन्दरै इच पई गे ते दुख ददें दा कोई ध्यान नई रेआ भीमसैन उत्थें बेठा दा डूगियें सोचें पई गया ।’

ए जंगलै दे बेल-वूटे आपूँ इच कियां समोधै कन्ने रवा दे न । ए दुष्ट धृतराष्ट्र ते नुआड़े पुत्तार साड़ै पिच्छें की पेदे न ? भीमसैन आपूँ निष्पाप हा । उसी दूएँ दे मनै इच उज्जने आले पापै दा कारण नईं सेई होआ । बचारा दुखें इच डुब्बी गया ।

पाण्डव कष्ट कटदे ते दुःख जरदे ते खतरें चा लंघदे अगें ठुरदे गे । रस्ते इच कदें ओ माऊ गी कन्हाड़ै चुक्की लैन, ते तौली गें पुट्टी लेन । ते कदें मते हुट्टी जान तां बसोई लैन । कदें जुआनी दा लुआरा आवै तां इक दूएँ कन्ने दौड़ बी लाई लैन ।

रस्ते इच उनें गी बेद ब्यास जी मिले । सारें उन्दे चरण बन्दे । ब्यास जी नै उनें गी सहारा दित्ता ते हौसला बधाया ।

जिसलै कुन्ती नै अपने दुःख सनाये तां उसी उनें ईआं दलासा दित्ता भलामानस आदमी सदा सुखी गै रौग, ते पापी म्हेशां दुःखी गै रौग नईं गल्ल नईं । जिन्दगी ते सुखें दुःखें दा ताना बाना

ऐ। दुनियां इच ऐसा कोई नईं जिस पुन्न ते पाप नईं कीता
होऐ। हर इक गी अपने कर्म दा चंगा जा मन्दा फल भोगना गै
पौन्दा ऐ। दुखी होने दा कोई लाह नईं। वेदव्यास हुन्दे आखे
मूजब पाण्डवें ब्राह्मणें दा भेस धारेया ते 'एकचक्र' नां दे नगरै गी
दुरी गे। इक ब्राह्मणै दे घर जाई डेर लाया ते चंगे दिनें गी
बलगन लगे।

०००

बकासुरे दा चण्डाथाप्पा

‘एकचक्र’ नां दी नगरी इच पाण्डव ब्राह्मणें दा भेस बदलिये रौन लगे । गलियें कूचें इच जाइयै भिखेया मंगदे ते माऊ कोल लई औन्दे । ओ हीखी लग्गी रौन्दी ही जे कुसलै परतोन्दें न । ते जे समें उप्पर कदें नईं पुज्जन तां माऊ दा कालजा धक होई नन्दा हा किश पद्रो ते नईं होई गया ।

जे किश भोजन ओ मंगी आनदे हे कुन्ती उसी दौं हिस्सें इच वण्डदी ही । अद्धा भीमसैनै गी, ते बाकी चौनें भ्रायें ते कुन्ती आस्ते हुन्दा हा । भीमसैन बायुदेवता दा पुत्तर हा ते बेसम्भ बल रखदा हा । उसी भुक्खी बी बड़ी लगदी ही । ओदा इक नां बृकोदर ए जेदा अर्थ हुन्दा ऐ भग्याडै आडू ढिडू आला । भग्याड उप्परा दा गै भुक्खा लबदा ऐ ते भायें किन्ना खा ओदी भुक्ख नईं चुकदी । ईआं गै भीमसैनै दी भुक्ख नईं ही चुकदी । “एकचक्र” नगरी इच रौन्दे गल्ल बनदी नईं ही । भीमसैन लिस्सा होन

लगा । माऊ गी ते भ्रायें गी मती चिन्ता होन लगी । भीमसैन इक घम्यारै गी मिलेया ते बाकफी होई गई ।

भीमसैनै ओदे गित्तै मिट्टी पुट्टियै आनी दित्ती । घम्यारै उसी एदे बदले इच इक बड़ा बड्डा घड़ा दित्ता । महल्ले दे जागतें गित्तै ओ इक तमाशा ते खेड़ होई गई ।

इक दिन बाकी भ्रा भिखेया मंगन गये, भीमसैन माऊ कोल घर रेआ । उन्नै सुनेया घरै आलेंदेया रोने दी बड़े बड़े जोरै दी बाज औन लगी । उने सोचेया गरीब ब्राह्मणें दै पता नई के विपता पेई ऐ । कुन्ती उट्टी ते पुच्छन गई । ब्राह्मण ब्राह्मणी इन्ने रोआ दे हे जे बोलन गै नई होऐ । आखर ब्राह्मण अपनी लाड़ी गी आखन लगा—तू बड़ी बदकिस्मत ते मूरख एं । अऊं तुकी मते बारी आखदा हा भलिए लोके चंगा इऐ जे इस नगरी गी छोड़ी चलचै । पर तू नई मन्नेया । तू आखें अऊं इत्थें गै पली—में प्योके गै रौनां, रिखें नातें कोल गै रौनां । हुण अऊं तुकी कियां खुहाई ओड़ां । अऊं ए गल्ल सोची गै कियां सकनां । तू मेरी जीवन साथन, मेरे बच्चे दी मा, तू ऐ मेरा सब किश एं । ए कियां होई सकदा ऐ जे तुगी मौती दे मुंह भेजी ओड़ां ते आपू जीन्दा रवां । हुण परमेसरै मसां घाली इक धी दित्ती ऐ । धी इक मानत हुन्दी ऐ । ओ कुसै जोग वरै गी सौंपनी हुन्दी ऐ । ए परमेसरै दी देन हुन्दी ऐ । ए बैन्स बधाने आली हुन्दी ऐ । इसी कियां बली चाढ़ी ओड़ां । ईआं गै दूआ ए साढ़ा पुत्तर ऐ । इसी बी नई मवान हुन्दा । ईऐ ते साड़ी जिन्दगी दी शान्ति ऐ । ते दुरेडे समैं दी हीखी ऐ । ए मरी जा तां पितरें गी ते असैं गी पिण्ड कुण देग ? हुण के करां ! उसले तू माढ़ी गल्ल नई सुनी ते ए थुआड़ी जिददूदा नतीजा ऐ । जे अऊं मरनां तां ए कुड़ी ते जागत बी मरदे न, की जे इन्नै गी पालने आला पिछें कुण ऐ ? हुण करां ते करां के ! सारे कोला चंगा ईऐ जे अस सारे गै किट्टे मरचै । ब्राह्मण रोन ते डुस्कन लगा ।

ब्राह्मणी बोली—प्रऊं थुआड़ी नेक धर्म पत्नी आं । में थुआड़े धी ते पुत्तर जम्मिऐ अपना फर्ज नभाया ऐ । तुस जागतें दी पालमा करी सकदे ओ अऊं नईं करी सकदी । जियां नषिद्ध मासै उत्पर इलां पौन्दियां न ईयां गै बिधवा जनानी बदमाशें ते बदनीतें हत्थ चढ़ी जन्दी ऐ । कुसै टल्ले गी थिन्द लग्गे दा होऐ तां कुत्ते उस पर लड़ी पौन्दे न । इक तुआईं दा खिचदा दूआ ताईं पासै खिचदा, ते लालचै इच कपड़ा लीरां लीरां होई जन्दा ऐ । ईयां गै बेस्हारा जनानी जेदे सिरे पर कोई नईं होऐ बदमाशें गित्तौ खेड़ होई जन्दी ऐ ।

अऊं दौं जतीम जागतें गी कियां पालड । ओ ते सुक्के तला इच्चे मच्छियें आडू फतकी जाडन । इस करी चंगा ए ऐ जे राकशै कोल अऊं जन्नी आं । ओ इस्तरी बड़ी धनभाग ऐ जेड़ी पति दे जीन्दे जी मरी जन्दी ऐ । ईऐ गल्लां शास्तर ग्लान्दे न । मिकी बिदा करो । माढ़े बच्चें दा ख्याल रखेओ । अऊं तुन्दे कन्ने बड़ी सुखी रई आं । में कई पुन्न कारज बी कीते न । तुन्दी भगती कारण मिकी सुर्ग थोई जाना ऐ । जेड़ी नेक धर्म पत्नी रई होऐ उसी मौती दा कोई डर नईं । माढ़े पिच्छुआं दूआ ब्याह करी लैयो । हुण मिकी हस्सियै खुश करी ओड़ो । अपना शीर्वाद दइऐ मिकी राकशै कोल टोरी ओड़ो ।

अपनी लाड़ी दे ए शब्द सुनिऐ ब्राह्मणै उसी गलें लाया । ओदे प्रेम करी एडा आत्तर होआ जे जातकै आडू फुटिऐ रोन लगा जिसलै बाणी खुल्ली तां आखन लगा—ओ प्यरिए ते भलिए लोके । ए तू के आखनीं एं । अऊं थुआड़े बगैर जीन्दा रही सकनां ? ब्होए दे मर्दे दा फर्ज ऐ जे ओ अपनी लाड़ी दी रखेया करे । तुगी राकशै गी सौंपिए में पाधी की बनां ? प्रेम ते फर्ज गी की छोड़ां ?

उन्दी धी जेड़ी ए बेदना आली गल्ल बात सुना दी ही डुस्कदी आखन लगी—

“भायें अऊं बच्चा गैं, पर माढ़ी गल्ल सुनी लौ ते फी जियां

चंगा बभोए ऊंआं करो । शड़ी इक अऊं आं जिसी तुस राकशै कोल टोरी सकदेओ । माढ़ी इक दी बल दइये तुस बाकी सारें गी बचाई सकदे ओ । इस बिपता दी नदी गी तरने गित्तै मिगी किशती बनन देओ । जे तुस दोए मरी गे तां साढ़ी दौनें दी—माढ़ी ते माढ़े लौके भ्राऊ दी रखेया कुण करग ? अस ते इस कठोर दुनिया इच तौले गे मरी जागे । जे मेरे इक्कली दे मरने कन्ने बाकी सारा टब्बर बची जा तां नेई मौत कोला होर चंगी मौत केड़ी होनी ऐ ? जे तुस शड़ी मेरी भलाई गै सोचदे ओ तां तुस मिकी राकशै कोल टोरी ओड़ो ।”

धियु दियां कोमल गल्लां सुनियै उनें उसी गलें लाया ते रोन लगे । उनें सारें गी रोन्दे दिखियै उन्दा जागत जेड़ा हब्रे अत्त गै जाना हा तोतली बाणी कन्ने आखन लगा ।

ओदी अक्खीं च चमक ही । “बापू जी तुस नईं रो, मां जी तुस नईं रो, बोबो जी तुस नईं रो, ते बारी बारी उन्दी गोदे इच बेठा । फी उट्टेआ ते चुल्ली दा मुआठ चुक्केया ते घमाइयै फेरन लगा ते मसूम बाणी कन्ने आखन लगा—अऊं इस डांगा कन्ने राकशै गी मारी ओड़नां ।

जागतै दे ईआं करने उप्पर उनें रोन्दे गी बी हासा आई गेया । पर फी ओ मते दुखी होए । ठीक उस बेले कुन्ती देवी उत्थें आई ते पुच्छन लगी जे ए वेदन की ऐ । अऊं थुआढ़ी के मदत करी सकनीं आं ?

ब्राह्मण आखन लगा—मां जी, उस रोगै दा लाज तुन्दे कश नईं । इत्थें शहरै कोल इक गुफा इच बकासुर राकश रौन्दा ऐ । ओ बड़ा तगड़ा ऐ । तेरां बरे होए उस इस शहरं ते राजै उप्पर कब्जा करी लैता दा ऐ ते सारें दी जान तसीऐ दित्ती दी ऐ । इत्थुआं दा राजा नस्सिए ‘वेत्रप्रिया’ नगरै इच जाई बैठा दा ऐ ते ओ साढ़ी रखेया नईं करी सकदा । पहलें ए राकश गुफा चा बाहर निकलदा हा ते भुक्खा कन्ने आत्तर होने करी सारे मरदें औरतें ते बच्चें गी

मारियै खान लगी पौन्दा । शहरदार बेनती कीती जे ईआं धाड़ा मारियै नई आवा करो । किश गल्ल तै करी लौ । ईआं गै जिसलै मरजी आई जा, आइयै बहु टुक्क नई करी करो । हफते इच इक दिन अस तुन्दे गितै खूब मास भत्त, मट्टा ते शराब ते होर वस्तां भेजा करगे । ए सारियां चीजां इक बैलगड्डी इच भेजा करगे जिसी दौं बैल जोत्तारे दे होडन ते इक मनुक्ख बी बिच होग । अस हर घरा चा इक मनुक्ख देआ करगे । भत्तै कन्नै बैल बी खाई लैयो ते मनुक्ख बी । पर इस चाली आइये सारें दा कतल नई करी करो । राकशै ए गल्ल मन्ती लैती । उस दिनै थमां राकश असैं गी बाहरले हमलें थमां ते जंगली जानवरें कशा बचांदा ऐ । किन्ने गै बरे होई गे न ईआं गै बन्दोबस्त चला दा ऐ ।

हवे तोड़ी कोई बीर नई लब्बा जेड़ा इस मसीबता थमां खलासी करा । इस राकशै सारै गै बीर जिनें किश जतन कीता मारी मकाये न । मां जी, साढ़ा हकीकी राजा बी असैं गी नई बचाई सकदा । जिस देसै दा राजा पर्जा दी रखेया नई करी सकदा उत्थुआं दे लोकें ब्याह नई करना चाही दा ते नां गै बच्चे पैदा करने चाही दे न ।

इक टब्बरै दा सुखी जीन तां गै होई सकदा ऐ जे राजा चंगा ते मजबूत होऐ । ते जे राजा तगड़ा नई तां धनदौलत इस्तरी बच्चे ते होर चीजें वस्तें दी रखेया नई होई सकदी । असैं किन्ना चिर होई गया ऐ दूएंगी ए कष्ट भोगदे दिखदे ते अज्ज साढ़ी बारी आई गई ऐ । अज्ज राकशै कोल मनुक्ख साढ़े टब्बरै चा जाना ऐ । माढ़े कोल धन बी नई जे अऊं कुसै होर गी खरीदियै बदले इच भेजी ओड़ां । साढ़े चा कोई बी गया तां बाकी नई बची सकदे । इस करी अऊं सारे टब्बरै गी लइऐ चलेयां ।

तुसैं आखेया ऐ तां गल्लां सनाइयै तुसैं गी दुखी कीता ऐ । परमात्मा गै साढ़ी मद्दत करी सकदा ऐ पर असैं गी ओदी बी मेद नई रेई ।

‘एकचक्र’ नगरी दी कहानी इच जेड़ियां राजनीति दियां सच्चियां गल्लां दस्सी दियां न ओ ध्यान देने जोग न ते उन्दे च मता उपदेस ऐ।

कुन्ती ने भीमसैन कन्ने आनियै गल्ल कीती, परतियै गई ते ब्राह्मणै गी आखन लगी “भलेया लोका !” हौसला नईं ठा। परमात्मा कशा बड्डा कोई नईं। मेरे पज पुत्तर न। अज्ज राकशै कोल भोजन लेइयें उन्दे चा इक जाग।

पहलें ते ब्राह्मण हरानी कन्ने त्रपकी उट्टेया पर फी उस मुण्डी भूनी। आखन लगा अपने बदलै दुए दी बली नईं देनीं। कुन्ती आखेया—ब्राह्मण देवता—तू डर नईं। मेरे पुत्तरै कोल दिब्ब ताकत ऐ। उसी बड़े मन्तर औन्दे न, उस राकशै गी जरूर मारी ओड़नां ऐ। कई राकशें गी मारदे में उसी आपू दिकखे दा ऐ। पर ए गल्ल बाहर नईं कड्डेयां नईं तां ओदी शगती खीन होई जाग।

कुन्ती गी ए डर हा जे इस गल्लै दा रौला पेया तां दुर्योधन दे लोके ईऐ समझना ऐ जे एदे च पाण्डवें दा हत्थ ऐ ते उन्हें साड़ा पता लाई लैना ऐ।

भीमसैन गी बड़ी खुशी चढ़ी ते बड़ा जोश आया। उस मौरी दी गल्ल पूरी करनी ही। जिसलै बाकी आ भिखेया लेइयै परतोए तां युधिष्ठिर होरें दिकखेया जे अज्ज भीमसैन दे चेहरे उप्पर बड़ी लाल्ली ऐ। नेईं लाल्ली बड़े चिरें बाद लब्बी उस करी युधिष्ठिर होरें सोचेया जे अज्ज भीमसैन कोई खास कम्मै उप्पर जा दा ऐ। उन्हें कुन्ती गी पुच्छेया ते उस सारी गल्ल दस्सी ओड़ी।

युधिष्ठिर आखन लगा—ए के गल्ल होई ? ए ते बड़ै तौले दी ते बेसमझी दी गल्ल होई ऐ। भीमसैन दी ताकतै स्थारे ते अस बेफिकर होइऐ सौने आं। भीमसैन दी ताकती दे भरोसै गै ते असें अपने छली कपटी शत्रू थमां अपना राज बापस लैनां ऐ।

इस लाखा मेहलै चा अस जीन्दे बची निकले आं ए गल्ल भीमसैन दी बदौलत नईं होई ? भीमसैन ते साढ़ी आशा दी किरण

ऐ। ओदे स्हारै गै ते साढ़ा अगड़ियें मेदें दा मैह्ल खड़ोता दा ऐ।
मते कष्ट सैहन करी तुसें फंसला ठीक नई कीता।”

कुन्ती देवी होरें आखेया—पुत्तारो। असें ब्राह्मण दे घर
किन्ना चिर नन्दे कन्ने कट्टेया ऐ। हुण साढ़ा फर्ज ऐ ते ए मनुखता
दा बड़ा भारा गुण ऐ जे अस उस रौने दा बदला चकाचै। मिकी
भीमसैन दी ताकती उपपर भरोसा ऐ ते कोई चिन्ता नई।
बरणावत इच कुस असेंगी कट्टेया ते हिडिम्बा राकशै गी कुस
मारेया? इस ब्राह्मण दे टव्वरै दी रखेया करना साढ़ा धर्म ऐ।

शहरदार ब्राह्मण दे घर आये। बैलगड्डी इच भान्ति २ दे
मास ते खाने पीने दियां चीजां वस्तां, मट्टे दे चगधरे, ते नशा चाढ़ने
आलियां शराबां हियां। दौं बल्द जोत्तरे दे हे। भीमसैन गड्डी
इच बेठा ते राकशै दी गुफा पास चली पेया।

बैल गड्डी चला दी ही। ढोल ढमाक्के कन्ने बज्जा दे हे।
जिसलै ओ निश्चित थारै उपपर पुज्जे तां शहरदार ते परतोइ आये
ते शड़े भीमसैन होर इक्कले अग्रे बधन लगे। गुफा दे सामने दा
रस्ता दिक्खियै कैक औन्दी ही। हड्डियां, बाल, आन्दरां, ते छिछरे
पेदे हे ते कीड़े मकोड़े चमके दे हे। कईं टुक्के दे हत्थ ते डुण्ह,
जंडां ते मुण्डियां पइदियां हियां। गिरजां ते इल्लड़ उपपर चक्कर
ला करदे हैं। उनेंगी ते धाम लग्गी दी ही। भीमसैन होरें
गड्डी रोकी ते गड्डी इच राकशै गित्तै रक्खी दी खराक गड़पफनी शुरू
करी दित्ती। उनें मनै इच गलाया राकशै कन्ने लड़ाई इच ए
खराक खीसवीस होई जानी ऐ। इस करी ए खाई गं लैनी चाही
दी ऐ। राकशै गी मारने परैन्त ओदी लोथै कन्ने छोइयै ए भृष्ठ
गै होई जानी ऐ। फी ए खाने जोग नई रौनी।

मता चिर बलगने करी राकश अग्रे गै तत्ता होआ दा हा
उस भीमसैन गी ईआं करदे दिक्खेया तां रोहै कन्ने पागल जन होई
गेया। भीमसैन बी राकशै गी दिक्खेया ते ललकारेया पई आईजा।
राकशै दा बड़ा किश देह, दाढ़ी मुच्छां ते बाल सारे लाल, कन्ने

थमां कन्नै तोड़ी चौड़ा मुंह, ओ भीमसैन पासै द्रौड़िया । भीमसैनै पर्वहि गै नईं कीती ते राकशै पासै पिटु करियै खन्दा रेआ । राकश हत्थ पा तां ओ परे छण्डी ओड़ै । राकश उसी मुक्के मारन लगा । उसी बड़ा रोह चढ़ेया जे ए पिटु गै नईं परतदा । लगा मुक्के बरान । पर भीमसैनै घ्यान गै नईं दिता ते खाने इच लग्गा रेआ । राकशै इक बूटा पुट्टेया ते भीमसैनै उप्पर सुट्टेया । भीमसैनै फी बी परतियै नईं दिक्खेया । खब्बे हत्थै कन्ने उसी बूटे गी भेठा करी ओड़िया ते सज्जे कन्ने खाने गी जटोये दा रेआ । जिसलै सारा भोजन समाई ओड़िया ते मट्टे दा आखरी चग्घरा बी पी ओड़िया तां उट्टेया, कूली कीती हत्थ धोते रमानै कन्ने डकार मारेया ते राकशै पासै परतोआ ।

फी दमै लड़न लगे । भीमसैन ते राकशै कन्ने खेडन लगा मरजी आखै भुजा तट्टै फी आखै उठ खड़ो । ईआं राकशै गी लीरें दी गुड्डी आड़ू नचान्दा रेआ । शेकड़ भीमसैनै उसी खल्ल पाया, क्याड़ी ते पिट्टी उप्पर गोडा रक्खेया ते हड्डियां फसाली ओड़ियां । राकश बेबस होइए पीड़ा कन्ने कलिया । ओदे मुहां दा खून बगेया ते ओ भुगती गेया । भीमसैन ओदी लोथै गी घसीटदा शहरै दे दर्वाजे तोड़ी लई आया । ब्राह्मणै दे घर आनियै उस श्नान कीता ते सारे दिनै दी कार कर्दगी सुनाई । माता कुन्ती सुनियै बड़ी खुश होई ।

०००

द्रोपदी दा स्वंबर

पाण्डव एकचक्र नगरी इच ब्राह्मणें दे भेसै इच रवा दे हे जे उनें पंचाल दे राजा द्रुपद दी धी द्रोपदी दे स्वंबरै दी गल्ल सुनीं । एकचक्र नगरी दे मते ब्राह्मण दान दक्खना लैने दी हीखी इच ते जलसे जलूस ते शाही ब्याह दी धूमधाम दिक्खने गित्तै सोच बचार करन लगे । कुन्ती नै अपने मौरी दे सुभा कन्ने जाचेया जे पुत्तरें दी मरजी ऐ जे पंचाल जाइयै द्रोपदी गी जित्ती आनचै । इसकरी उस युधिष्ठिरै गी आखेया—

असें इस नगरी इच रौन्दे मता चिर होई गया ऐ । हुण कुतै होर पासै चलने दा बचार करना चाही दा ऐ । ए पहाड़ ते घाटियां दिक्खी २ रज्ज होई गया ऐ । हुण इत्थें भिक्खेया बी इन्ती नईं थोन्दी इस करी इत्थें होर ठहरना ठीक नईं । चलो राजे द्रुपद दे देस चलचै । सुनने च आन्दा ऐ जे ओ खरा रसदा बसदा देस ऐ । कुन्ती दुनियादारी ते चतराई इच बेजोड़ ही । उस अपने

पुत्ररें दे बचार सैभन गै पढ़ी लैते ते उन्दे आखने पर पाया गै नई ।

ब्राह्मण टोलियां बनाइयै स्वंबर दिखन चले । पाण्डव बी ब्राह्मणें दे भैसे इच उन्दे कन्ने रली गे । बड़ा लम्मा पैण्डा मारियै ओ राजे द्रुपद दे सुन्दर शहरें इच पुज्जे । ते ममूली ब्राह्मण दे रूपै इच इक घम्यारें दे घर डेरे लई दिते ।

द्रोणाचार्य ते द्रुपद उप्परा दा भायें मित्तर भाव रखदे होन पर द्रुपद गी द्रोणाचार्य हुन्दे हत्थें जेड़ी नमोशी होई ही ओदा सल्ल गेदा नई हा । द्रुपद दी अपनी मर्जी ही जे द्रोपदी दा ब्याह अर्जुन कन्ने होऐ । द्रोणाचार्य अर्जुन कन्ने इन्ना प्रेम करदे है जे अर्जुन दा ब्याह द्रुपद हुन्दे होई जा तां ओ द्रुपद गी कदें बी शत्रु नई समझन । द्रुपद अर्जुन दा सौहरा होने करी होर बी तगड़ा होई जाग । द्रुपद गी जिसलै पाण्डवें दे बरणावत इच फकोई जाने दी खबर मिली तां उसी बड़ा दुख होआ । पर पिच्छुआं ए बी सुनचोआ जे ओ बची निकले न । किश तसल्ली होई ।

ब्याह दा मण्डुआ बड़ा सजाये दा हा । ओदे चवक्खी स्वंबर इच भाग लैने आले मेदवार ते महमानें दे ठहरनं गित्ते कमरे बने दे हे । बड़े मनभाने नजारे बनाये दे हे ते मनोरंजन गित्तै खेडें दा बन्दोबस्त कीता दा हा । चौदां दिन ते उत्थें खूब मौज मेला लगा रेआ ।

मण्डुए दे बस्कार इक लोहे दा धनुष रखे दा हा । स्वंबर दी शर्त ए ही जे द्रोपदी दा ब्याह ओदे कन्ने होग जेड़ा धनुष उप्पर बाण चाड़िये इस घूमदे चक्करै बिच्चा होइये उप्पर टिके दे नशाने गी फुण्डग । एदे गित्तै दिव्व शगती ते चतराई दी लोड़ ही । राजे द्रुपद नै ए घोषणा कराई दिती जे ए कर्तव करियै दस्सने आले गी गे द्रोपदी वरग

सारे भारत वर्षे दे राजे किट्टे होए दे हे । धृतराष्ट्र दे सारे पुत्तर, कर्ण, कृष्ण जी, शिशुपाल, जरासन्ध ते शल्य सारे गे

आये दे हे । इन्हें राजें महाराजें दे इलावा दर्शकें दी भीड़ मती ही ।
उत्थें इन्ना रौला पेदा हा जे सागर गै गर्जदा सेई हुन्दा हा । तुआई
सैकड़ें बाजें घनघोर पाई दी ही ।

धृष्टद्युम्न घोड़े पर चढ़िये अग्रे २ चलेया । पिछें द्रोपदी
हाथी उप्पर बैठी दी ही । व्याहनूँ श्चान करने परैन्त रेशमी टल्लें
इच ओ दिव्व जोत लबदी ही । ओ हाथी परा उतरी ते मण्डुए
इच आई । ईआं बभोआ जे सारा मण्डुए श्लैपे ते मधुरता कन्ने
भरोची गया ऐ । ओदे हत्थै इच जैमाल ही उस शर्मन्दे २ किट्टे
होए दे राजें पासै दिक्खेया ते मंच उप्पर चढ़ी गई ।

राजे ओदा श्लैपा दिक्खियै टऊ होई गे । ब्राह्मण मन्तरें दा
उच्चारण करन लगे ते होम करन लगे । जिसलै शान्ति पाठ होई
गेया ते संगीत बन्द होआ तां धृष्टद्युम्न द्रोपदी गी लइयै मण्डुए
बश्कार आया ते जोरेयां पुकारियै आखन लगा—

“किट्टे होए दे राजकमारो सुनो ए धनुष पेदा ऐ । ओ
नशाना ऐ ते ए तीर पेदे न ।

जेड़ा इस चक्करै बिन्चा पंज तीर उप्परोतली मारग ते ठीक
नशाना फुण्डग ओ मेदवार चंगे कुलै दा होआ तां ओदा मेरी भैनूँ
कन्ने व्याह होग । फी उस द्रोपदी गी किट्टे होए दे राजें दे नां,
बैन्स ते पिछला इतिहास सुनाया ।

कई राजें उट्टे ते धनुषै उप्पर तीर चाढ़न लगे पर किश नई
बनेया । धनुष बड़ा भारा हा ते खचोआ गै नई । बचारे भलखोए दे ते
ढीठ होए दे अपने आसनै उप्पर आनियै बई गै । शिशुपाल, जरासन्ध,
शल्य ते दुर्योधन सारे गै फेल होई गे हे ।

जिसलै कर्ण मदानै इच आया तां सारें गी मेद होई जे कम्म
तोड़ चाढ़ी जाग । उस नशाने उप्पर तीर मारेया पर बिन्दक बाल
भर फकं रई गया । नशाना खुञ्जी गया । धनुष नुआड़े हत्थै
दा छुड़की गया आखो जियां जानदार चीज ही । बड़ा रौला पई
गेया । राजे बड़ा रोह शण्डन लगे ।

ए बी कोई परीक्षा ऐ । ए गल्ल होई गै नईं सकदी । ए ते राजें दी भद् करने गित्तै साजश ऐ । उसलै ब्राह्मणें चा इक नौजवान उठेया ते धनुष पासै चलेया । सारे झुप्प होई गे

ए ब्राह्मण भेसै इच अर्जुन हा । जिसलै ओ खड़ोता तां भीड़ै इच मता रौला पेया । ब्राह्मणें इच बी दौं मत होई गे । कई बड़े खुश होए जे ब्राह्मणें इच बी नेआ नौजवान ऐ जेड़ा मकावले उप्पर आई सकदा ऐ ते कई जेड़े दुनियादारी इच बड़े स्याने हे आखन लगे ए के मूर्खता ऐ । जित्थें कर्ण ह्राटे ते शल्य ह्राटे कामयाब नईं होए उत्थें इक ब्रह्मचारी जाइयै अपनी बेज्जती करान लगा ऐ । उत्थें होर बी कईं हे जेड़े ए आखने आलें कन्ने सहमत नईं हे । ओ अर्जुनै दा शरीर ते बनौट ते जुआनी दिक्खियै आखन लगे—बभ्रोन्दा ते ईआं जे ए जित्ती जाग । इसी ते अपने उप्पर बड़ा भरोसा लबादा ऐ । तां गै ए हत्थ पान लगा ऐ । जिन्दू भायें किश लिस्सा ऐ पर शड़ा शरीरै दा बल गै थोड़ी शगती हुन्दी ऐ । तपस्या दा बी ते किश बल हुन्दा ऐ । इसी बी जतन करन देओ । उने सारें उसी शीर्वाद दित्ती ।

अर्जुन धनुष आले थार पुज्जा ते धृष्टद्युम्न गी पुच्छन लगा—
“की जी ! इक ब्राह्मण धनुष चढ़ाई सकदा जा नईं ?”

धृष्टद्युम्न आखन लगा—“हे उत्तम ब्राह्मण उच्चै कुलै दा कोई बी जेड़ा धनुष चाढ़ियै नशाना फुण्डी लैग ओदे कन्ने माढ़ी भैनुं दा व्याह होई जाग । मेरी ईऐ शर्त ऐ ते अऊं इस थमां फिरकदा नईं ।”

अर्जुनै नारायण भगवाण दा ध्यान कीता, धनुष चुक्केया ते चाढ़ी लेया । उस डोरी उप्पर तीर रखेया ते आस पासै बिन्दक मुस्कराइय दिक्खेया । सारी भीड़ दन्दें हेठ उंगली दइयै बुत्त बनियै दिक्खन लगी तां जे उस बिना झिजके ते बलगे उप्परो तली पंज तीर मारे जेड़े चक्करे बिच्चा निकलियै नशाने उप्पर लग्गे ते नशाना हेठ आई पेया । बाजे बज्जन लगे ते भीड़ खुशी कन्ने नच्चन लगी ।

मण्डुए इच बैठे दे ब्राह्मण बी खुशी कन्ने गान लगे ते मृग चर्म भुआड़न लगे । उनें गी ईआं सेई होआ जियां सारी ब्राह्मण जाति नै गै द्रोपदी जित्ती लई होऐ । ऐदे परैन्त इन्ना रौला पेया जे लिखन नई हुन्दा । द्रोपदी दा श्लैपा बड़ा तेजवान हा । ओदा चेहरा खुशी कन्ने चमकन लगा । उस अर्जुनै पासै दिक्खेया, अग्रे वदी, ते जैमाल नुआड़े गलै इच पाई ओड़ी । युधिष्ठिर नकुल ते सहदेव झट उत्थुआं निकले ते माऊ गी शुभ समाचार सनान मे उठी । शड़ा भीमसैन उत्थें रेआ । उसी डर हा किट्टे होऐ द क्षत्रिय राजे किश गड़बड़ नई करी बौन ।

भीमसैनै दा ख्याल ठीक निकलेया । राजे रोहै कन्ने तमशन लगे । आखन जगे स्वंबरै दी रस्म ते ब्राह्मणें इच हुन्दी गै नई । जेकर द्रोपदी नै कुसै क्षत्रिय रामकमारै कन्ने ब्याह नई करना तां कुआरी रवै । ते चिखा चिनिऐ भस्म होई जा । इक ब्राह्मण कियां उसी ब्याही सकदा ऐ ? अस इस ब्याह दा बरोध करने आं ते ए ब्याह कदें नई होन देगे । अस सचाई दी रखेया करगे ते स्वंबरै दी रस्मै दी पालमा करगे । इस रस्मै गी ईआं नई ब्रुट्टन देगे ।”

सेई होन लगा जे लड़ाई लगन लगी ऐ । भीमसैनै इक बूटा जड़ें समेत गै पुट्टेया पत्तार ते शाखां शिम्बी शाम्बियै ते नुआड़ी डांड बनाइयै अर्जुनै कोल आई खड़ोता । होन देओ जे किश हुन्दा ऐ । द्रोपदी किश नई बोली । अर्जुनै जेड़ा मृगचर्म लाये दा उसी फगड़ियै खड़ोती रई ।

कृष्ण जी ते बलराम होरें खौदल पाने आले राजें गी समझाया बभाया अर्जुन द्रोपदी गी लेइयै उससै घम्यारै दे घर चलेया जित्थें ओ ठहरे दे हे ।

जिसलै अर्जुन ते भीमसैन द्रोपदी गी लइयै जा करदे हे तां धृष्ट द्युम्न किश शिण्डा रखियै उन्दे पिछें २ चलेया । उनें उसी नई दिक्खेया । सब किश दिक्खी सुनिये ओ बड़ा खुश होआ ते

चर्ज करन लगा । उस परतोइयै राजे द्रुपद गी सनाया—पिता जी, ईआं बभ्रोन्दा ऐ जे ए पाण्डव न । द्रोपदी मृगचर्म फगड़ियै कन्ने २ टुरी गई ते उसी कोई लाज नई बभ्रोआ दी ही । मिमी जाइयै दिक्खेया ओ पंजे पाण्डव न ते उन्दे कन्ने जेड़ी स्यानी नेई जनानी ऐ ओ उन्दी मा कुन्ती सेई हुन्दी ऐ ।

राजे द्रुपद नै कुन्ती ते पाण्डवें गी मैह्लें सद्देया । युधिष्ठिर होरें राजे द्रुपद गी बल्ले नेऐ दस्सेया जे ओ पाण्डव गै न । उने ए बी सनाया जे असें सारें द्रोपदी गी सांभे गै ब्याहना ऐ । द्रुपद ए सुनियै बड़ा खुश होआ जे ओ पाण्डव न ते उसी जेड़ी द्रोणाचार्य हुन्दी तरफा चिन्ता ही ओ दूर होई गई ।

पर इस गल्लै उप्पर उसी बड़ा चर्ज होआ ते घृणा होई जे ओ द्रोपदी गी सांभे ब्याह्णन । द्रुपद नै एदा बरोध कीता ते आखेया ए ते बड़ा धर्म बरुद्ध ऐ । ए तुसैं गी के ख्याल सुज्झा ऐ ? ए ते बड़ा दुराचार ऐ । परम्परा बरुद्ध ऐ ।

युधिष्ठिर होर आखन लगे—राजा जी, खिमा करना । असैं विपता पौने बेलै सगन्ध चुक्की ही जे अस सब किश सांभ्हा गै करगे । हुण ए सगन्ध नई असैं त्रोड़नीं । साढ़ी माता दा ईऐ हुकम ऐ ।

आखर राजे द्रुपद गी मन्नना पेया ते ब्याह होई गया ।

०००

इन्दरप्रस्थ

जिसलै पञ्चाल दे स्वंबरै दियां खबरां हस्तनापुर पुज्जियां तां बिदुर होर बड़े प्रसन्न होए । ओ धृतराष्ट्र कोल द्रौड़दे गये ते आखन लगे—“राजा जी ! द्रोपदी साढ़ी नूंह बनने करी साड़ा कुल बड़ा मजबूत होई गया । साढ़े भाग बड़े चंगे न ।”

धृतराष्ट्र अपने पुत्ररे दे लाडै इच अन्ना हा उस समभेया जे दुर्योधन द्रोपदी दा स्वंबर जित्ती लेता ऐ । इस्सं गलतफहमी च उस बड़े पसोए दे आखेया—“तुसें बिल्कुल ठीक गै आखेया ऐ, साड़ै गित्तै बड़ा गै शुभ मौका ऐ । भटपट जाओ ते द्रोपदी गी लई आओ । पञ्चाल कमारी दा खूब स्वागत करो ।

बिदुर होरें भट गै गलती सधारी ओड़ी । आखन लगे—“परमात्मा उन्दी लम्मी आर्बला करै, पाण्डव जीन्दे न । ते अर्जुनै द्रोपदी दा स्वंबर जित्तीया ऐ । शास्त्रें दी विधि मताबक पजे पाण्डवें द्रोपदी गी सांभा गै ब्याही लैता ऐ । ओ अपनी माता कुन्ती समेत राजा द्रुपद कोल गै ठहरे दे न । ते राजीबाजी न ।

ए गल्लां सुनियै धृतराष्ट्र बड़ा दुआस होआ पर उस अपनी नमोशी जाहर नई होन दिती ।

उपपरा दा खुश होइयै आखन लगा—बिदुर जी । तुन्दियां गल्लां सुनियै मिकी बड़ी खुशी होई ऐ । प्यारे पाण्डव सच्चे मुच्चे जीन्दे न ? अस ते उन्दा सोग करदे रे । तुन्दे समाचारै कालजै ठण्ड पाई ओड़ी ऐ । द्रोपदी हुण साड़ी नू बनी गई ऐ । ए बड़ा चंगा होआ ।

दुर्योधनै दी घृणा ते ईर्ष्या पहलें थमां दूनी होई गई जिसलै उसी पता लग्गा जे पाण्डव ते लाखा मैह्ला चा बची निकले । इक बरा छप्पियै बी गुजारी लेया ते हुण पचाल राज द्रुपद कन्ने नाता होई जाने कारण होर बी तगड़े होई गे न ।

दुर्योधन ते दुशासन अपने मामे शकुनी कोल गे ते दुखी होए दे आखन लगे—मामा । अस ते मरोई गे । असें पुरोचनै उपपर बसाह करियै बड़ा धोखा खादा । साड़े शत्रू-पाण्डव साड़े कशा हुशियार निकले । भाग बी उन्दा गै साथ देया करदे न । धृष्टद्युम्न ते शिखण्डी उन्दे साथी बनी गे न । हुण अस के करी सकनेआं ?” कर्ण ते दुर्योधन धृतराष्ट्र कोल गे । दुर्योधन आखन लगा—“तुसें बिदुर गी ए के ग्लाया जे साड़े ते भाग खुल्ली गे न । ए साड़े गितौ भला चंगा समां आया ऐ जे साड़े कुदरती दुश्मन पाण्डव इन्ने तगड़ होई गे न जे ओ असें गी खतम करी ओड़डन । उन्दे खलाफ साड़ी साजश कामयाब नई होई सकी । हुण ते उनें गी पता बी लग्गी गेया ऐ । ए होर जादा खतरे आली गल्ल होई गई ऐ । हुण ते इत्थे गै गल्ल मुकदी ऐ—अस उनें गी हुण गै खतम करी ओड़चै जां आपू खतम होई जाचै । किरपा करियै असें गी किश सलाह देओ ।” धृतराष्ट्र होरें आ खेया—बेटा, जो तू आखेया ऐ गल्ल ते सच्च ऐ । असें बिदुर गी मनै दी गल्ल नई दस्सनी चाही दी । उसै करी में उसी इयां ग्लाया हा । पहले तू मिकी अपने बचार ते दस्स जे के करना चाही दा ऐ ।” दुर्योधनै आखेया—

में इन्नां परेशान आं जे मिगी किश सुभदा गै नईं । मेरा ख्याल ए जे अस इस गल्लै दा फैदा उठाचै जे पाण्डव मतरे आ न इक माऊ दे पुत्तर नईं । ते ईआं मादरी ते कुन्ती दे पुत्तरें इच दुश्मनी पुआचै । द्रुपद गी रिश्वत देइयै अपने कन्ने रलाई लैनेआं । साड़ा पक्ख लैने इच ए गल्ल के रकावट पाई सकदी ऐ जे ओदी धी पाण्डवें ब्याही दी ऐ । धनै दे जोरै कन्ने केड़ी गल्ल ऐ जेड़ी सिद्ध नईं होई सकदी ।

कर्ण मुस्कराया ते आखन लगा—“ए ते ऐवें फजूल गल्ल ऐ ।

दुर्योधन फी आखन लगा—ए गल्ल ते पक्की करचै जे हुण पाण्डवें गी परतियै इत्थें नईं औन देच्चै । ते नां गै राजै बिच्चा जेड़ा सारा गै अस आपूँ साम्भी बेठे देयां उनें गी किश हिस्सा बण्डाचै । अस किश ब्राह्मणें गी अपने कन्ने मलाचै ते शहरै च ए ए फवाह फलाई देचै जे पाण्डव हस्तनापुर गये तां पता नईं के नर्थ होई जाग ।

ईआं पाण्डव इत्थें औने थमां डरी जाडन ते अस उन्दे थमा बचे रौगे ।

कर्ण आखन लगा—ए बी फजूल गल्ल ऐ । तुस इस चाली उनें गी डराई नईं सकदे । दुर्योधन फी आखन लगा—द्रोपदी दी बजह कन्ने अस पाण्डवें इच नफाक नईं पुआई सकदे ? इक जनानी दा पंजे मर्दे कन्ने ब्याह बड़ा सखल्ला कारण ऐ । ब्याह बिद्या दे माहरें कशा पाण्डवें दे मनें इच इक दूए दे खलाफ ईर्षा ते शक पैदा करी देगे । ते मेरा ख्याल ऐ जे अस जरूर कामयाब होई जागे । अस कुसै सुन्दर जनानी दे जरिये कुन्ती दे पुत्तरें गी प्लेरने आं ते ईआं द्रोपदी गी उन्दे खलाफ करने आं । कदें द्रोपदी उन्दे चा इकै दे बारे इच बी शक करन लगी पेई तां अस उसी भट हस्तनापुर सेही लैचै ते अपने कन्ने मलाइयै अपनी स्कीम कामयाब करचै ।

कर्ण ए गल्ल बी हस्सियै गुआई ओड़ी । आखन लगा—तुन्दी इक बी गल्ल कम्मै दी नईं । तुस कुसै साजशै कन्ने पाण्डवें गी नईं

जित्ती सकदे । जिसलै ओ इत्थें हे ते बोटें आड़ू मसूम हे; उड्डुने गितौ फड बी नईं हे असैं दिक्खेया जे अस उस बेल्लै बी उनें गी धोखा नईं दई सके । तुस सोचदे ओ जे हुण अस उनेंगी धोखा दई सकगे । हुण ते उनें गी दुनियां दा मता तजर्बा होई गया ऐ । कन्ने बड्डी गल्ल ए होई ऐ जे उनें गी राजे द्रुपद दी पिठ्ठ होई गई ऐ । उनें गी थुआड़ी चालें दा पता लग्गी गया ऐ । हुण तुन्दी कोई चाल नईं चलनी । तुस उन्दे इच्च फुट्ट नईं पुआई सकदे । तुस मान्नी ते समभदार द्रुपदे होरें गी रिश्वत नईं दई सकदे । ओ कुसै कीमतै उप्पर बी पाण्डवें दा साथ नईं छोड़न लगा । हुण ते इक्कं रस्ता रेई गेदा ऐ । ओ ए ऐ जे उन्दे उप्पर हमला करी देओ । इस थमां पहले जे ओ होर मते तगड़े होई जान ते उन्दे कन्ने होर साथी आई मिलन असैं गी चाही दा जे अस उन्दे उप्पर हमला करी देचै । अस पाण्डवें उप्पर ते द्रुपद उप्पर चानचक्क गै हमला करी देचै । जादवें दी सैना गी उन्दी मद्दतै उप्पर पुज्जने थमां पहलें गै हमला करी देचै ।

हुण ते इस मुस्कला बिच्चा निकलने गी बहादरी आला रस्ता गै तुप्पना चाही दा ऐ । ते ईऐ क्षत्रिय वीरें गी सोभदा ऐ ।

धृतराष्ट्र होर ते किश निश्चा नईं करी सके । इस करी उनें सलाह मश्वरे गित्तै भीष्मपितामह ते द्रोणाचार्य होरें गी सद्दी भेजेया ।

जिस बेल्लै भीष्म होरें गी पता लगा जे पाण्डव जीन्दे न ते पञ्जाल राजा द्रुपद दे महमान न ते उनें द्रोपदी व्याही लैती ऐ तां ओ बड़े खुश होए । जिसलै धृतराष्ट्र होरें उन्दे कशा सलाह पुच्छी हुण के करचै तां भीष्म होरें जिन्दा दुनियादारी दा तजर्बा बड़ा हा ते चंगा मन्दा सब जानदे हे आखन लगे—मनासब गल्ल ते ए ऐ जे उनें गी सद्दिऐ उन्दा स्वागत कीता जा ते अर्द्धा राज उनें गी दित्ता जा । राजै दे लोक बी चान्दे न ईऐ नेआ फैसला हो जा । अपने कुलै दी शान कैम रखने गित्तै ईऐ गल्ल कीती लोड़चदी ऐ । लाखा

मैह्ल दी दुर्घटना दा लोकें इच मता चर्चा ऐ ते तुन्दी इज्जतू उप्पर हर्फ औन्दा ऐ । ए सारा दोष ते कलङ्क ते शक्क बी धनोई जाग ते तुस पाण्डवें गी सदियै अद्धा राज उनें गी दर्ई ओड़गेओ तां । मेरी ते ईऐ सिक्ख ऐ ।”

द्रोणाचार्य होरें बी ईऐ सलाह दित्ती ते आखेया जे कोई दूत भेजियै आपूँ इच सुला सफाई करी लौ । ते ऐमनी कन्ने रवो ।

ए सभा सुनिए कर्ण बड़ा तमशेआ । ओ दुर्योधनै दा बड़ा भगत हा । उसी ए गल्ल नईं सखाई जे पाण्डवें गी राजे विच्चा किश हिस्सा दित्ता जा । ओ धृतराष्ट्र होरें गी आखन लगा—
“ए द्रोणाचार्य होर तुन्दा खन्दे न । तुसें इनें गी मान दित्ता ते गप्फे दित्ते । इनें ए के सभा दित्ता ऐ । राजा गी चाही दा ऐ जे ओ मन्नने जां रद्द करने थमां पहले मन्तरियें दी रा भलेयां परखी लै ।”

कर्ण दे ए शब्द सुनिये द्रोणाचार्य होरें गी बड़ा रोह चढ़ेया । उन्दियां अक्खीं बलन लगियां । ओ आखन लगे—“ओ दुष्टा ! तूँ राजे गी करस्तै जाने दी सिक्ख देआ करनां एं । जियां भीष्म होरें ते में सिक्ख दित्ती ऐ जे धृतराष्ट्र ऊँगा नईं करग तां तौली मे कौरवें दा नाश होई जा ।”

फौ धृतराष्ट्र होरें बिदुर गी सदेया । उनें बी आखेया—
भीष्म होर साड़े कुलै दे बडेरे न । द्रोणाचार्य होर साड़े गुरु न । इनें जेड़ी सिक्ख मत्त दित्ती ऐ ओदा नरादर नईं करना चाही दा । पाण्डव बी ते तुन्दे गै बच्चे न जियां दुर्योधन ते नुआड़े भ्रा । तुस ए भलेयां समझी लौ जे जेड़े तुसें गी पाण्डवें दा नास करने दी सलाह दिन्दे न ओ सारे कुलै दा नास करने दी गै ध्याई बैठे दे न । द्रुपद ते नुआड़े पुत्तर, कृष्ण जी ते जादव सारे उन्दे पक्के साथी न । उनें गी जुद्ध इच हराना बिल्कुल संभव नईं । कर्ण दी सलाह गलत ऐ ते जागत आली हूड़मत्त ऐ ।

सारे लोकें च ए चर्चा ऐ जे असें पाण्डवें गी लाखा मैह्ल इच फूकने दा जतन कीता । असें गी सारें थमां पहले ए कलंक धोने

दा जतन कीता लोड़चदा ऐ । पाण्डवें दे जीन्दे बची निकलने दी खबर सुनियै सारे लोक खुश न ते सारे देस इच खुशी दी लहर बगा दी ऐ । ओ पाण्डवें गी परतियै इत्थें दिक्खना चान्दे न । दुर्योधनै दी गल्ल नई सुनो । कर्ण ते शकुनी हजे अनदादिये गै न । इनें गी राजनीति दा ज्ञान नई । ए सिक्ख मत्त जां सलाह देने दे जोग नई । तुस भीष्म हुन्दी गल्ल गै मन्नो ते ओदे उप्पर अमल करो ।

शेकड़ जाइयै धृतराष्ट्र होरें ईऐ मिथेया जे पाण्डवें गी अद्धा राज दइयै सुला करी लैनी चाही दी ऐ । उनें बिदुर होरें गी पञ्चाल भेजेया जे पाण्डवें गी ते द्रोपदी गी कन्ने करियै लई आओ ।

बिदुर होरें इक तेज चलने आला रथ लेया कन्ने मते सारे हीरे मोती जवाहरात ते कीमती तोहफे कन्ने पाये ते चली पे ।

बिदुर होरें राजे द्रुपद दी बड़ी बड़याई कीती ते धृतराष्ट्र हुन्दे पासेया बेनती कीती जे पाण्डवें गी ते द्रोपदी गी हस्तनापुर टोरो ।

द्रुपद होर धृतराष्ट्र दा बसाह नई करदे हे । उनें शड़ा इन्नां गै ग्लाय़ा—पाण्डवें दी जियां मरजी होऐ करन ।

बिदुर होर कुन्ती देवी कोल गे ते भुजा लेटियै चरण बन्दे । ओ आखन लगी—हे बिदुर जी ! तुसैं गै मेरे पुत्तरें गी बचाया ऐ । इस करी ए थुआड़े गै पुत्तर न । मिकी तुन्दे उप्पर भरोसा ऐ । जियां तुस सिक्ख मत्त देगे ओ अऊं ऊंआं गै करड । उसी बी धृतराष्ट्र दियें गल्लें उप्पर बसाह नई हा ।

बिदुर होरें उसी जकीन कराया—थुआड़े पुत्तरें दा कोई बाल बीका नई होग । उनें गी अपना राज वापस थोग ते ओ ओदे बारस बनडन । उन्दी बड़ी मान बड़याई होग । चलो हुण त्यार होई जाओ । आखर द्रुपद होरें बी हामी भरी ओड़ी । बिदुर होर पाण्डवें गी ते कुन्ती द्रोपदी गई लइयै हस्तनापुर आये ।

पाण्डव इन्ना कष्ट भोगियै ते बनवास कटियै परतोआ करदे न इस करी लोकें अपने प्यारे राज कमारें दे औने दी खुशी बिच शिड़कें

उप्पर पानी त्रौंकेया ते बजारें ते रस्तें गी फुल्लें कन्नें सजाया । जियां पहलै फंसला होई गेदा हा युधिष्ठिर होरें गी अर्द्धा राज दित्ता गया ते विधिपूर्वक राज तिलक कीता गया ।

धृतराष्ट्र होरें नमां राज थोए दे युधिष्ठिर होरें गी बिदा कीता ते शीर्वाद दित्ता—मेरे भ्रा पाण्डु नै इस राज दी उन्नति कीती । तुन्दी बी ऊंघ्रां गै इज्जत होऐ । पाण्डु राज होर मेरी सलाह उप्पर दुरदे हे । तुम बी उसै चाली ईन नभायो । मेरे पुत्तर किश बड़े अभमानी ते खुट्टे न । में ए बन्दोबस्त इस करी कीता ऐ जे तुन्दे इच लड़ाई भगड़ा नई पवै, घृणा नफरत नई चलै । तुम खाण्डव प्रस्थ जाओ ते उत्थें अपनी राजधानी बनाओ । साड़े बड़े पुरख, नहुष ते ययाति उत्थुआं गं सारा राज चलान्दे हे । ओ साढ़ी पुरानी राजधानी ऐ । उसी परतियै बसाओ ते मान बधाओ ।

इस चाली धृतराष्ट्र होरें युधिष्ठिर गी बड़े लाडै कन्ने समझाया पाण्डवें जाइयै उस पुराने नगरे दा काया कल्प करी दित्ता । मंहल बनाये, दुर्ग बनाये ते नुआड़ा नमां नां इन्द्रप्रस्थ रखेया । ए नमां नगर बड़ी उन्नति करन लगा । नाढ़ी मानता बधन लगी ते सारी दुनियां तरीफ करन लगी । पाण्डवें उत्थें छत्ती बरे राज कीत्ता । कुन्ती ते द्रौपदी कन्ने सुख चैनै कन्ने रे । ते अपने धर्म दा पालन करदे रे ।

०००

सारङ पत्नी

पुराण शास्त्रें इच जेड़ियां कथां कहानियां न उन्दे च पशू पक्षी मनुक्खें आड़ू गल्लां करदे न । कदे २ ते ओ बड़ी शैल सिक्ख मत्त दिन्दे न । धार्मिक नीति दी गल्ल बी दसदे न । पर असल गल्ल ए ऐ जे उन्दे गुणें द्वारा मनुक्खें दी प्रकृति इच भाँकने दा जतन कीता गे दा ऐ ।

पौराणिक साहित्य दी सुन्दरता दा इक गुण ए ऐ जे एदे इच कवि कल्पना ते प्रकृति दा बड़ा शैल मेल ऐ । रामायण इच इक मजेदार प्रसंग औन्दा ऐ । हनुमान गी बड़ा विद्वान ते स्याना आखदे न पर जिसलै ओ लङ्का गया तां उसी रावण दे रणवास इच इक बड़ी सुन्दर स्त्री गी सीता समझियै बान्दरें आड़ू शतानियां करदे दस्सेदा ऐ ।

आमतौर उपपर लौके जागते गी कहानियां सनाइयै परचान्दे न । उनें कहानियें इच पशु ते पक्षी गल्लां करदे न । पर पुराणें दियां कहानियां ते बड्डे लोकें आस्तै न । उत्थें जेकर कोई पशु पक्षी बोलदा दस्सेदा तां ओदी पृष्ठभूमि दी किश व्याख्या दित्ती दी हुन्दी

ऐ जे ओ पशु जां पक्षी मनुखें आला लेखा कियां बोलदा ऐ ।
 ग्रामतौर उप्पर बड़ा कारण उन्दा पिछला जन्म हुन्दा ऐ जिसलै ओ
 मनुख हुन्दे हे । मिसाल दे तौर उप्पर इक हिरण पिछले जन्म
 इच ऋषि हुन्दा हा जां इक लूमड़ी राजा हुन्दी ही । कुसै श्राप दे
 कारण ओ पशु बनी गे । नेई सूरते इच हिरण कम्म ते हिरणें आले
 करदा हा पर बोलदा ऋषि आइ हा । ते तुआई लूमबड़ी दी
 पशुवृत्ति ते चलदी ही पर राजे दी समझदारी ते तजबे आले गुण
 बी प्रगट हुन्दे रौन्दे हे । इस चाली ए कहानियां कुसै लै बड़े बड़्डे
 तत्थ दस्सने दे साधन बनी जन्दियां न । खाण्डवप्रस्थ जिसलै
 पाण्डवें गी थोआ उस बेल्लै ते ओ बड़ा भयानक थार हा । उच्चे
 नीन्दे थार ते अड्डो खोड़ । भूड़वूट ते किक्कर फलाइयां कण्डे ते
 खुड । ते चरोकना मिट्टी इच दबोए दा पुराना शहर हा । पक्षिएं
 इसी डेरा बनाई लेदा हा । ते चोर ते डाकू ते दुष्ट लोक इत्थें छपे
 दे रौन्दे हे । श्री कृष्ण होरें ते अर्जुन सलाह कीती जे इस बन गी
 फूकी ओड़ो ते इत्थें नमां शहर बसाओ ।

इक सारङ पक्षी उत्थें रौन्दा हा । ओदे चार बच्चे हे ।
 ओ अपनी पहली लाड़ी गी छोड़ियै नमीं कन्ने मौजां मारदा हा ।
 बच्चें दा बी ख्याल नई हा करदा । उंदी मा गै पालमा करदी ही ।
 जियां कृष्ण जी ते अर्जुन हुकम दित्ता बन गी अग्न फूकी ओड़ी ।
 अग्न चबक्खी मकी उठी ते लगी फना करन । बोटें दी मा घबराई
 ते बर्लाप करन लगी—अग्न बधा करदी ऐ सब किश फूकदी आवा
 दी ऐ । इस असें गी बी फूकी ओड़ना ऐ । जंगलै दे सारे जीव
 जैन्तें गी बचने दी मेद नई । अग्नी कन्ने सड़े दे बड़्डे बड़्डे बूटे
 जिसलै भुजा डिगदे न तां बड़े जोरें दी बाज हुन्दी ऐ । माढ़े बच्चें
 दे फड बी नई । तुसते ईआं अग्नी इच भडोई जागे ओ । हुण
 अऊं के करां ? तुन्दा बब्व बी तुसें गी छोड़िए दुरी गेदा ऐ । माढ़े
 इच इन्ना जोर नई जे तुसें गी चुक्कियै डुआरी मारी लें ।”

ईआं बर्लाप करदी माऊ गी बोटें आखेया—मां, तुं साढ़े करी

बलपि नईं कर । असें गी साढ़े भागें उप्पर छोड़ी ओड़ । जे अस् इत्थें मरी गै तां अगला जन्म असें गी चंगा थोग । जे तुम्मी साढ़े कन्ने जली मरगी तां साड़ा बैन्स गै नष्ट होई जाग । तूं कुतै बचा आले थार जा । कोई होर साथी तुप्पी लै तें नन्दै कन्ने जिन्दगी गजार । थुआड़े होर बच्चे होई जाडन । तूं असें भुल्ली जागी । अपने कुलै गितौ जड़ी गल्ल ऐ तूं उस्सै पर बचार कर । उनें बड़ी बेनती कीती पर माऊ दा मन नईं मन्तै । ओ आखन लगी—में इत्थें गै रौंड ते तुन्दे कन्ने गै अग्गी इच जली जाड ।

इने पक्षियें दी कहानी दी पृष्ठ भूमि ए ऐ । इक ऋषि मन्दपाल हे । उनें बड़ा चिर ब्रह्मचर्य बर्त पालेया । जिसलै ओ उप्परले लोके इच जान लगे तां दुआर पालें रोकी ओड़ेया 'पुत्तारहीन ते उबड़े लोके इच जाई गै नईं सकदा । ए आखियै उसी परताई ओड़ेया । उस आनियै सारंड पक्षी दा जन्म लेया । ते अपनी साथन जरिता कन्ने रौन लगा । उस चार अण्डे दित्ते । उस सारंड पक्षी नै जरिता गी छोड़ी ओड़ेया ते इक होर साथन लपिता बनाई लई ।

जरिता अण्डें उप्पर बेठी रई । उन्दे चा चार चूचे निकले जिन्दा हाल उप्पर दस्सेया ऐ । ओ ऋषि दी लुआद हे इसकरी माऊ गी ईआं उपदेश देआ करदे हे ।

माऊ नै अपने जागतें गी दस्सेया—इस बूटे कच्छ इक चूहे दी रुडु ऐ । में तुसें गी उत्थें रक्खी ओड़नियां । तुस रुडु इच बड़ी जायो ते इयां अग्गी थमा बची जागेओ ।

अऊं रुडु दा मुंह बन्द करी ओड़ड । तुसेंगी अग किश नईं करी सरुग । जिसलै अग हिसली जाग तां अऊं आनियै तुसें गी कट्टी लैड ।

बच्चे नईं मन्ते । ओ आखन लगे—रुडु इच जेड़ा ऐ ओ असें गी खाई जाग । इस करी अग्गी इच मरना खरा ते चूहे दी न्हेरी रुडु इच मरोई खलोई जाना जचदा नईं । मौरी पक्षी नै

बच्चें दे शक दूर करने दे जतन कीते, आखन लगी—में इक बाज रुड़ी चा चूहे खन्दा दिखया ऐ ।

तुसैं गी रुड़ी इच कोई डर नई । पर बच्चें आखेया—रुड़ी इच होर मते चूए होडन । साड़ा खतरा इक चूहे दे बाजै थमां खलोई जाने करी नई टली गया । अग्गी दे इत्थें पुज्जने थमां पहले पहले तू अपना आप बचाई लै । असें चूहे दी रुड़ी इच नई बड़ना । तू साढ़े गित्तै की जान दिन्नीं ऐं ? असें थुआड़े गित्तै किश बी नई कीता । दुनियां इच आइयै तुसैं गी कण्ट गै दित्ता ऐ । तू अपना होर कोई साथी तुप्पी लं ते नन्दै कन्ने रौह । जे अस फकोई गे तां उबड़े लोकें गी जागे ते जे खुशकिस्मती कन्ने कुतै बची निकले तां अग्न हिस्सलने पर तू असें गी इत्थें गै आनियै तुप्पी लियां । चिर नई ला । उड्डने दी कर ।' जिसलै बच्चें मता गै जोर लाया तां मा उड़ी गई ।

अग्गी दे लोरें बूटे गी घेरी लेया । ओ लौके पक्खरू घाबरे नई इक दूए कन्ने मिट्टियां बोलियां बोलदे रे । सारें कशा बड़डा भ्रा बोलेया—स्याना खतरे गी अग्गें गै सेई करी लैन्दा ऐ ते जिसलै खतरा आई पवै तां मनै गी थिड़कन नई दिन्दा । लौके आखन लगे—‘तुस बड़ु ओ, स्याने ओ । तुन्दे नेआ तुप्पे दा नई लबदा ।

जिसलै अग्न उन्दे कोल पुज्जी तां सारें हसदे मुहैं ओदा स्वागत कीता ते इयां स्तुती करन लगे—हे अग्नि देवता साड़ी मा असें गी छोड़ी गई ऐ । असें अपना बापू ते दिक्खेया गै नई । जिसलै अस अण्डें चा बाहर आये हे ओ है गै नई हा । हे आदि देव ! धूं गै तुन्दा भण्डा ऐ । हुण ते साड़ी शरण तुस गै ओ । अस ते पंख हीन आं । कोई स्हारा नई । साड़ा कोई राखा नई । तुसैं गै साड़ी रखेया करनी ऐ । जियां ब्रह्मचारी ब्राह्मण वेद-पाठ करदे न इयां उनें अग्नि देवता दी प्रार्थना कीती । अग्नि देवता नै सारा बन फूकी ओड़ेया पर उनें गी तत्ती बा बी नई लग्गी ।

जिसलै अग्न हिस्सली गई तां मा परतिये आई । उसी ऐ

दिक्खियै बड़ा चर्ज होआ जे बच्चे सम्मसीने न ते खुशी कन्ने मिट्टियां बोलियां बोला करदे न । उस उनेंगी गलें लाया ते बड़ी खुश होई ।

जिसलै अग्गी दे लोरे मका करदे हे तां उसलै नरपक्षी नै बच्चें दी चिन्ता करियै अपनी नमीं साथनै लपिता गी आखेया उनें बच्चें दा पता नईं के होआ । ओ बड़ी चिड़ी ते गालियां देन लगी । ओदे बार बार बैन सुनियै आखन लगी—“अच्छा ! ए गल्ल ऐ । मिगी थुआड़े मनै दा अग्गें गै पता हा । हुण तुगी परतियै जरिता कोल जाने दी लुमक लग्गी दी ऐ । मेरे कशा तुगी रज्ज होई गया ऐ । उस गित्तै बच्चें दा के पज्ज ला करना एं । तूं मिगी आपूं दस्सेया हा जे जरिता ते बच्चें गी अग्गी थमां किश डर नईं । तुसें गी अग्नि देवता नै बरदान दित्ता दा ऐ । तुस सच्ची गल्ल दस्सो ते जाओ उठी । तुसें गी कुसै ठाकेया ऐ ? अपनी लाडली जरिता कोल जाओ उठी ।

दगाबाज मर्दे उन्दे उप्पर बसाह करने आलियें कई जनानियें गी धोखा दित्ता दे ऐ । उन्दें च इक अम्मी सेई । अऊं बनै इच टक्करां मारदी रौड । तुसें जानां ऐ जाओ ।

मन्दपाल पक्षी आखन लगा—तू अपने कोला गै गल्लां बनान्दी जारनी एं । बच्चें गित्तै ते में पक्षी दा जन्म लेया ऐ । उन्दी चिन्ता ते सैभन होई । में शड़ा जाइयै दिक्खना ऐ । दिक्खियै परतोई औनां । ईयां उस दम दलासा दित्ता ते उस बूटे उप्पर गया जित्थें जरितां बेठी दी ही ।

जरिता नै पति आसै ध्यान गै नईं कीता । ओ इस्सै खुशी इच पसोई दी रेई जे बच्चे जीन्दे न । फी ओ पति पासै परतोई ते बड़ी बेरुखी कन्ने पुच्छन लगी तुस कियां आये ?

उस बड़े लाडै कन्ने आखेया—मेरे बच्चे राजीबाजी न ? इन्दे चा बड़ा केड़ा ऐ ?”

जरिता अत्यन्त बेरुखी कन्ने बोली—बच्चें दा बड़ा ध्यान

ते कल्याण कारी नई होऐ । शड़ी कन्नें गो प्यारी लगने आली सलाह नई लोड़चदी ।

कृष्ण होरें जबाब दिता—तुसैं बिल्कुल ठीक आखिया ते ईऐ कारण ऐ जे तुस तां तोड़ी चक्करवर्ती नई बनी सकदे जिन्ना चिर मगधै दा राजा जरासन्ध जीन्दा ऐ ते तुस उसी जित्ती नई लैन्दे । उस मते राजें गो जित्तियै अपने धीन कीता दा ऐ । सारे क्षत्रिय राजे बलकारी शिशुपाल तोड़ी बी नुआड़ी शगती थमां डरदे न ते नुआड़े अगगे कुसकदे नई । तुसैं उग्रसेन दे पुतार उस दुष्ट कैसै दा नां नई सुने दा ? जिसलै ओ जरासन्ध दा जमात्रा ते साथी बनेया तां में अपने साथिएं गो लइयै ओदे उपपर चढ़ाई कीती ही । त्रै बरे मतवातर लड़ने परैन्त असैं गो हार मन्ननी पई । असैं मथरा छोड़ी ते ताई घरोन्दे बक्खी द्वारका गो टुरी आये ।

नमां नगर बसाया । ते हुण रमानै कन्ने ते अमन चैनें कन्ने बस्सन लगे आं ।

भायें दुर्योधन ते कर्ण बी तुन्दे चक्करवर्ती होने दी आपत्ति नई करन पर जरासन्ध ते जरूर बरोध करग । ए बरोध तां मुकना एं जे तुस उसी हराइयै बड्डी ओड़ो । फी तुस राजसू जग्ग करेओ ओदी जेला इच सड़ने आले सारे राजे तुन्दी बक्खी होई जाडन ।

जिसलै कृष्ण जी नै ए ग्लाय़ा तां युधिष्ठिर होर आखन लगे—औं मन्ननां । होर बी कई राजे न जेड़े न्यां कन्ने ते चंगी चाली हकूमत चलान्दे न ते रमानै ते सन्दोखै दी जिन्दगी गजारदे न । अम्मी उन्दे चा इक्क आं । चक्करवर्ती बनने दी इच्छया बी शड़ा गमान ते फौड़ गै । अऊं चक्करवर्ती बनने दी चाह गै नई करदा । ते सच्ची गल्ल ए ऐ जे मिगी चक्करवर्ती बनने दा लुब्ब गै कोई नई । ए मेरे भायें दी मरजी ऐ । जिसलै तुन्दे नेए जरासन्ध कोला डरदे न तां साड़ी ते गल्ल गै जान देओ ।

भीमसैनै गो ए जतीमी आला सन्दोख चंगा नई लगा । ओ आखन लगा—लालसा ते राजे दा बड्हा गुण हुन्दा ऐ । उस

तगड़े होने दा के लाहू जे अपनी ताकती दा पता गै नईं होऐ । ईआं नन्द कन्ने बेल्ले रौने आली जिन्दगी मिकी नई चंगी लगदी । जेड़ा आलक छोड़ै ते राजनीति गी ठीक चाली बरतै ओ अपने कशा ताकतवरै गी बी जित्ती सकदा ऐ । शक्ति कन्ने दा पेच बी होन तां ते आदमी मताकिश करी सकदा ऐ । मेरा शरीरक बल, कृष्ण हुन्दी चतराई ते अर्जुनै दी वीरता ए त्रैवै रलियै के किश नईं करी सकदे ? अस त्रैवै किट्टे रली जाचै तां अस जरासन्ध गी बी जित्ती सकने आं एदे इच शक्के आली जा डरै आली गल्ल गै कोई नई ।

कृष्ण होरें आखेया—जरासन्ध गी जरूर बड्डे या लोड़चदा ऐ । ओ ऐ बी इसै जोग । छयासी राजे बन्दी पाये देन । उस सौ राजें दे बलिदान दी स्कीम बनाई दी ऐ । ते होर चौदें राजें उप्पर हत्थ पान लगा ऐ । जे भीमसैन ते अर्जुन तयार होई जान तां अम्मी कन्ने चली पौड । अस चलाकी कन्ने उसी बड्डी ओड़गे ते बन्दी राजें गी छड़काई लैगे । मिकी ए सलाह पसन्द ऐ ।

युधिष्ठिर होरें गी ए गल्ल मनै नईं लग्गी । ओ आखन लगे—एदा अर्थ ते भीमसैनै दी ते अर्जुनै दी बलि चढ़ाना ऐ । ए दमै माढ़ी अक्खी दी लो न । चक्करवर्ती बनने गिरौ में इनें गी नेए खतरनाक कम्मे उप्पर नईं भेजी सकदा । इस थमां लक्खां दर्जे खरा ऐ जे अऊं चक्करवर्ती बनने आला बचार गै छोड़ी ओड़ं ।

अर्जुन बोलेया—जिस जिन्दगी इच बहादरी दी गल्ल गै कोई नईं होऐ ओ के जीन जीना होआ । असें एडे कुलै इच जन्म लैता दा ऐ । इक क्षत्रिय इच भायें सारे गुण की नईं होन पर जिन्ना चिर ओ अगें बदिऐ जोर नईं लान्दा ओदा जस्स नईं हुन्दा । उत्साह गै ते कामयाबी दी कुञ्जी ऐ । अस जेकर हिम्मती कन्ने कम्म करचै तां किस्मता गी बी जित्ती लैनें आं । इक तगड़ा आदमी बी जे लापवाही करै ते जिन्ने साधन ओदे कोल हँन ओबी नईं बरतै तां ओबी फेल होई जन्दा ऐ । अपनी शक्ति दा पता नईं होने करी मते फेल हुन्दे न । असें गी पता ऐ जे शक्ति शाली आं । असें गी

अपना पूरा जोर लाने इच कोई डर नई ऐ। युधिष्ठिर होर ए की सोचन जे अस ए कम्म करने जोग नई। जिसलै अस बुद्धे होई जागे तां भगमें टल्ले लाई लैगे ते बनें गी ठुरी जागे ते उत्थे जाइयै तपस्या करदे रौगे। इसलै ते जिन्द मारी लोड़चदी ऐ। ते बहादरी दे कम्म कीते लोड़चदे न। ईऐ साड़े कुलै दी परम्परा ऐ।

कृष्ण होर ए गल्ल सुनिये बड़ खुश होऐ ते आखन लगे भरत खानदान ते कुन्ती दा पुत्तर अर्जुन मनासत्र गै सलाह देआ करदा ऐ। मौत ते सारें गी औदी गै। उस थमां न बीर बचदा ऐ ते न डराकल।

पर क्षत्रिय दा फर्ज इऐ जे ओ अपने कुलै ते पतिष्ठा वारे इच सच्चा रवै। ईऐ सारें कशा बड़ा फर्ज ऐ। सचाई दी लड़ाई इच अपने दुश्मने उप्पर बिजे पाना ते शान कन्ने जिताना।

शेकड़ युधिष्ठिर होरें गी सारें दे इकमतै गी मन्नना पेया जे जरासन्ध गी खत्म कीता लोड़दा ऐ। ईऐ उन्दा बड्डा फर्ज ऐ।

कमाल ऐ जे इस गल्लै बातै इच ईआं बभोन्दा जे अज्जै कल्लै दी गल्ल बात होऐ। शक्ति शाली लोग पराने समें इच बी ईआं गै दलीलां दिन्दे हे जियां अज्ज दिन्दे न।

०००

ए फल लेया ते राजे गी दित्ता ते शीर्वाद दित्ता—“ए लौ । तुन्दी इच्छया पूरी होई जाग ।”

राजे नै फल दियां दौं फाड़ियां कीतियां ते इक इक दौनें रानियें गी दई ओड़ी । उस अपनी सगन्ध पूरी करने मूजब ईयां कीता । फल खाने दे किश समें परैन्त दमैं गर्भवतियां होई गइयां । समें उप्पर प्रसूता होई । पर खुशी दे थार सगुआं दुःख गै होआ । दौनें रानियें अद्धा अद्धा जागत जम्मेया । उस मास दे लोथड़े गी दिक्खियै कैंक औन्दी ही । पर ओ हिस्से ऐ इक्कै जागतै दे हे । दौनें दी इक इक अवख, इक इक जड । अद्धा अद्धा चेहरा ते इक इक कन्न ।

दुःखी होए दे उनें नौकरें गी आखेया जे टल्ले इच बन्निये इनें गी कुतै बाहर सुट्टी आओ । नौकरें हुकमै मताबक ऊंआ गै कीता टल्ले इच बन्नेया ते गली इच कूड़े दे ढेरै उप्पर सुट्टी आये ।

इक मर्दार भक्खी राकशी तुआई आई निकली । ओ मास दे दो लोथड़े दिक्खियै बड़ी खुश होई । उस दौनें गी किट्टे कीता ।

परमात्मा दी करनी ओ अद्धे अद्धे हिस्से ठीक चाली जुड़ी गे ते जागत बनी गेया जीन्दा जागदा ते ओदे सारे अंग ठीक ठाक हे । कुतै रुआल भर फर्क नईं हा । राकशी बड़ी हरान होई । ओदी जागतै गी मारने दी इच्छा नईं होई । उस इक बड़ी शैल जनानी दा रूप धारेया, राजे कोल गई । ते जागत उसी पेशा कीता “ए तुन्दा जागत ऐ ।” राजा बड़ा खुश होआ ते उस ओ जागत रानियें कोल भेजी दित्ता जागतै दा नां जरासन्ध पेआ । ओ शरीरक बलै इच बड़ा तगड़ा हा । पर इक कमजोरी ओदे शरीर इच रेई गई । ओ दौं अद्धे अद्धे शरीरें दा बनेदा हा इस करी जे सक्खर जोर लाया जा तां ओ परतियै बक्ख २ होई सकदे हे ।

ए मजेदार कहानी इक बड़ा तत्थ दसदी ऐ जे बक्ख २ होए दे हिस्सें गी अगर किट्टे जोड़ेया बी जा तामी ओ कमजोर रौंदे न । ते कुसै लै बी बक्ख होई जन्दे न ।

जिसलै जरासन्ध गी जित्तना ते कन्ने उसी मारी ओड़ना पक्का निश्चित होई गया तां कृष्ण जी नै आखेया—हंस हिडम्बक ते कैस ते उन्दे होर साथी जेड़े जरासन्ध दे दोस्त हे मरी भुरी गेदे न । हुण ओ बक्खरा छण्डोई गेदा ऐ । इस करी उसी मारने दा ए बड़ा ठीक मौका ऐ । इसलै फौज कन्ने लड़ने दा लाभ नई । उसी द्वन्द जुद्ध गित्तै सुआका देओ ते बड़ी ओड़ो ।”

उस समें दे निजमें मूजव कुसै क्षत्रिय गी कोई ललकारै तां उसी ओ चैलेंज मन्जूर करी लैना हुन्दा हा । ते द्वन्द जुद्ध करना पौन्दा हा । जुद्ध भामें शस्त्र लइयै करो ते भामें सक्खने हत्थें । ए दूई किसमें दा जुद्ध ते सिद्धा २ मौती गी आला देने आली गल्ल ही । इक बारी जप्फी लग्गी तां इक न इक जरूर मरोन्दा हा । ए क्षत्रियें दी परम्परा ही ते कृष्ण जी नै इससै दा सहारा लेया ते जरासन्ध गी मारी ओड़ैया ।

उनें साघुएं दा भेस धारेया, रुक्खें दी शाल लाई ते हत्थें इच द्रुवां लेइयां । इयां इस रूपे इच ओ मग्ध राजै इच दाखल होए ते जरासन्ध दी राजधानी पुज्जे ।

जरासन्ध गी कचे सुखने आये ते लक्खन माड़े लब्बन लगे । उस औने आले भै गी टालने गित्तै शान्ति पाठ ते पर्योग करवाये ते आप्पू बर्त रक्खे । कृष्ण जी, भीमसैन ते अर्जुन बिना अस्त्र-शस्त्र लेदे मंहलै इच दाखल होए । ओ शकला सूरता ते चेहरे मोहरे थमां बड़े पुज्जे दे महात्मा सेई हुन्दे हे । जरासन्ध नै उन्दा स्वागत कीता । भीमसैन ते अर्जुन चुप्प गे रे उनें ओदे स्वागतै दा उत्तर नई दित्ता जे ऐमे भूठ नई बोलना पवै । उन्दे थार कृष्ण जी बोले । ए दवें तपस्या करा करदे न ते इनें मौन रक्खेदा ऐ । ए अद्धी रातीं पिच्छुआं बोलदे न । जरासन्ध नै जग्ग शाला इच उन्दी खातर कीती ते आप्पू मैहलें टुरी गया ।

जरासन्ध दा ए नियम हा जे ओ तपस्वी महात्में गी उन्दी सुविधा मताबक मिलदा हा । इस करी ओ इनें गी अद्धी रातीं मिलन आया । उन्दी चाल ढालें थमां जरासन्ध गी शक पेया ।

उस दिक्खेया जे उन्दे हत्थें उप्पर धनुष चलाने दे नशान न । ते कन्ने चेहरे मोहरे थमां क्षत्रिय सेई हुन्दे न । जरासन्ध नै आखेया सच्चोसच दस्सो तुस कुण ओ ? तां उनें बी साफ गै आखेया अस थुआड़े शत्रू आं । तू साढ़े कन्ने हुण गै लड़ी लै । साढ़े दौनें चा कुसै कन्ने लड़ी लै । उन्दी जानकारी लेइयै जरासन्ध नै आखेया—कृष्ण, तू ते ग्वाला एं । ते अर्जुन अजें जातक पूतक ऐ । भीमसैन अपने शरीरक बलै करी पर्सिद्ध ऐ । इस करी अऊं ओदे कन्ने गै जुद्ध करनां । भीमसैनै कोल कोई शस्त्र नईं हे जरासन्ध नै वा बिना शस्त्रें गै लड़ना मन्नी लैता ।

भीमसैन ते जरासन्ध ताकती इच बरोबरी दे हे । उप्परो-तली तेरां दिन जुद्ध करदे रे । नां ओ वसोए ते नां किश खादा पीता । कृष्ण ते अर्जुन कदें खुश ते कदें निम्मोभान होई जान । चौदमें दिन जरासन्ध किश हुट्टे दा सेई होन लगा । कृष्ण होरें भीमसैनै गी शारा कीता जे खीरी दमें उप्पर आई गया ई । भीमसैनै उसी इकदम चुक्की लैता ते भुआटनियां करान लगा । कोई सौ भुआटनियां कराइयै जोरे नै भुजा वट्टेआ ते जडें दा फगड़ियै बशकारा चीरी ओड़ेया—ते दौं हिस्से करी ओड़े । भीमसैन जित्तै दी खुशी कन्ने गर्जेया ।

ओ दौं हिस्से फी जुड़ी मिली गे ते जरासन्ध परत्तियै जीन्दा होई गया ते उस भीमसैनै उप्पर जोरेयां हमला कीता ।

भीमसैन ए दिक्खिए हौसला ढान लगा । उसी थौह गै नईं आवैं जे के करै । कृष्ण जी नै दातन लई बशकारा चीरी ते इक हिस्सा ताईं ते दूआ तुआईं सुट्टी ओड़ेया । भीमसैन शारा समभी गया । परत्ति ए जे उस जरासन्ध दे दो टोटे कीते तां उस बक्खरे बक्खरे पासै सुट्टे । ओ परत्ति ए नईं जुड़ी सके ते ईयां जरासन्ध दी मृत्यु होई ।

उनें बन्दी राजें गी मुक्त कीता ते जरासन्ध दे पुत्तारै गी मग्घ दा राजा बनाई ओड़ेया ए कम्म तोड़ चाढ़िऐ कृष्ण, अर्जुन ते भीमसैन इन्दरप्रस्थ परतोऐ ।

जरासन्ध दे मरने परैन्त राजसू जगै आस्तै रस्ता पद्रा होई
गेया । पाण्डवें खूब गज्जी बज्जिए जग कीता । युधिष्ठिर होर
'चक्कर वर्ती' राजा बनी गे । सारे जगै इच इक्कै ऐ दुर्घटना
होई । जिसलै सारे जशन मुक्की गे ते पहलें पूजा कोदी होऐ
एदे पर बचार होन लगा । शिशुपाल राज दवारै इच कृष्ण
जी दी बेज्जती करन लगा ते बकवास करन लगा । कृष्ण जी
कन्ने लड़ाई होई ते उनें सुदर्शन चक्करै कन्ने ओदा सिर बड्डी
ओड़ेया ।

एदी कहानी तुस अगें सुनो ।

०००

पहला मान कुसी ?

कुसै गल्लै दा बरोध करियै सभा थमां ठुरी औना कोई नमीं गल्ल नई । अज्ज कल असैम्बलिये च उसी 'बाक-औट' आखदे न महाभारत पढ़ो तां असें गी पता लगग जे 'बाक-औट अदू' बी हुन्दे हे ।

भारत वर्षे इच अदू किन्ने गै राजे हे ते ओ बक्ख २ ते सतन्तर हे । कुसै दी घोच नई ही । सारे देसै दा धर्म ते संस्कृति इक्क ही । पर इक राजा दूए राजै दी आजादी दा मान करदा हा । कदे कोई मौका आवै तां कोई महत्वाकांक्षी राजा बाकी राजे गी अपनी सत्ता मनाने गितै आखदा हा । नामी राजे बी कोई खास बरोध नई हे करदे ते उसी बड्डा मन्नी लैन्दे हे । सारे थमां हामी भराइयै फी ओ राजा 'राजसू' जग रचान्दा हा ।

जिनें मन्ने दा हुन्दा हा ओ सारे राजे उत्थे किट्टे हुन्दे हे ते उसी अपना मुखिया मन्नी लैन्दे हे । रस्मै रवाजे मूजब पाण्डवे सारे राजे गी सदेया । जरासन्ध ते मरोई गेदा हा । उनें राजसू

जग्ग रचाया । फी सारे दा जथाजोग मान करने दा समां आया । पहला मान उस महमानै दा कीता जन्दा हा जेड़ा सारें दा मन्नन थार होऐ । सुआल उठेया जे पहला मानै दा थार कुसी थोऐ । भीषम पितामह होरें आखेया जे पहली पूजा द्वारका दे महाराज श्री कृष्ण हुन्दी होनी चाही दी ऐ । युधिष्ठिर हुन्दी अपनी रा बी ईऐ ही ।

युधिष्ठिर होरें ए सलाह मन्नी ते सहदेव गी श्री कृष्ण जी दी परम्परा नुसार पूजा करने गित्तै आखेया । चेदी दा राजा शिशुपाल कृष्ण जी कन्ने घृणा करदा हा । बदी सदा भलाई कन्ने घृणा करदी ऐ । ओदे कशा नई जरोआ । उनै बड़ी घृणा कन्ने गड़ाका सुट्टेया ते आखन लगा—ए के मखौल ऐ ? ए के बेन्याई ऐ ? पर मिगी एदे च चर्ज बी नई बभोन्दा । सिक्ख मत्त लैने आला शास्त्र बिरुद्ध जम्मे दा ऐ । (ए पाण्डवें उपपर कटाक्ष हा ।)

ते सिक्ख मत्त देने आला बी ओदा पुत्तर ऐ जेड़ी उच्चता थमां नीचता गी जन्दी ऐ । ए गल्ल उस भीष्म हुन्दे बारे इच ग्लाई । भीष्म होर गंगा दे पुत्तर हे । ते नदी उच्चै थारै थमां नीन्दे थारै गी गै जन्दी ऐ ।)

ते जिस पूजा कीती ऐ ओ सहदेव बी शास्त्र बरुद्ध गै जम्मे दा ऐ । ते जेदी पूजा कीती ऐ ओदे बारे इच के आखां ? ओ ते जमान्द्रू गै मूरख ऐ ते ग्वालें दा जागत ऐ ।

इत्थें किट्टे होए दे राजे कोई जल्ले नई जे इस बारे इच ओ किश नई बोलडन । इत्थें लायक आदमियें दी कदर गै कोई नई । किट्टे होए दे राजें चा किश राजें शिशुपाल कन्ने हामी भरी ।

उन्दी शाबाश थमां उसी होर चुक्क थोई शिशुपाल युधिष्ठिर होरें गी आखन लगा—“इन्ने राजे किट्टे होए दे न तूं उन्दे चा कृष्ण दी पहली पूजा कीती ऐ ए बड़ी बेज्जती आली गल्ल ऐ । जोग ब्यक्तियें दा मान नई करना ते मूर्खें दा मान करना ए दमै

बड़े भारे अपराध न । ए भली गल्ल ऐ जे तू बनना ते चक्कर वर्ती ते तुकी पता इन्नी गल्लै दा बी नई ।

उसी होर रोह चढ़ेया ते ओ भखदा गया—तू इन्नें राजें ते बीर बहादरें गी आपू सदेया उनें गी तू खातरी च गै नई आन्दा । उन्दा नरादर करिऐ ते पहला मानै आला थार तू उस ग्वाले गी दई ओड़ेया ऐ । जिसी कोई जानदा गै नई । कृष्ण दा बब्ब वसुदेव उग्रसेनै दा नौकर गै ते हा । ओ ते राज बन्सै बिच्चा बी नई ।

ए कोई मनासब थार हा जां मनासब मौका हा तू देवकी दे पुत्तर कृष्ण कन्ने ए पक्ख पात की कीता ऐ ? ए गल्ल पाण्डु पुत्तरें गी कोई सोभा दिन्दी ऐ ?

ओ पाण्डवो ! तुस हजे अनदादिये ओ, शड़े नौजवान ओ । किश सिक्खेया नई । तुसें गी राजनीति चलाने दा सलीका नई आन्दा । इस पागल भीष्मै तुसें गल्ल रस्तै पाया ऐ, तुसें गी बुद्धू बनाया ऐ । कृष्ण कुण होआ ? ओ कोई राजा नई ।

एडे एडे राजें दी भरी सभा इच तुगी उन्दा अपमान करने दी जुर्त कियां होई ।

तू कृष्ण दी पहली पूजा कियां कीती ?

मान्नै दा पहला थार कियां दित्ता ?

उमरी इच बड़डा होने दा गुण बी ते ओदे कोल नई । ते जे तू बगो केसें गी गै बड़ा मान दिन्नां एं तां ओदे बब्बै दा मान करना हा । ओ जीन्दा ऐ ।

तुद उसी अपने गुरु दी पूजा दा थार नई हा दित्ता लोड़चदा । थुआड़े गुरु ते द्रोणाचार्य होर न । ओ इस सभा इच मजूद न । कृष्ण कोई जग कराने इच बड़ा तजबकार ऐ जे तू उसी ए मान्नै आला थार दित्ता ऐ ? ब्यास होर एडे विद्वान न, उन्दी मजूदगी इच ए नई होई सकदा । जे तू

मान्ने दा पहला थार भीष्म गी गै दित्ता हुन्दा तां ओ एदे कशा चंगी गल्ल ही । भाएं ओ सत्तर बत्तारा ऐ पर तुन्दे कुलै दा सारे कशा बड्डा बडेरा ते ऐ । तुन्दे कुल गुरु कृपाचार्य बी इस सभा इच मज्जूद न । सारे शास्त्रें दे अनुभवी ते बीर अश्वत्थामा बी इत्थें मज्जूद न । उनें गी बसारिऐ तूं कृष्ण गी कियां चुनी लैता ?

इत्थें किठु होए दे राजें इच दुर्योधन मज्जूद ऐ । परशुराम हुन्दा शगिर्द कर्ण बी ऐ । ए ऊऐ शेर नईं जेड़ा इक्कला गै जरासन्ध कन्ने लड़ेया हा ते उसी हराई दित्ता हा । उसी छोड़िऐ ते जातकें आलें पक्ख पात करियै तूं पूजा दा पहला थार कृष्ण गी मन्नेया जेड़ा न शाही खानदान बिचा ऐ न पढ़े लिखे दा ऐ न कोई महात्मा ऐ, ओ ते बडेरी उमरी दा बी नईं । ओ ते इक नीच ग्वाला ऐ होर कक्ख बी नई । ईआं तूं असैं सारें गी इत्थें सहिए साढ़ा अपसान कीता ऐ ।

ते हे कृष्ण ! तूं ए सब किश जानदे होए पहलें मन्नन थारै दी पूजा कियां मन्नी लैती ? ए ते करस्तै पेदे पाण्डवें थुआडे कशा गल्ली कराई ऐ । तूं अपना आप भुल्ली गया ऐ ? जां तुगी चंगी चलदी आवै करदी परम्परा गै भुल्ली गई ऐ । ए कुत्ते आडू जूठनै उप्पर हाबड़े दे पोने आली गल्ल नईं ? इस इज्जतै दी ते कोई पर्वाह गै नईं करदा । तुगी आपूं नईं लवदा जे ए नाटक खेडियै तूं अपनी बेजती आपूं कराई ऐ । ए ते अन्ने गी शैल शैल चीजां दस्सने आली गल्ल होई ऐ । ए ते इक खुसरे गी मटयार व्याही देने आली गल्ल ऐ । ए राजें जोग मान तुगी नईं पची सकदे ।

हुण ए पता लग्गी गया जे होने आला चक्कर बर्ती युधिष्ठिर बुड्डा ठेरा भीष्म ते कृष्ण इक्कै बोढ़ी दियां गुल्लां न ।

शिशुपाल ए कठोर वचन बोलियै अपना थार छोड़िऐ उट्टी चली पेया ते होरने गी बी आखन लगा जे उठी आओ । इस अपमानै उप्पर अपना रोह प्रगट करो ।

कई राजे ओदे पिच्छें दुरी गे ।

शकुनि दी चाल

राजसू जग होई गेया । इस निमित्त आये दे राजे, महात्मा ते बड़े लोक अपने अपने डेरें गी परतोई गे । व्यास होर बी बिदा लैन आये । युधिष्ठिर होरें खड़ोइऐ उन्दी बन्दना कीती, सिंहासनै उप्पर बहालेया ते आपूँ बी बई गे । व्यास होर बोले—हे युधिष्ठिर तुगी चक्कर वर्ती पद प्रापत होई गया ऐ । तुस एदे जोग बी ओ । हुण परमात्मा अगो इऐ प्रार्थना ऐ जे कुरु बैन्स होर फलै फुल्लै । तुस एदी होर उन्नति करो । हुण मिकी अपने आश्रमै गी परतोने दी जाजत देओ ।

युधिष्ठिर होरें अपने बड़ेरे ते गुरु व्यास हुन्दे चरण बन्दे ते आखन लगे—महाराज ! मेरियां किश शंकां न ते तुस गै उनें गी हटाई सकदे ओ । स्याने लोकें दा कथन ऐ जे किश अनिष्ट होनी दस्सने आलियां गल्लां होइयां न । होनी दियां गल्लां शिशुपाल दी मृत्यु कन्ने मुक्की गइयां जां शुरु होइयां न ? अगो होर किश के होने आला ऐ ?

भगवान वेदव्यास होर बोले—बेटा ! अगले तेरां बरे मते दुख ते कष्ट भोगने आला समां ऐ ।

ए जेड़े उत्पात होआ देन उन्दे थमां बभोन्दा ऐ जे क्षत्रियें दे कुलै दा नास होई जाग ।

ए उत्पात शिशुपाल दी मौती कन्ने नईं मुक्की गे । हजे ते बड़ा किश होना ऐ ? सैकड़े राजा मरोई जाडन । पुराना राज गे बदलोइ जाग । थुआड़े ते थुआड़े भ्रायें ते धृतराष्ट्र दे पुतरें बश्कार दुश्मनी पौनी ऐ, बैर बधना ऐ, बड़ा भारी जुद्ध होना ऐ ते क्षत्रियें दे कुलें दा भलेयां नास होई जाना ऐ । होनी गी कुण रोकेया ? तूं अपनी सचाई उप्पर डटेया रौ । चुकन्ने होइयै हुशयार होइऐ राज कर । अच्छा ! हुण अऊं चलना ! ए आखियै उनें युधिष्ठिर गी शीर्वाद दित्ता ते बिदा होई गे ।

व्यास जी दे शब्दें करी युधिष्ठिर जी दा मन बड़ा गमगीन होआ । उनें गी दुनियदारी ते उन्नति कन्ने गे नफरत होई गई । अपनी जिन्दगी गे बिरथा सेई होन लगी । अपने भ्रायें गी दस्सेया जे कुलै दा नास रुकदा नईं लबदा । उनें गी जिन्दगी भार सेई होन लगी ते कन्ने कौड़ी लगन लगी । औने आले समें दा बचार करिए उनें गी बराग होन लगा । भाग दी जोर जबरदस्ती कीयां जरनी ऐ ?

अर्जुन आखन लगा—‘तुस राजा ओ ! राजा होइयै तुसें गी ईआं क्षुब्ध नईं होआ लोड़चदा । होनी कन्ने टक्कर ऐ आओ हिम्मत करिए ते अपना फर्ज नभान्दे होइ करचै ।’

युधिष्ठिर होर बोले—आओ ! परमात्मा साड़ी रखेया करे ते चंगी बुद्ध देऐ । जित्थूं तोड़ी मेरा तल्लक ऐ औं सगन्ध खन्ना जे अऊं भ्रायें कन्ने जा रिश्तें साकें कर्त्तें अगले तेरां बरे कौड़ा नईं बोलड । लड़ाई दे कुसै बी मौकें गी टालड । अऊं कदें रोहें नईं होड । रोह गे दुश्मनी दी जड़ हुन्दी ऐ । कोई रोहै आली गल्ल जां दुश्मनी बधाने आली गल्ल करनी गे नईं । ईआं करगे तां भगवान वेदव्यास

हुन्दे उपदेसै कोला लाभ होई सकदा ऐ । सारे भ्रायें आखेया ठीक ऐ ईआं गै करगे ।

पहली घटना गै जेड़ी होई ते जेदे कारण कुरुक्षेत्रे दी भूमि लहुऐ कन्नै लतपत होई गई चौपड़ै दी खेड ही । ए चौपड़ै दी खेड गै मूल कारण ही जेदे बिच शकुनि नै युधिष्ठिर गी फसाई लैता । शकुनि दा दमाग शरारतें पासैं चलदा हा ते ओ दुर्योधनै दा खास मशीर हा । पर समझदार ते भलामानस युधिष्ठिर जूआ खेडने गी की मन्तेया ? जेदे एडे भयंकर नतीजे निकली सकदे हे ओ गल्ल उस की मन्ती ?

सारें कशा बड़ा कारण ए हा जे युधिष्ठिर होरें पक्का रादा करी लेया जे भ्रायें कन्नै मित्तरता कन्ने रौना उन्दी मरजी दा बरोध नई करना । इस करी जिसलै दुर्योधनै पासेया चौपड़ खेडने दी फर्माँश आई तां उस टालन नई होई । उस समय दा किश निजम बी नेआ हा जे ईऐ नेई बरोबरी दी खेड होऐ ता नां बी नई करन हुन्दी ही । आपूँ इच मित्तर भावना ते सदभावना पैदा करने गित्तै उन्नै नेई गल्ल मन्ती लैती जिस घृणा ते मौती दा जहरी बी राई दित्ता ।

किस्मत साथ नई देऐ तां स्कीमां भायें केडियां चंगियां की नई सोचों कक्ख नई बनदा । भागें सामनै बड़ी कोला बड़ी लयाकत बी फेल होई जन्दी ऐ । जे किस्मत चंगी होऐ तां साड़ियां गलितयां बी साड़े फायदे गित्तै कम्म औन्दियां न ।

ताईं युधिष्ठिर होर इस चिन्ता इच घुलै दे हे जे कोई लड़ाई भगड़ा नई होऐ तुआईं दुर्योधन पाण्डवें दी उन्नति दिक्खी २ ईर्षा कन्ने भुज्जदा जा दा । राजसू जगै इच आनियै उस बड़ा किश दिक्खेया हा । दुर्योधनै अनसम्भ दौलत दिक्खी, मनमोहने ते भलेखैं पाने आले बलौरी दवजि दिक्खे ते युधिष्ठिर हुन्दे सभा मण्डपै दी कारीगरी दिक्खी । युधिष्ठिर हुन्दी उन्नति कशा चकित गै होई गेया । बाकी राजें गी पाण्डवें दे मित्तर ते साथी बनदे दिक्खियै उसी बड़ा सल्ल होआ । पाण्डवें दी स्मृद्धि करी ओ चिन्ता इच

इन्ना गल्लान होआ ते उसी इन्ना दुःख होआ जे उस कोल खड़ोते दे शकुनि हुन्दी गल्ल बी नई सुनी ।

शकुनि पुच्छन लगा—तूँ हौके कैसी भरा करनां ?

तुकी के दुःख ऐ ?

दुर्योधन बोलेया—अपने भ्रायें कन्ने युधिष्ठिर ईयां सोभदा ऐ जियां देवतें दा राजा इन्द्र । सारे किठे होए दे राजें दै दिखदे २ शिशुपाल बड़ो ओड़ेया पर कुसै गी बी अगें आनिये बदला लैने दी जुतं नई होई । सारे राजें युधिष्ठिर दी कृपा दृष्टि जित्तने खातर अपने हीरे जवाहरात ते मान मर्यादा ओदे अगें भेटा चाढ़ी ओड़ी । ईयां बभ्रोन्दा जियां ए सारे दे सारे राजे बपारी लोक होन । ए सारा किश दिक्खियै दुःखी नई होआं ते के करां । मिगी ते जीन गै जहर लग्गा करदा ऐ ।

शकुनि बोलेया—दुर्योधन ! पाण्डव थुआड़े भ्रातृ न । उन्दी उन्नति थमां तुगी ईर्षा नई कीती लोड़चदी । उनें गी जेड़ी जद्दी जादात थोई ऐ उसी भोगा दे न । भाग चंगे न बधा फला करद न । कुसै गी चंगी माड़ी नई आखदे । तूँ कैत दोखी बननां ?

उन्दी खुशी ते शक्ति कन्ने थुआड़ी मानता थोड़ी घटदी ऐ ?

थुआड़े भ्रा ते साक-रिश्ते थुआड़ी फर्माबदारी इच न । द्रोणाचार्य, अश्वत्थामा ते कर्ण थुआड़ी बक्खी न । भीष्मपितामह, कृपाचार्य, जयद्रथ, सोमदत्त ते मेरे हुन्दे होई—साड़े नेए साथी हुन्दे होइ तूँ दुखी की होएं ?

तूँ ते सारा संसार जित्ती सकनां एं । तूँ गमगीन नई हो ।

ए गल्लां सुनिए दुर्योधन आखन लगा—शकुनि जी । गल्ल ते ठीक ऐ जे मेरे इन्ने साथी न । अस पाण्डवें दे बरुद्ध जंग करिए उनें गी इन्दर प्रस्थै थमां की नई कड्डीं लाचै ?

शकुनि आखन लगा—नई, ए कम्म ऐडा सौखा नई । मिकी इक तरीका औन्दा ऐ युधिष्ठिर गी बगंर लड़े दे ते बिना रत्तू दा तोपा भुजा सुट्टे दे इन्दरप्रस्थै थमां कि गां कड्डीं लाना ऐ ।

दुर्योधन दियां अक्खीं खुशी कन्ने चमकन लगियां । पर उसी

गल्लै पर जकीन गै नईं आवै । आखर ओ पुच्छन लगा—मामा ए होई सकदा जे बिना कट्ट-बड्ड होए दे गै पाण्डवें गी जित्ती लैता जा ।

आखर थुआड़ी स्कीम के ऐ ?

शकुनि नै जवाब दिता—युधिष्ठिर गी चौपड़ खेडने दा बड़ा शौक ऐ । पर चौपड़ खेडना उसी औन्दा नईं ।

उसी ओ चालां नईं औन्दियां जेड़ा इक चलाक खलाड़ी जानदा ऐ । अस उसी चौपड़ खेडने गितौ सदचै ओ इसी क्षत्रियें दी परम्परा समझिये मन्नी लैग । मिकी इस खेडै दे सारे भेत औन्दे न । थुआड़े पासेया अऊं खेडड । युधिष्ठिर मेरे भा दा बच्चा होआ । अऊं तुकी नुआड़ा सारा राज ते धन-दौलत जित्ती देड । ते रत्तू दा तोपा बी भुजा नईं पौग । कोई लड़ाई नईं होग ।

०००

सादा

दुर्योधन ते शकुनि धृतराष्ट्र कोल गे । शकुनि नै गल्ल बात
शुरू कीती । आखन लगा महाराज । दुर्योधन कुसं गमै ते चिन्ता
कन्ने भुस्सा हुन्दा जा दा ऐ । ओदे मनै इच कोई बड़ा भारी सल्ल
ऐ । तुस नुआड़ा बचार गै नईं करदे । नेईं लापवाही पता
नईं की ऐ ?

धृतराष्ट्र दुर्योधनै गी बड़ा गै प्यार करदा हा उस दुर्योधनै गी
गलें लाया ते आखन लगा मिकी ते कोई कारण नईं सेई हुन्दा तूं
की दुखी एं ?

दुनिया दी केड़ी चीज ऐ जेड़ी थुआड़े कछ नईं । सारी
दुनियां थुआड़े अगै नौन्दी ऐ । सुगै इच देवतें आला लेखा सारे
सुख ते खुशियां थुआड़े अगै पिछें फिरदे न । तुकी दुखी होने आली
के गल्ल ऐ ? संसारें दे प्रसिद्ध बिद्वानें कशा तूं बेद, शस्त्र बिद्या ते
होर इलम सिक्खे दे न । जेठा पुत्तर होने करी राजें दा बारस बी

तू ऐं । राज बी तुकी गै थोए दा ऐ । हुण पिच्छें के रेई गया ऐ ? दुआसी आली के गल्ल ऐ ? दस्सो !

दुर्योधनै जवाब दित्ता—बापू जी ! जियां कौई बी ऐरा गैरा जीन्दा ऐ ऊंआं अऊं जिया करनां । ऊंआं गै ढिड्डु भरी लैनां, ते टल्ले लाई लैनां । पर ए कोई जीन थोड़ा ऐ ? नेआ जीन जीने दा के लाह ऐ ? फी उस इक इक करिऐ सारियां गल्लां बुहासरियां जेड़ियां नुआड़े ढिड्डे च घृणा ते द्वेष बधा करदियां हियां ।

जिनें नुआड़ा जीन गै अम्बला करी ओड़े दा हा । पाण्डवें दी राजधानी दी मैहमा सनाइयै आखन लगा इन्ना दुख मिगी अपना सब किश नष्ट होई जाने पर नईं हुन्दा जिन्ना इस उन्नति गी दिक्खिऐ होआ ऐ । फी आखन लगा—सन्दोखी जीन क्षत्रियें दा गुण नईं । डरने कन्ने ते दया करने कन्ने क्षत्रियें दा मान नईं रौन्दा । युधिष्ठिर दा मान ते प्रभुता दिक्खियै मिकी अपना धन ऐश्वर्य किश सेई नईं हुन्दा । पाण्डवें दा बड़ा वादा होआ ऐ अस ते निगरी गे आं ।

धृतराष्ट्र बोलेया—बच्चुआ ! तू पटरानी दा जेठा पुत्तर, तू गद्दी दा बारस, तू जुवराज ते कौरवें दे कुलै दा टिक्का । तुकी पाण्डवें कन्ने घृणा नईं करनी चाही दी । अपने साक सर्वन्धियें कन्ने दुख करियै खास करी जिसलै उन्दे च कोई दोश बी नईं होऐ बड़ा पाप हुन्दा ऐ । एदा नतीजा छड़ा दुःख ते मौत गं हुन्दा ऐ । युधिष्ठिर जनेह निष्कपट मनुक्खै कन्ने तू घृणा की करना ए ? उन्दी उन्नति बी ते साड़ी गै उन्नति ऐ । साड़े मित्तर उन्दे मित्तर न । उसी ते साड़े बारे इच कोई ईर्खा जां द्वेष नईं ऐ । तुम्मी ते बीरता ते कुलै दी दृष्टि कन्ने उस जनेआ गै एं । तू अपने भ्राऊ दा दोखी की बनें ? तुकी द्वेष नईं करना लोड़चदा ।” राजा अपने पुत्तरै गी ते बड़ा प्यार करदा हा पर कदें कदें मनै इच जे किश आवै जां ठीक होऐ ओ बी सनाई ओड़दा हा ।

दुर्योधनै गी बब्बै दी सिक्ख नईं सखाई । किश खिञ्जिऐ ते बड़बोला होइऐ आखन लगा—जिस मनुक्खै गी सधारन बुद्धि नई

होए ओ भायें केडे शास्त्र पढ़ी जा ओ उस कड़छी आडू गै हुन्दा ऐ जेड़ी किन्ने गै मद्धरें इच फिरदी ऐ पर न उसी किश सुआद औन्दा ते न किश लाह हुन्दा ऐ । तुसैं गी राजनीति दा ज्ञान ते ऐ पर राजनीति गी बरतने आली बुद्ध नई । नई ते तुस ईआं नई आखदे । दुनियांदारी होर गल्ल होई राज चलाने आली गल्ल बक्खरी होई । बृहस्पति होरें बी गलाये दा ऐ—सन्दोख करना ते जरना सधारन लोकें दे गुण न पर ए राजें दे गुण नई । भायें न्यां कन्ने होए ते भायें बेन्याई कन्ने राजे दा धर्म ऐ जित्त प्राप्त करदे जाना । दुर्योधन राजनीति दियां बड़ियां मसालां देन लगा ते माड़िं चीजें गी चंगा सिद्ध करन लगा ।

शकुनि बिच गाहनी पेई गेया ते अपनी सारी योजना समझान लगा । कियां युधिष्ठिर गी सादा देना, चौपड़ खड़ाना, उसी हराना ते नुआड़ा सब किश जित्ती लैना, ते सब किश बिना लड़ाई दे गै करी लैना ।

शकुनि बड़ा दुष्ट हा आखन लगा—तुस छड़ा युधिष्ठिर गी चौपड़ खेडने दा सादा भेजो । बाकी अऊं साम्भी लैड ।”

दुर्योधन आखन लगा—“शकुनि पाण्डवें दी सारी धन दौलत माढ़े गित्तै जित्ती लैंग । ते जुद्ध बी नई करना पौग । तुस इक बारी मन्नी जाओ ते युधिष्ठिर गी सादा भेजो ।”

धृतराष्ट्र आखन लगा—थुआड़ी गल्ल मिकी ठीक नई लगदी । बिदुर होरें गी पुछने आं । ओ ठीक सलाह देडन ।

पर दुर्योधनै दी मरजी बिदुर हुन्दी सलाह लैने दी नई ही । ओ बबै गी आखन लगा—बिदुर होरें धर्म शास्तर खोली कडने न । ओदे कन्ने साड़ी गल्ल नई तोड़ चढ़ती । राजें दी नीति धर्म शास्तरें दे उपदेसैं थमां बक्खरी हुन्दी ऐ । एदे इच दयाधर्म नई हुन्दे । सफलता गै एदी घसवट्टी हुन्दी ऐ । बिदुर होर ते मिगी दिक्खी गै नई सखांदि । ओ ते पाण्डवें दा पक्ख पात करदे न । ए ते तुसैं गी बी पता ऐ ते मिगी बी पता ऐ ।

धृतराष्ट्र आखन लगा—पाण्डव ताकतवर न । मेरे बचारे मूजब उनें गी शत्रु बनाना ठीक नई । चौपड़ कन्ने बैर गै वधना ऐ । इस खेडै दे नतीजे हई थमां बाहर होई जाने न । असें गी ए कम्म नई करना चाही दा ।

पर दुर्योधन जिद्दी परई गेदा हा आखन लगा—समझदारी दी नीति ईऐ ऐ जे अस डरचै बिल्कुल नई । ते अपने जतनें कन्ने अपने बचा दे तरीके करी लैचै । इस बेल्लै अस तगड़े आं हुण गै फाई की नई मकाई लैचै । दूरन्देसी आली गल्ल ते ईऐ ऐ । इक बारी मौका खुज्जी गया तां परतिऐ नई औना । चौपड़ दी खेड कोई असें नमीं थोड़ी कड़ी ऐ चेचा पाण्डवें गी हराने गित्तै । ए ते पराने जमाने दा चलदा आवं दा शुगल ऐ । क्षत्रिय राजे खेडदे आये न । इस बेल्लै ते बिना लड़े भिड़े दे साड़ी गल्ल तोड़ चढ़ा करदी ए । एदे इच के तराज ऐ !

धृतराष्ट्र आखन लगा—“बेटा, अऊं बुड़ा होई गयां । जियां थुआड़ी मरजी ऊंआं कर । पर जिस रस्तै तूं पेया एं मिकी चंगा नई लगदा । मिकी बभोन्दा ऐ तूं पिछों पछतागा । पर किश भागें दा गै फेर लबदा ऐ ।”

आखर धृतराष्ट्र दुर्योधनै दी दलीलें अगें हारी गया । हुट्टी गेदा हा ते किश बेबस बी होआ करदा हा । ओ दुर्योधनै गी इस माड़े कम्मै थमां वाज नई रखी सकेया ।

खीर आपू मन्ती गया । ते चौपड़ खेडने गित्तै मण्डुआ बनाने दी आज्ञा दई दित्ती । फी बी चोरिया उस बिदुर हुन्दे कन्ने गल्ल बात करी लैती ।

बिदुर होरें आखेया—हे राजा साढ़े कुलै दा नास होई जाग । साढ़े इच कदें नई मुक्कने आले झगड़े फसाद शुरु होई जाडन ।

धृतराष्ट्र अपने पुतरै दी गल्ल मन्ती बैठा दा हा आखन लगा—भाग चंगे लोड़चदे न । खेड़ ते बुरी नई । ते ज किस्मत गै खुट्टी ऐ तां ओदा उपा कोई नई । की जे किस्मतै अगै कुसै दी पेश जन्दी नई ।

बाजी

बिदुर होरें गी दिक्खिए युधिष्ठिर होरें घाबरिए पुच्छेया तुस निम्मोभान की ओ ? हस्तनापुरै आले साढ़े भ्रा ते राजीबाजी न ?

महाराज धृतराष्ट्र ते राजकमार ठीक-ठाक न ?

बिदुर होरें औनें दा मनशा दस्सेया । हस्तनापुरै आलै ते ठीकठाक न । थुआड़ा के हाल ऐ ?

अऊं महाराज धृतराष्ट्र हुन्दे पासेया तुसें गी सदन आयां । उत्थें खेडें दा नमा मण्डुआ बनेया ऐ जियां तुसें इत्थें नमें मैहल बनाये न । महाराज होरें आखेया ऐ जे तुस ते सारे भ्रा हस्तनापुर आओ, दिक्खो सुनो ते इक बाजी चौपड़ै दी बी खेडी जाओ । फी अपनी राजधानी गी आई जाना ।”

युधिष्ठिर होरें बिदुर जी गी सलाह पुच्छी । बाजी आली खेडै करी क्षत्रियें इच लड़ाई भगड़े शुरू होई पौन्दे न । समझदारी दी गल्ल ऐ जे इसी टालेया गै जा । असें ते तुन्दी सिक्ख मन्ननी ऐ । जियां तुस आखो उंआं गै करचै ।

विदुर होरें आखेया—ए कोदे कोला छप्पा गुज्जा ऐ ? जूए-
बाजी दे बड़े औगण न । में ते इस गल्लै दा बरोध कीता हा ।
फी महाराजा धृतराष्ट्र होरें मिगी तुसैं गी सद्न भेजी गै ओड़ेया ।
हुण जियां थुआड़ी मरजी होऐ करी लौ ।

युधिष्ठिर होरें गी चेतावनी ते थोई पर ओ फी बी अपने भ्रायें
गी लेइऐ हस्तनापुरै गी टूरी पे ।

कोई पुच्छी सकदा ऐ जे युधिष्ठिर होरें ए सादा की मन्नेया ।
एदे त्रै कारण होई सकदे न । लोक काम-वासना, जुआ ते शराब दे
धीन होइऐ जानदे होई बी अपने पैरें कुआड़ी मारदे न ।

युधिष्ठिर गी जूआ खेडने दा बड़ा शौक हा । उस समें दी
परम्परा ही जे क्षत्रिय लोक जूआ खेडने दे सादे गी परतान्दे नईं हे ।
इक त्रीया कारण बी हा । जिसलै व्यास होरें समझाया हा जे आपसी
झगड़ें करी कुलै दा नास होई जाग तां युधिष्ठिर होरें सगन्ध चुक्की
ही जे ओ कोई नेआ कम्म नईं करडन जिस करी किसै किस्में दी
नराजगी पैदा होऐ । इसकरी उनें धृतराष्ट्र हुन्दा सादा मोड़िऐ
उनें गी नराज करने दी गल्ल नईं सोची ।

ऐ सारियां गै गल्लां किट्टियां ते चौपड़ खेडने दी अपनी मरजी
बी ही इस करी युधिष्ठिर हस्तनापुर आई गे । पाण्डव ते उन्दा
अमला फंला उन्दे आस्तै निश्चित कीते दे मैह्ले इच ठहरे ।

जिस दिन पुज्जे उस दिन बसां करिऐ दूए दिन सारे कम्मैं
थमां फारग होइऐ बड्डेलै खेडुं दे मण्डुए इच जाई पुज्जे । आपूं
इच इक दूए कन्ने दुआ सलाम करने पिच्छुआं शकुनि नै युधिष्ठिर
होरें गी आखेया जे चौपड़ बछाई दित्ता ऐ आओ इक इक बाजी
होई जा ।

पहले ते युधिष्ठिर होरें आखेया—महाराज ? जूआ बुरी चीज
ऐ । जूए इच बहादरी जां लयाकत दी गल्ल ते हुन्दी नईं जे आदमी
इन्दे करी जित्तै । असित देविल ते होर कई ऋषिणें जेड़े जूए दे बड़े
बड्डे खडारी होए न, आखेदा ऐ जे जूए थमां पर्हेज गै करना चाही दा
ऐ । की जे ए धोखे बाजी गी जन्म दिन्दा ऐ ।

उनें ठीक आखे दा ऐ जे क्षत्रिये आस्तै सिद्धा रस्ता युद्ध क्षेत्रे इच लड़ाई दा ऐ । तुस बी ते ए गल्ल भलेयां जानदे ओ ।

युधिष्ठिर होरें गल्ल ते आखी पर उन्दा अपना मन चौपड़ खेडने गी आखै करदा हा । शकुनि कन्ने गल्ल बातें इच ए चीज साफ भलाका दिन्दी ऐ । शकुनि इस कमजोरी गी भट ताड़ी गया । आखन लगा—“एदे बिच खेडै दा के दोष ऐ ?

सच पुच्छो तां जुद्ध के चीज ऐ ?

वेदें दे पण्डतें इच शास्त्रार्थ के चीज हुन्दा ऐ ?

विद्वान मूर्खें उपपर विजय पाई लैन्दा ऐ । हर सूरतें इच स्याना आदमी गै जितदा ऐ । ए ते ताकत जां चतराई दी घसवट्टी हुन्दी ऐ । इन्नी गै गल्ल ऐ । एदे इच माड़ी गल्ल कोई नई । जित्थों तोड़ी नतीजे दा तल्लक ऐ ओ ते हर क्षेत्रे इच चतर आदमी मूर्खें गी जितदा ऐ ।

इऐ चीज जूए इच हुन्दी ऐ । जेकर तुस डरदे ओ तां वेशक नई खेडो पर एदे इच सच ते भूठ आदि उपदेसै दी आड़ लैने दी कोई लोड़ नई ।

युधिष्ठिर आखन लगा—खरा मेरे कन्ने कुन खेडग ?

दुर्योधन आखन लगा—बाजी उपपर धन जवाहरात आदि लाने दी जिम्मेदारी मेरी पर मेरे थार पासा मामा शकुनि होर सुटडन ।

युधिष्ठिर गी पूरा जकीन हा जे दुर्योधन गी हराई लैड । पर शकुनि दी ते गल्ल गै होर ही । शकुनि ते मन्ने दा खडारी हा । इस करी युधिष्ठिर किश जरकी गया ?

आखन लगा—ए ते कोई तरीका नई जे खेडे कोई ते पासा कोई दूआ आदमी सुट्टै ।

शकुनि नै ताना मारेया—लौ हुण होर बहाना कट्टी मारेया ऐ । युधिष्ठिर किश भलखोई गया । समझदारी गी पिच्छे सुट्टिये आखन लगा—खरा ! अऊं खेडड ।”

मण्डुआ खचाखच भरोचे दा हा । द्रोणाचार्य, कृपाचार्य,

भीष्म-पितामह, विदुर ते धृतराष्ट्र बैठे दे हे । उन्हें गी पता हा जे खेडें दा नतीजा खतरनाक निकलना ऐ । पर ओ चुप्प बैठे दे दिखदे रे । ओ ठाकी नईं सके । किट्टे होए दे राजकमार बड़े चा ते उत्साह कन्ने खेड़ दिक्खन लगे ।

पहले ते उन्हें जवाहरात दी बाजी लाई । फी सुन्ना, चान्दी ते रथ ते घोड़ें दी बाजी लाई दित्ती । युधिष्ठिर उप्परोतली हारदा गै गया । जिसलै सारा किश हारी बैठा तां उस अपने नौकर चाकर बाजी उप्पर लाई दित्ते । ओ बी हारी गया । उस अपने हाथी ते संना बाजी उप्पर लाई । उन्हें गी बी हारेया । चौपड़ै दा पासा आखो शकुनि दे शारें उप्पर गै चलदा हा । गवां, भिड्डां, शहर गां, ते बस्सने आले नागरिक ते होर सारी जादात युधिष्ठिर हारी गया । फी बी बदबस्ती दा मारे दा बाजी उप्पर बाजी लान्दा गै जा, रुकै नईं । अपने भ्रायें दे ते अपने गहने बन्दे बी हारी बैठा । लग्गे दे टल्ले तोड़ी हारी बैठा । पर बदबस्ती पिच्छे लग्गी दा ही । ओ शकुनि दे मकाबले इच कक्ख बी नईं हा ।

शकुनि पुच्छन लगा—किश होर बी ऐ जेड़ा बाजी उप्पर लाना ई ?

युधिष्ठिर आखन लगा—ए मेरा सौली रंगत आला भ्रा नकुल ऐ ए बी मेरा धन ऐ । में इसी बाजी उप्पर लान्नां ।”

शकुनि बोलेया—ए गल्ल ऐ ?

खरा ! अस थुआड़े प्यारे राजकमार गी जित्ती लैनैं गां ।

ए आखिए शकुनि नै पासा सुट्टेया—नतीजा ऊऐ निकलेया जे उस आखेदा हा । सारी सभा कम्बी उठ्ठी ।

युधिष्ठिर आखन लगा—ए लौ मेरा भ्रा सहदेव ए सारियें बिद्याएं च निपुण ऐ । उसी बाजी उप्पर लाना गल्ती ऐ पर अऊं लान्नां । आओ खेड़चै ।”

शकुनि नै ए आखियै पासा सुट्टेया—ए चलेया ते ओ जित्तेया । बो मारा ।” युधिष्ठिर होरें सहदेव बी नुआया । शकुनि बड़ा दुष्ट

हा उस सोचेया जे युधिष्ठिर कुतै बस्स नईं करी जा । इस करी उस तान्ना मारेया—

भीमसैन ते अर्जुन थुआड़े सवके भ्रा होए । ओ माद्री दे पुतरे थमां जादा प्यारे होए । उनें गी थोड़ा बाजी पर लाना ऐं ?

युधिष्ठिर गी चंगे माड़े दा विवेक नईं रेआ । उसी ए गल्ल बड़ी चुब्बी जे मतरे भ्रा उसी प्यारे नईं । ओ आखन लगा—ओ मूर्खा ! तूं साड़े इच फुट्ट पान्ना एं । तूं पापी जीन जीने आला कियां समझी सकनां एं जे अस कनेआ धर्म दा जीन जीनेआं । अऊं ऐतकी अर्जुनै गी बाजी उप्पर लान्नां । अर्जुन जेड़ा सदा जितदा ऐ ते लड़ाई दे समुन्दरै गी ईआं गै टप्पी जन्दा ऐ । आओ खेड़चै । शकुनि आखन लगा—ए लौ अऊं फी पासा चलन लगां । उस पासा सुट्टेया । युधिष्ठिर अर्जुनै गी बी हारी बैठा ।

बदबख्ती दे सिलसिले नै युधिष्ठिर गी पागल करी ओड़ेया ओ डिग्गा ते डिग्गा गै जा करदा हा । अक्खीं इच अत्थरुं भरियै आखन लगा महाराज ! माढ़ा भ्रा भीमसैन साड़ा सैनापति ऐ । ओ दुष्टें दे हिरदे कम्बाई दिन्दा ऐ । ओ इन्द्र समान जोधा ऐ । उस कदें अपमान नईं जरेया । शरीरक बलै इच ओदी बरोबरी दा संसारै इच कोई नईं । अऊं उसी बाजी उप्पर लान्नां । युधिष्ठिर फी खेड़ेया ते भीमसैन गी बी हारी बैठा ।

बदमाश शकुनि पुच्छन लगा—होर किश ऐ जे बाजी उप्पर लाना ई ?”

युधिष्ठिर आखन लगा—हां । मेरा अपना शरीर ऐ । जे तूं जित्ती जागा तां अऊं थुआड़ा गुलाम बनी जाड ।”

“ले, जित्तन लगा ईं ।” ए आखिए उस पासा सुट्टेया ते जित्ती गया । शकुनि सभा मण्डप इच खड़ोइयें ते इक इक दा नां लेइयै आखन लगा—ए पञ्जै पाण्डव साड़े गुलाम बनी गे न ।

सारी सभा सुन्न होई दी दिखदी रेई । शकुनि युधिष्ठिर पासै मुड़ियै आखन लगा—इक रत्न हजे थुआड़े कोल ऐ । उसी बाजी पर

लायें तां तुम्मी आजाद होई सकनां ऐं । तूं द्रोपदी गी बाजी उप्पर नईं लाई सकदा ?

युधिष्ठिर भलेयां नराश होई गेदा हा आखन लगा—
चलो द्रोपदी बी लाई । आखी ते बैठा पर नुआड़ा कालजा कम्बी उट्टेया ।

जित्थें किश स्याने ते वृद्ध लोक बैठे दे हे किश फुस फुस होई । फी सारे पासेया—“धक्कार धक्कार ऐं” दियां बाजां औन लगियां । कोमल भावें आले रोन गै लगी पे । दूए गी परसीना आई गेया । ते तरेली आई गेई । उन्नं समझेया जे दुनिदां दा अन्तकाल आई पुज्जा ऐ ।

दुर्योधन, ओदे भ्रा ते कर्ण खुशी कन्ने नच्चन लगे । उस टोली इच इक युयुत्सु हा जेड़ा शर्मे कन्ने सिर नीन्दा करियै बैठा दा हा । ते हौके भरा करदा हा । शकुनि नै पासा सुट्टेया ते कर्लाया लौ अऊं ए बी जित्ती गेयां ।

दुर्योधन बिदुर गी आखन लगा—“जाओ, ते पाण्डवें दी प्यारी रानी द्रोपदी गी लेई आओ ।

ओ हुण साड़ा घर बाहर सोता करग ते साफ करा करग । उसी भटपट लेई आओ ।

बिदुर आखन लगा—तूं पागल होई गेया एं जे मौती गी आले देन लगा एं । थुआड़ी ते दशा ते उस चाली ऐ जियां कोई धागे कन्ने बज्जा दा डडलै उप्पर लटका करदा होऐ । तुगी सफलता दा सन्न चढ़ेदा ऐ । इस लै तुकी कक्ख नईं लबदा । पर उस तुकी खाई जाना ऐ ।

दुर्योधन गी इयां भाड़-फण्ड करियें बिदुर होर सभा गी आखन लगे—युधिष्ठिर गी द्रोपदी गी बाजी उप्पर लाने दा कोई हक नईं की जे ओ अपनी आजादी गुआई बैठा दा ऐ ।

ओदे अपने अधिकार गै नईं रे दे । मिकी लब्बा करदा ऐ जे कौरवें दा सत्यानास तौले गे होने आला ऐ । ए धृतराष्ट्र दे

पुत्तर अपने भित्तरें ते भलाई चाहने आलें दी गल्ल नईं सुनदे—ए सिद्धो नरकें गी रस्ता पद्धरा करा करदे न ।

बिदुर दियां गल्लां सुनिऐ दुर्योधनै गी बड़ा रोह चढ़ेया ।
उस अपने सारथि प्रातिकामी गी आखेया—बिदुर साढ़े कन्ने दुःख
करदा ऐ । ओ पाण्डवें कशा डरदा ऐ ।

थुआड़ी गल्ल होर ऐ । तूं भटपट जा ते द्रोपदी गी इससै लै
लेई आ ।”

०००

द्रोपदी दी बेदन

दुर्योधनै दी आज्ञा करी प्रातिकामी द्रोपदी कछ गया ते आखन ला—हे पूजा जोग महारानी । चौपड़ै दे फेरै इच पड़्यै युधिष्ठिर ह्वरें सब किश ते तुसैं गी बी हारी ओड़ैया ऐ । हुण तुस दुर्योधनै ही मालकी इच ओ । दुर्योधनै दी आज्ञा मूजब अऊं तुसैं गी लैन आयां जे चलो ते उन्दे महलै इच दासी बनियै कम्म करो । अगों थमां तुन्दा कम्म दासी दा गं पक्का ऐ ।

जिस चक्कर वर्ती नै राजसू कीता होऐ ओदी पटरानी द्रोपदी ए स्नेआ सुनिऐ सुन्न होई गई । ओ आखन लगी—

“हे प्रातिकामी ? ए तू के आखा करना एं ? कुण राजा अपनी रानी गी बाजी उप्पर लाई ओड़दा ऐ ? बाजी उप्पर लाने गितौ होर कक्ख नईं हा रेआ ?”

प्रातिकामी बोलेया—“ए गल्ल तां होई की जे ओ अपनी सारी जादात हारी बेठे हे । जिसलै कक्ख नईं रेआ तां उनें शुआड़ी बाजी लाई ओड़ी ।”

प्रातिकामी नै सारी गल्ल सनाई कियां युधिष्ठिर होरें सारी दौलत हारी, फी अपने भ्रा हारे, अपने आप गी हारेया ते आखर द्रोपदी गी बी बाजी उप्पर लाई ओढ़ेया ।

ए गल्ल सुनिए द्रोपदी दा कालजा फटन लगा पर उस जिगरा कीता । ते रोहै कन्ने ओदी अक्खीं लाल होइ गइयां । उस सारथी गी आखेया—जा जूआ खेडने आलें गी पुच्छ जे पहले तुसें अपने आप गी हारेया या अपनी रानी गी हारेया ?

खुल्ली सभा इच सारे सामनै ए प्रश्न पुच्छो । एदा उत्तर आनी दे ते फी मिकी लेई चल ।

प्रातिकामी सभा इच गया ते युधिष्ठिर गी ए प्रश्न पुच्छन लगा ।

युधिष्ठिर चुप्प गै होई गया ।

दुर्योधनै प्रातिकामी गी आखेया—जा द्रोपदी गी इत्थें लइ ग । आख समा इच आइयै आपू पुच्छी लै ।

प्रातिकामी फी द्रोपदी कछ गया ते धीनगी कन्ने आखन लगा—“रानी ! दुर्योधन बड़ा कमीना ऐ, आखदा ऐ सभा इ आनियै आपू पुच्छी लै ।

द्रोपदी आखन लगी—नई तूं परतिए जा ते सारी सभा गी ए प्रश्न पुच्छ ते उत्तर मंग । प्रातिकामी नै ऊआं गै कीता ।

दुर्योधनै गी बड़ा रोह चढ़ेया । उस अपने भ्राऊ दुशासनै गी आखेया—ए बड़ा मूर्ख ऐ । ए भीमसैना थमां डरदा ऐ । तूं जा ते द्रोपदी गी लई आ । नई आवै तां घसीटिए लई आ ।

ईआं हुकम होआ तां दुशासन बड़ा खुशी खुशी आज्ञा पालन करन चलेया ।

ओ द्रोपदी दे मंहलें इच गया ते रोबै कन्ने आखन लगा—आ, चिर की ला करनीं ?

हुण तूं साढ़ै धीन ऐं । तूं साढ़ी मालकी इच ऐं । हे सुन्दरी ! तूं शर्म नई कर । हुण तूं असें गी खुश कर । असें तुकी जित्ती लैता दा ऐ । सभा मण्डपे इच चल । दुशासन एडा काह्ला

हा जे उसी खिचिचयै लई चलेया ।

द्रोपदी कम्बदी उट्टी ते गमै दी मारी दी धृतराष्ट्र दे रणवासै गी नस्सन लगी । दुशासनै द्रौड़ियै उसी फगड़ी लैता ते घसीटियै सभा पासै लई चलेया ।

बड़ी घृणा हुन्दी ऐ, सर्कण्डे उब्बरदे न जिसलै अस दिक्खने आं जे धृतराष्ट्र दे पुतर कनेए नीच कमें उप्पर तयार होई गे ।

जिसलै द्रोपदी सभा इच पुज्जी उस उत्थें किट्टे होए दे वजुगें गी पुच्छेया—तुसैं मिगी बाजी उप्पर कियां लगन दित्ता ?

युधिष्ठिर होरें गी उनें धोखे इच फसाई लैता दा हा । चौपड़ै दे मन्ने दे खडारिएं उन्दे थमां सब किश खुस्सी लैता जिसलै उन्दे कोल बक्ख नईं रेआ ते अपनी अजादी मुहाई बंठे हे उस बेलै ओ मिकी राजी उप्पर कियां लाई सकदे हे ?

द्रोपदी नै हत्थ पसारे, ओदी अक्खीं शमाशम बगा दियां हियां उस डुसकदे आखेया—जे तुस बी अपनी जन्म देने आली ते दुद्ध पलते आली मौरी गी प्यार करदे ओ, उन्दी इज्जत करदे ओ जे तुसैं गी अपनी धर्म पत्नी, भैन जा धियू दी इज्जत प्यारी ऐ, जे तुस ईशर ते धर्म इच विश्वास करदे ओ तां मिकी इस बेइज्जती कोला बगई लौ । ए बेइज्जती ते मौती थमां बी भयंकर ऐ ।

ए बेनती ईआं गै ही जियां हरणी दा बच्चा सूली चाढ़े दा होए । सारे बडुं बडेरें शर्म कन्नें सिर नीन्दे सुट्टी ओड़े

भीमसैनै थमां नईं जरोआ । उस गरजिए अपने मनै दा आल कडुेया । उस गर्जे कन्नें सभा दियां कन्धां हिल्ली उट्टियां । स युधिष्ठिर गी फटकारेया—गये गुजरे दे जुआरी लोक, जिन्दा पेशा जुआ खेडना हुन्दा ऐ ओबी अपनी रखेल इस्त्रियें गी बाजी उप्पर ईं लान्दे । तुस ते उन्दे थमां बी गे गुजरे होई गे । तुसैं द्रोपदी गी नें बदमाशें दी मरजी उप्पर, उन्दी देया उप्पर छोड़ी ओड़ेया ऐ । रे कशा ए बेन्याई नईं जरोन्दी । तुस गै इस अपराधें दे जम्मेदार ओ ।

सहदेव ! कुतुआं अग्गी दी मुआठी लइ आ । अऊं उनें हत्थें
गी फूकी ओड़ां जिनें चौपड़ै दा पासा सुट्टैया ऐ ।

अर्जुनै भीमसैनै गी ठाकेया—तुसैं ईआं कदें नईं बोलेया ।
शत्रुएं जेड़ा जाल असेंगीफसाने गित्तै तने दा हा ऐ ओदे इच अस फसा
करने आं । ओ तुन्दे थमां बी नेआ कम्म करवान लगे न । उन्दी
चालै इच नईं फसना चाही दा । किश संभली जाओ ।

भीमसैनै मसां गै अपना रोह सम्हालेया ।

धृतराष्ट्र दे पत्तर विकर्ण थमां द्रोपदी दी बेदन नईं दिक्खन
होई । ओ खड़ोइऐ आखन लगा—हे क्षत्रिय वीरो ! तुस चुप्प
की ओ ?

ए ठीक ऐ जे अऊं थुआड़ै मकावले इच बच्चा गै आ । पर
तुस बोलदे गै नईं इस करी अऊं आखन । सुनो ! युधिष्ठिर गी
धोखे कन्ने सादा दइयै इस खेडै इच फसाया । उस द्रोपदी गी उस
बेलै बाजी उप्पर लाया जिसलै उसी कोई हक नईं हा । ही जे
द्रोपदी छड़ी युधिष्ठिर दी गै रानी नईं ।

इस्सै बजह करी गै ए बाजी गैर कनूनी ऐ । छड़ा इना गै
नईं युधिष्ठिर ते अपनी आजादी मुहाई बैठा दा हा । जेड़ा शत्रु
गै आजाद नईं ओ दूए गी बाजी उप्पर लाई कियां सकदा ऐ ।

इक आपत्ति होर ऐ । द्रोपदी दी बाजी दी गल्ल शकुनि नै
सभाई ही । ए खेडै दे निजमै दे बरुद्ध गल्ल ऐ । कोई बी खडरी
दूए गी किश लाने उप्पर मजबूर नईं करी सकदा । जे अस नें
सारियें गल्लें उप्पर बचार करचै तां असें गी मन्नना चाही दा ऐजे
द्रोपदी गी असें कनूनी तौर पर नईं जितेया । ए मेरी रा ऐ ।

जिसलै विकर्ण ईआं हिम्मत करियै बोलेया तां सभा दे लहें
गी बी बुद्ध आई उनें विकर्ण गी शाबाश दित्ती ते ताड़ियां बजाइं
आखन लगे धर्म बचाई लेआ ई । धर्म बचाई लेया ई ।

उस बेलै कर्ण उठेया ते आखन लगा—ओ विकर्ण ! तूं कियां भुलो
गेया एं जे ए बड्डे बडेरें दी सभा ऐ । तूं धर्म सखाना एं ? तूं ते हें
बच्चा एं । अपनी मूर्खता ते बेसमझी कन्ने तूं अपने कुलै गी गै नकसा

प्रजान लगा एं जिस कुलै नै तुगी जन्म दिता । जियां अरणी अगग पैदा करदी ऐ ते अगग उससै अरणी गी पहले फूकदी ऐ । तू भला एं जिस पत्तली खन्ता एं उससै गी छेक करनां एं । गुरु इच गं जिसलै युधिष्ठिर आजाद हा उस अपनी सारी जादात हारी ओड़ी ही ओदे इच द्रोपदी वी शामिल ऐ । ओ ते अगगें गै शकुनि दे कब्जे इच ऐ । इस मामले इच ते आखने आली कोई गल्ल गै नई । इनें पाण्डवें जेड़े टल्ले लाये दे न ओ वी उन्दे अपने नई । शकुनि हुन्दे न । हे दुशासन ! तू पाण्डवे दे टल्ले तुआरी लै, द्रोपदी दे टल्ले वी तुआरी लै ते शकुनि गी दई ओड़ ।

कर्ण दे कठोर शब्द सुनिए पाण्डवें समझेया जे उन्दे धर्म दी परीक्षा होत लगी ऐ उनें अपने टल्ले तुआरिए सुट्टी ओड़े । ओ सिद्ध करन लगे जे सच ते धर्म गित्तै ओ बड़ा किश करी सकदे न ।

ऐ दिक्खिए दुशासन द्रोपदी कोल गया ते जबरदस्ती टल्लें गी हत्थ पान लगा । दुनिया इच कुसै वी ओदी सहायता नई कीती । बेबस होइए ओ बचारी गासै आसै दिक्खन लगी । परमात्मा तू ऐं बौड़ । ओ बर्लाप करन लगी—हे दुनियां दे मालक ! अऊं तुसें गी पूजनी आं, मिकी तुन्दा गै भरोसा ऐ । मिकी इसलै सुट्टी नई पायो । तुसै मेरी शरण ओ । तुन्दी शरणे थमां बक्ख मेरा होर किश नई । मिकी बचाई लौ ।”

द्रोपदी बेहोश होई गई । दुष्ट दुशासन भलेयां गै तुआरी ओड़ी दी ही ओ वेशर्म होइए द्रोपदी दे चीर खिचन लगा । सारे लोक त्राहि त्राहि करी उठे । भले मानसें अक्खीं मीटी लैतियां । उसलै परमात्मा दी दया दृष्टि होई । इक चर्ज जन गै होई गया । दुशासन चीर खिच्ची खिच्ची बतेह होत लगा । इक चीर खिच्चे ते ओदी थां दूआ अगगें गै पल्टोए दा होए । दिखदे दिखदे उत्थें सभा इच साड़ियें दा अम्बार लग्गी गया । दुशासन चीर खिच्ची खिच्ची हुट्टी गया ते वतेह होईए बई गया । सारी सभा ए चर्ज दिक्खिए कम्बी उठी । भले लोक परमात्मा दी आरति करन लगे । उन्दी अक्खीं थमां शमशम अत्थरुं बगन लगे ।

भीमसैनै दे ओठ फड़कन लगे उस गरजिए ए सगन्ध चुक्की—
“ए दुशासन भरत कुलै दा कलंक ऐ । ए पापी ऐ । में जे एदा पट्ट
नई त्रोटं ते एदी छाती दा खून नई पियां तां मिकी अपने बडेरे कन्ने
कदें बास नई थोऐ ।

उसलै चान चक्क गै गिहड़ हुआंकन लगे खोते डींकन लगे ते
इल्लां ते गिरजां चीकन लगियां ते सारे पासेया भयानक बाजां औन
लगियां । ते बुरे लखन प्रगट होन लगे ।

धृतराष्ट्र समझी गया जे इस घटनां करी ओदे कुलै दा नास
जकीनी गल्ल ऐ ।

उस अकली कन्ने ते हिम्मती कन्ने कम्म लैता । उस द्रोपदी
गी अपने कोल सहेया । उसी तशफी दित्ती । बड़े लाडै कन्ने
कोमल बचन बोलन लगा । युधिष्ठिर गी आखन लगा—“तू ते
बिल्कुल निर्दोस ए । थुआड़ा कोई शत्रू नई । दुर्योधनै जो किश
कीता ऐ उसी बकशी ओड़ो । ते सारी गल्ल गै मनै दा कड़ी ओड़ो ।
अपना राज वापस लौ, धन दौलत वापस लौ, हर इक चीज वापस
लौ । आजाद होई जाओ ते बधो फलो रस्सो बस्सो । इन्दरप्रस्थं
गी टुरी जाओ ।

पाण्डव इस बदकिस्मती आले मण्डप थमां बाहर निकले ।
उनें गी चक्कर आई गेदा हा ते किश थौह नई आवा दा हा । उनें गी
ए खलासी चर्ज बभोन लगी । पर ए खुशी मता चिर नई रेई ।

जिसलै युधिष्ठिर ते ओदे भ्रा टुरी गे कौरवें दे मैहलै इच बड़ी
लम्मी जोरदार बहसां शुरु होइयां । दुशासन ते शकुनि ततूनियां
लान लगे ते दुर्योधन अपने बब्बै ऊप्पर भखन लगा । तुसें ते बनी
बनाई दी स्कीम गै फेल करी ओड़ी ऐ । ओठें पुज्जे दा ग्राह खुस्सी
लैता ऐ । बृहस्पति होरें आखेदा ऐ जे ओ हर स्कीम ठीक हुन्दी ऐ
जेदे कन्ने शत्रु दा नास होई जा । इनें पाण्डवें साढ़ें गित्तै मसीबत
खड़ी करी ओड़नी ऐ । एदा उपा गै ईऐ जे छल कपटे कन्ने उनें
गी जित्तो । उन्दे धर्म ते मानै दी आड़ लइऐ उनें गी फी फसाना

चाही दा ऐ । कोई बी इज्जतदार क्षत्रिय चौपड़ दी बाजी खेडने थमा इनकार नई करग ।

बब्व उसी बड़ा चान्दा हा दुर्योधनै ओदे कशा हामी भराई लई जे युधिष्ठिर गी परतिऐ चौपड़ खेडने गितै सदेया जा ।

युधिष्ठिर इन्द्रप्रस्थ दुरी गेदा हा जे ए स्नेआ दइऐ दूत भेजी ओड़या ।

हब्वे युधिष्ठिर पुज्जा गै हा जे धृतराष्ट्र दा सादा पुज्जी गेया जे परतिऐ चलो । ए स्नेआ सुनिऐ युधिष्ठिर आखन लगा—ए चंगा माड़ा सब किश भागें दे गं इल्लयार ऐ । होनी नई टलोन्दी जे असैं खेडना गै तां खेडना गै ।

चौपड़ दा सादा इनकार बी नई करन हुन्दा । ए ते मन्नना गै पौग । व्यास होरें ग्लाय—सुन्ने दा हरण न कदे होआ तेन कदें होना । फी बी रामचन्द्र जी नुआड़े पिच्छें दुरी पे । भावी दा भाना बरतदा गै । मनुक्खै दी बुद्ध गै सारे थमां पहलै अष्ट हुन्दी ऐ ।

युधिष्ठिर होर हस्तनापुर पुज्जे ते परतिऐ शकुनि कन्ने चौपड़ खेडन लगे । सभा इच सारें ठाकेया पर मन्नै कुण ?

पृथिवी दा भार हौला होना हा इस करी कलिजुगै युधिष्ठिर गी अपना मोहरा बनाया । हुण बाजी ए लग्गी जे जेड़ा हारै ओ भ्रायें समेत बनै इच बारां बरे रवें ते तेरमां बरा छप्पिए कट्टै कुसै गी पता नई लग्गी । ते जे पता लग्गी गेया तां बारां बरे परतियें बनबास भोगना ।

चौपड़ दा नतीजा टकोदा गै लब्बै दा हा । युधिष्ठिर इस बारी बी हारी गेया । पाण्डवें वनबास दा बत धारेया । सारी सभा दा शर्मै कन्ने सिर नई चुकोऐ ।

०००

धृतराष्ट्र दी घबराट

जिसलै पाण्डव बनवास गी चले तां लोक बर्लाप करन लगे ते गलियें इच किट्टे होई गे, कोठें उप्पर, मनारें उप्पर, ते बूटें उप्पर चढ़िऐ उनें गी जन्दे दिक्खन लगे । ओ राजकमार जेड़े रत्न जड़े दे रथें उप्पर चढ़दे हे, ते हाथियें उप्पर शान कन्ने बौन्दे हे ते जिन्दे अगगे बाजे बजदे हे अज्ज आपू भुजा टुरदे जा करदे हे । ते कन्ने २ लोक रोन्दे चला करदे हे ।

सारे पासेया—हे राम, ते धिक्कार ऐ ते ईश्वर उप्परा ए सब किश कियां दिक्खा करदा ऐ—इऐ बाजां सुनोचादियां हियां ।

अन्ने धृतराष्ट्र नै बिदुर गी सद्दी भेजेया ते आखेया जे पाण्डवें दे बनवास जाने दा हाल सुना ।

बिदुर सनान लगा—युधिष्ठिरै मुं है उप्पर टल्ला सुट्टे दा हा । पिच्छें २ भीमसैन अपने डौलें गी दिखदा जा करदा हा । अर्जुन रस्ते उप्पर रेत सुटदा जा करदा हा । नकुल ने सहदेव होरें सारे शरीरै उप्पर बभूत रमाई दी ही ते युधिष्ठिरै पिछें टुरा दे हे । द्रोपदी

बी युधिष्ठिर कन्ने ही । ओदे बाल खुल्ले दे हे ते मुं है उप्पर पवे दे हे । ओदी अक्खीं इच अत्थलं हे । उन्दा पुरोहत धौम्य सामवेद दे जमराज दी स्तुति दे मैन्तर बोलदा जा करदा हा ।

धृतराष्ट्र नं जिसलै ए गल्ल सुनी तां ओदी चिन्ता होर बधन लगी । ओ पुच्छन लगा—ते नगर बासी के आखदे न?

विदुर नै दस्सेया—सारिएं जातें ते धर्म दे नगरबासी जे किश आखदे न ओ उन्दे शब्दे इच ईयां ऐ “साड़े नेता ते असें गी छोड़ी गे न । कौरवें दे बड़ेरे बी ईयां गै न उनें ए किश अपने सामनै कियां दित्ताहोन ? लालची धृतराष्ट्र ते ओदे पुत्तरें पाण्डु दे पुत्तरे गी बनें गी कड्डी लाया ऐ ।” लोक असें गी इयां दोस ला करदे न । तुम्हाईं गासै उप्पर बहलें बगैर गे बिजली चमकं दी ऐ । धरती कम्बै करदी ऐ ते लक्खन बुरे गै लब्बै करदे न ।

जिसलै विदुर ते धृतराष्ट्र गल्लां करा करदे हे उसलै ऋषि नारद होर उन्दे सामने प्रगट होए ते आखन लगे—

दुर्योधनै जेड़ा पाप कीता ऐ ओदे नतीजै दे कारण अज्जे थमां चौदें बरें वाद कौरव कुलै दा नास होई जाग । ए आखिये ओ लोप होई गे ।

दुर्योधन ते ओदे साथी बड़े डरे ते द्रोणाचार्य कोल गये ते प्रार्थना करन लगे—महाराज तुस असें गी नई छोडेओ । भामें किश बी होई जा । द्रोणाचार्य होर बड़े गंभीर होइऐ बोले—स्याने जियां आखदे न अग्गी ऊआं गै जकीन करनां ।

पाण्डवें दा जन्म दिब्ब ऐ । ते उनें गी कोई नई जिती सकदा । फी बी मेरा फज धृतराष्ट्र दे पुत्तरें गित्तै लड़ना ऐ । फी जे ओ मेरे उप्पर बसाह करदे न ते कन्ने में उन्दा निमक खन्नां । अऊं जी जान लाइऐ उन्दे गित्तै लड़ड । पर होनी सारें कशा बलवान हुन्दी ऐ । पाण्डवें जरूर बनवासै थमां वापस आना ऐ ओ रोहै कन्ने बला दे होने न । मिकी पता ऐ रोह के हुन्दा ऐ । में द्रुपद गी गद्दी थमां तुम्हारेया ते बेज्जित कीता की जे मिकी ओदे

उप्पर रोह चढ़े दा हा । उस अपमाने दा बदला लैने गितौ उस जग कीता हा जे ओदे घर ऐसा पुत्तर होऐ जेड़ा मिकी मारी सके । ओदे घर धृष्टद्युम्न पुत्तर जम्मेया । भागें दी गल्ल ऐ जे ओ पाण्डवें दा साला ऐ ते पक्का दोस्त ऐ । भावी नै जे किश सोचे दा ऐ ओ किश बनदा जा करदा ऐ । तुस बी उस्सै रस्तै जा करदे ओ थुआड़े दिन बी पूरे होई गेदे न । जे किश चंगा होई सकदा जे करी लौ । कोई बड़ा जग करो । पाप रहत सुख भोगो, मथाजें गी दान देओ । चौदमें वरै तुन्दे उप्पर ऋट्ट पौनी ऐ । दुर्योधना । युधिष्ठिर कन्ने सुलह करी लै । ए मेरी सलाह ऐ अग्रे जियां थुआड़ी मरजी ऐ ऊंआं कर ।

द्रोणाचार्य दी गल्लें कन्ने दुर्योधनै गी रोह गै चढ़ेया ।

संजय ने धृतराष्ट्र गी पुच्छेया—महाराज ! तुस की दुःखी ओ ?

अन्ना राजा बोलेया पाण्डवें गी दुख देखै शान्ति कियां होई सकदी ऐ ?

संजय बोलेया—तुसैं जे किश ग्लाय़ा ओ बिल्कुल ठीक ऐ । जेदा नास होना निश्चित हुन्दा ऐ ओदी बुद्ध फिरी जन्दी ऐ । उसी चगे माड़े दी तमीज करने दी जाच गै भुल्ली जन्दी ऐ । सारें गी खाई जाने आला काल कोई लाठी लेइयै ते कुसै दा सिर नई पाड़दा ओ उस व्यक्ति दी बुद्ध गै भ्रष्ट करदा ऐ । उसी नेआ मत्तू करदा ऐ जे ओ अपना नास आपूँ करदा ऐ । थुआड़े पुत्तरें द्रोपदी दा बड़ा अपमान कीता ऐ । ते अपने पैरें आपूँ कुहाड़ी मारी ऐ । धृतराष्ट्र आखन लगा—में धर्म ते राजनीति दा रस्ता नई पगड़ेया । में अपने मूर्ख पुत्तरें दे आखै लगिऐ दन्दै दा रुकना शुरु कीता ऐ । हुण ते सिद्धा डडलं हेठ जा करने आं ।

बिदुर होर धृतराष्ट्र गी उपदेस दिन्दे रौन्दे हे । ओ उसी आखदे हैं—थुआड़े पुत्तरें बड़ा बड़ा पाप कीता ऐ । युधिष्ठिर कन्ने धोखा कीता ऐ । ए तुन्दा फर्ज नई जे उनें गी सच्चे रस्तै पानां ते पापें

थमां दूर रखना । हुण बी तुस हुकम करो ते पाण्डवें गी सहियै उन्दा राजपाट उनेंगी परताई देओ । युधिष्ठिर गी वनवासै दा सद्दो ते ओदे कन्ने सुलह करी लौ । दुर्योधन जिस लै ताकती दे स्हारै कुसै दा तर्क बी नईं सुनदा तां तुसैं दुर्योधनै गी बी संयम सखाया लोड़चदा ए । ते जे ओ तर्क दी गल्ल नईं मन्ने तां उसी जबरदस्ती गल्ल समझाई लोड़चदी ऐ ।

धृतराष्ट्र पहलें ते दुखी होए दा चुपचाप सुनदा रेआ । उसी पता हा जे बिदुर बड़ा सयाना ऐ ते जे किश आखदा ऐ ओ साड़ी भलाई आस्तै आखदा ऐ । पर बल्ले २ ओदा धीरज बी सम्बन लगा । बार बार ईऐ गल्लां सुनि सुनि ओ तंग पई गया ।

इक दिन धृतराष्ट्र कोला नईं गै जरोआ । ओ बुहासरेया—बिदुर जी । तुस म्हेशां पाण्डवें दा पक्ख लैन्दे ओ ते मेरे पुत्तरें खलाफ बोलदे ओ । तुस साड़ी भलाई नईं चान्दे । दुर्योधन आखर मेरा पुत्तर ऐ । अऊं उसी कियां तज्जी ओड़ां । जेड़ी गल्ल मुमकिन गै नईं ओदा उपदेस देने दा के लाह ?

मिकी ते तुन्दे इच कोई श्रद्धा नईं रेई । ते न गै तुन्दी लोड़ ऐ । तुसैं जेकर पाण्डवें कोल जाना ऐ तां टुरी जाओ । ए आखियै उस बिदुर पासै पिट्ट परताई ते रणवासै गी गया उठी ।

बिदुर गी बड़ा गम होआ जे कौरवें दा नास जकीनी गल्ल ऐ । उने धृतराष्ट्र दी गल्ल पगड़ी ते रथै उपपर चढ़िये बनै गी टुरी गे जित्थें पाण्डव रौन्दे हे ।

धृतराष्ट्र पच्छोतान लगे । ओ सोचन लगा—“ए में के कीता ?

बिदुर गी कड्डिए ते पाण्डवें कश टोरिए में पाण्डवें गी गै मजबूत कीता ऐ । ए सोचियें उस संजय गी सद्देया ते आखेया जे मेरा स्नेआ लेई जा । बिदुर गी आखेयां जे अऊं बड़ा पशता करतां । मेरे कशा ओ शब्द ईआं गै निकली गे हे । हुण अऊं बड़ा दुखी आं । तू परतोई आ ।

संजय द्रौडदा आश्रमै गी गया । उस दिक्खेया—पाण्डवें मृग चर्म लाये दा हा ते आसँ पासै ऋषि लोक बैठे दे हे । विदुर बी उत्थें गै हा । संजय नै बिदुर नी स्नेआ दित्ता ते आखेया जे तुस नईं परतोए तां अन्ना राजा गमै कन्ने मरी जाग ।

बिदुर होर नर्म तबीयत आले हे । धर्म दी मूरत हे उनें गी बड़ा क्यास आया ते हस्तनापुर परतोई आये । धृतराष्ट्र नै उने गी गलै कन्ने लाया । ते लाडै कन्ने रोन लगे । सारा भेद भाव अत्थरुं रस्तै निकली गया ।

इक मैत्रेय ऋषि धृतराष्ट्र दै दवरै इच आये । धृतराष्ट्र नै उन्दा बड़ा मान कीता । धृतराष्ट्र उन्दा शीर्वाद लैनै गित्तै आखन लगा—

हे पूजा जोग ऋषि जी ! तुस मेरे पुतरें पाण्डवें गी मिले होंगे ओ । ओ कुस जंगलै इच रौन्दे न । ओ ठीक ठाक गै न ?

साढ़े कुलै इच परतिऐ समोध होई जाग न ?

मैत्रेय आखन लगे—काम्यक बनै इच गुधिष्ठर मिकी सैभन गै लब्बी गे । उत्थें उनें गी बड़े ऋषि लोक मिलन आये दे हे मिकी उत्थे सारियें गल्लें दा पता लग्गा । में बड़ा हरान होआ जे भीष्म ते तुन्दे हुन्दे ए सब किश कियां होई गया ?

तुसैं कियां जाजत देई ओड़ी ?

पिबुआं मैत्रेय—दुर्योधनै गी बी मिले । उसी सिक्ख-मत देन लगे—थुआड़ी भलाई इस्सै बिच ऐ जे पाण्डवें गी नकसान नईं पजाया जा ।

सगों उन्दे कन्ने सुलह कीती जा । पाण्डव आपू बड़ें बलवान न ते श्री कृष्ण ते द्रुपद उन्दे रिश्तेदार न ।

मूर्ख ते जिद्दी दुर्योधनै नै गल्ल हस्सिये गवाई ओड़ी । अपना फैसला अटल दस्सने गित्तै पट्ट बजान लगा ते भुवां गी पैरें दे नउएं कन्ने खरोत्तन लगा । मुहां दा किश उत्तर नईं दित्ता ते दुरी गया ।

मैत्रेय गी बड़ा रोह चढ़ेया उनें दुर्योधन पासै दिक्खिए आखेया—

तू एडा घमण्ड करनां एं जे असें गी पट्ट बजाइयै दस्सनां एं, अस जेड़े थुआड़ी भलाई चाने आं ।

“ए थुआड़े पट्ट भीमसैनै गुर्जे कन्ने भन्नी ओड़ने न, ते तू युद्ध भूमि इच मरना ऐ ।” धृतराष्ट्र ए सुनिए कम्बी खड़ोता, ऋषि दे चर्णो डिग्गी पेया ते माफी मंगन लगा । मन्त्रेय होरें आखेया - जे थुआड़ा पुत्तर पाण्डवें कन्ने सुलह करी लैग तां इस श्रापै दा फल नईं होग । नईं ते ए श्राप नईं टली सकदा । ओ रोहै कन्ने सभा थमां बाहर टुरी गे ।

महाभारत बड़ी पुरानी कथा ऐ । पर मनुखें दा सुभा इक्कै नेआ रौन्दा ऐ । अज्ज बी रोह ते घृणा मनुखें गी ऊआं गै खा करदे न ते उन्दी तबाही करा करदे न । इन्दे सामनै उमरी दा जां इस्त्री पुरुषै दा कोई सुआल नईं । जे अस ए ध्या उसलै पढ़चै जिलै असें गी रोह चढ़न लगै तां एदे उप्पर वचार करने करी अस मुखता ते अपराध करने थमां बची जागे ।

०००

कृष्ण जी की पतिग्या

जिसलै शिशुपालै दे कृष्ण जी दे हत्थें मरोई जाने की खबर ओदे मित्तर राजा शल्व गी थोई उसी बड़ा रोह चढ़ेया । उस इक सैना किट्ठी कीती ते द्वारका गी घेरी लैता । कृष्ण जी हब्रे पुज्जे दे नईं हे । बृद्ध उग्रसैन होर नगरपाल हे ।

महाभारत इच लड़ाइयें ते घेरें दा हाल पढ़े इआं बभोन्दा जे अस अज्जे दिये लड़ाइयें दे हाल पढ़ा करदे होचै । द्वारका किलेबन्द नगर हा । ते इक टापू उप्पर बने दा हा । सुरक्षा दे सारे साधन इत्थें मजूद हे । बैरकां बनी दियां हियां । राशन किट्ठा कीता दा हा । शस्तर अस्तर किठ्ठें कीते दे हे । लड़ाई करने आले सूरमें बिल्कुल तयार हे । उग्रसैन होरें शराब बन्दी की डौण्डी फराई ओड़ी । ते खेड तमाशें उप्पर पबन्दी लाई ओड़ी । साड़ फूक पालसी आड़ू पुल त्रोड़ी ओड़े ते बाहरले जहाजें गी अपनी बन्दरगाहें इन्चे आने की मनाही करी दिती । शहरै दे चक्की खाई इच लोहे दे शूल गड्डी ओड़े ते शहरै की फसील भलेयां मरम्मत

कराई ओड़ी । शहरै अन्दर औने आले रस्ते लोहे आली कण्डें दी तार लाइयै बन्द करी ओड़े । अन्दर औना जां बाहर जाना दौनें उप्पर बड़ी सख्त पबन्दी लग्गी । पास लइयै गे औन जान हुन्दा हा । अपने पराये दी पशान करने गित्तै गुप्त शब्द निश्चित करी दित्ते । शहरै गी मजबूत करने दी कोई बी कसर नई रौन दित्ती । शहर पहलें कुदरत दी तरफा गै बड़ा सुरक्षित हा । हुण ते बिल्कुल गै कोई कसर नई रई । श्पाहिणं दी तनखाह बधाई ओड़ी । रंगरूट भरती करने इच खूब छान बीन करियै ते सख्त परीक्षा लइयै भरती करदे हे ।

घेरा बड़ा जन्नरदस्त हा । शहरै इच लोकें गी बड़े कष्ट होए । जिसलै कृष्ण जी द्वारका गी परतोए तां उनें गी अपनी पर्जा दी हालत दिक्खियै बड़ा दुख होआ उनें शल्व उप्पर हमला कीता, उसी हराया ते घेरा चुक्केया ।

एदे पिछ्छां उनें गी पहले बारी हस्तनापुरै दियें गल्लें दा पता लग्गा जे कियां चौपड़ खडोआ ते पाण्डवें गी बनवास होआ । कृष्ण जी उस वनै पासै टुरी पे जित्थें पाण्डव रौन्दे हे ।

कृष्ण हुन्दे कन्ने भोज ते वृष्णी कुले दे लोक बी आये । चेदी दा राजा धृष्ट केतु बी आया । कैकय लोक पाण्डवें दे बड़े भगत हे, ओ बी आये ।

जिसलै उनें दुर्योधनै दी जोरा जबरी सुनी तां उनें गी सच्च गै रोह चढ़ेया । ओ कर्लाई उठ्ठे “नेए दुष्टा दा खून पी लेना चाही हा ऐ । धरती रत्तू दी प्यासी होई गई ऐ ।”

द्रोपदी रोन्दी रोन्दी आई ते डुस्की डुस्कीए कृष्ण जी गी अपने उप्पर होए दे अत्याचार सनान लग्गी । उस सनाया—“मिकी घसीटिए सभा इच लई गे । में इक्कै साड़ी लग्गी दी ही । धृतराष्ट्र दे पुत्तरें मेरी बेज्जती कीती ते मेरी बिपता दां मखौल उड़ाया । उनें मिकी अपनी दासी गै समझी लैता ते मेरे कन्ने दासी दा बर्ता कीता । भीष्म पितामह ते धृतराष्ट्र बी मेरा जन्म ते कुल भुल्ली गे । उनें गी ए बी चेता नई रेआ जे अऊं उन्दी नूंह लग्गी आं ।

हे कृष्ण जी ! ए मेरे पति बी इस बेज्जती ते अपमाने थमां मेरी रक्षा नई करी सके । भीमसैन हुन्दा शरीरक बल ते अर्जुन हुन्दा गाण्डीव मिकी नई पुक्करे ।

पत्नो दा इयां अपमान होऐ तां कमजोर थमां कमजोर लोक बी ए बेज्जती नई जरदे ते बेज्जती करने आले गी जीयें भारी ओड़दे न । पाण्डव मन्ने दे शूरवीर न पर दुर्योधन ते हजे बी जीन्दा ऐ । अऊं पाण्डु राज दी तूंह ते मिकी बालें थमां पगड़िऐ घसीटेया गया । अऊं पजे पाण्डवे दी पत्नी, मेरी इयां बेज्जती होई । हे मधुसूदन ! तुस बी पता नई कुत्थे दुरी गे हे ।” द्रोपदी खड़ोती दी कम्बन लगी । ओदे कशा अगे नई बोलन होआ । गमै कन्ने ओदा गला भरोची गया ।

कृष्ण जी गी बड़ा क्यास आया । उनें रोन्दी द्रोपदी गी दमदलासा दित्ता । ओ आखन लगे—

“जिनें तुगी दुख दित्ता ऐ उनें गी लड़ाई च डन्न देगे । उन्दियां लोथां जुद्ध खेत्तारै इच रलडन । तूं अपनी अक्खीं पूंज । अऊं तुगी बचन दिन्नां जे थुआड़ी बेज्जती दा बदला जरूर चकाड । अऊं पाण्डवें दी हर चाली मदत करड । ए पक्की गल्ल ऐ जे तूं ऐं चक्करवर्ती महाराज दी पटरानी बनगी । भायें गास डिग्गी पवै, हिमालय दे दौं टोटे होई जान, धरत फटी जा, अनसम्भ सागर सुक्की जा पर अऊं ग्लान्ना जे मेरी पतिग्या जरूर पूरी होग । ऐ मेरी सगन्ध ऐ ।

ए आखियै कृष्ण जी नै द्रोपदी दे सामनें सगन्ध चुक्की । ए सगन्ध भगवान दे अवतार लैने दे उद्देशै दे मतावक गै ही । शास्त्रें इच आखेया दा ऐ सच्चै उप्पर चलने आलें दी रक्षा ते दुष्टें दे मारने गित्तै ते धर्म दी रक्षा गित्तै अऊं पृथ्वी उप्पर हर जुगै इच अवतार लैन्नां ।”

धृष्टद्युम्न नै बी भैनुं गी दलासा दित्ता ते दस्सेया जे कौरवें दा अन्त काल कोल आई गेदा ऐ । उन दस्सेया—अऊं द्रोणाचार्य गी मारड, शिखण्डी भीष्म पितामह गी खत्म करग । भीमसैन होर दुर्योधन ते ओदे भायें दा चाण्डा थापा करडन । अर्जुन होर उस

सारथी पुत्तरै गी बड्डी ओड़डन ।

श्री कृष्ण होरें दस्सेया—जिसलै थुआड़े उप्पर ए मसीबत पई अऊं द्वारका नईं हा । अऊं द्वारका हुन्दा तां ए चौपड़ै दी खेड खेडन गै नईं दिन्दा । बिना सद्दे दे गै अऊं उत्थे जन्दा उठी ते द्रोणाचार्य, कृपाचार्य ते दूए स्याने लोकें गी कर्तव्य समभान्दा । ए बिनाशकारी चौपड़ै दी खेड कदै नईं होन दिन्दा । ताईं शकुनि तुसैं गी ठग्गा करदा हा । तुआईं अऊं शल्व कन्ने जुद्ध करा करदा हा । शल्व नै द्वारका गी घेरा पाये दा हा । जिसलै अऊं शल्व गी हराई बँठा उस देलै गै मिगी इस चौपड़ै दीखेड दा ते अगो जे किश होआ ओदा पता लग्गा । ए दुखदायी गल्ल ऐ जे इससै बेल्लै थुआड़ी मसीबतै दा इलाज नईं करी सकदा । बन्न त्रुट्टी जा तां मुरम्मत होने तोड़ी किश पानी ते बगदा गै । इन्ना दुख जरना गै पौन्दा ऐ ।”

कृष्ण होरें जाजत लई ते द्वारका परतोई आये । उन्दे कन्ने अर्जुन दी पत्नी सुभद्रा ते भनेआ अभिमन्यु आये । धृष्ट द्युम्न पञ्चाल देसै गी परतोई गेआ ते द्रोपदी दे पञ्जे पुत्तरें गी बी लई गेया ।

०००

पाशुपत

जिसलै बनै च रौन लगे तां पहले पहले भीमसैन ते द्रोपदी कदें कदें युधिष्ठिर हुन्दे कन्ने बड़े बहसदे हे । ओ आखन जे सच्चा क्रोध क्षत्रिय दा धर्म ऐ । दूआ बेज्जती करदा जा, पत तुआरदा जा, तां बी सबर करदे जाना, जरदे जाना मनासब गल्ल नई । उने बड्डे बड्डे लोकें दे प्रमाण देने, दलीलां पेश करनियां ते अपनी गल्ल सिद्ध करनी । युधिष्ठिर होर मजबूती कन्ने जवाब दिन्दे हे । ओ आखन—जेड़ा बचन कीता ओ पूरा करना चाही दा ऐ । जरना सारें कोला बड्डा गुण ऐ ।

भीमसैन बड़ा काह्ला हा ओ आखै हुण गै हमला करो ते दुर्योधनै गी मारी ओड़ो राज बापस लेई लौ । ए गल्ल कोई क्षत्रियें गी शोभा दिन्दी ऐ जे इयां बनै इच दरबदर फिरदे रौचै ।

भीमसैन युधिष्ठिर होरें गी आखै—“तुस छड़े वेदें दे मन्तर घोखदे ओ ते शब्दें दी बाज सुनिए गै सन्दोख करी लैन्दे ओ । तुसें गी उन्दा अर्थ नई आँन्दा । तुन्दी बुद्ध ठकानै नई रेई दी । तुस

महाभारत

जम्मे के बेशक क्षत्रिय कुलै इच ओ पर क्षत्रिये आली गल्ल कोई नईं करदे । तुन्दा सुभा ते ब्राह्मणें आला होई गेदा ऐ । तुसें गी पता ऐ जे शास्तर आखदे न क्षत्रिय गी कठोर ते हिम्मती होना चाही दा ऐ । साढ़ा फर्ज ऐ जे अस धृतराष्ट्र दे पुत्तरें गी मनमानी नईं करन देचै । उस क्षत्रिय दा जन्म बी विरथा ऐ जेड़ा अपने दुष्ट शत्रू गी जितदा नईं । ए मेरे बचार न । में समझनां जे नेए धोखेबाज शत्रू गी मारिए नर्क बी भोगना पवै तां बी ओ सुगं समान ऐ । तुन्दा सबर असेंगी अग्गी थमां मता जालदा ऐ । अऊं ते अर्जन अट्टो-पहर इसै अग्गी च जलदे बलदे रौने आं । असें गी नीन्दर गै नईं पौन्दी ।

उनें बदमाशें धोखे कन्ने साढ़ा राज खोई लेआ ते मौजां मारा करदे न । ते तुस भुक्खे अजगरै आड़ू इआं गै लम्मे पेदे रौन्दे ओ । तुस आखदे ओ असें गी अपनी पतिग्या नभानी चाही दी ऐ । अर्जुनै गी सारी दुनिया जानदी ऐ ओ कियां छप्पा गुज्जा रेई सकदा ऐ ? हिमालय पर्वतै गी मुट्ठी भर घा ओलै थोड़ा स्पेलन हुन्दा ऐ ?

शेर दिल अर्जुन नकुल ते सहदेव कियां छप्पे रेई सकदे न ?

मन्त्री प्रमन्त्री दी द्रोपदी छप्पी गुज्जी कियां टुरी फिरी सकदी ऐ ? ओ कियां नईं पनशोग ?

मन्त्री लौ असें ए नईं होई सकने आलियां गल्लां करी बी लेइयां तां धृतराष्ट्र दे पुत्तर अपने गुप्तचरें दे जरीए साढ़ा पता नईं लाई लैडन । इस करी ए पतिग्या गै तोड़ चढ़ने आली गल्ल नईं । ए गल्ल गै उनें इस करी बनाई ऐ जे तेरां बरे असें गी परतिए बनवास भोगना पवै ।

शास्तर बी मेरी गल्लै दा समर्थन करदे न जे धोखे कन्ने कराई दी पतिग्या कोई पतिग्या नईं हुन्दी । थोड़ा नेया प्राचित करियै इसी मोड़ी लैना ठीक ऐ । दान्दे थमां कम्म लैना गै तां घा दी मुट्ठी पाइयै सगन्ध पूरी करी लैनी ठीक ऐ । तुस शत्रुएं गी मारने दा रादा पक्का करो क्षत्रिय सामनै एदे कशा बड्डा धर्म होर कोई नईं ।"

भीमसैन हर बेल्लै अपनी गल्लै उप्पर जोर दिन्दा रौन्दा हा ।

द्रोपदी बी दुर्योधन कर्ण ते दुशासन हत्थें होई दी अपनी बेज्जती दी गल्ल घोखदी रौन्दी ही ते शास्तरें दियां दलीलां दिन्दी रौन्दी ही । युधिष्ठिर होर सोचिए चिन्ता करदे हे । राजनीति ते शास्तरें दियां गल्लां सनान्दे । आखदे शत्रू दी ताकत बी ते दिक्खियै गल्ल हुन्दी ऐ ।

ओ आखदे—“साढ़े शत्रुएं कोल भूरिश्रवा, भीष्म पितामह, द्रोणाचार्य, कर्ण ते अश्वत्थामा नेए बीर न । दुर्योधन ने नुआढ़े भ्रा जुद्ध बिद्या च वड़े चतर न । किन्ने गै लौके लौके राजे ते बड्डे बड्डे महाराजे उन्दी बक्खी होई गे दे न । ए ठीक ऐ जे भीष्मपितामह ते द्रोणाचार्य दुर्योधनै दा चलन चंगा नईं समझदे पर उन्हें ओदा साथ नईं छोड़ना ते जुद्ध इच ओदी बक्खी गै रेइयै जिन्दू दी वाजी लाई ओड़नी ऐ । कर्ण बड़ा भारी जोद्धा ऐ । ओ सारे शस्तर चलाने इच चतर ऐ । लड़ाई कियां चली पौग किश आखन नईं हुन्दा । जित्त ते बिल्कुल जकीनी नईं । तौल करने दा कोई फेदा नईं ।” इयां समझाई समझाई युधिष्ठिर होर मसां अपने लौकें भ्राएं गी दमदलासा दिन्दे हे ।

जिआं व्यास होरें सिक्ख दित्ती ही अर्जुन हिमालय पर्वतें उप्पर तपस्या करन टुरी गया । ओदा बचार हा जे देवतें कोला नमें शस्तर बी लई औड । अर्जुनै भ्रायें कोला जाजत लेई ते फी द्रोपदी कोल बिदा लैन गया । द्रोपदी आखेया—“हे अर्जुन ! परमात्मा तुन्दा मनोरथ पूरा करै । तुन्दे जन्मै बेल्लै माता कुन्ती नै जे किश हीखियां कीतियां हियां ते जे किश परमात्मा थमां मंगेया हा सो तुसैं गी प्राप्त होऐ ।

साढ़ी खुशी, साढ़ा जीन, इज्जत ते उन्नति सारा किश तुन्दे कन्ने गै । शस्तर प्राप्त करिए तौले गे परतोयौ । इयां द्रोपदी नै अर्जुनै भी मंगल शीर्वाद दित्ती ते बिदा कीता ।

ए दिक्खने आली गल्ल ऐ जे बोलै करदी धर्मपत्नी द्रोपदी ऐ पर मंगल कामना कुन्ती माता दी ऐ । कीजे शब्द ए न—जेकिश

कुन्ती माता न तुसेंगी जन्म देने एल्लै परमात्मा अग्रे प्रार्थना कीती ही बड़े घोर बने चा लंघदा अर्जुन इन्द्रालिक पर्वतै उप्पर जाई पुज्जा। उत्थें उसी इक बुड्डा ब्राह्मण मिली पेया। ओ वृद्ध महात्मा बड़े लाड्डू कन्ने अर्जुन गी आखन लगे—बेटा, तू ते शस्तर बन्ने दे न ते कवच लाये दा ऐ। तू कुण एं ? इत्थें शस्तरें दा के कम्म ऐ ? ए ते ऋषिं सन्तें दी भूमि ऐ। उनें रोह ते वासना जिती दी हुन्दी ऐ। इत्थें क्षत्रियें दा लावा लाइयै नईं औन्दे।”

ए गल्लां करने आला देवतें दा राजा इन्द्र हा जेड़ा अपने पुत्तरै गी मिलन आया हा। अर्जुनै उनें गी मत्था टेकेया ते आखेया अऊं शस्तर तुप्पन आयां। मिकी शस्तरें दा वरदान देओ।

इन्द्र आखन लगा—अर्जुन ! शस्तरें दा के लाह ऐ ? किश नन्द भोगने आली गल्ल मंग जां सुगें आले सुखें दा वर मंग। अर्जुन बोलेया—हे देवराज ! मिकी सुगें दे नन्द नईं लोड़चदे। में द्रोपदी ते भायें गी बने इच छोड़ियै इत्थें आयां। मिकी शस्तर गै लोड़चदे न। होर किश नईं लैनां। इन्द्र आखन लगा—जे शिवजी महाराज प्रसन्न होई जान ते किरपा करन तां तुकी ए दिव्व शस्तर थोई सकदे न। शिवें दी तपस्या करो। ए आखिए इन्द्र देवता लोप होई गे। अर्जुन हिमालय पर्वतै उप्पर गया उठी। उत्थें उस शिवें दी तपस्या शुरु करी दित्ती।

के होआ जे शिवजी शकारी दा रूप धारिए ते पार्वती गी लेइए शकारै पिछें लग्गे दे उत्थें आई पुज्जे। शिव बड़ी तेजी इच हे। जंगली सूरै अर्जुनै उप्पर हमला करी दित्ता। अर्जुनै अपने गाण्डीव कन्ने इक तीर मारेया। शिवें बी पिनाक कन्ने इक तीर मारेया।

अर्जुन जोरै कन्ने कर्लिया—तुसें कुण ओ ? अपनी लाड़ी गी लेइयै इस बने इच की फिरै करदे ओ। तुसें मेरे शकारै उप्पर तीर की मारेया ऐ ?

शकारी बड़ी बेरुखी कन्ने आखन लगा—ए बन शकारै कन्ने

भरपूर ऐ । ए शकार साढ़ा ऐ । अस इस बने इच रौने आले आं । तूं ते कोई बनबासी नईं लबदा । थुआड़े अंग बड़े कुंगले न । बभोन्दा ऐ जे तूं कोई सुखी जीन जीने आला एं । ए गल्ल ते सगुआं में पुच्छनी ही जे तूं इत्थें के करां करनां एं ? ए सूर ते मेरे बाणै कन्ने मोआ ऐ । ते जे थुआड़ें मनै इच किश होर गमान ऐ तां आ दो दो हत्थ करी लै ।” अर्जुन बी इऐ चान्दा हा । ओ भट उट्टेया ते शिवें उप्पर नागें आडू तीरें दी बरखा बराई दित्ती । उसी बड़ा चर्ज होआ जे तीरें दा शकारी उप्पर कोई असर गै नईं होआ । ओ तीर इयां गै बेअर्थ गे जियां पहाड़ै उप्पर फुडा पौन्दियां न । जिसलै सारे तीर सम्भी गे तां धनुष मारन लगा । शिवें गी किश बझोआ गै नईं । उनें धनुष खोई लैता ते गड़ाका सुट्टेया । अर्जुन निहत्था होई गया हा उसी बड़ा चर्ज होआ जे इक ममूली शकारी नै उसी इयां हर्राई ओड़ेया ऐ । उसी किश शक होन लगा । पर ओ डरेया नईं । उस अपनी तलवार सोत्तरी ते लड़न लगा । शिवें दे शरीरै गी लगदे गै तलवारै दे टोटे होई गे । हुण होर कोई शस्तर नईं रेआ तां ओ नावाकफ शकारी कन्ने हत्थें पलचन लगा । पर घोलै इच बी उनें अर्जन गी बट्टी ओड़ेया । उनें अर्जन गी नेआ जप्फा मारेया जे अर्जन बेवस होई गया ।

जिसलै भलेयां फाह्मा होई गया ते किश नईं बनेया तां दीन होइऐ शिवें दा ध्यान करन लगा ते प्रार्थना करन लगा । जिसलै ध्यान कीता तां उसी मनै इच प्रकाश होआ ते समझ आई जे शकारी कुण ऐ ।

ओ शिवें दे चरणें डिग्गी पेया । ते माफी मंगन लगा । शिवें माफ करी ओड़ेया ते गाण्डीव परताई ओड़ेया । वाकी शस्तर बी जेड़े खोई लैते दे हे दर्ई ओड़े । उनें अर्जुन गी बचित्तर पाशुपत शस्तर बी दित्ता ।

अर्जुनै दा सारा शरीर इस लड़ाई इच ठुल्ली गया हा ओ शिवें दी किरपा दृष्टि कन्ने ते हत्थ लाने कन्ने गै सत्था होई गया ।

ते पहले थमा सौ गुणा तगड़ा ते तेजवान होई गया । शिवें आखेया—“जा हुण सुगें इच जाइये अपने पिता इन्द्र हुन्दे चरण बन्दी आ । ए आखिये जियां सूरज अस्त होई जन्दा ऐ इयां शिव लोप होई गे ।

अर्जुन गी बड़ी खुशी चढ़ी ओ आखन लगा—में सच्चें मैं शिवें दे दर्शन कीते न ? उनें सच्चें मैं मिकी अपने दिव्व हत्थें कन्ने स्पर्श कीता ऐ ?

मिकी होर के लोड़चदा ऐ ?

उसलै इन्द्र दा सारथि मातली रथ लेइऐ उत्थें आई गया ते अर्जुन गी लेइयै देवतें दे राजै गी दुरी पेया ।

०००

मसीबतै दी कहानी नमीं गल्ल नईं

पाण्डव बनै इच रवै करदे हे । कृष्ण जी ते बलराम जी अपने साथिये कन्ने उनें गी मिलन आये । ए सब किश दिक्खिऐ बलराम बड़ा दुःखी होआ ते कृष्ण जी गी आखन लगा— “कृष्ण जी ! इस संसारै इच भलमानसी ते दुष्टता दा फल जोका किश उल्टा गै होई गेदा लबदा ऐ । दुष्ट दुर्योधन ते राज करा करदा ऐ । रेशमी टल्ले लान्दा ऐ ते मुन्ने दे गहने बन्दे पान्दा ऐ ते ताईं भलामानस युधिष्ठिर बनै इच दिन गजारा दै, ते वृक्खें दी शाल लान्दा ऐ । जिसी डन्न थोना चाही दा ऐ ओ मोजां मारै ते जिसी किश मुखे दा साह थोना चाही दा ऐ ओ विपता भोगै । इस करी लोकें दी परमात्मा उप्परा श्रद्धा गै हटा करदी ऐ । शास्त्रें इच गुणै दी तरीफ बी शड़ा मखौल गै लबदा ऐ । की जे सामरतक्ख ते दुनियां इच भलाई बुराई दे होर गे नतीजे लबदे न । ए धृतराष्ट्र जिसलै जमराज दे सामनै जाग उसलै अपने कुकर्मै दी के सफाई

देग ? वचारे निर्दोस पाण्डवें ते जग्गै दी अग्नि थमां होई दी द्रोपदी दी बिपता दिक्खियै ए पर्वत ते पृथिवी बी रोन्दे न ।

सात्यकि कोळ गै बंठा दा हा आखन लगा—वलराम जी ! ए रोने दा समां नईं । असैं इत्थें पाण्डवें कोल बइयै ए दिखदे रौना ऐ जे युधिष्ठिर होर असैं गी कुसलै किश करने गी आखडन ?

कृष्ण जी, तुन्दे ते होर रिश्तेनातें दे हुन्दे होई पाण्डव बनें इच जीवन की नष्ट करन ? आओ अस सैना किट्टी करचै ते दुर्योधनै उप्पर हमला करी देचै । वृष्णिणयें दी सैना लइऐ अस कौरवें गी पक्क गै नष्ट करी सकने आं । बाह, फौजा दी लोड़ के ऐ ? कृष्ण जी ते तुन्दा दौनें दा चीची दा कम्म ऐ । में ते कर्ण दी तीरन्दाजी दा मान भन्नना ऐ । ते नुआड़ा सिर बहुना ऐ । आओ दुर्योधनै गी ते नुआड़े साथिएं गी लड़ाई दे सदाने इच खत्म करचै ते राज अभिमन्यु गी सौंपी ओड़चै । पाण्डवें सगन्ध गै पूरी करनी ऐ तां बनें इच रहिए पूरी करदे रौन । उनें गी उऐ करन देओ । असैं बीरें गी ईऐ किश सोभदा ऐ ।

वासुदेव कृष्ण जी बंठे दे सारी गल्ल सुना करदे हे आखन लगे—जे किश तुस आखदे ओ ठीक ते ऐ । पर पाण्डवें ओ चीज लैनी नईं जेड़ी उनें अपने हत्थें नईं जित्ती दी होग । ओ दूएँ दे हत्थें जित्ती दी चीज नईं लैन लगे । द्रोपदी बीर कुलै इच जम्मी दी ऐ । ओ ते ए गल्ल बी नईं सुनन लगी । युधिष्ठिर होरें प्यार जा डरै मूजब सचाई दा रस्ता छोड़ना नईं । जिसलै बनवासै दा निश्चित समां मुक्की जाग उसलै पञ्चाल, केकय चेदी दे राजा ते अस लोक किट्टे होंगे अपनियां फौजां किट्टियां करिए पाण्डवें दी सहायता करगे ते दुश्मनै गी जित्तगे ।

कृष्ण जी दे ए शब्द सुनिए युधिष्ठिर होर बड़े खुश होए । आखन लगे—“श्री कृष्ण होरें मेरे मनै दी गल्ल आखी ऐ । सचाई शक्ति ते धन दौलत थमां बड्डी हुन्दी ऐ । सचाई दी हर कीमत दइयै रक्षा करनी चाही दी ऐ । राजै दा के ऐ ?

जिसलै ओ आखडन अस लड़ने गी तयार आं । वृष्णी कुलै दे बीरें अगें मेरी बेनती ऐ जे इस बेलै परतोई जाओ । जिसलै मौका आया अस भट किट्टे होई जागे” इयां आखियै युधिष्ठिर होरें उनें गी मसां टोरेया ।

अर्जुन हजे हिमालय पर्वतै उपपर गेदा हा । भीमसैन बड़ी चिन्ता करा करदा हा ते काह्ला पवा करदा हा । ओदे कशा नईं जरोआ दा हा । ओ युधिष्ठिर गी आखन लगा—“अर्जुन गै साढ़ी जान ऐ । ओदे उपपर गै सारा दारोमदार ऐ । उसी गेदे किन्ना चिर होई गया ऐ । ओदी कोई खबर गै नईं सुनी । जेकर ओ नईं रेआ तां पञ्चाल राज, सात्यकि ते कृष्ण होर बी असें गी नईं बचाई सकदे । में ते कदें बची गै नईं सकदा । ए सब किश उस चौपड़ दी खेडा दा नतीजा ऐ । ईऐ खेड साढ़ी सारी मसीबतें ते दुःखें दा कारण ऐ । इससै खेड साढ़े दुश्मन गी मजबूत कीता ऐ । वनें इच रौना क्षत्रियें दा धर्म नईं ऐ । असें अर्जुन गी सहना चाही दा ऐ ते कृष्ण जी दी महत लइयै धृतराष्ट्र दे पुतरें उपपर हमला करी देना चाही दा ऐ । मिकी ते उसलै गै ठण्ड पौनी ऐ जिसलै दुष्ट शकुनि कर्ण ते दुर्योधन मरोडन । जिसलै ए कर्तव्य पूरा होई जन्दां ऐ तां फी तुसें जेकर मरजी होग तां सन्यासी बनिऐ वनै इच दुरी औना । जिस शत्रू नै इयां चलाकी कीती होऐ ओदे कन्ने चलाकी करना कोई पाप नईं । उसी चलाकी कन्ने मारी ओड़ना कोई पाप नईं । में सुनेया ऐ जे अथर्व बेदै इच किश मैन्तर न जिन्दे कन्ने समां संगड़ोई सकदा ऐ ते थोड़ा होई सकदा ऐ । जे इयां होई सके तां तेरें बरें गी तेरां दिन बनाई लैना चाही दा ऐ । एदे इच कोई दोश नईं । ते चौदमें दिन में दुर्योधन गी जीएं मारी ओड़ड ।”

भीमसैन दे शब्द सुनिए युधिष्ठिर नै उसी गलें लाया ते ओदी काहली गी शान्त कीता । जिसलै तेरां बरे मुकदे न उसलै बीर अर्जुन अपने गाण्डीव कन्ने ते तुस अपने गुर्जे कन्ने दुर्योधन गी मारी ओड़ो । दुर्योधन ते ओदे साथी पापे इच इन्ने डुब्बे दे न ते

जे ओ कुतै नस्सी नईं सकदे । तुस चिन्तां नईं करो ।

जिसलै ओ दुखी भ्रा आपूँ इचें इयां बहसा करदे हे उसलै
महां ऋषि बृहदश्व पाण्डवें दी कुटिया इच आये । पाण्डवें उन्दा
सत्कार कीता । फी युधिष्ठिर होर आखन लगे—हे पूजा जोग
ऋषि जी ! साढ़े धोखेबाज शत्रुएं असें गी चौपड़ै दी खेडे इच
फसाया, धोखे कन्ने साढ़ा राज खोई लेया, धन दौलत खोई लैती ।
मेरे बीर भ्रायें गी, द्रोपदी गी, ते मिकी बनै इच कड्डी लाया ।
अर्जुन बड़ा चिर होआ दिव्व अस्तर शस्तर लैन गया हा, हब
तोड़ी नईं परतोआ । असें गी ओदा बड़ा मन्दा लग्गा करदा ऐ ।
ओ दिव्व अस्तर लइयै औग बी ? कदूँ तोड़ी औग ? मेरे नेआ
दुखी इस संसारै इच होर कुण होना ऐ ?

ओ महं ऋषि आखन लगे—“तुस जी लौका नईं करो ।
अर्जुन दिव्व अस्तर लइऐ आवा करदा ऐ । जिसलै समां औग तां
तुस अपने शत्रू गी जरूर जित्तगेओ । तुसें ए के आखेया जे दुनियां
इच तुन्दे नेआ बदकिस्मत जा दुखी कोई नईं । ए गल्ल सच्च
नईं । ए ठीक ऐ जे हर इक गी अपना दुख गै मता लबदा ऐ ।
जेड़ी हड्डें बर्तोऐ करदी होऐ ऊऐ सेई हुन्दी ऐ । सुनी सनाई नईं ।
तुस निषध दे राजा नल गी जानदे ओ जा नईं ?

बनै इच उसी बी तुन्दे थमां मते कष्ट जरने पे हे । उसी
पुष्कर नै जूए इच धोखे कन्ने जित्तिया हा । ओदी धन संपदा नष्ट
होई गई । राज खसोई गया । ते बनबास जाना पेया । ओ
बचारा नेआ बदकिस्मत हा जे कोई भ्रा बी नईं हा । ते न गै
कोई ऋषि मुनि जां ब्राह्मण कन्ने हा ।

कलजुगै नै नुआड़ा दमाग नेआ फेरैआ जे उसी चंगे बुरे दी
तमीज गै नईं रई । उसी ए बी थौह नी रेआ जे ओ के करा दा
ऐ । उस अपनी लाड़ी गी गै तज्जी ओड़ेया । ओ बचारी बनै इच साथ
दिन्दी ही । फी बनै इच मारचदा फिरन लगा । इक्कला मुक्कला ते
पागल जनेआ बने दा हा । ओदे कन्ने अपना मकाबला करी

दिक्खो । थुआड़े वीर भ्रा थुआड़े कन्ने न । पतिवर्ता पत्नी कन्ने ऐ । ते दुखै इच दमदलासा देने गित्तै ऋषि मुनि ते ब्राह्मण कन्ने न । तुन्दा मन सत्था ऐ ते मजबूत ऐ । अपने उप्पर रोह ते औन्दा गै पर थुआड़ी दशा एडी खराब नई ।

फी महान् ऋषि नै नल दी जीवन कथा सनाई । ए ठारें ध्यायें दा बड़ा काव्य ऐ (नैषध चरित) । महा ऋषि नै इयां गल्ल कीती :—

हे युधिष्ठिर ! राजा नल नै थुआड़े थमां मते कष्ट भोगे हे । उस सारे कष्टें गी जित्तेया ते खुशी कन्ने बाकी जिन्दगी गजारी । थुआड़ी बुद्ध बड़ी साफ ऐ थुआड़े कन्ने साथ बड़ा चंगा ऐ, नजीकी ते प्यारे सारे कच्छ न ।

तुन्दा मता समां धर्म चर्चा इच बीतदा ऐ । ए बड़ी चंगी गल्ल ऐ । ऋषि एं मुनि एं कन्ने बेदें ते वेदान्त दियें गल्लें इच गुजरदा ऐ । धीरज कन्ने ए सारे दुःख ते कष्ट जरो । ए दुःख कष्ट मनुक्खै गी पक्का करदे न थुआड़े नेए शूरवीरें आस्तै ए कोई बड़ी गल्ल नई ।

इयां महान् ऋषि बृहदश्व होरें युधिष्ठिर गी दलासा दित्ता ।

०००

अगस्त्य ऋषि

इन्दरप्रस्थे इच जेड़े ब्राह्मण लोक युधिष्ठिर हुन्दे कोल रौन्देहे ओ बने इच उन्दे कन्ने गे उठी । एडे अमले फैले दा गजारा टोरना मुस्कल होआ करदा हा । अर्जुन दे पाशुपत अस्तर लैन जाने दे बाद इक दिन लोमष ऋषि पाण्डवें दी कुटिया च आये । उनें युधिष्ठिर गी सलाह दित्ती इस अमले फैले गी घटाओ । ते तीर्थे जाओ । पर इन्नी फौज लेइए तीर्थ-जात्रा मुस्कल होई जानी ऐ । इक थां थमां दूऐ थां जाने दी बड़ी खेचल हुन्दी ऐ । युधिष्ठिर गी ए औख ते सेई होआ करदी ही उस अपने साथिए गी आखेया पई जेड़े खेचल नईं जरी सकदे । जिन्दे थमां पण्डे नईं मारन हुन्दे, जेड़े छड़े भगती करिए गै माढ़े कन्ने रवा करदे न ओ धृतराष्ट्र हुन्दे कोल टुरी जाओ । ओ नईं भल्लन तां पंचाल राज द्रुपद कछ टुरी जाओ ।

जिसलै थोड़े नेए लोक रई गे तां पाण्डव तीर्थ जात्रा चली

पे । ओ हर तीर्थे दी कथा सुनदे ते परम्परा चेतै रखदे । इयां उनें अगस्त्य जी दी कथा सुनी ।

आखदे न इकबारी अगस्त्य होरें अपने बड़ेरें दियां रूहां पुढियां टडोई दियां दिक्खियां । उनें पुच्छेया तुस कुण ओ ? ते तुन्दी ए बुरी दशा की ऐ ? उनें रूहें जबाब दित्ता—बेटा अस थुआड़े पितर आं । जे कर तूं साढ़ा ऋण—पितृऋण नईं चकागा, ब्याह नईं करगा, बैन्स नईं बधागा तां थुआड़े पिछुआं असें गे पानी देने आला कोई नईं रौग । पिण्ड देने आला कोई नईं होग । इस करी अस ए तपस्या करा करने आं तुगी आखने गित्तै जे असें गी इस खतरे थमां बचाई लै ।

अगस्त्य होरें ए गल्ल सुनी तां ब्याह करने दा निश्चा करी लैत्ता । विदर्भ देसै दे राजे दै कोई सन्तान नईं ही । ते दुखी रौन्दा हा । ओ अगस्त्य मुनि हुन्दे कोल आया जे शीर्वाद देओ लुआद होऐ । अगस्त्य होरें आखेया थुआड़े इक बड़ी शैल धी जम्मग पर ओदा ब्याह तूं मेरे कन्ने करी ओड़ेयां ।

रानी नै इक कुड़ी जम्मी जेदा नां लोपा मुद्रा रक्खेया । समा पाइयै ओ जुआन होई । ओ एड़ी शैल ते स्नाहकड़ी निकली जे सारे राजे ओदी ताड करन लगे । पर अगस्त्य हुन्दे कोला डरदे कोई कड़माई गित्तै फर्मेंश पाने दी हिम्मत नईं करै ।

आखर अगस्त्य ऋषि होर विदर्भ आये ते राजे गी आखन लगे कन्या ब्याही दें । ओ लाडें पली दी, नाजक राजकमारी उसी बनवासी ते तपस्या करने आले ऋषि गी कियां ब्याही देयां । राजा सोचें पेई गया । पर ऋषि दे रोहै थमां बी डर औन्दा हा । न बी नईं होऐ । बड़े दुखे इच पेई गया । लोपामुद्रा गी बी चिन्ता होई जे गल्ल के ऐ । मा बब्ब एडे दुखी की न । उसी पता लगा तां ओ तयार होई गेई उस आखेया—मेरी मरजी कन्नै तुस ऋषि हुन्दे कन्नै मेरा ब्याह करी देओ । राजे दे मनै दा भार हौला होआ । अगस्त्य ऋषि ते लोपामुद्रा दा ब्याह होई गया ।

जिसलै राजकमारी ऋषि हुन्दे कन्नै चलने गी तयार होई तां
 ऋषि होरें आखेया—ए कीमती पशाकां तुआरी ओड़ो, ए गहने बन्दे
 हीरे मोती लुआई ओड़ो । लोपामुद्रा नै नूँ नई कीती ते सारे टल्ले
 ते गहने बन्दे अपनी स्हेलियें ते दासियें गी बण्डी ओड़ो । आपूँ
 मिरगशाला लेई-लेई ते वृक्षै दी शाल लपेटी लेई । ते खुशी खुशी
 ऋषि हुन्दे कन्नै टुरी पेई ।

गंग द्वार जाइए उनें तपस्या ते साधना शुरू करी दित्ती ।
 दवैं इक दूए गी प्रेम करन लगे । व्याहनूँ जिन्दगी इच कामवासना
 ते प्रमुख गल्ल होई । लोपामुद्रा इक दिन शर्मान्दे पर धीनगी
 कन्नै आखन लगी—इत्थैं कुटिया इच एकान्त गे नई ।
 कन्नै मेरी मरजी ऐ जे ऊए नेआ विस्तरा होए जनेआ प्यौके घर
 हा, सुन्दर पशाकां होन, कीमती हीरे जवाहरात होन । तुन्दे बी
 स्नाहकड़े टल्ले होन ते गहने बन्दे होन । तां मनै दी मौज पूरी करने
 दा नन्द ऐ ।

अगस्त्य होर मुस्कराइयै आखन लगे—पेई ! न मेरे कछ धन
 दौलत ऐ ते न गै ईए नेए थुआड़ी इच्छा पूरी करने दे साधन न ।
 अस ते वनै इच रौने आले साधु मलंग आं । लोपामुद्रा गी अपने पति
 दियें योगिक शक्तियें दा पता हा । आखन लगी “महाराज । तुन्दा ते
 तपोधन इन्ना ऐ जे तुस इक मिण्टै इच सारी दुनियां दी धन-दौलत
 किट्ठी करी सकदे ओ ।”

अगस्त्य होर आखन लगे—ए गल्ल ते ठीक ऐ । पर जे
 तपस्या धन इनें क्षणभंगुर संसारी चीजें गित्तै खर्च करी ओड़ैया तां
 तपस्या क्षीण होई जाग ।

ओ आखन लगी—अऊं ए ते नई चांदी । मेरी ते इन्नी गै
 मरजी ऐ जे तुस सधारन तरीके कन्नै इन्ना कमाओ जे अस नन्दे कन्नै
 जिन्दगी गजारचै ।

अगस्त्य होर मन्नी गे उनें सोचेया चलो कुसै राजे कोला दान
 मंगी लैन्नेआं । इक राजा बड़ा मशहूर हा । लोक आखदे हे ओदे
 कछ मताधन ऐ । ऋषि होरें राजा गी आखेया—अऊं धन मंगन

आयां । जिन्नी मिगी लोड़ ऐ उन्ना दे पर दिक्खेयां दूएं गी नक्सान नईं होऐ ।

राजा नै राज्जै दी आमदनी ते खर्चै दी सारी रपोट ऋषि हुन्दे सामनै रक्खी दित्ती ते आखेया महाराज जे किश मनासब बभ्भोन्दा ऐ लेई लौ । ऋषि होरें हसाब कताब दिक्खेया तां लब्बा जे ए ते मसां कम्म गै दुरा करदा ऐ । वच्चत कोई है गं नईं । राज्जै दी आमदनी मसां मरी मुक्कियै खर्च टोरदी ऐ ।

पराने जमाने च बी इयां गै हुन्दा हा ।

ए दिक्खियै अगस्त्य होरें आखेया—इस राजे कोला दान लैने कन्ने एदी पर्जा गी कष्ट होग । होर कुसै राजे कोला मंगनेआं । ऋषि होर चलन लगे राजा आखन लगा—अम्मी तुन्दे कन्ने चलनां । दिक्खनेआं दूएं राजें च के हाल ऐ ।

व्यास होरें लिखेदा ऐ, ते निजम बनाये दे न जे राजा उन्ना गै टैक्स ला जिन्नी पर्जा उप्पर खर्च करने दी लोड़ होऐ । जे ओ मते टैक्स लाग तां लोकें गी मता कष्ट होग । अगस्त्य होरें सोचेया इलवल राजा बड़ा दुष्ट ऐ । उत्थें जतन करी दिक्खनेआं ।

इलवल ते ओदा आ वातापी ब्राह्मणें दे घोर शत्रू हे । जानी दुश्मन हे । ब्राह्मण लब्बा नईं ते उनें मारेया नईं । उनें ब्राह्मणें गी मारने दी इक स्कीम बनाई दी ही । इलवल ब्राह्मणें गी धाम आखदा । मन्तरै दी शक्ति कन्ने अपने आ वातापी गी बकरा बनाई ओड़दा । ते उस नकली बकरे गी मारदा ते मास मैहमानें गी खलाई ओड़दा । उने दिनें ब्राह्मण मास खन्दे हे ।

जिसलै धाम मुक्की जन्दी तां इलवल अपने आऊ दा आह्वान करदा हा । उसी सञ्जीवनी बिद्या औन्दी ही । ओ मोए दे गी जीन्दा करी लैन्दा हा । ओ वातापी गी बाज मारदा । वातापी भोजन रूपे इच बचारे ब्राह्मणें दे ढिड्डै च पुज्जा दा हुन्दा हा । ओ जीन्दा होई जन्दा ते उन्दे ढिड्ड पाड़िऐ बाहर निकली औन्दा हा ।

इस चाली किन्ने गै ब्राह्मण मरोई गे ।

जिसलै इलवल गी पता लगा जे अगस्त्य होर कोल गै आई पुज्जे न तां ओ बड़ा खुश होआ । उस सोचेया इक ब्राह्मण ते शकार थोआ । उस अगस्त्य होरें गी धाम आखी । ऊंआं गै धाम बनाई । वातापी गी बकरा बनाइयै ओदा मास बनायेदा हा । ऋषि होरें भलेयां रज्ज सुट्टेया । हुण छड़ा इलवल नै मैन्तर पढ़ना हा ते वातापी नै ढिड्ड पाड़ियै बाहर निकलना हा । इलवल नै मैन्तर पढ़ेया ते आखेया वातापी बाहर आई जा ।

अगस्त्य होर मुस्कराये । उनें ढिड्डुं उप्पर हत्थ फेरेया ते आखेया—वातापी मेरे ढिड्डुं च हज्म होई जा । संसारै दा भला इससै च ऐ ।

इलवल पलै पलै कलान लगा—वातापी बाहर आ । इलवल घाबरेया । वातापी बाहर नई आया । ऋषि होरें दस्सेया—वातापी हज्म होई गेया ऐ । ए चाल जिन्नी चलनी ही चलोई गई । हुण नई चलदी ।

ओ दुष्ट इलवल अगस्त्य हुन्दे पैरें पेई गेया । आखन लगा जिन्नी धन दौलत लेनी ऐ लेई लौ । इयां ऋषि होरें लोपामुद्रा दी इच्छेया पूरी कीती । अगस्त्य होरें लोपामुद्रा गी पुच्छेया—दस्स भागवाने । दस पुत्तर लेने नीं जां इक । दस सधारन मनुक्ख होडन पर जेड़ा इक होग ओ दस्सें बराबर होग । लोपामुद्रा आखन जगी मिकी इक गै पुत्तर देओ पर ओ अत्यन्त विद्वान ते गुणवान होना चाही दा ऐ आखदे न जे लोपामुद्रा नै ईऐ नेआ गै पुत्तर जम्मेया ।

इक बारी के होआ जे विन्ध्याचल पर्वत मेरु पर्वत कन्ने दुःख करत लगा । ओ लगा उच्चा होन । सूरज, चन्द्रमा ते नखतारें दी गति च रकावट पौन लगी । देवते इस खतरे गी टालना चान्दे हे । उनें अगस्त्य हुन्दे कशा सहायता मंगी । ऋषि होर विन्ध्याचल

पर्वतै कोल गेए ते आखन लगे—हे पर्वत राज । जिन्ना चिर अऊं लंगी नईं लैन्दा तूं बधना बन्द कर । ते मेरे परतोने तोड़ी रुकेया रवेयां । जिसलै में परतोई अ्रौड फी तूं जिन्ना मरजी ऐ बधी जायां । उन्ने तोड़ी इन्तजार करेयां ।

बिन्ध्याचल पर्वत अगस्त हुन्दी बड़ी मानता करदा हा । उस उन्दा हुकम मन्नी लैता । अगस्त्य होर परतियै उत्तर पासै परतोए गै नईं । ओ दक्खन भारतै इच गै बस्सी गे । अद्दूं दा बिन्ध्याचल दा बधना रुकेदा ऐ । ओ दिन ते अज्जै दा दिन । महाभारतै च इयां गै कथा लिखी दी ऐ ।

०००

ऋष्य शृंग

ए सोचना गलत ऐ जे मनुख बड़े सौखे ब्रह्मचर्ये दा जीन जी सकदा ऐ जे बचपने इच गै उसी बासना आले सुख भोगे दा बिल्कुल थौह पता नईं लगन दित्ता जा । जे थौह पता नईं होने करी कोई ब्रह्मचारी बनेदा रौन्दा ऐ तां ओदा ब्रह्मचर्य अज्ज बी है नईं ते कल बी है नईं । इस कहानी थमां ए गल्ल बड़ी टकोदी सेई हुन्दी ऐ । ए कहानी रामायण इच बी लिखी दी ऐ पर इस चाली नईं जनेई महाभारत इच ऐ ।

विभाण्डक ऋषि जग बनाने आले ब्रह्मा आडू-तेजवान हे, इक बनै इच रौन्दे हे । उन्दा पुतर ऋष्य शृंग बी उन्दे कन्ने हुन्दा हा । जातकै अपने बब्बै गी छोड़िऐ होर कोई मानू जा पुरुष नईं हा दिक्खे दा ।

इक बारी के होआ जे अंग देसै इच बड़ा भारा काल पेया । बरखा नईं होने करी फसलां सुक्की गइयां । अन्न नईं थोने करी

लोक मरन लगे । सब जीव जैन्तू तड़फन लगे । राजा रोमपाद ब्राह्मणें कोल सिक्ख मत्त लैन आया । जे राज काल थमां कियां बचै । ब्राह्मण आखन लगे—हे महाराज ! इक निकके नेए ऋषि न, जिन्दा नां ऋष्यशृंग ऐ, ओ पूर्ण ब्रह्मचारी न । उनेंगी अपने राजे इच सद्दो । उनेंगी तपस्या करी ए सिद्धी प्रापत ऐ जे जित्थे जान उत्थे गै खूब बरखा हुन्दी ऐ ।

राजा नै अपने दर्बारिएं कन्ने सलाह कीती जे ऋष्यशृंग गी विभाण्डक ऋषि हुन्दे आश्रमै थमां कियां आन्दा जा । जियां उनें सलाह दिती ही राजा नै शहरै दियां सबने थमां शैल कञ्जरियां सद्धियां ते उने गी आखेया—जे जियां हुन्दा ऐ ऋष्यशृंग होरें गी अंग देसै इच लई आओ ।

ओ वचारी मुन्दरियां बडियां घावरियां । नईं जान तां राजा रोहें हुन्दा ऐ ते गइयां तां ऋषि हुन्दा रोह सामनै हा । आखर उनें सोचेया जो किश भागं इच ऐ ऊऐ किश होना ऐ । चलो देसै इच जेड़ा काल पेदा ऐ ओदे कशा ते लोक वचडन । राजा नै उनें गी ए कम्म तोड़ चाढ़ने गित्तै सब किश सम्भान तैयार करी दित्ता ।

उने इक बड्डी नेई किशती लई ते ओदे इच बाग लाया । नकली बेलां ते नकली गै बूटे । ते बिच नकली गै आश्रम बनाई लेया । ओ किशती उनें विभाण्डक ऋषि हुन्दे आश्रमै कोल वगदी नदी इच जाई बन्नी । दा लाइमै ओ ऋषि हुन्दा आश्रम दिक्खन आइयां । पर बिच्चा कम्बा करदियां हियां ।

खुशी दी गल्ल ए होई जे ऋषि होर आश्रमै इच नईं हे । उनें सोचेया मौका मजेदार ऐ उन्दे चा इक ऋषि हुन्दे पुत्तरै कोल गई । ओ ऋष्यशृंग गी आखन लगी—“सनाओ ऋषि जी ! राजी बाजी ओ ! तुसे कन्दमूल खाई ले न ? ऋषि लोकें दी तपस्या ठीक ठाक चलै दी ए ? तुन्दे पिता हुन्दा तपोबल खूब बधैं करदा ऐ ? तुन्दा अपना बेदें दा पाठ ठीक चला दै । उनें दिनें ऋषि लोक इक दूए गी इयां गै कुशल समाचार पुछदे हे ।

उस नौजवान आश्रमवासी ऋषि नै कदें नेआ शैल मनुक्ख नईं

हा दिक्खे दा न गै कदें नई मिट्टी बाज सुनी दी ही । आखर समाजिक भावना दा डूर फुटेया । उसी दूएँ कन्नै रौनें दी लालसा होन लगी । उस कदें इस्त्री नई ही दिक्खी दी पर सैभन गै उस श्लैपै पासै ओदा मन खचोन लगा । ओदे मनै इच किश किश होन लगा । उस सोचेया ए बी कोई ऋषि ऐ । ओदे मनै इच खुशी दा सुम्ब फुटी निकलेया । ओ नुआड़े पासै दिखदा रेआ ते आखन लगा—“तुस ते बड़े चंगे ब्रह्मचारी सेई हुन्दे ओ । तुस कुण ओ ? अऊं तुसें गी प्रणाम करनां । तुन्दा आश्रम कुत्थें ऐ ? तुस के तपस्या करा करदे ओ ? ऋष्यशृंग नै ओदा सत्कार कीता ।”

ओ आखन लगी—“इत्थुआं त्रै जोजन मेरी कुटिया ऐ । में थुआड़े गित्तै फल आन्दे न । तुस मिगी प्रणाम नईं करो । पर औं तुन्दे सत्कारै दा जबाब जियां साढ़ा रवाज ऐ, ऊआं देड ।”

उस ऋषि गी घोटिए गलें लाया । मठयाई आन्दी दी ही, उसी खलाई । बड़ा सगन्धी आला हार ओदे गलै इच पाया । ते किश पलाया बी । फी उसी गलें लाया ते आखन लगी—अस अपने मैहमानें दा इयां सत्कार करने आं । ऋषि गी सत्कारै दा ए तरीका बड़ा प्यारा लगा ।

ओ वस्वा भटपट बेली होई । जाजत मंगन लगी । ओ डरै दी ही जे विभाण्डक ऋषि होर नईं परतोई आन । आखन लगी मेरा अग्निहोत्र करने दा समां होई गया ऐ । ओ बल्लें गै निकली ते खिसकी गई ।

जिसलै ऋषि विभाण्डक होर परतोए तां ओ आश्रमै दी दशा दिक्खिए बड़ा चर्ज करन लगे । ताईं तुआईं मठयाई खिल्लरी दी ही । कोई सोतफण्ड नईं । बेल्लां ते झाड़ियां पलची दियां हियां । पुतरै दे चेहरे उप्पर ओ तेज नईं लब्बा । बासना कन्नै ओदे चेहरे उप्पर किश कालख आई गेदी ही । आश्रमै दे लौके फौके कम्म बी नईं हे होए दे ।

विभाण्डक होर बड़े क्षुब्ध होए, पुतरै गी पुछन लगे—बेटा ! तूं समधां किट्ठियां नईं कीतियां । ए बेल्लां कुण मरोड़ियां न ?

ए भाड़ियां कुस भन्नियां न ? गवै दी धार कड़ी ऐ ? कोई थुआड़ी सेवा करन इत्थें आया हा ? ए बचित्तर हार कुस दित्ता ऐ ? तूं किश घावरे दा बी लवनां एं ?

बचारा सिद्धा साधा ते भोला ऋष्यशृंग आखन लगा—इक ब्रह्मचारी आया हा । ओ बड़ा गै शैल हा । ओदा श्लैपा नईं दस्सन हुन्दा । ओदी बाज बड़ी मिट्टी ही । अज्ज मिकी इन्नी खुशी होआ करदी ऐ जे दस्सन नईं हुन्दी । ओदे कन्ने गल्लां करिऐ ते उसी दिक्खिऐ बड़ा गै सन्दोख हुन्दा हा । उस मिकी गलें लाया । ओ आखदा हा अस इयां गै सत्कार करने आं । मिकी बड़ा मजा आया । नेआ नन्द कदे नईं हा आया । मिट्टे थमां मिट्टा फल खाइऐ बी ओ मजा कदे नईं आया । फी उस बब्बै गी दस्सेया जे ओ ब्रह्मचारी कनेआ हा, कनेआ शैल हा ते उस के के कीता हा । ऋष्यशृंग मजे लाइयै आखन लगा उस ब्रह्मचारी कन्ने रौने गी बड़ा मन करदा ऐ । में कुसै दिन तुप्पन जाड ते उसी लई औड । अऊं तुसें गी कियां समभां जे ओ किन्नां चंगा हा ते किन्ना शैल हा । मेरा उसी मिलने गी बड़ा जी करदा ऐ ।

जिसलै ऋष्यशृंग नै इऐ ने मनै दे भाव बुहासरे ते हलचल दस्सी जनेह उस कदे नईं बुज्जे हे तां विभाण्डक होर समभी गे जे के होआ ऐ । ओ आखन लगे—“बेटा ! ए कोई ब्रह्मचारी नईं हा । ए कोई शतान राकश हा । ए राकश साढ़ी तपस्या इच बिघ्न पाने गित्तै इयां गै करदे न । ओ अपना कम्म सिद्ध करने गित्तै बड़ियां चालां चलदे न । हुण उनें गी अपने कोल नईं बज्जन देयां ।” विभाण्डक होर त्रै दिन तुपदे रे जे ए गड़बड़ करने आला कुण हा पर कोई पता नईं लगा ।

फी इक दिन जिसलै विभाण्डक होर आश्रमै इच नईं हे, कन्द मूल लैन गेदे हे ओ बेस्वा बल्ले नेऐ उत्थें आई जित्थें ऋष्यशृंग बैठे दे हे । ऋष्यशृंग उसी दिखदे गै उट्टियै द्रौड़ैया ते स्वागत करन लगा । इयां बभोऐ आखो बन्न त्रुट्टी गया ऐ । इस बारी उस बेस्वा गी

किश करने दा समां गै नईं दित्ता, ओदे कछ गेया ते आखन लगा—
चलो अज्ज तुन्दा आश्रम दिक्खी आवां । पिता जी दे औने थमां
पहले पहले उत्थुआं होई औन्नां ।

ओ ते इऐ गल्ल मिथिए आई दी ही । ओदे ते मनै दी गल्ल
होई गई । ओ भटपट उस किशती च जाई चढ़े जेड़ी आश्रम
जनेआ लबदी ही । ओदे चढ़े गै उनें रस्सा खोलेया ते ऋष्यशृंग
गी लइऐ अंग देसं गी चली पइयां । रस्ते इच उनें ऋष्यशृंग दियां
बड़ियां खातरां कीतियां । ते उसी मता किश दस्सेया ।

जिसलै ओ अंग देसै इच पुज्जा तां दुनियादारी दे मते तरीके
सिक्खी गेदा हा ।

रोमपाद ऋष्यशृंग दे औने दी खबर सुनिए बड़ा खुश होआ ।
ओ उसी सज्जे दे रणवासै इच लई गेया । उत्थे ओदे गित्तै खास
कमरा बनाये दा हा । जियां ब्राह्मणें आखेदा हा ऋष्यशृंग दे
अंग देसं इच पैर रखदे गै उत्थें बरखा शुरु होई गई । नदी नाले
ते भीलां भरोची गे । लोकें दें रुआं फिरी गे । सारे खुश होई गे ।
रोमपाद नै अपनी धी ऋष्यशृंग गी ब्याही दित्ती ।

जे किश सारी योजना बनी ही ओ ते पूरी होई गई पर राजा
बिच्चा घावरन लगा जे विभाण्डक ऋषि होरें तुपदे आई जानां ऐ
ते श्राप दई ओड़ना ऐ । जिस रस्ते विभाण्डक होरें औना हा राजा
नै उत्थें थोड़े थोड़े फासले उपपर गवां महियां बन्नी ओड़ियां ते ग्वालें
गी आखी ओड़ेया जे जिसलै विभाण्डक ऋषि होर औन तां उन्दी
खूब खातर करो । आखो अस ऋष्यशृंग हुन्दे दास आं । ते अपने
स्वामी दे पिता दा तुन्दा स्वागत करन आयें आं । असें गी जो हुकम
करो अस हाजर आं ।

जिसलै ऋषि विभाण्डक होर आश्रमै गी परतोए उनें गी पुत्तर
नईं लब्बा । उनें गी बड़ा रोह चढ़ेया । उनें सोची लैत्ता ए अंग
देसै दे राजे दा कम्म ऐ । ओ नदियां लंघदे ते आं टपदे राजधानी
पासै चलन लगे । उन्दियां अक्खीं रोहै कन्ने बलै दियां हियां ।
पर रस्ते इच सारे अपने पुत्तरै दे गै नौकर ते दास लब्बे जेड़े कदम

कदम उप्पर उन्दा स्वागत करदे हे । उन्दा रोह ढलन लगा ते जिसलै राजधानी पुज्जे तां रोहै दा नां निशान नईं रेदा हा ।

राजधानी पुजदे मे उनें गी बड़े मानै कन्ने राजे दे महलें इच लई गे । उत्थें जाइये उने दिक्खेथा जे उन्दा पुत्तर ते इन्द्र आडू सिंहासनैं उप्पर बैठा दा ऐ । ओदे कन्ने नुआड़ी पत्नी राजकमारी शान्ता बी ऐ । ओदा श्लैपा दिक्खिए ओ बड़े पसोये । ते खुश होए विभाण्डक होरें राजे गी शीर्वाद दित्ता । ते अपने पुत्तरै गी समझाया “राजा गी प्रसन्न करने दा जतन करेयां । जिसलै पुत्तर होऐ तां मेरे कच्छ बनै इच आई जायां ।” ऋष्यशृंग होरें ऊआं गै कीता जियां पिता नै आखेया हा ।

लोमश जी नै युधिष्ठिर होरें गी सनाया—समां पाइयै जियां दमयन्ती ते नल, सीता ते राम, अरुन्धती ते बसिष्ठ लोपामुद्रा ते अगस्त्य, द्रोपदी ते तुस बनै इच दुरी आये ओइयां गै शान्ता ते ऋष्यशृंग बनै गी दुरी गे प्रेमै कन्ने रौन लगे ते परमात्मा दा भजन करन लगे । ए ओ आश्रम ऐ जित्थे ऋष्यशृंग होर रौन्दे हे । इत्थें स्नान करो ते पवित्तर होई जाओ । पाण्डवें उत्थें स्नान कीता ते पूजा कीती ।

खेचल : यवक्रीत दी तपस्या

जात्रा करदे करदे युधिष्ठिर होर गंगा कनारै रैभ्यमुनि दे आश्रमै कोल आए। लोमश ऋषि होरें पाण्डवें गी इस थारै दी कथ सनाई। “इऐ ओ घाट ऐ जित्थें राजा दशरथ हुन्दे पुत्तर भरत नै श्चान कीता हा। इन्द्र नै वृत्रासुर गी धोखे कन्नै मारेया सो इत्थें गै आनियै उन्दा पाप धनोआहा। इत्थें गै तप करियै सनत्कुमार परमात्मा कन्नै इक्क होई गे हे। इत्थें गै आनियै देवतें दी माऊ अदिति नै होम कीता ते औहृतियां पाइयां ते इक पुत्तरै गित्तै तपस्या कीती। हे युधिष्ठिर जी ! तुस बी इस पर्वतै उप्पर चढ़ो। तुन्दे उप्पर जेढ़ी बिपत्ती पेई दी ऐ दूर होई जाग। गंगा जी दे बगदे पानियें च न्हौन्दे गै तुन्दा क्रोध ते बासना धनोई जाडन।”

लोमश ऋषि होरें इस थारै दी महमा गाई। उनें इक कहानी बी सनाई। इक ऋषि दा पुत्तर यवक्रीत इत्थें कियां

मोआ हा । ओ सनान लगे—“इत्थैं दौं ब्राह्मण भरद्वाज ते रैभ्य रौंदे हे ।

उन्दी आपूं इच्चें बड़ी मित्तरता ही । रैभ्य ते उन्दे दौंनैं पुत्तरें परावसु ते अर्वाविसु नैं बेद सिक्खे ते बड़े भारे बिद्वान बनी गे । भरद्वाज होर ईश्वर भगती च गै मगन रौंदे हे । उन्दा जातक हा यवक्रीत । ओ ए दिक्खियै बड़ी ईर्खा ते दुःख करदा हा जे ब्राह्मण ओदे तपस्वी बब्बै दी इत्थी मानता नईं करदे जित्थी ओ बिद्वान रैभ्य दी करदे न । यवक्रीत नैं इन्द्र गी खुश करने गित्तै तप करना शुरु करी दित्ता । उस तपस्या करी करी अपने शरीरै गी बड़ा कष्ट दित्ता । ए दिक्खियै इन्द्र गी बड़ी देया आई । ओ प्रकट होए ते पुच्छन लगे—भई तूं अपने शरीरै गी की कष्ट देऐ करना एं ?”

यवक्रीत आखन लगा—“अऊं वेदें दा एडा पण्डत होना चाह्नां जेडा अज्जै तोड़ी कोई नईं होआ । अऊं इक बड़ा बिद्वान बनना चाह्नां । ए ताड पूरी करने गित्तै अऊं तपस्या करा करनां

गुरु कोल पढ़न जाड तां मता चिर लग्गनां ऐ ते बड़ी खेचल करनी पौनी ऐ । अऊं इस करी तपस्या करा करनां जे बिना गुरु थमां पढ़े दे गै मिगी आपूं गै ज्ञान होई जा । मेरे उपपर इऐ किरपा करो ।”

इन्द्र होर मुस्कराये ते आखन लगे—“ब्राह्मण देवता ! तुस करस्तै पेई गे ओ । तुस घर जाओ, कोई गुरु तुप्पो ते उन्दे कशा बेद पढ़ो । बिद्या प्राप्ति च तपस्या नैं के करना ? पढ़ाई ते पढ़ियै गे औनी ऐ ।” ए आखियै इन्द्र होर लोप होई गे ।

पर भरद्वाज हुन्दे पुत्तरै तपस्या नईं छोड़ी । उस होर मती घोर तपस्या शुरु करी दित्ती । देवता लोक बी दिक्खियै डरन लगे ते दुखी होन लगे । इन्द्र होर फी प्रगट होए ते आखन लगे—“बिद्या प्राप्ति दा तूं गलत तरीका चुनेआ ऐ । ए ज्ञान तुगी

पढ़िए गै प्रापत होना ऐ । थुआड़े पिता नै बी बड़े धीरजै कन्नै
बेद पढ़े हे । तूं शरीरै गी कैंत दुःख दिन्नां एं ?”

पर यवक्रीत नै ए दूए बारी दी चेतावनी गी ध्यान नेईं दित्ता
ते मुंहजोर होइऐ आखन लगा—“जे मेरी गल्ल नेईं मनोई तां
अऊं अपने अंग इक इक बड्डी बड्हुऐ अग्नि च औहतियां देई ओड़ड ।
में तपस्या नेईं छोड़नी ।”

ओ तपस्या करदा रेआ । तपस्या जारी ही इक दिन ओ गंगा
न्हौन गया ते उस दिक्खेया जे इक बुड्ठा ब्राह्मण रेतू दियां मुट्टियां
भरी भरी गंगा च सुट्टा करदा ऐ । यवक्रीत नै पुच्छेया—“बाबा जी
तुस के करा करदे ओ ?”

बुड्ठा बोलेया—“अऊं गंगा गी बन्न लान लगां । जिसलै अऊं
मुट्टियां भरी भरी रेत सुट्टियै बन्न बन्नी लैड तां सारे लोकें गी गंगा
टप्पने दी सौख होई जाग । इस लै गंगा पार जान केडा औखा ऐ ।
लोकें दे भले गित्तै कम्म करा करनां । ठीक ऐ नेईं ?” यवक्रीत
हस्सेया ते आखन लगा—“बाबा जी, तुस बी भले ओ । मुट्ठी मुट्ठी
रेत पाइयै एडे बड्ठे दरया च बन्न बन्होंदा ऐ ? किश होर कार
करो ।” बुड्ठा आखन लगा—“मेरी कार बेवकूफी आली ऐ जा
थुआड़ी जो बिना पढ़े दे, तपस्या कन्नै गै बेद सिक्खना चान्दे
ओ ।” यवक्रीत समझी गया जे बुड्ठा ब्राह्मण इन्द्र गै । उस बड़े
नरम होइऐ इन्द्र जी गी बेनती कीती जे मिगी बिद्या प्राप्ति दा
बर देओ ।

इन्द्र होरें उसी शीर्वाद दित्ता ते आखेया—“अच्छा ! जियां
तूं आखनां एं अऊं तुगी बर दिन्नां । जा बेद पढ़ । तूं बड़ा बिद्वान
होई जागा ।”

०००

यवक्रीत दा नास

यवक्रीत नै बेद पढ़े ते बिद्वान होई गया । उसी बड़ा गमान होई गया जे उस इन्द्र जी दे बरै कन्ने बेद पढ़ी लैते न, ते कुसै गुरु थमां बिद्या प्रापत नई कीती । कुसै दा चेला नई बनेया ।

भरद्वाज होरें गी पुतरै दी ए गल्ल चंगी नई लगदी । ओ डरदे हे जे इस रैभ्य ऋषि हुन्दा अपमान करी ओड़नां ऐ ते मरोई जानां ऐ । उनें उसी पहलै गै समझाया जे देवता लोक उनें मूर्खे गी जेड़े तप करन जटोई पौन्दे न, बर दई ओड़दे न । दवाइयां बेचने आले मूर्खे गी नशे आलियां दवाइयां नई के मढ़ी ओड़दे ? नेए बर आत्म संजमै दा नास करदे न । जिसलै संजम नई रेआ तां मन करस्तै पई जन्दा ऐ ते नतीजा ए निकलदा ऐ जे मनुवखे दा नास होई जन्दा ऐ । उनें जेड़ी सिक्ख दिती ही उसी होर स्पष्ट करने गितै ए कथ सुनाई—

“पुराने समें दी गल्ल ऐ । इक ऋषि होर हुन्दे हे । उन्दा नां बलधी हा । उन्दे पुतरै दी अकाल मृत्यु होई गई । उनें गी

महाभारत

१७६

बड़ा दुख होआ । उन्हें पुत्तर प्रापती गित्तै घोर तपस्या शुरू कीती ।
उन्हें आखेया नेआ पुत्तर देओ जेड़ा कदें मरै नई ।

देवते आखन लगे—मनुक्ख जोनि इच्च आइयै मरना जरूर
पौन्दा ऐ । भायें केहू लम्मी उमर होऐ आखर मरना ते हुन्दा गै ।
उन्हें आखेया—तुस दस्सी ओड़ो केडी लम्मी उमर होनी चाही
दी ऐ ।

ऋषि होर बोले—जे ए गल्ल ऐ तां मेरे पुत्तरै दी इन्ती उमर
करो जिन्ती सामने पर्वतै दी ऐ । ऋषि होरें गी वर थोई गया ।
छन्दै जातक होआ जेदा नां मेधावी रखेया ।

मेधावी गी ए गमान होई गया जे उस कदें मरना गै नई ।
की जे पहाड़ै कदें नष्ट होना नई ते ओदी आयू पहाड़ै जिन्ती ऐ ।
ओ सारें कन्ने खौरा बोलै ।

इक दिन इस घमण्डी नै इक महात्मा धनुषाक्ष हुन्दा अपमान
करी ओड़ेया । महात्मा नै इकदम श्राप दिता—

जा भस्म होई जा । पर मेधावी उप्पर किश असर नई
होआ ते चंगा भला रेआ । ऋषि होरें गी बड़ा चर्ज होआ । उन्हें
गी पता लग्गा जे मेधावी गी जमदे गै वर थोआ दा ऐ ।

धनुषाक्ष होरें सण्डे दा रूप धारेया ते अपनी तपस्या दे बलै
कन्ने पहाड़ै गी टक्कर मारी ते त्रोंड़ी टकाया । पर्वत त्रुटदे गै मेधावी
दा काल होइ गया ।”

भरद्वाज होरें ए कथा सनाइयै पुत्तरै गी सावधान कीता—
“इस पुरानी कथै थमां सिक्ख लै । घमण्डै कन्ने कुतै मरोई नई
जायां । किश आत्म संजम पैदा कर । सदाचार दी हृद् नई
टप्प । रैम्य मुनि जी दा नरादर नई करा कर ।”

वसन्त रितु आई । बेलें बूटें गी फुल्ल पे । ते बड़ें स्नाहकड़े
लब्बन लगे । सारा वन गै रंग बरंगे फुल्लें कन्ने ते पक्खरूणं दे मिट्टे
गीतें कन्ने सोभन लगा ।

सारी धरत गै कामदेव दे जादू कन्ने मोहित होआ दी ही ।
परावसु दी लाड़ी रैम्य ऋषि हुन्दे आश्रमै कश टेह्ला करदी ही ।

ओदा श्लैपा, पवित्तरता ते हिम्मत किश अनोखियां गै गल्लां हियां । ओ दिब्ब गै लब्बा दी ही । उससै बेल्लै यवक्रीत उत्थें आई पुज्जा । ओ उस मटयारै दे श्लैपे ते मधुरता कन्नै इन्ना बेबस होआ जे उसी किश होश नईं रेई ते अपने उप्पर कोई संजम नईं रेआ । ओ उसी जवर्दस्ती नकेवलै पासै लेई गया ते पतारी ओड़ेया । ओ लज्जा संकोच ते घबरा करी किश नईं करी सकी ।

रैभ्य ऋषि होर जिसलै आश्रमै गी परतोए तां उनें दिक्खेया जे उन्दी नू बड़ी दुखी ऐ ते नुआड़े अत्थरुं गै नईं थमोआ करदे । जिसलै उनें गी पता लग्गा जे एदे कन्नै के अत्याचार होआ ऐ तां ते रोहै कन्नै बेकाबू होई गे । उनें अपने सिरै थमां इक बाल पुट्टेया ते मैन्तर पड़ियै अग्नि इच पाया ।

उससै बेल्लै उन्दी नूएँ जनेई इक शैल मटयार उस जगै दी अग्नि बिच्चा निकली । ऋषि होरें अपनिएं जटें बिचा इक बाल होर पुट्टेया ते अग्नि इच सुट्टेया । इक बड़ा भयंकर भूत अग्नि चा निकलेया । ऋषि होरें उनें दौनें गी आखेया, “जाओ यवक्रीत गी जीएं मारी ओड़ो ।” दौनें सतवचन आखेया ।

यवक्रीत बड़ु लै सजेतै गेदा हा । ओ भूतनी मटयार ओदे कछ गेई । मुस्करान लगी, ते पट्टू पान लगी । जिसलै ओ दनां क बेध्यान होआ उस भूतनी नै पानी छूने आला लोटा चुकेया ते नस्सी गेई । दूआ भूत बड़ा नेजा चुक्कियै यवक्रीत पासै द्रौड़ेया ।

यवक्रीत त्राहियै उट्टी खड़ोता । उस सोचेया जिन्ना चिर औं हत्थपानी करियै फारग नईं हुन्दा माढ़ा मैन्तर नेईं फुरी सकदा । उस लोटे पासै हाम्बेया । उत्थें लोटा गै नईं हा । ओ छपड़ी पासै द्रौड़ेया ओ बी सुक्की दी ही ।

ओ कछ बगदी नदी पासै द्रौड़ेया पर ओदे पुजदे गै नदी बी सुक्की गई । ओदे गित्तै कुतै पानी नईं रेआ । ओ भूत हर पासै ओदे पिच्छें २ द्रौड़ेया । यवक्रीत जान बचाने गित्तै नस्सै ते पिच्छें पिच्छें भूत नेजा लइयै द्रौड़ै । पापै करी ओदे बरतें ते जागरणें दा पुन्न सम्भी गेदा हा । आखर ओ अपने पिता दी जग शाला पासै

द्रौढ़या । अगें नेआ भाना बरतेआ जे जग्ग शाला दे काने चोकीदारै उसी नईं पशानेया ते अन्दर नईं बड़न दित्ता । यवक्रीत मौती थमां डरा करदा हा । ओ जबर्दस्ती अन्दर जान लगा । इन्ने इच ओ भूत आई पुज्जा उस नेजे कन्नै यवक्रीत गी त्रुम्बी ओढ़ेया । यवक्रीत मरी गेया ।

जिसलै भरद्वाज अश्रमै इच पुज्जे उनें गी अपने पुत्तरै दी लोथ पई दी लब्बी । उनें सोचेया जे इस रैभ्य दी वेज्जती कीती होनी ऐ इस करी ऐ दुर्गति होई ऐ ।

ओ आखन लगे—“बड़ा दुख ऐ पुत्तरा ! तुगी घमण्ड ते गमान खाई गे । सारे कशा बड़ी गलती गै ऐ ही जे तू बेद इयां पढ़े जियां कोई ब्राह्मण नईं पढ़दा । तू नेई गल्ल की कीती जिस करी तेरी ऐ दुर्गति होई ।” उनें श्राप जित्ता—“जिस रैभ्य नै तेरी जान लेती ऐ ओ बी अपने पुत्तरै हत्थें मरोऐ ।” उनें गी पुत्तरै दी मौती दा बड़ा सल्ल हा ।

जिसलै अपने उप्पर किश संजम होआ तां दुःखी होइऐ आखन लगे—“ऊऐ चंगे जिन्दे पुत्तर नईं । माढ़ा इक मात्तर पुत्तर हा सै बी टुरदा होआ ते में अपने गमै कन्नै बतोऐ दे अपने मित्तर ते साथी गी श्राप देई ओढ़ेया । इस जीने दा लाह गै कोई नईं ।” उनें पुत्तरै दी चिख चिनी ते आपू बी कन्नै गै बलदी चिखा इच छाल देइयै भस्म होई गे ।

०००

शड़ी पढ़ाई करनी गै काफी नईं हुन्दी

राजा बृहद्युम्न रैभ्य ऋषि हुन्दे भगत हे । उनें इक जग्ग रचाया । उनें गुरु होरे गी बेनती कीती जे अपने पुत्तारें परावसु ते अर्वावसु गी जग्ग करान भेजो । अपने पिता कोला जाजत लेइयै ओ दमै खुशी खुशी राजधानी पासै दुरी पे ।

जगै दियां तयारियां होआ दियां हिया । परावसु गी लाड़ी गी मिलने दा चा चढ़ेया । रातीं इक्कला गै दुरी पेआ ते हजे भुसमुसा गै हा जे अपने आस्रमै च आई पुज्जा । अपने आस्रमै कछ उस दिक्खेया जे कोई जंगली जानवर शैहू बट्टिऐ बैठा दा ऐ ते भपटने गै आला ऐ । परावसु नै फट्ट दित्ता ते भुजा सुट्टी ओढ़ेया । पर जिसलै उस धरोइयै दिक्खेया तां ओदे खानेया गेई । उस अपने पिता रैभ्य ऋषि गी जंगली जानवरें दे टपलै मारी ओढ़ेया हा । रैभ्य ऋषि मिरग शाल लेइयै भाड़ी कछ बैठे दे ध्यान करा दे हे ।

उस समभी लैता जे भारद्वाज ऋषि दे श्रापै करिऐ गै ए हत्या दा पाप होआ ऐ । उस झटपट दाह-संस्कार कीता ते अर्वावसु

गी जाइयै सारी गल्ल सनाई ते आखन लगा “ए पाप ते होई गया पर इस करी राजे दे जगै च बिघ्न नेईं पेया लोड़चदा । अड़ेआ तूं इयां कर जे जा, ते मेरे कशा भलेखे कन्नै होए दे पापै दा मेरे थार तूं प्राचित करी आ । भलेखे च पाप होई जा तां ओदा प्राचित होई जन्दा ऐ । तूं माढ़े थार प्राचित करी आ, अऊं इत्थें राजे दा जग भुगताई ओड़नां । अऊं ते ए कम्म इक्कला टपाई लैड । पर थुआढ़े इक्कले कशा ए नेईं होना ।”

अर्वाविसु भला मानस ते सिद्धा सादा हा मन्नी गया ते आखन लगा—“तुस राजे दा जग भुगताओ । ते अऊं थुआड़े, पिता ते ब्रह्महत्या दे, पापै दा प्राचित करनां जे तुन्दा कलंक हटै ।”

बचारा अर्वाविसु भ्राऊ दे पापै दा प्राचित करन लगा । बर्त पूरा करिए ओ राजे दे दर्वारै च भ्राऊ दी मदत करन आया । परावसु दा पाप नेईं धनोआ । पाप कोई करै ते प्राचित दूआ करै इयां पहलै दा पाप नेईं धनोन्दा । परावसु दे मनै बिच पाप बस्सी गया । उस भ्राऊ दे मुहें उपपर तेज दिक्खेया ते नुआढ़ा दोखी होई गया । उस भूठा कलंक लाइयै नुआढ़ा अपमान करने दी ध्याई । जिसलै अर्वाविसु जग शाला च आया तां परावसु जोरें गल्ल करन लगा जे राजे गी सनोची जा । आखन लगा—“इस आदमी नै ब्रह्म हत्या दा पाप कीता दा ऐ । ए इस पवित्तर जगै च कियां आई सकदा ऐ ?”

अर्वाविसु गी बड़ा रोह चढ़ेया । उस आखेया—“भूठी तोह् मत ला करनां ऐ । में कदू ब्रह्म हत्या कीती ऐ ?” पर कुसै बी ओदी गल्ल सुनी गै नेईं । राजे नै हुकम दिता ते उसी बेइज्जत करिए जगशाला चा बाहर कड़ी ओड़ेया ।

अर्वाविसु आखदा गै रेआ जे अऊं निर्दोस आं । ए पाप मेरे भ्राऊ नै कीता ऐ । पर ओबी भुल भलेखै होए दा ऐ । में प्राचित करिए ते बर्त रखियै पाप शान्त कीता ऐ ते इसी बचाया ऐ ।” पर एदे कन्नै मामला सगूं होर बिगड़ेया । की जे कोई बी ओदी गल्ला दा जकीन गै नेईं करै । पाप भ्राऊ कीता ते प्राचित

करने दी लोड़ इसी कियां पेई ? सारे आखन लगे—“इक ते इस पाप कीता ऐ ते दूआ हुण भूठ मारै करदा ऐ । अपने निर्दोस भ्राऊ गी दोस ला करदा ऐ । इयां अपने पापें दा भार बधा करदा ऐ ।”

निर्दोस अर्वावसु गी इक ते ब्रह्म हत्या दा कलंक लाया ते दूआ उससै गी भूठा बी सिद्ध करी ओड़या । ओ बचारा बड़ा निम्मोभान होआ दा बनै च गया उठी । उस सोचेया जे इस दुनियां च न्यां गै नेई । उस घोर तपस्या करनी शुरू करी दिती ।

देवता खुश होए ते उस पवित्तर आत्मा गी पुच्छन लगे—“तुसैं के बर लैना ऐ ?” इस तपस्या दे समें च गूढ़े चिन्तन ते उच्चे बचारें कन्नै ओदा मन बिल्कुल शुद्ध होई गेदा हा । अपने भ्राऊ पर सारा रोह ढली गेदा हा । उस इऐ प्रार्थना कीती “मेरे पिता मुड़िऐ जीन्दे होई जान । मेरे भ्राऊ दे मनै चा सारी दुष्टता दूर होई जा, ते नुआढ़ा पाप शान्त होई जा ।”

“देवतें उसी इऐ बर देई ओड़या ।” लोमश ऋषि होरें रैभ्य ऋषि दे आश्रमै कोल ए कथ युधिष्ठिर गी सनाई । ते आखेया “हे पाण्डवो । इत्थे स्नान करो । ते इस पवित्तर नदिया च अपनियां बासनां धोई ओड़ो ।

अर्वावसु ते परावसु इक्कै विद्वानै दे दौं पुत्तर हे । ओदे कछा गै दौनैं बिद्या प्रापत कीती ते बड़े बिद्वान बने । पर ग्यान किश होर चीज ऐ ते गुण बखरी चीज ऐ । ए ठीक ऐ जे मनुक्खै गी चंगे मन्दे दा ग्यान होना चाही दा ऐ । तां गै मनुक्ख बुराई गी छोड़ी सकदा ऐ ते भलाई गी अपनान्दा ऐ । पर ए ग्यान अपनी जिन्दगी दे कम्मैं च अमली रूपै च प्रगट बी होना चाही दा ऐ छड़ा पढ़ेदा ते तोते आड़ू रटे दा ग्यान मनुक्खै गी धर्मात्मा नेई बनान्दा । रटे दा ग्यान छड़ा उप्पर लाये दे टल्लें आड़ू ओपरी शान गै हुन्दी ऐ । ओ साढ़े जीवन दा अंग नेई हुन्दा ।”

अष्टावक्र मुनि

पाण्डव तीर्थे दी जात्रा करदे बनों बन फिरा करदे हे । ओ इक आश्रमै कोल आये जित्थुआं दे ऋषिएं गी उपनिषदें अमर बनाई ओढ़े दा ऐ । लोमश होरें युधिष्ठिरै गी इस थारै दी कथा सनाई ।

उद्दालक इक बड़े बड़ु ऋषि हे ते वेदान्त पढ़ान्दे हे । उन्दा इक विद्यार्थी हा कगोल । ओ बड़ा धर्मात्मा ते भगत हा पर एडा विद्वान नईं हा । दूए विद्यार्थी नुआड़ा मौजु कसदे रौन्दे हे पर उद्दालक होर ओदी पढ़ाई आले पासै इन्ना ध्यान नईं हे दिन्दे जिन्ना नुआड़े गुणें गी चान्दे हे । ओ ओदी भगती ते सदाचार पर मुग्ध हे । उनें अपनी धी सुजाता उसी ब्याही दिती ।

उन्दे घर जातक होआ । जातक आमतौर उपपर माऊ बब्बे उपपर गै जन्दा ऐ । पर उत्थें पोत्रा बाबे उपपर गया । ओ हज माऊ दे ढिड्डु इच गै हा जे उस बेद सिक्खी ले ।

जिसलै कगोल बेद-पाठ करदे गलितयां करदा हा तां बच्चे गी ढिड्डु च गै कष्ट हुन्दा हा ते ओ कष्ट कन्नै बेट खाई जन्दा हा ।

इयां जिसलै ओ जम्मेया उसी ढिङ्डा च गै अट्टु डींग पेई गे दे हे ।
इनें अट्टु त्रेडें करी उस जातकै दा नां अष्टावक्र पेई गया ।

इक दिन के होआ जे कगोल मिथिला दे राज पण्डतै कन्नै
बहसी पेया । शर्त ए रक्खी जे जेड़ा हारी जा ओ पानी च डुब्बिऐ
मरी जा ।

कगोल हारी गया । उसी पानी च डुब्बिऐ जान देनी पेई ।

अष्टावक्र मठोआ तां बड़ा बड़्डा बिद्वान निकलेया । बारें
बरें दा हुन्दे २ उस वेद ते वेदान्त सब पढ़ी लैते । इक दिन अष्टावक्र
गी पता चलेया जे मिथिला दा राजा जनक इक बड़ा जगग करा
करदा ऐ । उत्थें बड़े बिद्वान कट्टे होने न ते शास्त्रार्थ होना ऐ ।
अष्टावक्र अपने मामे श्वेतकेतु कन्नै मिथिला दुरी पेया ।

जगगशाला पुज्जने आले हे जे रस्ते इच राजा ते नुआड़े
दबारी मिली पे । राजे दे कर्मचारी अगें चलदे चलदे आख्दे जा
करदे हे—परे हटी जाओ । महाराज आवै दे न । अष्टावक्र होर
परें नईं होए ते कर्मचारिएं गी आखन लगे—

हे कर्मचारिओ ! रस्ते इच कोई अन्ना, अंग हीन, इस्त्री,
कुसै भार चुक्के दा होऐ जां वेदपाठी ब्राह्मण मिली जा तां धर्मार्त्ता
राजे दा फर्ज ऐ जे ओ उनें गी रस्ता देऐ ते परें होई जा ।
शास्त्रें इऐ आज्ञा दित्ती दी ऐ । राजा ब्राह्मण बालक दे शब्द
सुनिऐ बड़ा चगत होआ । उस मन्नेया जे गल्ल पक्क ठीक ऐ ।
उस रस्ता देई दिता । अपने कर्मचारिये गी आखेया— ए ब्राह्मण
बालक जे किश आखै करदा ऐ बिल्कुल ठीक ऐ । अगग अगग गै
हुन्दी ऐ । ओ फूकी टकान्दी ऐ भामें चिंग्याड़ी होऐ ते भामें
लोरा । अष्टावक्र ते श्वेतकेतु जगग शाला च गे । द्वारपाल नै
उनें गी रोक़ी लैता ते आखन लगा इत्थें जागतें दा कोई कम्म नईं ।
इत्थें बृद्ध ते वेदें दे पण्डत गं आई सकदे न ।

अष्टावक्र आखन लगा—असें गी छड़े जातक पूतक नईं
समझो । असें गुरु जी कोला वेद पढ़े दे न । जिनेंगी वेदें दे तत्थ

पता न, ओ उमर ते नुहारां नेईं दिखदे । द्वारपाल आखन लगा—अच्छा अच्छा । फड़ां नेईं मारो । तुस लौके नेए जातक । तुसें वेदान्त कुत्थों सिक्खेया ?

जातक आखेया—थुआड़ा के मतलब ऐ जे अऊं कांसी कोले जेडा बड़ा ते बिच्चा खाली कदू नेईं । बड़डे-कदू ग्यान, जोग्यता जा उमरी दा पता नेईं लगदा । होई सकदा ऐ जे कोई बड़ा लम्मा होऐ पर शड़ा नकम्मा गै होऐ । मिगी अन्दर जान देओ ।”

द्वारपाल आखन लगा—न थुआड़ी उमर ऐ ते न कद । पर गल्लां तू बड़डे बाबे आडू करना एं । द्रौड़ी जा इत्थुआं ।

अष्टावक्र नै जवाब दिता—हे द्वारपाल ! बाल चिट्टे होई जाने करी कोई महात्मा नेईं होई जन्दा । असली प्रौढ़ आदमी ओ हुन्दा ऐ जिस बेद पढ़े दे होन, बेदांग जानदा होऐ, उन्दा तत्थ जानदा होऐ ते उन्दा नचोड़ ओदे कोल होऐ । में ते दर्बारै दे पण्डत बन्दी गी मिलन आयां । राजा जनक गी पता देओ जे अऊं शास्त्रार्थ करन आयां ।

इन्नें च राजा आपू उर्थें आई पुज्जा । उस अष्टावक्र गी पशानी लैता । ए ऊऐ बिद्वान जातक हा जेडा रस्ते च लब्बा हा । राजा नै उसी आखेया तुगी पता ऐ जे साढ़े दर्बारै दा पण्डत बन्दी बड़ा डाढा ऐ । उस कईए गी शास्त्रार्थ च हराई ओड़े दा ऐ । ते जेडा हारी जा उसी समुन्दरै च सुट्टी ओड़दे न । उस केई बिद्वान समुन्दरै च सटाई ओड़े दे न । तू इस कम्म गी हत्थ नईं पा ते ट्टरी जा ।

अष्टावक्र जवाब दिता—पण्डत मेरे नेए बिद्वान कन्ने बहस नेईं कीती दी । अऊं बेद ते वेदान्त जाननां । ओ लौके फौके पणतें गी जित्तिऐ मस्ती गेदा ऐ जेड़े सच्चें गे बिद्वान नेईं हे । मिकी माता ने सनाया जे उस पण्डत मेरे बब्ब गी बी हराइयै समुन्दरै च डबोए दा ऐ । अऊं पिता दा बदला लैन आयां । ऋण चकान आयां । मिकी पक्का जकीन ऐ जे अऊं बन्दी पण्डत गी

हराई ओड़ड । पहिया ऋट्टी जां ते जियां रथ रुलकदा ऐ इयां गै उसदा हाल होना ऐ । तुस उसी सद्दो ।

अष्टावक्र ते बन्दी दी बहस होई । उनें शास्त्रै दा इक विषय पगड़ेआ ते शास्त्रार्थ गुरु करी दित्ता ।

दोऐ जने अपनी अपनी अकल दड़ान लगे ते दूए गी पलचाने दा जतन करन लगे । आखर सभा नै फैसला दित्ता जे अष्टावक्र जित्ती गया ते राज पण्डत बन्दी हारी गया । बन्दी नै मुंह भिगड़ा करी लैता । समुद्र च डुब्बियै उसी बदला चकाना पेया । ओ वरुण देवता दे लोक जाई पुज्जा । अष्टावक्र दे पिता कगोल दी आत्मा गी शान्ति होई । उसी अपने पुत्तारै दी जित्तै पर बड़ी खुशी होई । महाभारतै दे लेखकै कगोल दे मुंहै दा इयां ग्लाय़ा ऐ— जरूरी नई जे पुत्तार बी बब्बै आडू होऐ । इक कमजोर पिता दा पुत्तार बड़ा बलवान होई सकदा ऐ । इक मूर्ख पिता दा पुत्तार बड़ा बिद्वान होई सकदा ऐ । कुसं दी महानता ओदी नुहारी थमां जां ओदी उमरी थमां नेई पता लगदी । उपराला रंग रूप धोखा देने आला हुन्दा ऐ । इस गल्लै थमां पता लगदा ऐ जे कगोल बी खरा स्याना हा ।

०००

भीमसैन ते हनुमान

द्रोपदी पलै पलै आखदी रौन्दी ही—अर्जुनै बिनां मिकी ए काम्यक वन बिन्द बी चंगा नईं लगदा । अर्जुनै बाजूं जिन्दगी दा किश नन्द गै नईं रेआ । बाकी पाण्डव भ्रा बी अर्जुनै दे बछोड़े करी दुखी हे । कुण दिन होए अर्जुन हिमालय पर्वतै उप्पर दिब्व अस्तर प्राप्त करन गया हा, ओ हबे तोड़ी परतोआ गै नईं ।

भीमसैन द्रोपदी गी आखन लगा—भलिए लोके । सच्ची गल्ल ते ए ऐ जे अर्जुनै बाजूं मिगी बी थुआड़े आडू गे बभोन्दा ऐ । ए वन भां भक्ख गै लबदा ऐ । मनै गी शान्ति गै नईं हुन्दी । सहदेव कोल बैठा दा हा उसी पुच्छेया—अड़ेया तुगी के बभोन्दा ऐ ?

सहदेव बोलेया—ए आश्रम अर्जुनै बिना सुन्ना-सुन्ना सेई हुन्दा ऐ । चलो कुतै होर पास चलचै मत किश बछोड़े दी पीड़ घटै । युधिष्ठिर होर अपने पणतै धौम्य होरें गी सनान लगे—दिब्व अस्तर प्राप्त करने गितै में अपने भ्राऊ अर्जुनै गी टोरेया हा । ओ साढ़ा शूरवीर ते निडर योधा हबे तोड़ी नईं परतोआ । असैं अर्जुनै गी

राजा इन्द्र कोल दिव्व अस्तर लैन टोरेया हा । इन अस्तरें शस्तरें कन्नं गै अस भीष्म पितामह, द्रोणाचार्य, कृपाचार्य ते अश्वत्थामा होरें गी जित्ती सकनेआं । इयां ते इन्हें गी जित्तना कठन ऐ । ते इन्हें सारें दुर्योधन दी ते कौरवें दी बक्खी गै लड़ना ऐ ।

कर्ण उन्दी बक्खी गै ऐ । कर्ण गी दिव्व अस्तरें दा भेत औन्दा ऐ । उस ते पक्क ध्याये दा ऐ जे अर्जुन कन्ने लड़ना ऐ । में अर्जुन गी भेजे दा ऐ जे राजा इन्द्र गी पर्सन्न करिए दिव्व शस्तर प्रापत करो तां जे अस कौरवें कन्नं जुद्ध करचै ।

कौरवें गी जित्तने दा होर कोई उपा नईं । एडी म्हीमै उप्पर भेजिए हुण नुआड़ा मन्दा लग्गा करदा ऐ । इत्थें अस किट्टे रे दे आं इस करी पलै पलै चेता औन्दा ऐ । मेरी मरजी आखदी ऐ कुसै होर पास चलच, जे ए बछोड़ा ते कुसै चाली भुलचै । तुस दस्सो हां कुत पास चलचं ।

धौम्य नै मते बनें ते तीर्थे दे नां लए ते उन्दा वर्णन कीता । पाण्डव उनें सारें थारें गे, ते मन किश होर होआ । बछोड़े दी पीड़ किश घट होई । उनें इस जात्रा इच मते बरे लाये ते तीर्थे दियां कथां सुनियां जिन्दे करी तीर्थ पवित्तर होए देन । द्रोपदी मते बारी बनें चा लंधी ते पर्वत चढ़ी चढ़ी फाहूबी होई जन्दी ही । भीमसैन ते नुआड़ा पुत्तर घटोत्कच उन्दी बड़ी मद्दत करदे हे ते सुख दिन्दे हे । हिमालय दे पर्वतें इच इयां पैण्डं पेदे ओ इक बड़े खतरनाक जंगलै इच पुज्जं । रस्ता बड़ा अड्डोखोड़ ते सिद्धी चढ़ाई आला हा । युधिष्ठिर होरें गी बड़ी चिन्ता होई । उनें भीमसैन गी आखेया—अग्रे रस्ता बड़ा डाड्डा ऐ ते द्रोपदी गी बड़ा कष्ट होग । “औं, नकुल ते लोमश ऋषि होरे निकली चलने आं । तूं, सहदेव ते द्रोपदी पिछें गंगद्वार ठहरो ।”

भीमसैन नईं मन्नै ओ आखन लगा—अर्जुन दे बछोड़े कशा गे किश सिक्खो । अग्रे ओदा बछोड़ा तुसें गी रमान नईं लैन देआ करदा हुण सहदेव, द्रोपदी ते भीमसैन दा बछोड़ा बी गल पाइ लौ । ए जंगल राकशें, भूतें ते जंगली जनौरें कन्नं भरोचा दा

ऐ। तुसें गी इक्कले कियां जान देयां। रस्ता औखा ऐ तां के होआ। ऊऐ नेआ थार औग तां औं द्रोपदी गी कनादे चुक्की लैड। नकुल ते सहदेव गी बी टपाई लैड।”

युधिष्ठिर होरें ए सुनिए भीमसैन गी गलें लाया ते सीस दिती परमात्मा करै थुआड़ा शरीर बल होर बधै।

द्रोपदी मुस्कराई ते युधिष्ठिर होरें गी आखन लगी—मिकी चुक्कने दी लोड़ नई। औं दुरी सकनी आं। मेरी चिन्ता नईं करो।

ओ राजा सुबाहू दे राजै इच पुज्जे। राजा नै उन्दी बड़ी खातर कीती। उनें किश समां उत्थे गजारेया। फी ओ नारायण आश्रम दे सुन्दर बनै गी गे उठी। ते उत्थें ठहरे।

इक दिन के होआ जे उत्तर ते चढ़दे पासेया बा चली ते इक फुल्ल बाऊ चा आनिये द्रोपदी कोल डिग्गा। द्रोपदी नै हथ्ये कन्ने ओ फुल्ल चुक्की लैता। ओ फुल्ल बड़ा स्नाह्कड़ा हा। सुगन्धि आला हा। द्रोपदी गी बड़ा पसिन्दै आया। खुशी ते मस्ती कन्ने भीमसैन गी आखन लगी—“दिक्खो कनेआ शैल फुल्ल ऐ। केडी शैल सगन्धि ऐ ! ए में युधिष्ठिर होरें गी देन लगी आं। तुस इऐ ने मिकी होर फुल्ल आनी देओ। अस काम्यक बनै इच राही लेंगे।” द्रोपदी नै द्रौड़िए ओ फुल्ल युधिष्ठिर होरें गी दई ओड़ेया।

द्रोपदी गी खुश करने गित्तै भीमसैन उस फुल्लै दा बूटा तुप्पन चढ़ी पेआ। जताई दा उस फुल्लै दी बाशना आवै दी ही ओ उस्स पासे चलदा गया। रस्ते च जगली जानवर मिले। उस उन्दी पर्वाह गे नईं कीती।

इक पहाड़ी हेठ केलें दा बगीचा हा भीमसैन उत्थें पुज्जा। उस दिक्खेया जे इक बड़ा भारा घोली बान्दर रस्ते इच लेटे दा ऐ ते सारा रस्ता रोकी ओड़ेदा ऐ। उस बान्दरै दा बड़ा तेज हा जियां अग्नि दा पुंज गै ऐ हो।

भीमसैन जोरेयां हक मारी ते बान्दरै गी डराइऐ नठाने दी कीती। बान्दरै बिन्दक अक्खीं गुआड़ियां ते बल्लें नेए आखेया—

में किश बमार आं । इस करी इत्थें लेटे दां । तूं मिकी की बभाली ओड़ेया ऐ ?

तुस ते समभदार मानू ओ । औं ते निरा पशु होआ । जचदी गल्ल ते इऐ जे समभदार मानू नीच पशुएं उप्पर देया करन । इयां सेई हुन्दा ऐ जे तुसें गी चंगे मन्दे दा ज्ञान नईं । तुस कुन ओ ? कताईं जा दे ओ ? इत्थुआं अगगे नईं जन्दे । अगगे देवते गै इस रस्तै जाई सकदे न । मनुक्ख इस हद्दे थमां अगगे नईं जाई सकदे । इत्थै गै जे किश फल फ्रूट ऐ खाओ ते अकली दी गल्ल इऐ जे परतोई जाओ ।”

भीमसैन गी इयां कदें भाड़ नईं ही पेदी उसी बड़ा रोह चढ़ेया ते खिज्जियै पुच्छन लगा—हे बान्दरा, तूं कुन एं ? बड़ियां फौड़ां मारना एं । औं क्षत्रिय योधा आं । कुरु बैन्स मेरा बैन्स ऐ ते कुन्ती मेरी मा ऐ । औं वायुदेवता दा पुत्तर आं । अच्छा ! हुण रस्ता छोड़ नईं तां बुरा होगी ।

ए सुनिए बान्दर किश मुस्कराया ते आखन लगा “औं बान्दर आं ए ते ठीक ऐ । पर जे तूं अगगे बधेया तां थुआड़ी खैर नईं ।”

भीमसैन आखन लगा—अपनी सिक्ख मत्त अपने कोल गै रक्ख । तुगी एदे कन्ने के जे औं मरां जां जियां ? अच्छा भला उट्ट ते रस्ते चा भेठा ओ । नईं ते औं परे त्रटडीं ।

बान्दर बोलेया—मेरे कशा ते ठोन्दा नईं । औं बड़ा बुड्डा बान्दर आं । जे तूं जरूर गै जाना ऐ तां मेरे उप्परा टप्पी जा ।

भीमसैन आखन लगा—ए ते सखल्ली गल्ल ही । पर शास्त्रें ठाके दा ऐ जे कुसै पशु गी नईं टप्पना । नईं ते औं तुगी गै के इस पर्वत गी बी इक्कै शाल मारिए टप्पी जां जियां हनुमान होरें समुन्दर टप्पेया हा ।

बान्दरै बड़े हरान होइयै पुछेआ—अच्छा जी ! ओ हनुमान कुण हा जिन्न समुन्दर टप्पी ओड़ेया ?

जे तुसैं गी उन्दी कथा औन्दी ऐ तां मिगी बी सनाओ ।
भीमसैन गर्जिए आखन लगा—तुगी हनुमान हुन्दा बी पता नईं ।
ओ मेरे बड़्डे आ न । उनें सौ जोजन चौड़ा समुन्दर टप्पेया हा ।
ओ भगवान रामचन्दर जी दी पत्नी सीता जी गी तुप्पन चढ़े दे हे ।
अम्मी ताकत ते बीरता इच उन्दे बरोबर गैं । अच्छ ! हुण गल्लां
मतियां होई गइयां न । उठ ते रस्ता छोड़ । मिकी रोह नईं चढ़ा
कुतै होर नर्थ नईं कराई ओड़ेयां ।

बान्दरै जवाब दिता—तू एडा जोधा ए । बिन्दक सबर
कर । जिन्ना शूरवीर ए उन्नां गै तुगी नरम बी होना चाही दा ऐ ।
बुड्डे ते कमजोर लोकें उप्पर देया कनी चाही दी ऐ । कमजोरी करी
मेरे कशा ठोन्दा नईं । बड़ेपे नै मिगी भन्नी टकाये दा ऐ । शास्तरें
ठाके दा ऐ, ते तुसैं मिकी टप्पना नईं, इस करी तू मेरी पूशल बक्खी
करिए रस्ता बनाई लै ।

भीमसैन गी अपनी ताकती दा बड़ा गमान हा उस सोचेया—
पूशल खिचिचयै इसी परै सुट्टनां । ओ बड़ा हरान होआ जे पूशल
हिल्ली बी नईं । उस अपनी सारी टिल्ल लाई ओड़ी पर पूशल बिन्द
बी नईं हिल्ली । उस कचीचियां बट्टियां, ते सारे अंगें दा जोर लाया ।
जोड़ें शा कड़ाके उट्टे ते ओ पर्सा पर्सा होई गया पर पूशल नईं
खिसकी । न ताईं, न तुआईं ते न गै पिच्छें होई । बड़ा झित्था
पेया । भलखोइए सिर नीठा करी बैठा । भला गमान त्रुट्टा ।
नरम होइय आखन लगा—“तुस कुण ओ ? मिगी माफी देओ ते
दस्सो तुस सिद्ध ओ, देवता ओ जां गन्धर्व ओ ।” भीमसैन बलवानें
दा बड़ा मान करदा हा । अपने कशा बलवान होऐ तां उसी गुरु
आडू मन्निऐ गल्ल करदा हा ।

हनुमान आखन लगा—हे बीर पाण्डव । औं गै हनुमान आं,
पवन पुत्तर, थुआड़ा बड्डा आ । जंदे विषे इच तू हुण गै गल्ल कीती
ही । जेकर तू इस रस्तै जागा तां ए रस्ता ते दिब्ब आत्मैं दा
रस्ता ऐ । उप्परले लोकें गी जाने आला रस्ता ऐ । उत्थे यक्ष,

राकश इत्यादि रौन्दे न । उत्थें जाने इच खतरा ऐ । इसै करी औं तुगी रोका करनां । इस हद्द थमां अग्रे जाइऐ कोई मनुक्ख जीन्दा नईं रई सकदा । इत्थै कोल गे ओ नदी बगै दी ऐ जेदे पानी इच तुगी उस सगन्धि आले फुल्लें दे बूटे थोडन जिसी तुप्पदा तू इत्थें आई पुज्जा ऐ ।

भीमसैन गी बड़ी गै खुशी होई । आखन लगा—अज्ज मेरे कशा बड्डा खुशकिस्मत कुण होई सकदा ए ? ए मेरे गै भाग न जे मिकी बड्डे भ्राऊ दे दर्शन होए न । हुण माढ़े पर किरपा करो ते मिगी ओ रूप दस्सो जेड़ा तुसें समुन्दर टप्पने बेल्लें धारेया हा ।” ए आखियै भीमसैन हनुमान अग्रे लेटिए पणमि कीता ।

हनुमान होर मुस्कराये ते अपना देह वधान लगे । ओ इक पर्वतै आडू खड़ोइ गे । चबक्खी उन्दा गै बस्तार लब्बन लगा । भीमसैन गी भ्राऊ दा दिब्ब शरीर दिक्खिए सर्कण्डे उब्बरी आये । पहलें ते शड़ा वर्णन सुनियै गै चवात लगदा हा । उस अक्खीं मीटी लैतियां । उस दिब्ब शरीरै चा निकला करदी लो नईं भलोन्दी ही ।

हनुमान होर आखन लगे—भीमसैन ! शत्रुएं सामनै मेरा शरीर इस थमां बी बड्डा होई जन्दा ऐ । फी हनुमान होरें अपना शरीर सडोड़ी लैता । ते पैहले रूपै च आई गे । उनें भीमसैन गी लाड कन्नै गलें लाया ।

भगवान वेद-व्यास होर आखदे न जे भीमसैन हनुमान हुन्दे कन्नै गलें लगने करी बिल्कुल ताजा दम होई गेया ते अगों थमां होर जोरै आला होई गेया ।

हनुमान होर आखन लगे—हुन तुस परतोई जाओ । जिसलै तुसें गी मेरी लोड़ पवै तां मेरा ध्यान करना । मिकी तुन्दे कन्नै गलें लगिऐ उन्नी गै खुशी होई ऐ जिन्नी भगवान राम चन्दर जी नै माढ़ी पिढी उपपर हत्थ फेरेया हा तां होई ही । कोई बर मंगना ऐ तां मंगी लौ”

भीमसैन आखेया पाण्डवें दे बड़े भाग न जे मिकी तुन्दे दर्शन होई गे । तुन्दी देया कन्ने अस जरूर गै अपने शत्रुएं गी जित्ती लैगे ।

हनुमान होरें सीस दित्ती ते बिदा करदे होई आखेया—जिसलै
तू जुद्ध भूमि इच शेरै आडू गर्जगा तां मेरी गर्ज बी ओदे कन्ने साथ
देया करग ते शत्रुएं दे कालजे कम्बी जा करडन । अऊं थुआडे भ्रा
अर्जुन दे रथ दे भण्डे उप्पर सदा मजूद रौड । तुन्दी जिता होग ।”

हनुमान होरें कोल बगदी नदी दस्सी जेदे च ओ सगन्धी आले
फुल्ल खिड़े दे हे जिनें गी तुपदा तुपदा भीमसैन इत्थें आई पुज्जा हा ।
उसी ख्याल आया जे मिगी द्रोपदी बलगा करदी होग । उस फुल्ल
चुने ते भटपट लेइए परतोने दी कीती ।

०००

अऊं बगला नेईं जे तुस दिक्खिए गै भस्म करी ओड़गेओ

इक बारी मार्कण्डेय ऋषि पाण्डवें कोल आये । गल्लें गल्लें
च युधिष्ठिर होर स्त्रियें दे बारे च आखन लगे—स्त्रियें दा धीरज,
उन्दी जरने दी शगती ते उन्दी पवित्तरता संसारै दियां दिव्व
बस्तुआं न । इस्त्री बच्चे गी जन्म दिन्दी ऐ, नौ महीने उसी ढिङ्ग च
रखदी ऐ, अपनी जिन्दू थमां मती नुआड़ी रखेया करदी ऐ । इन्ना
दुःख ते कष्ट पाइयै ते ढिङ्ग फटालिए उसी संसारै दी लो दसदी ऐ ।
ते फी हर बेल्लै ओदे मुखै गित्तै गै जतन करदी रौन्दी ऐ । इस्त्री
सौभन गै बड्डे दिलै आली ते खिमा दा भाव रखने आली हुन्दी ऐ ।
कई बारी पति बड़ा दुष्ट हुन्दा ऐ, ओ उसी नफरत करदा ऐ,
नुआड़ी पर्वाह गै नईं करदा, ते हर चाली दुख दिन्दा ऐ पर इस्त्री
फी बी उसी खिमा करी दिन्दी ऐ ते उस्से गी प्रेम करदी ऐ । ए
कनेई बचित्तर गल्ल ऐ ।

मार्कण्डेय होरें ए गल्ल सुनिऐ युधिष्ठिर जी गी इक धर्म कथा सनाई :—कौशिक नां दे इक ब्राह्मण होए न जिनें ब्रह्मचर्य पालन कीता ते बड़ा तप कीता । इक दिन बूटे हेठ बहिए बेदपाठ करा दे हे । इक बगले नै उपरा उन्दे सिरै उप्पर बिट्टु करी ओड़ी । उनेंगी बड़ा रोह चढ़ेया । उनें उप्पर दिक्खेया ते दिखदे सार गै बगला भस्म होई गेया । बगले गी इयां मरी जन्दे दिक्खी उनेंगी कष्ट होआ ।

जे मनै दियां मरजियां इयां पूरियां होन लगन जे रोहै च जां तौली च मरजी करने कन्ने गै गल्ल पूरी होई जा तां दुनियां दा के बनै ? किन्ना दुःख ते पच्छो-ता होऐ ! ए बड़ी चंगी गल्ल ऐ जे मनै दी मरजी, मरजी करने कन्ने गै पूरी नईं होई जन्दी । ओदे गित्तै बाहरले साधनें दी मती लोड़ हुन्दी ऐ । बाहरले कारण सहायता देन तां गल्ल बनदी ऐ । बाहरले कारण हर बेल्लै मरजी माफक सहायता नईं दिन्दे इस करी अस मते पापें ते दुखें थमां वचे रौने आं । कौशिक होरें गी बड़ा कष्ट ते बसोस होआ जे इक माड़ा बचार उन्दे हिरदे च आया ते रोहै च उनें इक पक्खरू मारी ओड़ेया ऐ । किश दिन बीती गे । इक दिन ओ जियां सदा भिक्खेया लैन जन्दे हे, भिक्खेया लैन निकले ।

ओ इक घर गे ते भिक्खेया लैन दर्वाजे च खड़ोई गे । घरै आली भाण्डे माजै दी ही । कौशिक होर बलगन लगे जे कम्मै थमां बेल्ली होइऐ भिक्ख पान्दी ऐ । इन्ने च ओदा पति आई गेया । ओ बड़ा हुट्टे दा ते भुक्खा भाना हा । ओ बचारी नुआड़ी सेवा च लग्गी पेई । उस नुआड़े हत्थ पैर धुआये, बैसक पाई ते रुट्टी दित्ती । इस टुण्डवाली च उसी भुल्ली गै गेया जे बाहर साधु खड़ोता दा ऐ । अपने पति दी सेवा थमां फारग होइऐ ओ साधु गी भिक्खेया पान आई । आखन लग्गी—महात्मा जी ! तुसें गी मता बलगना पेया ऐ—मिगी माफी देई ओड़ोओ । कौशिक होरें गी बड़ा रोह चढ़े दा हा, उब्बली पे-भलिये लोके ! तू मिगी इन्ना चिर लुआई ओड़ोया ऐ । इयां नरादर करना चंगा नईं हुन्दा ।

इस्त्री आखन लगी—हे महात्मा जी ! तुस मिगी माफी देई ओड़ो । अऊं अपने पति दी सेवा च लगगी दी ही इस करी चिर होई गया ।

महात्मा बोलेया—पति दी सेवा ते ठीक ऐ, करनी गै चाही दी ऐ । पर ब्राह्मण दा नरादर बी ते नईं करना चाही दा । तुगी किश मता गै गमान सेई हुन्दा ऐ ।

ओ आखन लगी—तुस नराज नेईं होवो । अऊं तुसें गी दस्सा करनी आं जे पति दी सेवा च लगगी दी ही इस करी चिर लगगी गया । अऊं कोई बगला ते ऐ नेईं जे तुसें गी रोह चढ़ग ते तुस सोचने कन्ने गै इक पतिवर्ता इस्त्री गी किश नक्सान पजाई सकने ओ ।”

महात्मा होर टउ होई गे । इस इस्त्री गी बगले आली गल्ल कियां पता लगगी ऐ ?

ओ फी आखन लगी—महात्मा जी, तुसें गी पता नेईं जे कर्तव्य किन्ना पवित्तर हुन्दा ऐ । तुसें गी ए बी पता नईं जे रोह मनुक्ख दा सारें थमां बड़ा शत्रु हुन्दा ऐ । तुसें गी भिक्खेया पाने च जेड़ी देरी होई गेई ऐ उसी खिमा करो । तुस मिथिला जाओ ते उत्थें जेड़ा धर्म व्याध नां दा मनुक्ख रौन्दा ऐ ओदे थमां सिक्खो जे नेक जिन्दगी दा भेत के ऐ ।

ब्राह्मण बड़ा हरान होआ । आखन लगा—तुसें मिगी चंगी झाडफण्ड कीती ऐ । एदे कन्ने माढ़ा कल्याण गै होग । परमात्मा थुआड़ा भला करै ।” ए आखियै ओ मिथिला पासै टुरी पेया ।

कौशिक मिथिला पुज्जा ते धर्मव्याधै दा घर तुप्पन लगा । उस सोचेया जे ओ कोई शहरै थमां बाहर लोकें दे रौलें थमां दूर कोई इकला आश्रम होग । ओ शिड़कें पर फिरदा लोकें दियं आलीशान कोठियें ते बागें च हुन्दा इक बूचड़ै दी हट्टी सामने जाई पुज्जा । इक कसाई मास बेचै दा हा । उसी बड़ा चर्च होआ जिसलै कुसै दस्सेया जे इऐ धर्मव्याध ऐ । ओ टउ होए दा दूर-खड़ोइए किश सोचें पेई गया । ओ कसाई अपनी हट्टी थमां बाहर

आया ते महात्मा गी पुच्छन लगा—महाराज ! तुस राजी बाजी ओ ? उस पतिवर्ता ब्राह्मणी नै गै तुसँ गी तार्ई ते नईं टोरेया ! महात्मा होर ते मते गै हरान होए ।

कसाई आखन लगा—महात्मा जी मिकी पता ऐ तुस की आये ओ । आओ घर चलचै ।” ओ महात्मा गी घर लेई गया । उस दिक्खेया जे टव्वर बड़ा सुखी ते पर्सिन्न ऐ ।

ओ कसाई दी माऊबव्वै प्रति भगती दिक्खियै बड़ा चर्ज करन लगा । कसाई नै कौशिक गी धर्म, मनुक्ख दे जीवका कमाने दे साधन ते कर्तव्य उपपर उपदेश दित्ते । ओ महात्मा बी घर परतोआ ते अपने माऊ बव्वै दी सेवा करन लगा ! ए कम्म उस नजरन्दाज गै करी ओड़े दा हा ।

महाभारतै च धर्म व्याधै दी कथा व्यास होरें इयां लिखी दी ऐ जियां गीता दा उपदेस ऐ । उनें दस्सेया ऐ जे मनुक्ख भायें किश कम्म करै पर जे ओ दयानतदारी कन्ने करदा रवै तां ओ ऊऐ कम्म करदा मोक्ष प्रापत करी लैन्दा ऐ । ओ परमात्मा जेड़ा सारें गी जन्म दिन्दा ऐ ते सर्व-व्यापक ऐ ओदी इऐ सारें थमां बड्डी पूजा ऐ । मनुक्खै दा पेशा किश होऐ ओ भायें मंजबूर होइयै करना पेदा होऐ, भायें अपनी मरजी कन्नै चुने दा होऐ पर सारें कशा बड्डी गल्ल ओ दयानतदारी ते श्रद्धा ऐ जिस कन्नै मनुक्ख कम्म करदा ऐ । वेद-व्यास होरें इस महान सचाई दा उपदेस इक ब्राह्मण गी इक कसाई थमां दुआया जेड़ा बड़ा नीच ते घटिया कम्म करदा हा ।

०००

दुष्टें गी कदें सन्दोख नईं हुन्दा

वनवास दे दिनें च मते ब्राह्मण पाण्डवें कोल औन्दे हे । इक ब्राह्मण हस्तनापुर जे परतोआ ओ धृतराष्ट्र गी मिलन टुरी गया । धृतराष्ट्र होरें ब्राह्मणै दी इज्जत खात्तर कीती । ब्राह्मणै सनाया जे पाण्डवें राज भोगे दा ऐ बचारे भागें दे मारे बनै इच वर्षा बाऊ इच रौन्दे न, ते बिपता दे दिन कट्टा दे न । धृतराष्ट्र होरें गी ए सुनियै किश क्लेश बी होआ गै होग पर मती चिन्ता इस गल्लै दी होन लगी जे ए मूल व्याजै समेत ओदे पुत्तरें गी चकाना पौना ऐ । युधिष्ठिर भीमसैनै दा मनासब रोह किन्ता चिर दबाई रक्खग ?

धृतराष्ट्र होर डरन लगे जे पाण्डवें दा मते चिरै दा दब्वे दा रोह सुम्बै आडू फुटी पौना ऐ ते फी ए समल्होना नईं । उस दे अगें जो किश आया सो फना होई जाना ऐ । ओ सोचें पेई गया— अर्जुन ते भीमसैनै असें गी सजा दित्ते बिना नईं रौना । शकुनि कर्ण ते दुर्योधन ते दूरै दी घट सोचने आला दुशासन अपने पासेया मखीरै दी हाम्बै गी बूटे दी उस टाली उप्पर जाई चढ़े दे न जित्थुआं

शुङ्के दे खल्ल सर्वनासै दे अगाध गत्तै इच—भीभसने दे रोहै इच जाई पौना ऐ ते बचा दी कोई सूरत नई

बचारें चा बचार निकलन लगे—बड़ी माड़ी गल्ल होई ऐ ! अस लालचै इच की फसी गे ? कोई गरीबी कारण असें ए भूख नई मारी । असें बेन्याईं दा रस्ता की फगड़ेया ? परमात्मा नै इन्ना दित्ता दा ऐ जे खाई खाई नई मुक्कै । अस सन्दोखै कन्ने खन्दे रौन्दे तां के माड़ हा । पर अस लालचै इच फसी गे ते असें दूए दा हक्क मारेया । गलत गल्लै दा माड़ा गै नतीजा निकलदा ऐ । दिव्व अस्तर शस्तर लइयै अर्जुन सुर्गा दा परतोई आया ऐ । सुर्ग जाइयै धरती उपपर परतोने दी कोदी मरजी आखदी ऐ ?

अर्जुन जरूर बदला लैने गित्तै गै परतोआ ऐ । असें गी बदला चकाने आस्तै तयार रौना चाही दा ऐ । इऐ ने बचार उनें गी औन लगे ते मनै इच चैन नई होऐ ।

ताईं पासै धृतराष्ट्र होरें गी इयां चिन्ता लगी दी ही ते दूए पासै शकुनि, कर्ण ते दुर्योधनै दा खुशी कन्नै सिर फिरी गेदा हा ओ इक दूए गी बधाइयां देन जे बड़ी उन्नति होआ करदी ऐ । कर्ण ते शकुनि दुर्योधनै गी आखन लगे—जेड़ा राज युधिष्ठिरै कोल हा ओ हुण साढ़ा ऐ । हुण असें गी दुख करने दी के लोड़ ऐ ?

दुर्योधन आखन लगा—कर्ण ! ए गल्ल ते ठीक ऐ । पर सबने थमां मती खुशी मिकी उस बेल्लै होग जिसलै औ अपनी अक्खीं पाण्डवें गी बिपता जरदे दिक्खां ते उनें गी अपनी शान दस्सां ते साड़ां । एदा तरीका इऐ जे अस बनै इच जाचै ते पाण्डवें दी बिपता दिखच । पर माढ़े पिता नै जाजत नई देनी । साढ़े पिता होर बी कनेए न उनें गी माढ़ी खुशी गै नई सखान्दी ।

दुर्योधन आखन लगा—महाराजा धृतराष्ट्र पाण्डवें थमां डरदे न । उनें गी ख्याल ऐ जे पाण्डवें कोल तपस्या दा बल ऐ । ओ असें गी बनै इच नई जान दिन्दे । नां मिलन दिन्दे । ओ डरदे न

जे किश खतरा नईं होऐ । पर सच्ची गल्ल आँ दस्सां जे हब्रे तोड़ी असें खेचल गै कीती ऐ । जे भीमसैन अर्जुन ते द्रोपदी गी बनै इच बिपता कटदे नईं दिक्खेया तां के दिक्खेया ?

इस खुशी दे बिना मिकी ए जीन बेल्ला ते फजूल गै बझोन्दा ऐ । शकुनि ते तूँ आपूँ कोई स्कीम लड़ाओ ते पिता हुन्दे कशा हान कराओ जे बनै इच जाइयै पाण्डवें दी किस्मत दिक्खी औचै ।

दूऐ दिन बड़ु लै गै कर्ण दुर्योधनै कोल हसदा हसदा गया ते आखन लगा में इस मुस्कलै दा हल्ल कड़ी लैता ऐ । अस द्वैत बनै इच अपने तबेले दिक्खन की नईं चलचै ते कन्नै माल मवेशी दे लेखे जोखे दी पड़ताल करी आगे । एदे इच महाराज गी के तराज होई सकदा ऐ ?

शकुनि ते दुर्योधन गी गल्ल मनै लगी ते आखन लगे कमाल सोचेया ऐ । उनें ग्वालें दे मुखिया गी महाराज कोल भेजेया जे जाइये जाजत लई आ ।

पर महाराज नईं मन्नै । ओ आखन लगा—ए ठीक ऐ जे राज कमारें खेडेया लोड़चदा ऐ । गवें दा लेखा जोखा करना बी ठीक ऐ । पर मिगी पता लग्गा ऐ जे पाण्डव बी उससै बनै इच रौन्दे न । ए तुन्दे आस्तै मनासब नईं जे उस बनै इच जाओ । आँ तुगी उस थार कदें नईं टोरदा जित्थें भीमसैन ते अर्जुन होन ते कन्नै लड़ाई ते रोहै दी बुन्याद बी होऐ ।

दुर्योधन आखन लगा—अस उन्दे कछ गै नईं जागे । अस उन्दे थमां परे परें गै रौगे । ते उन्दे कन्ने नईं मिलगे ।

राजा आखन लगा—भार्यें तुस किन्ता बचा करो इस कोल जाने इच गै खतरा ऐ । इस बेलै पाण्डवें दी मसीबतै इच दखलन्दाजी करना ठीक नईं । तुन्दा कोई श्पाही गै टुरी जा ते कोई नेईं गल्ल करी बबै जे लड़ाई लग्गी पवै । गवें घोड़ें दा लेखा जोखा करनां ऐ । कुसै होर गी भेजी ओड़ने आ ।

शकुनि आखन लगा—महाराज ! युधिष्ठिर धर्म जानदा ऐ ते ओदे उप्पर अमल बी करदा ऐ । उस सारी संभा सामनै बचन

दित्ता दा ऐ ते पाण्डव उस बचनै गी नभाडन । उनें बचन दित्ता दा ऐ जे पाण्डव साढ़े कन्ने दुश्मनी नईं करडन । दुर्योधनै गी शकार खेडने दा चा ऐ । तुस कैदे लेई भानी पान्दे ओ । उसी गवें घोड़ें दा लेखा जोखा करी औन देओ । अम्मी कन्ने जन्नां । औं दिक्खड जे कोई ब्री पाण्डवें कछ नईं जा ।

महाराज उप्पर मता जोर पेया ते पहलै आडू मन्नी गया ते आखन लगा—पई जियां तुन्दी मरजी ऐ करी लौ ।

जिस हिरदे इच घृणा भरोची दी होऐ उसी सन्दोख कुत्थुआं होना ऐ । घृणा इक नेई अगग ऐ जे जित्थें सलगदी ऐ उससै थारै गी फूकी टकान्दी ऐ ।

दुर्योधनै दी बेज्जतो होई

कौरव खूब सैना ते साथी लेइय द्रुतवन जाई पुज्जे । दुर्योधन ते कर्ण बड़े खुश होआ दे हे जे पाण्डवें दी विपता दिक्खिये मौजू लेंगे । पाण्डवें दे आश्रमै थमां चार मील दूर गै उनें अपने शानदार तम्बू गड़ी दित्ते ।

उनें गवें दे चौनें ते घोड़ें दे तवेले दिक्खे, लेखा जोखा कीता । गवां, सान्ह ते बच्छे गिने ते फी नाच दिक्खन लगे । जंगलै च शकार खेडन लगे ते होर खेडां खेडन लगे ।

शकार खेडदे २ दुर्योधन ते ओदे साथी पाण्डवें दी कुटिया कोल इक बड़े शैल तला कोल पुज्जे ते आखन लगे इत्थे तम्बू लाई देओ ।

उत्थें अगें गै गन्धर्वे दे राजा चित्रसेन होरें डेरा लाये दा हा । ओदे नौकरें दुर्योधनै दे श्पाहियें गी आखेया जे ताई तम्बू नेईं लाओ ।

दुर्योधनै दे नौकरें जाइयै रपोट कीती महाराज उत्थें कोई रजवाड़ा आये दा ऐ ते ओ असं गी तम्बू नेईं लान दिन्दा ।

दुर्योधनै गी ए सुनियै बड़ा रोह चढ़ेया उस सोचेया इयां गी कोई रजवाड़ा होना ऐ । आखन लगा—जाओ उसी कङ्डी लाओ ते अपने तम्बू उत्थे गङ्डी देओ ।

श्पाही तला उप्पर आये ते तम्बू लान लगे पर गन्धर्व मते हे उनें दुर्योधनै दे श्पाहियें गी कङ्डी लाया ।

जिसलै दुर्योधनै गी ए पता लग्गा तां ओ बड़ा तमशेया ते बड़ी फौज लेइयै चलेया जे दिक्खां माढ़ी खुशी च रकावट पाने आला कुण ऐ ।

गन्धर्वें ते दुर्योधनै दी सेना च घोर जुद्ध छिड़ी पेया । शुरू २ च ते कौरव जितदे लब्बन लगे पर तौले गै गंधर्वें दे राजा चित्रसैनै फौजै गी सम्हालेया ते दिव्व अस्तर वर्तन लगा । कर्ण दा रथ भञ्जी गया ते बाकी कौरव बी शस्तर खुआइयै नस्से । बड़ी भद् होई । शड़ा दुर्योधन मदानै च रेई गया । चित्रसैनै उसी कैद करी लैता, ओदियां मुश्कां कस्सियै उसी रथै च सुट्टी लेया ते संख बजाइयै अपनी विजय दी घोषणा करी दित्ती । गन्धर्वें होर किन्ने गे मन्ने प्रमन्ने दे कौरव बन्दी बनाई ले । कौरवें दी सेना बिच नाठ पेई गई श्पाही चववखी नस्सन लगे । किश पाण्डवें दे आश्रमै च जाई छप्पे । भीमसैनै गी जिसलै पता लगा जे दुर्योधनै दी ते चित्रसैन गन्धर्वें दी लड़ाई होई ऐ ते दुर्योधन हारी गया ऐ ते पगड़ोई गया ऐ तां उसी बड़ी खुशी होई । ओ युधिष्ठिर गी सनान लगा—इनें गन्धर्वें जेड़ा कम्म असें करना हा, करी ओड़ेया ऐ । दुर्योधन साढ़ी बिपता दा मौजू कस्सन आया हा । पर भली होई । ओदे कन्ने नेईं गै होई लोड़चदी ही । मेरी ते मरजी ऐ इस गन्धर्वें दा धन्यवाद करी आवां । पर युधिष्ठिर नै उसी फण्ड चाढ़ी—वाह भ्रावा ! ए कोई खुशी दी गल्ल ऐ ! कौरव आखर साढ़े भाई बन्ध न । कुसे बखले हत्थें उन्दी बेज्जती साढ़ी बेज्जती ऐ । ए बेज्जती

बर्दाश्त नेई करनी चाही दी । असें कौरवें गी बचाना चाही दा ऐ ।

भीमसैनै गी ए गल्ल किश मनासब नेई बझोई । ओ आखन लगा—अस उस पापी गी की बचाचै ? उस असें गी लाखा मैह्लै च फूकन लाया हा । तुसैं गी उस आदमी दी के चिन्ता ऐ जिस मिगी जहर देइयै मारन लाया हा ? जिस मेरे ह्स्थ पैर बन्नियै नदी च डोबन लाया हा । उनें दुष्टें ते बदमाशें कन्ने साढ़ी के हमदर्दी होई सकदी ऐ ? उनें द्रोपदी गी बालें दा पकड़िऐ ते घसीटिऐ सभा च नेता हा ।

उससै बेल्लै दूरा दा दुर्योधनै दे कलनि दी मद्धम नेई बाज युधिष्ठिरै दे कन्नैं च पेई । उस भ्राऊ गी आखेया भटपट जा ते दुर्योधनै गी छड़का । बड्डे भ्राऊ दी आग्या मन्नियै भीमसैन ते अर्जुनै ताईं तुआईं नस्से दे कौरवें गी कट्टे कीता ते चित्रसैनै गी ललकारेया । पर चित्रसैन पाण्डवें कन्नै लड़ना नेई हा चान्दा इस करी जिस लै पाण्डव पुज्जे उस भट दुर्योधनै गी छोड़ी ओड़ेया ते बाकी कौरव बी छोड़ी ओड़े । ओ आखन लगा—ए कौरव बड़े आकाड़े दे हे । इन्दी टैं भन्ननी ही । कौरव बेज्जत होइयै भटपट हस्तनापुर नस्से । रस्ते च कर्ण बी मिली पेया । ओबी लड़ाई च हारी गया हा ।

दुर्योधन बड़ा भलखोआ । ओ सोचन लगा इस कशा चित्रसैनै हत्थें मरोई जन्दा तां खरा हा । ए बड़ी बेज्जती ऐ । उस मरण बर्त रक्खी लैता । ते दुशासन गी आखेया—तू राजतिलक करिऐ राजा बनी जा ते राज कर । दुश्मनै कशा इयां हारिऐ ते भद्र कराइयै हुण अऊं जीन्दा नईं रेई सकदा ।

दुशासन आखन लगा—तुस राजा कियां नेई रेई सकदे ? ए गल्ल कदें नेईं होई सकदी । ओ भ्राऊ दे पैर पगड़िऐ रोन लगा । कर्ण कशा बी भ्राऊ दी ए दशा जरन नेईं होई ।

ओ आखन लगा—ए गल्ल कौरवें गी, कुरुबेन्सै दे शूरवीरें गी

नेईं सोभदी । इन्नां बसोस करने दी गल्ल वी के ऐ ? तुन्दे इयां करने कन्ने शत्रू होर खुश होडन । पाण्डवें पासै दिक्खो । उन्दी इन्नी वेज्जती होई ऐ । उनें कोई मरन बर्त रखेया ऐ ?

शकुनि वी आखन लगा—कर्ण ठीक आखदा ऐ । तू अपनी जिन्द की गुआयें । पाण्डवें दा सारा राज थुआड़े कब्जे इच्च ऐ । मरण बर्त रक्खियै के लाह ऐ? जे तू प्राचित करना ऐ तां पाण्डवें गी सद् बे उन्दा राज परताई ओड़ । उन्दे कन्नै मित्तरता करी लै । जिसलै दुर्योधनै ए गल्लां सुनियां तां ओदे मनै दा कपट फी जागेया । हारने जां वेज्जत होने कशा पाण्डवें गी राज परताई देना उस बड़ा बुरा बुज्जेया ।

ओ जोरेयां आखन लगा—अऊं पाण्डवें गी जित्तड ।

कर्ण आखन लगा—ए कीती न राजें आली गल । मरने दा के मतलब होआ जो ? जीन्दे रौगओ तां गं किश करी सकगेओ ।

जिसलै हस्तनापुर परतो न लगे तां कर्ण आखन लग—सारिएं पवित्तर चीजें दी सगन्ध खाइयै आखनां जे जिसलै तेरां बरे बीती जाडन तां आँ लड़ाई इच्च अर्जुनै गी जरूर मारड । उस तलवारी दी मुट्टै गी हत्थ लाइऐ सगन्ध खादी ।

०००

कृष्ण जी दी मुख

पाण्डव बनवास कट्टा दे हे दुर्योधनै इक बड़ा जग रम्भी कहुआ । बड़ी फूं फां ते रौनक मेला शुरु होइ गया । ओ ते राजसू जग गै करना चान्दा हा पर ब्राह्मणै ठाकेया जे युधिष्ठिर ते धृतराष्ट्र दे जीन्दे जी राजसू जग नईं होई सकदा । उनें आखेया—तुस वैष्णव जग करी लौ । उस मन्ती लैता ते खूब गज्जी बज्जिए जग कीता ।

जिसलै जग समाप्त होई गया तां लोक गत्तां करन लगे जे ए वैष्णव जग ते युधिष्ठिर दे राउसू जगै दा सोलमा हिस्सा बी नेई होआ । पर दूए बक्खी दुर्योधनै दे साथी आखन जे नेआ ते ययति, मान्धाता जां भरत बेलै गै होआ होग तां होआ होग । इस समें इच कोई नईं करी सकेया । दुर्योधनै दे दर्बारियें ते तरीफें दे पुल बन्ती दित्ते । कर्ण दुर्योधनै गी आखन लगा—राजसू जग ते असै इस करी नईं कीता जे पहलें पाण्डवें गी लड़ाई इस हराइयै ते उन्दा स्यापा मकाई लैचै ।

फी आखन लगा—अर्जुन गी मारना मेरे जिम्मै रेया । उस कसम खादी—जिन्ना चिर अर्जुनै गी बड़ी नईं लैड उन्बा चिर मास नईं खाड, शराब नईं पीड, कुसै अभ्यागतै गी खाली हत्थ नईं परताड । कर्ण नै अर्जुन गी मारने दी नेईं पक्की सगन्ध सभा इच चुक्की । कौरव कर्ण दी ए सगन्ध सुनियै बड़े पसोये । ते खुशी कन्ने जयकारे बोलन लगे । उन्नै इयां समझी लैत्ता जियां सारें पाण्डवें दा सफाया होई गया ऐ ।

गुप्तचरें बनै इच पाण्डवें गी सनाया जे कर्ण नै ए सगन्ध खादी ऐ । युधिष्ठिर गी बड़ी चिन्ता होई । ओ कर्ण दी बड़ी ताकत मनदे हे । कर्ण जमान्द्रू कवच पाइयै जम्मे दा हा ते ओदे कोल दिव्व अस्त्र शस्त्र हे । ओदे बीर जोधा होने दा ते कुसै गी शक नईं हा ।

इक दिन बड़ु लै उठने थमां पैहलै युधिष्ठिर होरें गी इक सुखना आया । सुखनै जां ते सौने बेलै जां उठने थमां किश चिर पैहलै आन्दे न ।

उन्नै गी सुखना आया जे जंगल दे सारे जंगली पशू किट्टे होइयै उन्दे अग्गें बेनती करन लगे जे परमात्मा आस्तै साढ़ा बी नष्ट नईं करो । तुस कुसै होर जंगलै गी टुरी जाओ । ओ बड़े रोइयै ते पल्ला पाइय बेनती करन लगे । युधिष्ठिर होरें गी बड़ा क्यास आया ते ओ अपने भायें कन्नै दूए जंगलै गी टुरी गे । साढ़े बड़्डे बड़ेरें गी बी पता हा जे जंगली पशुएं दी रखेया कीती लोडचदी ऐ ।

इक दिन दुर्वासा ऋषि होर अपने दस हजार चेलें गी लइयै दुर्योधनै कोल आई गे दुर्योधनै गी उन्दा सुभा पता हा ओ आपू बड़े फिकरै कन्नै उन्दा स्वागत ते खातरदारी करन लगा । उस उन्दी ओ खातरदारी कीती ते आन्दे लुआऐ जे दुर्वासा होर तृप्त होई गे । आखन लगे बर मंगी लै ।

दुर्योधनै गी इस परीक्षा चा पास होई जाने दी बड़ी खुशी होई । ते जिसलै ऋषि होरें वर मंगने गी आखेया तां उस सोचेया—

ए भला मौका ऐ। इस क्रोधी ऋषि दा रोह पाण्डवें उप्पर चढ़ाने आं। आखन लगा—तुसेसाढ़ा घर पवित्तर करी बड़ी देया कीती ए साढ़े भ्रा बनै इच रौन्दे न। तुस उनें गी बी दर्शन देओ। उन्दा बी मान बधाओ। ओ बड़े खुश होडन। पाण्डवें कछ जाने दा ओ मौका दस्सेया जिसलै ओ रुट्टी खाइयै बेल्ले होइ गेदे हुन्दे न ते अभ्यागते आस्तै किश बी नई बचे दा हुन्दा।

दुर्वासा होर बी लोकें दी परीक्षा लैन्दे रौन्दे हे। उनें दुर्योधनै दी प्रार्थना मन्नी लैत्ती।

दुर्योधनै सोचेया—पाण्डव आपू तंगी तुर्शी कन्ने गजारा करा करदे न। उनें ऋषि ते ओदे एडे अमलै फैले दी खातरदारी कुत्थुआं करनी ऐ। ते जिसलै ओ स्वागत नई करी सके तां क्रोधी ऋषि आपू उनें गी श्राप देडन। तां असें गी जादा मजा आग। इयां छड़ा बर प्राप्त करिए के लैना ऐ।

जियां दुर्योधनै आखेया हा दुर्वासा होर अपने चेल्लें गी लइयै पाण्डवें कोल टुरी गे। ओ दपहरी दा भोजन करिए बसोऐ दे हे।

सारे पाण्डवें उन्दा स्वागत कीता। उन्दी बन्दना कीती मान कीता। ऋषि होर आखन लगे—अस स्नान करियै आये। साढ़ा भोजन तयार करो। ए आखियै ओ नदी उप्पर स्नान करन गे उठी।

जिसलै पाण्डवें बनै इच रौना शुरु कीता हा। तां युधिष्ठिर हुन्दी तपस्या दिक्खियै सूरज भगवान होरें इक 'अक्षय पात्र' दिता हा, जेदे चा कदे भोजन मुकदा नई हा। ए पात्तर दिन्दे होई सूरज भगवान होरें आखेया हा ए पात्तर तुन्दे कोल बारां बरे रौग ते तुसें गी दिनै इच भोजनै दी लोड़ होग देया कर्ग। जिसलै सारे खाई लै करडन ते द्रोपदी आपू खाई लै तां ए उस रोज खाली होई जा करग।

इस करी पैहलें ब्राह्मणें गी भोजन करान्दे हे। फी दूए अभ्यागतें गी। पिच्छुआं पाण्डव आपू खन्दे हे। द्रोपदी सारें

थमां पिच्छुआं खन्दीं ही ।

जिसलै दुर्वासा होर पुज्जे उसलै पाण्डव ते द्रोपदी भोजन करियै बेल्ले होए हे । ओ पात्तर उस दिनै गितै खाली होई गेदा हा । द्रोपदी ते बड़ी घावरी । उसी थत्थो बत्थे पेई गे जे जिसलै ऋषि ते उन्दे चेले शनान सन्ध्या बन्दना करिये परतोए तां उनै गी के बर्ताडि ।

ओ रसोई बड़िऐ भगवान कृष्ण गी बेनती करन लगी—हे भगवान् इस औखे बेल्लै बौड़ो, ते ऋषि हुन्दे रोहै थमां रखेया करो । श्री कृष्ण भगवान परतक्ख होई गे । ओ आखन लगे—मिगी बड़ी भुक्ख लग्गी दी ऐ इसलै भटपट जे किश ऐ लई आ । बाकी गल्लां पिच्छुआं करगे ।

ए भली गल्ल बनी । इयां बभोआ जे जिस थमां सहायता दी भेद ही ओ शत्रू कन्ने जाई मिलेया ऐ । ओ बड़ी घावरी दी बोली—“भगवान ! मेरी नेई परीक्षा नई लौ । सूरज भगवान दे दित्ते दे ‘अक्षय पात्र’ दी अज्जै दी शक्ति खत्म होई गेदी ऐ । तुआईं पासै दुर्वासा ऋषि होर आई गेदे न । आँ के करां ? ऋषि होरें अपने चेलें समेत हुणं आई जाना ऐ । हजे इऐ थोह नई आवा करदा जे तुस बी आइयै आखन लगे जे भुक्ख लग्गी दी ऐ ।”

श्री कृष्ण होर आखन लगे—“मिगी बड़ी सख्त भुक्ख लग्गी दी ऐ में कोई बहाना नई सुनना । ओ पात्तर लई आ । आँ आपूँ दिक्खी लैन्नां ।”

द्रोपदी ओ पात्तर चुक्की लई आई । रिद्धी भाजी ते भत्तं दा इक दाना पात्तर दे गलमे कण्डै लग्गा दा हा । श्री कृष्ण होरें ऊऐ खाई लैता ते प्रसन्न होई गे । श्री कृष्ण होर श्री हरि रूपे इच संसारै इच व्यापक न । उनै गी सन्दोख होआ ते सारे संसारै गी सन्दोख होई गेया द्रोपदी बड़ी भलखोई जे कनेई लिन्दी आं जे भाण्डा बी शैल नई मांजेया ते जूठन लग्गी रौन दित्ती ऐ । ओ जूठी रुआल भगवान बासुदेव गी खानी पई ऐ ।

श्री कृष्ण होरें गी रज्ज होई गेया । उसइक दाना खाने कन्ने

गै तृप्ति होई गई । उन्हें भीमसैनै गी सद्देया ते आखन लगे नदी
उप्पर जाओ ते ऋषि होरें गी आखो—महाराज भोजन तयार ऐ ।
सारे तुसैं गी बल्गा करदे न ।

भीमसैनै गी थौह नेईं आवै पर कृष्ण जी उप्पर पूरा बसाह करदा
हा । इस करी भटपट नदी उप्पर गया । ऋषि होर ते चेले श्नान करा
दे हे । उन्हें गी बड़ा चबात होआ जे कुत्थें ते उन्हें गी बड़ी भुक्ख
लगी दी ही ते हुण इयां बभोन लगा जे रज्ज होई गया ऐ । जियां
भोजन करने परैन्त तृप्ति हुन्दी ऐ इयां गै सारे बुज्जन लगे ।

चेलें ऋषि होरें गी आखेया—“अस युधिष्ठिर होरें गी भोजन
तयार करने गित्तै आखी आये दे आं । पर असैं गी ते रज्ज होई
गया ऐ । ते होर खाने दी गंजैश गै नईं ऐ ।”

दुर्वासा होर जानदे हे के भेत ऐ । उन्हें भीमसैनै गी आखेया—
अस भोजन करी बेठे आं । युधिष्ठिर होरें गी आखनां असैं गी खिमा
करन । ऋषि होर अपने चेलें समेत दुरी गे ।

ए सारा संसार श्री कृष्ण भगवान हुन्दे विराट शरीरै इच्च
विदमान ऐ । उन्हें गी इक दाना खाने कन्ने तृप्ति होई तां सारे जीवें
गी ते ऋषि होरें गी बी तृप्ति होई गई ।

०००

माया (जादू) दा तला

बनवासै दे बारां बरे मुक्कने पर आये । इक दिनै दी गल्ल ऐ । इक हरण इक ब्राह्मणै दी कुटिया च आया ते ओदी अग्न सलगाने आली अरणी कन्ने खैरन लगा । जिसलै जान लगा तां ओदे सिंग अरणी इच फसी गे । हरण ब्राह्म्या ते जंगलै पासै द्रौड़ैया । अरणी बी सिंगें इच फसी गई । उनें दिने माचसां ते हुन्दियां नई हियां । अरणी गी काठै कन्नै रगड़िऐ चंग्याड़ा कड्डी लैन्दे हे ते अग्न बाली लैन्दे हे ।

ब्राह्मण कर्लाया—ओ हरण मेरी अरणी लेइयै नस्सी गया ऐ । हुण अऊं हवण कियां करड ?” ओ घाबरे दा पाण्डवें कछ द्रौड़ैया ।

पाण्डव हरणै पिच्छें द्रौड़े पर ओ कोई माया दा हरण हा । शालीं मारदा पाण्डवें गी दूर बनै च खिची लेई गया ते लोप होई गया । सुक्की खेचल होई पाण्डव हुट्टी गे । बचारे निम्मोभान होए दे इक बड़ हेठ बसोन लगे ।

नकुल नै सूंक सुट्टी ते बसोसै कन्नै आखन लगा अस इक ब्राह्मणै दी इन्नी सारी सेवा नईं करी सकदे । साढ़ा ए के पतन होई गेया ऐ ?

भीमसैन आखन लगा—गल्ल ते ठीक गै । जिसलै द्रोपदी गी बालें दा खिच्चिऐ सभा इच लेई आये हे असैं उनें बदमाशें गी उस्सै लै मारी ओढ़ेया लोड़चदा हा । असैं ए गल्ल नेईं कीती उस्सै दा पाप लग्गे दा ऐ जे साड़ी ए दशा होई ऐ ।' उस अर्जुनै पासै दिक्खेया ।

अर्जनै आखेया ठीक ऐ । उस सारथी दे पुत्तरै बकवास कीता ते में जरी लैता । किश नेईं कीता । अस है गै इस्सै जोड़े आं ।

युधिष्ठिर होरें दिक्खेया ते उनें गी बसोस होआ जे सारे गै दुखी होआ करदे न । उनें सोचेया इनें गी कुसै कारै लाचै । उनेंगी बड़ी त्रेह लग्गी—नकुल गी आखन लग्गे—अढ़ेया उस बूटे पर चढ़िऐ दिक्ख भला कोल कुतै नदी जा तला लवदा ऐ ?

नकुल बूटे पर चढ़ेया तां तुआं दिक्खिऐ आखन लगा—पानी कण्डै जम्मने आलै किश बूटे ते कन्नै बगले उडरदे लवदे न । मेरा ख्याल ऐ उत्थें जरूर पानी ऐ । युधिष्ठिर होरें आखेया—जा पीने गित्तौ किश पानी लेई आ ।

नकुल उत्थें पुज्जा, इक तला दिक्खियै बड़ा खुश होआ । उसी बड़ी त्रेह लग्गी दी ही उस सोचेया पहले अपनी त्रेह ते चकां फी तरकशें इच भरियै भ्राऊ गित्तौ पानी लेई जाड । उस हजे पानी इच हत्थ डोवे गै हे जे इक बाज आई—तौल नईं कर इस तला दा मालक अऊं आं । हे नकुल पहलें मेरे प्रश्नें दा उत्तर दे फी पानी पियां ।

नकुल बड़ा हरान होआ । पर उसी त्रेह डाडी लग्गी दी ही । उस चेतावनी दो कोई पर्वहि नईं कीती ते पानी पी लैता । उसी उस्सै बेल्ले खमारी चढ़ी ते ओ डिग्गी पेया । इयां बझोए जे मरी गै गेया ऐ । युधिष्ठिर होर बड़े हरान होए नकुल नै इन्ना चिर

की लाया ऐ। उने सहदेव गी भेजेया जे पता ते लै। जिसलै सहदेव उल्ले पुज्जा उस दिक्खेया जे ओदा भ्रा भुंजा पेदा ऐ। ओ हरान होआ जे के गल्ल होई ऐ? की लेटेदा ऐ? पर त्रेह बड़ी लग्गी दी ही तला पासै हाम्बेया जे पानी दा घुट्ट ते पियां। किश शान्ति होऐ। परतिऐ बाज आई—हे सहदेव। ए तला मेरा ऐ। पहलें मेरे प्रश्नें दा उत्तर दे पिछुआं त्रेह चकायां। उस बी नकुल आडू उस चेतावनी पासै कोई ध्यान नेईं दित्ता पानी पीता ते पुट्टा होई गया। युधिष्ठिर होर बड़े हरान होऐ ए गल्ल के बना दी ऐ। उनें अर्जुनै गी आखेया अड़ेया दिक्ख ओ दमै सम्मे सीने ते हैन न। ते कन्ने पानी जरूर लेई आवयां। बड़ी त्रेह लग्गी दी ऐ।

अर्जुन भटपट गया। तला उप्पर पुज्जा ते दमै भ्रा मोऐ दे लब्बे। ए दिक्खिऐ ओदा भ्राका निकली गया। उस सोचेया इत्थें कोई दुश्मन नईं छप्पे दा होऐ जिस दौनें गी मारी ओड़ेया ऐ। उसी बड़ा दुख होआ ते बदला लैने दी भावना कन्ने ओदा खून उब्बलन लगा पर त्रेह इत्ती डाड़ी लग्गी दी ही जे पहलें पानी पीने दी गल्ल गै ध्याई। ओ मौती दे तला पासै हाम्बेया—फी बाज आई—“पहलें मेरे प्रश्नें दा जवाब दे फी पानी पियां। ए मेरा तला ऐ। जे तू मेरा आखा नेईं मन्नेया तां थुआड़ा बी इनें दौनें आयें आडू हाल होना ऐ।

अर्जुनै गी बड़ा रोह चढ़या। ओ बोलेया तू हैं कुण एं? मेरे सामनै ते आ। अऊं तुकी जियें मारी ओड़ा।” ते जताईं पासेया बाज आई ही उस तुआईं पासं तीर चलाये। उसगैबी मानुऐ गड़ाका सुट्टेया—बाऊ च कैसी तीर चलानां। ए कोई लग्गने थोड़े न। पहले मेरे प्रश्नें दे उत्तर दे ते फी त्रेह चका। जे बिना जवाब दित्ते दे पानी पीता तां मरी जागा।”

अर्जन बड़ा परेशान होआ। आखन लगा सामनै आवें तां दौं हत्थ बी करां। पर पहलें त्रेह ते चकाई लें। पहला शत्रू ते त्रेह ऐ पहलें इसी ठण्डा करी लें।

उस पानी पीता—ते ओ बी चित्त होई गया युधिष्ठिर होरें मता चिर बल्यो—फी भीमसैन गी आखन लगे—भ्रावा साढ़ा बीर जोधा अर्जन बी नईं परतोआ । भ्रायें गी जरूर किश मुसीबत आई दी ऐ । साढ़े किश भाग गै मन्दे न । तौल कर, उनें गी तुप्प कन्ने पानी बी लेई आ । आऊं त्र्याया मरन लगां । भीमसैन किश बोलेया नईं । ते काह्ला पेदा तौले बाहर द्रौड्येया ।

ओदे दुख ते रोहै दा अन्दाजा लाओ जिसलै उस भ्रायें गी दिक्खेया उस सोचेया यक्ष लोकें इनें गी मारी ओड्येया ऐ । अऊं शत्रु गी तुप्पनां ते मारी ओडनां । पर, त्रेह बड़ी लग्गी दी ऐ पहलें उसी शान्त करी लैं फी लड़क । ओ तला पासै उतरन लगा । बाज आई—भीमसैन खबरदार प्रश्नें दा उत्तर देइयै गै पानी पियां । जे मेरी गल्लै गी सुट्टी पागा तां मरी जागा । भीमसैन गर्ज्येया तू हुकम देने आला कुण ए ? उस ताईं तुआईं दिक्खेया ते पानी पी लैता । उसी अपनी ताकत इयां खीन हुन्दी सेई होई जियां कोई टल्ला नपीड़ी ओड़दा ऐ । ओ बी मरिऐ डिग्गी पेया । इकला युधिष्ठिर बड़ा घाबरेया । त्रेह कन्नै बतेह होआ करदा हा । बलपि करन लगा—उनें गी कोई श्राप लग्गी गेया ऐ ? जां इयां गै पानी तुपदे टक्करां मारै दे न ? जां त्र्याहे दे व्याकुल होई ऐ बेहोश होई गे न ? जां मरी गे न ? जिसलै नेईं गै जरोन होआ तां उट्टेया । कन्नै त्रेह बड़ा सता दी ही । ओ भ्रायें गी तुप्पन तला पासै चलेया ।

युधिष्ठिर होर बी उस्सै पासै दुर जताईं पासै उन्दे भ्रा गे हे । रस्ता ओखा हा । जंगली सूर, टिमकड़े आले हरण ते बड्डे जंगली पक्खरू ताईं तुआईं दुरा फिरा दे हे । युधिष्ठिर होर दुरदे २ इक मदाने इच आये । ओ सैले घा कन्नै कचूर हा ते उत्थें इक निर्मल पानी दा नाडू बगा दा हा । ओ नाडू उनें गी अमृत जन गै सेई होआ । फी चौरै भ्रा लब्बे ओ इयां पे दे हे जियां जगै पिछुआं थून ढट्टे दे होन । युधिष्ठिर हुन्दे कशा ए किश नईं दिक्खन होआ । नईं जरोआ तां जोरेंआं रोन लगे ।

भीमसेन ते अर्जुनं दे मुं ऐं उप्पर हत्थ फेरन लगे । ओ बचारे सिल जन पे दे हे । युधिष्ठिर होर बलपि करन लगे—असें जेड़े प्रण कीते ते सगन्धां चुक्कियां हियां उन्दा इऐ नतीजा निकलनां हा ? बनवास मुक्कने उप्पर आया तां तुस टुरदे होए । मेरे भाग कनेए मन्दे न जे देवतें बी मिगी छोड़ी ओड़ेया । उन्दे वचन बी भूठे होई गे ।

अपने भ्रायें दे मजबूत अंग दिक्खिए ते उन्दी बेवसी दिक्खिए ओर हरान होऐ ते सोचन लगे इनें गी मारी ओड़ने आला एडा बलवान कुण होई सकदा ऐ ? मेरा कालजा जरूर लोए दा बने दा ऐ जे नकुल ते सहदेव गी मोए दे दिक्खिए फटेआ नईं । मेरा दुनियां इच जीन्दे रौने दा केह लाह ऐ ? फी उनें गी माया जन सेई होन लगी । ए गल्ल कोई सैभन नईं होई सकदी । इस दुनियां इच केड़े शूरवीर न जेड़े मेरे भ्रायें दा मकाबला करी सकदे न ? इन्दे शरीरें उप्पर कोई फट्ट बी नेईं लबदे जिन्दे करी मरी गे होन । नुहारां बी हिस्सी दियां नईं । सुत्ते दे सेई हुन्दे न । मोए दे नईं बभोन्दे । आसै पासै कुसै दुश्मनै दा पैरा बी ते नईं लबदा । जरूर कोई माया दी गल्ल ऐ । दुर्योधनै ते कोई चाल नईं चली ओड़ी ? कुतै उस पानी इच जहर ते नईं पाई ओड़ेया ?

युधिष्ठिर होर बी नाड़े पासै ढलन लगे । त्रेह उनें गी तुआं खिच्ची लेई गई । भट गै गैबी बाज आई—“थुआड़ें भ्रायें माढ़ी गल्लै पासै ध्यान नेईं दित्ता ते मरीं गे न । तुम्मी उन्दे आड़ू नईं करेयां । पहलें मेरे प्रश्नं दा उत्तर दे ते फी त्रेह चका । ए नाड़ू माढ़ा ऐ ।”

युधिष्ठिर होर समझी गे जे ए बाणी कुसै यक्ष दी गै होई सकदी ऐ ते इसी नईं मन्नने करी गै भ्रायें दी मृत्यु होई ऐ । उनें सोचेया खबरें गल्ल सौरी जा । गैबी बाजै गी आखन लगे—पुच्छो के पुच्छदे ओ ? ओ बाणी उप्परो तली प्रश्न पुच्छन लगी—

“सूरजै गी रोज कुण चाढ़दा ऐ ?”

युधिष्ठिर होरे उत्तर दित्ता—ब्रह्म दी शगती ।

हर खतरै इच मनुक्खै गी कुण बचान्दा ऐ ?

“हौसला गै मनुक्खै गी हर खतरे इच बचान्दा ऐ ।”

केड़ी विद्या पढ़िऐ मनुक्ख अकलमन्द बनदा ऐ ?

“शास्तर पढ़िऐ अकलमन्द नई बनन हुन्दा बड्डे लोकें दी संगत करिऐ बुद्धिमान बनन हुन्दा ऐ ।”

यक्ष पुच्छैया—पृथ्वी कोला बी भारी चीज के ऐ ?

युधिष्ठिर होरें जवाब दिता—ओ मां जेड़ी बच्चें गी जन्म दइऐ पालदी ऐ ओ पृथ्वी थमां बी भारी हुन्दी ऐ ।

गासै थमां उच्चा कुण ऐ ?

बब्ब ।

बाऊ कशा मता तेज चलने आला कुण ऐ ?

मन ।

नकम्मे घा कशा बी नखिद्ध चीज के हुन्दी ऐ ?

निम्मोभान मन ।

बदेसै इच मित्तर कुण हुन्दा ऐ ?

बिद्या ।

घर गै रौने आले दा मित्तर कुण हुन्दा ऐ ?

धर्मपत्नी ।

मौती बेल्लै कुण साथ दिन्दा ऐ ?

धर्म । मरी जाने पिच्छुआं इक धर्म गै शड़ा आत्मा कन्ने इक्कला साथ दिन्दा ऐ ।

सारें कशा बड्डा भाण्डा केड़ा ऐ ?

पृथ्वी गै सारें कशा बड्डा भाण्डा ऐ जेदे इच सब किश समाई जन्दा ऐ ।

खुशी के हुन्दी ऐ ?

नेक चाल चलन दा नतीजा खुशी हुन्दी ऐ ।

किस चीजै दा त्याग करने करी मनुक्ख सारें दा प्यारा बनदा ऐ ?

घमण्ड नईं करने आले मनुक्खै गी सारे चान्दे न ।

ओ के नुकसान ऐ जेदा नतीजा सुख हुन्दा ऐ, दुख नईं ?

क्रोध त्यागने कन्ने मनुक्ख कदे दुखी नईं हुन्दा ।

के चीज त्याग करने कन्ने मनुक्ख धनी बनदा ऐ ?

इच्छा दा त्याग करने कन्ने मनुक्ख धनी बनदा ऐ ।

असली ब्राह्मण होना जन्म करी हुन्दा ऐ, जां कर्म करी, जां बिद्या करी ?

जन्म ते बिद्या ब्राह्मण नईं बनांदे । सदाचार ब्राह्मण बनान्दा ऐ । भायें कोई किन्ना पढ़ी जा पर जे ओ अपनी बुरी आदतें दा गलाम ऐ ओ ब्राह्मण नईं होई सकदा । भायें चीनैं वेदें दा पण्डित की नईं होऐ पर जे ओ दुराचारी ऐ तां ओ ब्राह्मण नईं होई सकदा ।

दुनियां इच सारें कशा बड्डा चर्ज के ऐ ?

लोक हर रोज जीबें गी मरदे ते जमलोक जन्दे दिखदे न, पर जेड़े पिच्छे रौन्दे न ओ म्हेशां जीन्दा रौने दी हीखी करदे न । ए सारें कशा बड्डा चर्ज ऐ ।

इयां यक्ष नै किन्नैं गै प्रश्न पुच्छे ते युधिष्ठिर होरें सारें दे जबाब दिते ।

आखर यक्ष नै आखेया—हे राजा ! थुआड़ा इक भ्रा जीन्दा होई सकदा ऐ । जिसी आखें जीन्दा करी देयां ।

युधिष्ठिर होरें इक खिन सोचेया ते आखन लगे—सौली नुहारी आला, मुट्ठी २ अक्खीं ते चौड़ी छाती आला ते लम्मियें बाएँ आला नकुल जेड़ा टाल्ली दे बूटे आडू डिंगा दा ऐ जीन्दा करी ओड़ो ।

यक्ष खुश होया ते युधिष्ठिर गी पुच्छन लगा—तू भीमसेन गी छोड़िये जेदे इच सोलां हजार हाथियें दा बल ऐ, नकुल गै की

चुनेयां ? में ते सुनेदा ऐ तुगी भीमसैन बड़ा प्यारा ऐ । ते तू अर्जुन की नई चुनेया जेदा भुजा बल थुआड़ी रखेया करदा ऐ । इन्हें दौनें गी छोड़ियै तू नकुल गै की चुनेयां ऐ ?

युधिष्ठिर होरें जबाब दित्ता—मनुक्खै दी रखेया धर्म नै करनी ऐ, भीमसैन जा अर्जुन नई । जे धर्म पासेया मुंह मोड़ी लौ तां मनुक्खै दा नास होई जन्दा ऐ । कुन्ती ते माद्री मेरे पिता दियां दो पत्नियां हियां । औ कुन्ती दा पुतर इक ते जीन्तां । इस करी उसी फी बी किश सहारा ऐ । माद्री दा इक पुतर जीन्दा होई जा तां हसाब बरोबर होई जागा । इस करी में नकुल गी जीन्दा करने गित्तै चुनेयां ऐ ।

यक्ष युधिष्ठिरै दी पक्खपातै थमां रहत भावना गी दिक्खियै बड़ा खुश होआ उस चौनें भ्रायें गी जीन्दा करी ओड़ैया ।

ए मृत्यु दा देवता जम हा जेड़ा हरण बनियै ते यक्ष बनियै अपने पुतर युधिष्ठिरै गी दिक्खन ते परीक्षा लैन आये दा हा । उस युधिष्ठिरै गी गलें लाया ते सीस दित्ती । जम आखन लगा—तुन्दे बनवासै दा निश्चित समां मुक्कने आला ऐ । तेरमां बरा बीती जाग । कोई शत्रू तुन्दा पता नई लाई सकग । तुस अपना वचन नभाई लैगे ओ । ए अखियै ओ लोप होइ गया ।

एदे इच ते कोई शक नई जे पाण्डवें गी बनवासै इच बड़े कष्ट भोगने पे । पर लाभ बी घट्ट नई होए । इस कठन परीक्षा चा पाण्डव कुन्दन बनियै ते पहलें थमां मते जौरै आले ते धीरजवान बनियै निकले ।

अर्जुन तपस्या कीती, दिव्य अस्तर प्राप्त कीते ते इन्द्र कन्ने मलाटी करिए होर बल प्राप्त कीता । भीमसैन बी अपने बड़े भ्राऊ हनुमान कन्ने मिलेया उस झीलै कण्डै, जित्थें सगन्धी आले फुल्ल खिड़े दे हे । हनुमान कन्ने गलें लगिऐ ओदा बल दस गुणा होर बधी गया ते । माया दे सरं कण्डै अपने पिता धर्मराज गी मिलिए युधिष्ठिर होर बी दस गुणा तेजवान होई गे ।

पाण्डवें नौकरी कीती

युधिष्ठिर होरें अपने कन्नै रौने आले ब्राह्मणों गी आखेया—
“हे ब्राह्मण वर्ग ! धृतराष्ट्र दे पुतारें साढ़े कन्नै धोखा कीता, साढ़ा
राज खुस्सी लैता, असें गी गरीब बनाई ओढ़ेया । फी बी असें ए
दिन बनै इच खुशी कन्नै कड़ी लैते न । हुण बनबासा दा तेरमां
बरा शुरू होत लगा ऐ । इस करी तुन्दे कशा बक्ख होने दा समा
आई गया ऐ । गेडे बारां म्हीने असें दुर्योधनै दे गुप्त चरें थमां
छप्पिए गजारने न । ए हुण परमात्मा उप्पर गै जे फी अस कदू
मिलगे । ते मिलने इच कोई डर या छपा नेई होग । तुस असें गी
शीर्वाद देओ जे अस इस परीक्षा बिचा पास होई जाचै ते धृतराष्ट्र
हुन्दा कोई आदमी डरै जा लालचै मूजब साढ़ा पता उनें गी नेई देई
ओढ़ै ।” युधिष्ठिर होर जिसलै ए शब्द बोला करदे हे तां उन्दा
गला भरोची गया ते बाज कम्बन लगी ।

धौम्य ऋषि होरें उनें गी तसल्ली दिती । ओ आखन लगे—
इस बछोड़े दा दुःख ते मता ऐ । औने आले खतरे बी बड़े न । पर

तुस बी ते पढ़े लिखे दे ते ग्यानी ओ । तुसेंगी डरने जा घावरने दी लोड़ नई । तुस अपना भेस बटाई लौ । जिसलै देवतें दे राजा इन्द्र गी राकशें दवा पाया तां इन्द्र होर ब्राह्मणै दा भेस धारिऐ निषध देसै इच छप्पी रे हे । इयां छप्पियै उनें त्यारी कीती ते शत्रुएं दा नाश कीता हा । तुस बी इयां गै करो । सारे संसारै दे स्वामी महा बिष्णु गी बी अदिति दे ढिड्डु च आइये मनुक्ख जनम लैना पेया हा । ते राजे बलि थमां ओदा राज खुस्सना पेया हा । ते इयां उनें दुनिया दा भला कीता हा । नारायण भगवान नै बी राकशें दे राजा वृत्र गी हराने गित्ती इन्द्र दे बज्र इच प्रवेश कीता हा । अग्नि देवता नै बी देवतें दी रखेया गित्तै समुद्र दे पानी इच जाइयै बास कीता हा । भगवान बिष्णु नै बी दशरथ दे पुत्तर बनिए किन्नै गै बरे दुखें ते मुसीबतें इच गजारे हे ते रावणै गी मारेया हा ।

बड्डे लोक भले कम्मै गित्तै इयां अग्यात बास करदे आये न । तुस बी इयां गै करियै अपने शत्रुएं गी जित्ती लेंगेओ ते परतिऐ धन मान प्राप्त करगे ओ ।

युधिष्ठिर होरें ब्राह्मणें कोला विदा लैती ते अपने अमले फैले गी बी घरो घरी दुरी जाने गी आखेया । फी पाण्डव बनै इच कुतै नकेबले थार बेइयै अगोआं दी योजना सोचन लगे । युधिष्ठिर होरें किश हिस्सले मनै कन्नै अर्जुनै गी आखेया—तुगी ते दुनियांदारी दे सारे तौर तरीकें दा पता ऐ । ए तेरमां बरा कुत्थें गजारना ठीक रौग ?”

अर्जुन आखन लगा—महाराज मृत्यु दे देवता धर्मराज होरें असें गी शीर्वाद दित्ती ऐ । अस किट्टै रौगे, बरा बी बीती जाग ते कुसै गी साड़ी भिस्क बी नेई थोग । किन्नै गै शैल शैल ते चंगे राज न । कोई चुनी लौ । पञ्चाल ऐ । मत्स्य ऐ, शल्व ऐ, विदेह ऐ, बल्हिक ऐ, दशार्ण, शूरसेन, कर्लिग ते मगध न । इन्दे चा कोई मिथना तुन्दा कम्म ऐ । पर जे तुसें माढ़ी रा पुछी ऐ तां में समझनां जे राजा बिराट हुन्दा मत्स्य राज सारें कोला ठीक ऐ । ए बड़ा सुन्दर ते समृद्ध ते शक्तिशाली राज ऐ ।

युधिष्ठिर होर आखन लगे—मत्स्य दे राजा बिराट होर खरे तगड़े न ते असैं गी चान्दे बी न । बड़े समझदार ते धर्मत्मा वृत्ति दे व्यक्ति न । ओ दुर्योधन दे दबा हेठ ज। प्रलोभन इच बी नेई अन लगे । मेरा ख्याल बी ईऐ जे गुप्तवास उन्दे राजै इच गै कीता जा ।

अर्जुन आखन लगा—ए गल्ल ते ठीक होई । पर तुस बिराट हुन्दे दर्बारा इच के कम्म करगेओ ? अर्जुनै स्वाल ते पुच्छी ओड़ेया पर युधिष्ठिर हुन्दी स्थिति सोचिए दुखी बी होआ । आपूँ केडे बड़े राजा हे जिनैं आपूँ राजसू जग्ग कीते उनेंगी छप्पियै रौना पवै दा ऐ ते नौकरी करनी पवै दी ऐ । युधिष्ठिर होर बोले—अऊं सोचारनां जे बिराट गी आखां मिगी दर्बारी रक्खी लै । अऊं उसी गल्लां बातां सनाई खुश रक्खंग ते कन्नै जूए दे दा पेच बी सखांड । अऊं सन्यासी दा भेस रक्खड ते जोतिश विद्या दे चमत्कार दससड । वेद, वेदांग, नीति, राजनीति ते होर कईं विद्या सखाड । मिगी बड़ा हुश्यार रौना पौग पर चिन्ता आली कोई गल्ल नेईं । अऊं उसी दस्सी देड जे अऊं युधिष्ठिर हुन्दा मित्तर हा ते ए गल्लां युधिष्ठिर हुन्दे कोल रहियै सिक्खी दियां न । भीमसैन जी, तुस बिराट उन्दे कोल के कम्म साम्बगेओ तुसें ते बक ते हिडिम्बा गी मारे दा ऐ । तुसें जटामुर गी मारियै असैं गी बचाया हा । बल ते बीरता तुस कियां छपागेओ ? मत्स्य देसै इच तुस छप्पे गुज्जे नईं रेई सकदे । युधिष्ठिर होर ए प्रश्न पुशदे २ रोई पे ।

भीमसैन गड़ाका सुट्टियै आखन लगा—मेरा ते ख्याल ऐ जे अऊं बिराट दा स्यान बनी जां । तुसें गी पता ऐ जे मिकी भुक्ख मती लगदी ऐ ते कन्नै मिगी रसो बनानी बी अन्दी ऐ । अऊं नेए २ खाने बनाड जे बिराट होर चगत रेई जाडन । उनें ओ चीजां कदें खादी दियां नेईं होडन । कन्नै अऊं दर्बारी पहलवान बनी जाड ते जेड़े बाहरले पहलवान आवा करडन उनें गी ढाड़्यै राजे गी खुश करा करड ।

युधिष्ठिर होरें गी चिन्ता होई जे भीमसैन घोल करन लगा तां ए भेत जरूर खुल्ली जाना ऐ । भीमसैन समझी गया ते आखन लगा—चिन्ता नेईं करो । अऊं कुसै गी जियें नेईं मारड । जेकर कोई ऊऐ नेआ पहलवान आई गया तां उसी छड़ी भुआटनी गै कराड । जियें नेईं मारड । मस्ते दे साहूँ, सण्डे ते जंगली-जानवरें गी सिद्धे करड ते राजे बिराट गी खुश रखड ।

फी युधिष्ठिर होर अर्जुन गो पुच्छन लगे—तुस के कम्म साम्बगेओ ? तुस अपनी टकोदी बीरता कियां छपैलगेओ ? युधिष्ठिर होर पुच्छा करदे हे ते कन्नै अर्जुनै दी बीरता दे कारणामें सुनान्दे जा दे । उनें अर्जुनै दी तरीफे इच बीह श्लोक सनाये । अर्जुनै दी तरीफ नेईं करनी तो फी होर कोदी करनी ?

अर्जुन आखन लगा—भ्राता जी । अऊं खुसरे दा भेस बनाई लैड । ते मैहलें दियें रानियें दी सेवा करड । धनुश खिच्यै खिच्यै जेड़े नशान मेरी बाहूँ वें उप्पर पेदे न उनें गी फतूई लाइऐ छपैली लैड । जिसलै उर्वशी मिकी मोहित करन लगी ही ते उसी मां आखियै टाली ओड़ेया हा तां उस मिकी श्राप दित्ता हा जे जा नपुंसक होई जा । पर इन्द्र होरें किरपा कीती ते इस समें गी इक बरा करी ओड़ेया ते कन्ने छूटदिती जे जदूँ मेरी मरजी होऐ अदूँ भोगां । ओ नमदीं आला समां में हुण भोगड । अऊं बंडा पाई लैड । जनानियें आडू बाल बाई लैड । ते टल्ले बी ऊंआं गै लाई लैड । बिराट दी रानी दे महला इच रौड ते दासी बनिए सेवा करड । अन्दर जनानियें गी गाना ते नच्चना सखाड । अऊं आखड जे में युधिष्ठिर हुन्दे राजै इच द्रोपदी दी सेवा कीती दी ऐ । ए आखियै उस द्रोपदी पासै मुंस्कराइयै दिक्खेया । युधिष्ठिर होर रोआ करदे हे । ओ बड़े हिस्सले दे मनै कन्नै आखन लगे—भागें दा फेर दिवखो जेड़ा बहादरी ते नामवरी च श्री कृष्ण हुन्दी बरोबरी दा ऐ, भरत वंश दा कुलदीपक ऐ, जेड़ा सुन्ने दे सुमेरु पर्वतै आडू उच्चा ऐ, ओ खुसरा बनिए राजे बिराट दी रानी दी सेवा करन चलेया ऐ ।”

युधिष्ठिर होरें नकुल पासै दिक्खेया ते पुच्छेया तुस केड़ा कम्म

सम्हालगेओ । नकुल कन्नै गल्ल करदे उनेंगी नकुल दी माता माद्री दा चेता आई गेया ते ओ रोन लगी पे । नकुल आखन लगा—अऊं राजे बिराट दे तबेले इच होई जाड । में घोड़ें गी साधने ते उन्दी दिक्ख भाल इच बड़ा खुश रौनां । मिकी उन्दियें बमारियें ते कारियें (लाजै) दा पता ऐ । में शड़ा घोड़े दी सुआरी गै नेई करी सकदा, उनें गी सधार्ई सकनां ते रथवानी बी करी सकनां । बिराट होर मिकी रखियै खुश होई जाडन ।

युधिष्ठिर होरें सहदेव गी पुच्छेया—तुस ते देवतें दे गुरु बृहस्पति हुन्दी बुद्धि दे मालक ओ ते राकशें दे गुरु शुक्राचार्य हुन्दे नेए नीतिवान ओ । तुस के कम्म करगेओ ?

सहदेव आखन लगा—नकुल होर घोड़ें दी दिक्खभाल करडन, अऊं गवें दी करड । अऊं बिराट दियें गवें गी कोई बमारी नई होन देड ते कन्नै जंगली पशुएं कोला बचा करड ।

युधिष्ठिर होरें “द्रोपदी” करिए सम्बोधन ते कीता पर गले चा शब्द नेई निकलेया भई तू के करगी ? द्रोपदी उनेंगी जिन्दू थमां बी प्यारी ही । ओदी रखेया करना ते ओदा मान करना परम कर्तव्य हा । उसी सेवा करने गित्ते ग्लाना बड़ी भारी बेज्जती ही । ओ राजकमारी ही । ओ बड़े उच्चे कुलै दी ही । बड़े लाडें पली दी ही । युधिष्ठिर हुन्दा गला भरोची गेया ते बोलन नेई होआ । द्रोपदी उन्दा दर्द समभी गेई पर बड़े हौसले कन्नै आखन लगी—हे महाराज ! तुस सारें कशा उत्तम ओ । तुस मेरी चिन्ता नेई करो माढ़े करी दुखी नेई होवो । अऊं बिराट दी रानी दे मैह्लें इच इक दासी बनियै रेई लेड । अऊं रानी दी खिदमतगार ते स्हेली बनी जाड । अऊं अपनी आजादी ते पवित्तरता गी आंच नेई लगन देड । अऊं खिदमतगार ते स्हेली बनिए इन्नां हक्क ते जरूर वर्ती सकनी आं । अऊं सिर गुन्दना, ते गल्ल-बात करिए मैह्लें दी रौने आलियें गी खुश रखने दे लौके फौके कम्म करी लेड । अऊं आखड जे महाराज युधिष्ठिर हुन्दे राजै इच में द्रोपदी दी खिदमतै च ही । इयां अऊं अपना पता नेई लगन देड ।

युधिष्ठिर होरें द्रोपदी दे हौसले दी प्रशंसा कीती ते आखन लगे—हे भागवान ! जनेआ थुआड़ा कुल उच्चा ऊऐ नेइयां थुआड़ियां गल्लां न । जिसलै पाण्डवें ए निश्चा करी लेया तां धौम्य ऋषि होरें उनें गी शीर्वाद दित्ता ते इयां सिक्ख दित्ती—“जिनें राजे दी खिदमत करनी होऐ उनें बड़ा हुश्यार रौनां पौन्दा ऐ । उनें गल्लां मतियां नेईं करनियां, सेवा करनी चाही दी ऐ । अपनी रा तां गै देनी—जे कोई मंगै । आपू अगगे अगगे नेई होना । जिसलै कोई ठीक मौका होऐ तां राजे दी तरीफ बी करनी । लौकी थमां लौकी गल्ल बी होऐ पर राजे गी सनाइयै करनी । राजा के हुन्दा ऐ । मनुक्खैं दें रूपे इच्च अग्नि पुंज गै हुन्दा ऐ । न ओदे कश मते नेई जाना ते न गै कन्नी कट्टी ओड़ना । भायें राजा दे किन्नै गै विश्वास पात्तर की नईं होवो ते भायें किन्ना इख्त्यार की नईं थोए दा होऐ फी बी इयां गै बर्ता रक्खो जे पता नेई उस कुस बेलें कडुई लाना ऐ । राजे उप्पर मता बसाह करना बेवकूफी हुन्दी ऐ । राजे गी मित्तर ते हितचिन्तक समझियै ओदे घोड़े जा रथें उप्पर कदें नईं चढ़ना, ओदे आसनै उप्पर कदें नईं बौना । राजे दे नौकरे गी सदा हुश्यार तें संजमी रौना चाही दा ऐ । राजा तरीफ करे तां उसदी मती फूक नेई लैनी चाही दी । ते बेज्जती करी ओड़ें तां न गै निम्मोभान होआ लोड़चदा ऐ । राजा कोई भेत आली गल्ल दस्सै तां ओ जाहर नईं करनी । पर्जा कोला कोई चीज तोफे जा बखशीश दे दे रूपे इच्च कदें नेईं लैनी । दूए नौकरें कन्नै कदें दुःख नेई करना । राजा बुद्धिमानें गी पिच्छे करिए मूखें गी उच्चे ओदे उप्पर लाई ओड़दे न । इऐ नेई उन्दी मनमानी गी दरगुजर करना चाही दा ऐ । मैह्लें दिये इस्त्रियें कन्नै बड़ा मेलजोल नेई रक्खना । उन्दे प्रति रूआल भर बी घटिया दरजे दी गल्ल कदें नईं करनी ।”

ए गल्लां समझाइये धौम्य होरें पाण्डवें गी शीर्वाद दित्ता । इयां इक बरा विराट कश धीर्जे कन्नै कट्टो । बाकी फी नन्दै कन्नै गजारगेओ तुसें गी अपना राज बी थोई जाग ।

आखर धमै दी गै जीत हुन्दी ऐ

युधिष्ठिर होरें सन्यासी दा बेस धारण करी लैता । अर्जन खुसरा बनी गया । दूएँ बी अपने अपने भेस बदली लैते । पर उन्दी नुहार, रोबदाब ते श्लैपा ऊऐ नेआ रेआ । ओ राजे बिराट कोल नौकरी मंगन गे । पर उसी बभोआ जे ए लोक नौकरी जोग नेई राज करने जोग न । पहलें तो उनें गी नौकर रक्खन गै नेई लंगा पर जिसलै उनें मते शन्दे कीते तां उस उनें गी ऊए नौकरी देई ओड़ी जेड़ी उनें बक्खरी २ मंगी ।

युधिष्ठिर होर ते राजे दे साथी बनी गे हर बेल्लै शतरंज गै गै खेडदे रौन । जां पासे गै सुटदे रौन । भीमसेन बडा स्यान होई गया । ते जेड़ा कोई बड़ा नामी पहलवान दरबारै इच्च आई जा ओदे कन्नै घोल कररियँ राजे गी खुश रखदा हा । जंगली जानवरें गी बी कावू करी लैन्दा हा ।

अर्जनै अपना नाम बृहन्नला रखेया । ओ राजकुमारी उत्तरा ते ओदी सहेलियें गी नच्चना, ते गाना बजाना सखाने उपपर होई

गेया । नकुल होरें घोड़ें दा तबेला सांवी लेया ते सहदेव गवें ते साहूनें दी दिक्ख भाल करने उप्पर होई गया । रानी द्रोपदी जेदी टहल सेवा दासियां करदियां हियां भागें दी गल्ल उसी बिराट दी रानी सुदेशना दी खिदमतगारी साम्बनी पेई । ओ रणवासै इच दासी बनी गई ते लौके फौके कम्म करन लगी ।

रानी सुदेशना दा भ्रा कीचक राजा बिराट दा सैनापति हा । राजा बिराट दा रोबदाब ते शान उस्सै करी ही । कीचक दी मानता इन्नी ही जे सारे आखदे हे जे मत्स्य राजै दी वागडोर ते कीचक कोल ऐ । राजा बिराट ते नां भात्तार दा राजा ऐ ।

कीचक गी बी किश अपनी ताकत दा मता गै मान होई गेदा हा । ओ राजे गी अपनी मुट्ठी इच समझदा हा । ओ द्रोपदी दे इलैपे उप्पर नेआ मोहित होआ जे द्रोपदी गित्तै पागल गै होन लगा । उसी अपनी ताकत ते समर्था दा इन्ना मान हा जे उस सोचेया आखर द्रोपदी इक दासी गै ओदी गल्ल कुत्थे टालन लगी । ओ द्रोपदी कन्न छेड़ छाड़ करन लगा । ओ बचारी बड़ी दुखी होन लगी ।

द्रोपदी शर्मै मूजब न सुदेशना गी सुना न कुसै होर गी । उस इन्नी गल्ल आखी ओड़ी जे मेरे पति गन्धर्व न ते जिस बी मेरी बेज्जती कीती उसी उनें जियें मारी ओड़नां ऐ । ओदा सदाचार ते तेज इन्ना हा जे सारें जकीन करी लैत्ता भइ एदे पति गन्धर्व गै न । पर कीचक एडी तौली जकीन करने आला आदमी नेई हा । ओ द्रोपदी गी प्लेरदा गै रेआ । कीचकै दी छेड़-छाड़ थमां तंग आइयै द्रोपदी नै रानी सुदेशना गी शिकैत कीती ते आखेया जे मेरी रखेया करो ।

पर कीचक दा भैनु उप्पर बड़ा रोब हा । उस मुंह पाड़ियै भैनु गी आखी ओड़ेया जे थुआड़ी दासी बिना रौन नेई हुन्दा ते जियां जाननियें मद्दत कर । मेरी जिन्द बचा ते उसी आख जे माढ़ी गल्ल मन्नी लै ।

रानी उसी ठाकन लगी पर ओ कुत्थें मन्नै । आखर सुदेशना गी भुकना पेया । उनें दौनें द्रोपदी गी फसाने दी सलाह बनाई ।

इक दिन कीचक दे मैहलै इच बड़ी धाम बनी । खूब मठयाइयां ते शराबां तयार होइयां । रानी सुदेशना नै द्रोपदी गी गी सद्देया ते सुन्ने दा गड़वा देइयै आखेया जा कीचक दे कमरे चा शराब भरी लेई आ ।

द्रोपदी उस कामवासना कन्नै मस्ते दे कीचक दे कमरे गी उस वेलै जाने थमां नां नुकर करन लगी । उस रानी गी बेनती कीती कुसै होर गी भेजो । पर रानी इक्क नईं सुनै ते सगों रोहें होइयै आखन लगी—तूं ऐ जा । में होर कुसै गी नेई भेजना । आखर बचारी द्रोपदी गी मन्नना पेया ।

द्रोपदी सच्ची डरै करदी ही । जिस लै द्रोपदी कीचक दे कमरे इच पुज्जी तां ओ कामवासना कन्नै मोहित होए दा उसी शन्दे मिनतां करन लगा । ते तंग करन लगा ।

द्रोपदी नै नुआड़ी कोई गल्ल नेई मन्नी । ओ आखन लगी—तूं उच्चै कुलै दा एं । तूं मिकी इक नीच दासी गी की तंग करना एं ? तूं करस्तै की चलना एं ? तूं मिकी बोही दी गी की तंग करना एं ? थुआड़ा बेड़ा गर्क होई जाग । गन्धर्व मेरी रखेया करने आले न । ओ रोहै इच आइयै तुगी जियें मारी ओड़न ।

द्रोपदी नुआड़े तरले मिनतां नेई मन्नै तां उस द्रोपदी गी बां दा फगड़ी लेया ते अपने पासै खिच्चन लगा । द्रोपदी नै गड़वा भुआ रखेया ते कीचक थमां अपना आप शड़काइयै नस्सी । पिच्छें २ कीचक द्रौड़ेया । द्रोपदी जोरेयां कलान्दी दवारै इच आई । पर कीचक उत्थें बी नुआड़े पिच्छे २ गया । उसी छड़ी शराबे दी मस्ती गै नई ही ताकतै दा नशा बी हा । सारें दे सामनै उस द्रौपदी गी ठुठ्ठे मारे ते गालियां कड़ियां । सारे सैनापति दी ताकतै थमां डरदे हे । कुसै ठाकने दा हौसला नेई कीता ।

द्रोपदी कोला ए दुख ते बेज्जती नेई जरोई । उस सोचेया इन्नी बी बेवसी के होई । उसी ए बी भुल्ली गया जे पाण्डव

समें थमां पहले जाहर होई गे तां के नर्थ होई जाग । ओ रातीं भीमसैन कोल गई उसी जगाइयै ते कीचक जे किश कीता हा, बुहासरी । उस सनाया कियां कीचक पिच्छें लगा ते उस बेज्जती कीती । उस भीमसैन गी प्रार्थना कीती जे मिगी बचाई लै ते माढ़ा बदला लै । ओ सैहकी २ रोन लगी ।

“मेरे थमां नेई जरोन्दा । तुस इस बदमाशै गी हुण गं जियें मारी ओड़ो । तुन्दे सगन्ध तोड़ चाढ़ने गित्ते में दासियें दे कम्म करा करनियां । राजे विराट दा सन्दल धस्मनिआं । में एदी बी पर्वाह नेई कीती । में अज तक माता कुन्ती दी ते तुन्दी सेवा कीती ऐ । हुन मिगी इनें दुष्टें दी सेवा करनी पौन्दी ऐ । ते इन्दियां भिड़कां जरनियां पौन्दियां न । मिगी कम्म करने थमां आर नेई—ए दिक्खो मेरे हत्थ । उस अपने हत्थ दस्से जेड़े कम्म करी करी फुटी गे दे हे । भीमसैन होरें उने हत्थें गी अपने सिरै ते अक्खीं कन्ने लाया । गम तर्स ते प्रेम करी ओ चुप्प जन होई गया । उस द्रोपदी दे अत्थरू पूंजे । आखर भरोचे दे गले कन्ने बोलेया—मिगी युधिष्ठिर हुन्दी सगन्धै दी कोई पर्वाह नेई । न मिगी अर्जुन हुन्दी सिक्ख मत्तै दी लोड़ ऐ । जे किश होना होऐ सो होऐ । अऊं थुआड़ी गल्ल पूरी करड । में कीचक ते ओदी चण्डाल चौकड़ी गी जियें मारी ओड़ड । भीमसैन रोहै कन्ने उट्टी खड़ोता ।

पर द्रोपदी नं समझाया तौल नेई करो । उनें गल्ल वात करियै ए ते कीता जे कीचक गी रातीं इक्कले सद्देया जा । जित्थे अर्जुन होर नच्चना सखान्दे न उस कमरे इच भीमसैन द्रोपदी दे थार जनानी दा रूप धारियै इन्तजार करग । दूऐ रोज कीचक फिरी द्रोपदी कन्ने छेड़छाड़ करन लगा । बड़े घमण्ड कन्ने आखन लगा—हे दासी । में तुगी भुजां ऋद्धेया ते राजे दे सामनै ठुड्डे मारे । आया कोई थुआड़ी मद्दती गी ? मत्स्य देसै इच राजा विराट होर छड़े नां दे गै राजा न । अऊं सैनापति असली राजा आं । तूं कैत मूर्खता करनीं ? आं, माढ़े कन्ने नन्द कर, ते राज भोग । अऊं

थुआड़ा भगत बनी जाड । ओ प्रार्थना करन लगा रोव पान लगा, पैरें पौन लगा । इयां सेई होऐ जे बासना भरी अक्खी कन्नै गै द्रोपदी गी खाई ओड़ग ।

द्रोपदी नै ढिल्ली होने दा पज्ज कीता । आखन लगी—कीचक । जकीन करेयां हुण थुआड़ा आखा मोड़ने दी हिम्मत नेई रई । पर इक शर्त ऐ जे थुआड़े कुसै बी भ्राऊ, दोस्तै जा रिश्ते नाते गी साढ़े सर्वन्धै दा पता नेई लग्गा लोड़चदा ।

सगन्ध करें जे इस वादे गी तोड़ नभागा ते इस भेतै दा कुसै गी पता नेई लग्गन देगा तां अऊं थुआड़ी गल्ल मन्नड ।

कीचक बड़ी खुशी कन्नै मन्नी गया । निश्चा होआ जे उस्सै रातीं नाच सिक्खने आले कमरे इच मलाटी होग ।

ओ आखन लगी—जनानियां ते दिने दिनें नच्चने दे पाठ लेई लैन्दियां न, ते तरकालां पौन्दे गे अपने २ कमरें इच उठी जन्दियां न । रातीं उस कमरे इच कोई नई हुन्दा । अज्ज रातीं आवैयां । अऊं तुगी बल्गा करदी होड । फी जियां तुस आखगेओ..... । कीचकै गी नन्दै दा भूटा आई गया ।

कीचक नै तरकालें श्चान कीता, अतर फलेल लाया, खूब सज्जेया सजाया ते उस कमरे इच गया । दरवाजा खुल्ले दा हा । ओ बल्लें गे अन्दर दाखल होई गया ।

निम्मी नेई लो ही उस दिक्खेया खट्टा उप्पर कोई सुत्तोदा ऐ । उस सोचेया पक्क सैरेन्द्री गै । ओ तलोफदा तलाफदा सुत्ते दे व्यक्ति गी हत्थ फेरन लगा । पर सैरेन्द्री दा कोमल शरीर नेई हा । ओ ते भीमसैनै दा वज्जर देह हा । भीमसैन खट्टा पर कुद्देया जियां शेर शकारै उप्पर कुददा ऐ । उस कीचक गी भुजा ऋट्टेया । कीचक हरान होई गया । पर ओ कोई डरौकल नेई हा । हुण ते जीने मरने दा प्रश्न सामनै आई गेदा हा । दवै जने खूब जोरा कन्ने लड़न लगे । कीचक समझन लगा ए कोई सैरेन्द्री दा गन्धर्व पति गै । दवै बरोबरी दे हे । उस बेल्लै भीमसैन, बलराम ते कीचक

त्रैवे जोर ते कुश्ती इच बरोबरी दे मन्ने जन्दे हे । भीमसैन ते कीचक दा घोल बी वाली ते सुग्रीव आला जुद्ध होई गया ।

आखरकार भीमसैन कीचक गी मारी ओड़ेया उसी नेई कोटी चाढी ते गुन्नेया जे नुआड़ा भड़था बनी गया । शड़ा मासै दा पित्र गै बनी गया । भीमसैन होरें कीचक गी डन्न देने ते जियें मारी ओड़ने दी खबर द्रोपदी गी सनाई । आपूं भटपट रसोई घर गया उठी । नहाइयै सन्दल लाया ते रमानै कन्नै सेई गया ।

द्रोपदी नै मैह्लै दे चौकीदारें गी जगाया ते आखन लगी— कीचक मेरे कन्नै छेड़छाड़ करन आया हा । में उसी आखेदा हा जे मेरे पति गन्धर्व न । उन्हें ए गल्ल नेई जरनी । सो उन्हें कीचक आला चाण्डा ठप्पा करी ओड़ेया ऐ । तुन्दा सैनापति कामबासना करी मरोई गया ऐ । जाओ उसी दिक्खी लौ ।” उन्हें कीचक दी लोथ दिक्खी । ओदी शकल गै नेई ही रेई दी । ओ ते छड़ा मासै दा पिन्न जन्न सेई हुन्दा हा ।

०००

मत्स्यदेसै दी रखेया

कीचक दी जे दशा होई उसी दिक्खियै राजे बिराट दे सारे लोक द्रोपदी कशा डरन लगे । इस जनानी दा श्लैपा केडा ऐ जे सारें दे मन मोही लैन्दी ऐ । पर है बी ओडी गै खतरनाक जिन्नी शैल ऐ । एदे पति गंधर्व न । ए राज पवारै गितै खतरनाक ऐ । अज्ज इनें ए कीता ऐ कल रोह चढ़े तां पता नईं होर के किश करी ओड़डन । इस करी इसी नगरै थमां बाहर कड्डी ओड़ना गै ठीक ऐ । ए सोचियै नगर बासी रानी सुदेशना कोल गये ते आखन लगे द्रोपदी गी इत्युआं कड्डी लाओ ।

सुदेशना द्रोपदी गी आखन लगी—एदे इच कोई शक नईं जे तूं बड़ी सतै आली जनानी एं भलीलोक एं । पर तूं ए नगर छोड़ियै कुतै होर दुरी जा । मिकी थुआड़े कशा रज्ज होई गया ऐ ।

छप्पियै रौनें आले समें गी खत्म होने इच इक गै म्हीना रई गेदा हा द्रोपदी आखन लगी—इक म्हीना होर रौन देओ । इन्ने

इच मेरे पतियें दा कम्म तोड़ चढ़ी जाना ऐ ते उनें मिकी लई जानां ऐ। ओ गन्धर्व राजा बिराट ते ओदे राजै दा बड़ा स्नान मनडन। स्नान ते मनदे मनडन पर जे चिड़ी गे तां मारु जरूर बनी जाडन। सुदेशना उन्दे कशा कची डरी गेदी ही। उस नां नई करन होई।

तेरमां बरा गुरु हुन्दे गै दुर्योधनै दे श्पाहियेंगी हुकम होई गया हा जे पाण्डवें गी तुप्पो ते कोई बी थां छप्पा गुज्जा नई रौन देओ। उनें बी सारे थां तुप्पी मारे। किन्नें म्हीने खेचल करदे रे पर कोई पता नई लग्गा। उनें रपोट करी ओड़ी जे पाण्डव कुतै इक्कले गे मरोई गे दे न। फिरी खबर आई जे कुसै जनानी पिछे कीचक मरोई गया ऐ। ओदा कुसै गन्धर्व कन्नें घोल होआ हा। कीचक गी दो गै आदमी मारी सकदे हे। उन्दे चा इक भीमसैन हा। उनें गी शक पेया जे ओ गन्धर्व भीमसैन गै नई होऐ जिस कीचक गी मारी ओड़ेया ऐ। दुर्योधन बी सोचन लगा जे जिस जनानी पिछे ए कतल होआ ऐ ओ द्रोपदी गै नई होऐ। उस भरे दर्बारै इच अपना शक जाहर कीता।

ओ आखन लगा—मिगी शक ऐ जे पाण्डव बिराटदी नगरी इच न। बिराट बड़ा खुददार राजा ऐ ओ साढ़े कन्ने मित्तरता नई करदा। ओ बड़ा आकड़े दा ऐ। ए बेला बड़ा शैल ए हमला करने गित्तै ते गवां खोई लंने आस्तै। जे पाण्डव उतथें होऐ तां ते बिराट दा स्नान चकाने गित्तै ओ जरूर लड़न औडन। ते अस उनें गी जरूर पशानी लैगे।

जे अस उनें गी निश्चित समें थमां पहलें तुप्पी लैगे तां उनें गी वारां बरे परतिऐ बनै इच रौना पौग। ते जे पाण्डव उतथें नई होऐ तां साढ़ा घरा के गया।

त्रिगर्त द राजा सुशर्मा नै दिलै कन्ने इस गल्लै दा समर्थन कीता “ए मत्स्य दा राजा बिराट माढ़ा शत्रू ऐ। इस कीचक मिगी बड़ा दुख दित्ता दा ऐ। कीचक दी मृत्यु करी राजा कमजोर पई गेदा ऐ। मिगी बिराट उप्पर हमला करने दी जाजत देओ।

कर्ण इस तजवीजै दा समर्थन कीता । उनें सर्व सम्मति कन्ने फैसला कीता जे बिराट उप्पर दक्खनै पासेया हमला कीता जा । बिराट दी फौज दक्खन पासै टुरी जाग ताईं दा दुर्योधन कौरवें दी सैना लइयै उत्तरै पासेया चान चक्क हमला करी देऐ । ओ पासा खाली गै रेदा होना ऐ ।

सुशर्मा नै दक्खनै पासेया हमला करी दित्ता । गवां खोली लैत्तियां, रस्ते इच औंदे बन ते खेतर जुआड़ी ओड़े । गवाले द्रौड़दे द्रौड़दे राजा कोल पुज्जे । राजा सोचन लगा अज्ज जेकर कीचक जीन्दा हुन्दा तां गल्ल ठीक वननी ही । उस शत्रुएं गी खिद्दी लाना हा

उस ए गल्ल कनक गी सनाई । राजा युधिष्ठिर होरें अपना फर्जी नां कनक रखेदा हा । ओ राजा गी आखन लगे— घाबरने दी कोई गल्ल नईं । औं भायें साधू आं पर लड़ने इच मांहर आं । औ कवच लाइये ते रथे इच बइयै जुद्ध करन जाड ते शत्रुएं गी खिद्दी लाड । तुस अपने रसोइयै बलालगी, तबेले दे राखे धर्मग्रन्थी गी ते गवें दे राखे तन्त्रीपाल गी हुकम देओ जे ओ बी रथें उप्पर चढ़ियै आई जान ते साढ़ी मद्दत करन में सुनेया ऐ जे ओ बड़े शूरवीर न । तुस आज्ञा देओ जे असैं गी अस्तर शस्तर दित्ते जान ।

बिराट बड़ा खुश होआ ते भट आज्ञा दित्ती । रथ तैयार होई गे । अर्जुन गी छोड़ियै सारे पाण्डव सुशर्मा कन्ने लड़ने गित्तै टुरी पे । सुशर्मा ते बिराट दी फौजे दम्यांन जोरै दी लड़ाई शुरु होई गई । दौने पासै खूब जानी नुकसान होआ । सुशर्मा नै बिराट दा रथ घेरी लैत्ता ते उसी भुजा उतरियै लड़ने उप्पर मजबूर करी दित्ता । फी सुशर्मा नै बिराट गी पगड़ी लैता ते अपने रथे उप्पर कैदी बनाइयै बहाली लेया । राजे बिराट दे कैदी होई जाने करी सारी फौजा दे हौसले त्रुट्टी गे ते फौज खीस बीस होन लगी । युधिष्ठिर होरें भीमसैन गी हुकम दित्त सुशर्मा उप्पर हमला करो ते बिराट गी

छड़काई लौ ते मत्स्य दियां सारियां फौजां किट्टियां करी लौ ।

युधिष्ठिर हुन्दी आग्या सुनिए भीमसैन इक बूटा पुट्टन लगा ।
युधिष्ठिर होरें ठाकेया ते आखेया—इऐ नेआ कर्तब नईं करो ते
न गै जयकारा बलाओ । ऐसा नईं होए जे तुसैं गी कोई पशानी
लै । सधारन आदमी आडू लड़ो । रथें उपपर चढ़िए तीर कमानैं
कन्नै लड़ो ।

भीमसैन रथै उपपर चढ़ेया ते शत्रू उपपर हमला करी दित्ता
बिराट गी छड़काया ते सुशर्मा गी बन्दी बनाई लैत्ता । मत्स्य दियें
फौजें दी नमी योजना बनाई । सुशर्मा दी सैना उपपर हमला कीत्ता
ते उसी हराई ओढ़ेया ।

जिसलै सुशर्मा दे हारने दी खबर नगगरै इच पुज्जी तां सारे
खुशियां मनान लगे । उनें शहर सजाया ते राजे दे स्वागतै गित्तै
शहरा बाहर आई गे ।

जिसलै ओ राजे बिराट दे स्वागतै दी तयारी करा करदे हे
दुर्योधनै दी सैना नै उत्तर पासेया हमला करी दित्ता ते शहरा बाहर
गवें दी गोऊशालायें गी लुट्टन लगी पई । कौरवें दी सैना अगे
बदन लगगी ते उनें किन्नियां गै गवां खोई लैत्तियां । गवें दा राखा
शहरै गी द्रौढ़ेया ते राजकमार उत्तर गी आखन लगा—हे राजकमार
कौरवें दी सैना आई गई ऐ । साढ़ियां गवां खुस्सै करदी ऐ ।
महाराज बिराट होर दक्खन पासै त्रिगर्त दे राजे कन्ने लड़न गे दे न ।
अस बश्कार फसे दे आं । साढ़ा राखा कोई नईं । तुस राजकमार
ओ । साढ़ी रखेया करो । चलो, अपनियां गवां छड़काओ ते अपने
कुलै दी लाज रक्खो । जिसलै गवें दे राखे नै लोकें सामनै ते खास
करी मैहलें दियें इस्त्रियें सामनै शकैत कीती तां राजकमार उत्तर
गी किश गैरत आई गई ते जोशै कन्नै बोलेया मिकी कोई सारथी
थोई जा तां आँ इक्ला गै गवां छड़काई आनना । लड़ाई इच मेरे
हत्थ ते दिक्खो । लोकें गी अर्जुन ते मेरे बिच किश फर्क गै नईं
सेई होग ।

जिसलै उत्तर ए गल्ल गला करदा हा तां द्रौपदी मैहलें अन्दर ही ओ ए सुनियै खूब हस्सी । ओ द्रौपदी राजकमारी उत्तरा कोल गई ते आखन लगी—देसै उप्पर बड़ा खतरा आया ऐ । गवें दे राखे शकैत कीती ऐ जे कौरवें दी सैना शहरा पासै बदा करदी ऐ ते उनें किन्नियां गै गवां गोऊशाला दा खोली लैत्तियां न । राजकमार उत्तर लड़ने गी तयार ऐ । उसी इक सारथी दी लोड़ ऐ । लौकी नेई गल्ला पिच्छे कोई रकावट की आवे । औं तुसैं गी इक गल्ल दस्सनियां बृहन्नला अर्जुन दा सारथी रेदा ऐ । जदूं औं पाण्डवें दी रानी कश ही तदूं में ए गल्ल सुनी ही । में एबी सुनेया हा जे बृहन्नला नै अर्जुन कोला अस्तर बिद्या बी सिक्खी ही । तुस बृहन्नला गी हुकम देओ जे ओ राजकमार हुन्दा सारथी बनी जा ।

राजकमारी भ्राऊ कोल द्रौपदी ते आखन लगी—मिगी सैरेन्द्री नै दस्सेया ऐ । उस पाण्डवें कश नौकरी कीती दी ऐ । ओ आखदी ऐ बृहन्नला बड़ा स्याना सारथी ऐ । ओ अर्जुनै दा सारथी रेदा ऐ । उसी लेई जाओ, साढ़ी रखेया करो ते मान प्रापत करो ।

राजकमार मन्नी गया, राजकमारी नाच सिक्खने आले कमरे पासै द्रौपदी ते बृहन्नला गी (जेड़ा अर्जुन हा) आखन लगी—सारथी बनियै राजकमार उत्तर कन्ने जाओ । ओ बोली—कौरव माढ़े पिता दा पशुधन लइऐ जारदे न । महाराज हुन्दी गैरहाजरी दिक्खिए ओ हमला करन आये न । सैरेन्द्री ने दस्सेया ऐ जे तुस अर्जुन दे सारथी रे ओ । ते अश्व विद्या इच निपुणता प्रापत कीती दी ऐ । जाओ राजकमारै दी रथवानी करो । डरो नई ! राज कमार तुन्दी रखेया करग ।

अर्जुन मनै इच मुस्कराया । उप्परा किश भिजकियै फी मन्नी गया । उस इयां दस्सेया जे कवच पाना औन्दा गै रई । उसी कवच पान्दे दिक्खियै जनानियां हस्सन लगियां । ओ बी आखन लगियां राजकमार तुन्दी रखेया करग । अर्जुन किश समां इयां गजारियै जिसलै घोड़ें दा तंग कस्सन लगा तां सारे सेई कीता जे

सारथी ते माहर ऐ । ते जिस बेलै उस घोड़े दियां बागां पगड़ियां
तां घोड़े बड़े प्यारै कन्ने ओदा आखा मन्न लगे ।

राजकमार जरूर जित्तग । अस शत्रू दियां पशाकां खोई
आनगे ते तुसें गी वण्डी देगे । तुसें गी नाम दर्ई देगे । ए अखियै
बृहन्नला नै रथ चलाया ते लड़ाई पासै लई चलेया ।

०००

राजकमार उत्तर

राजे बिराट दा टिक्का राजकमार उत्तर नगरै दा ते बड़े जोरा कन्नै रथे उप्पर चढ़ियै चली पेया । बृहन्नला सारथी बने दा हा । ओ आखन लगा रथ झटपट उत्थें लेई चल जित्थें कौरवें साढ़ियां गवां डक्की दियां न ।

बृहन्नला नै घोड़ें गी तेज कीता ते भट गै कौरवें दी फौज सामनै लब्बन लगी । इयां बभ्रोन्दी ही जियां कोई चमकदी सुन्ने दी पीली कन्तार फौजे दे टुरने कन्नै उड़ी दी धूड़ै इच लपटोई दी ऐ । अग्रे बदे तां उत्तर गी भीषम द्रोणाचार्य, कृपाचार्य, दुर्योधन ते कर्ण लब्बे । ओदा हौसला फौजै गी दूरा दा दिक्खियै गै ढवा दा हा इनें महारथियें गी दिखदे गै भलेयां ठप्प होई गया । मुंह सुक्कन लगा ते सरकण्डे निकली आये । सारे अंगें कम्बनी पेई गेई । डरै मारै उस हत्थें कन्नै अक्खीं खट्टी लैत्तियां ।

आखन लगा—“अऊं इक्कला फौजा दा मुकाबला कियां करी सकनां ? मेरे कोल फौज बी नई” । जिन्नी ऐ ही ओ पिता होर

लेइ गे दे न । शहर इयां गे खाली पेदा ऐ । ओदी रखेया दा कोई बन्दोबस्त नईं इक्कले मनुखै दा नियमित फौजै कन्नै लड़ना टकोदी मूर्खता ऐ । उस फौजै इच दुनियां दे मननै प्रमन्नै दे जोधा न । हे बृहन्नला । रथ परताइयै लेई चल ।”

बृहन्नला नै गड़ाका सुट्टेया ते आखेया—नगगरा दा चलदे ते थुआड़ा इरादा बड़ा पक्का हा ते मैह्लें दियें इस्त्रियें बी बड़िया मेदां बन्नी दियां न । नगरवासियें बी बड़ा बसाह कीता दा ऐ । सैरेन्द्री ने तरीफ कीती ते तुसैं आखेयां तां अऊं बी आई गेया । जे हुण अस गवां शड़काइयै नईं जागे तां लोक ते असैं गी मखौल करडन । में ते रथ नेइऊं परताना । हुण ते डटो ते लड़ो । डरने दी के गल्ल ऐ ? ए गलाइये बृहन्नला रथ शत्रू पासै लेई चलेया । ते कोल जाई पुज्जा । उत्तर दे शाड़ शुड़की गे । ओ कम्बदी बाजै कन्नै आखन लगा—“अरौ नईं लड़ी सकदा । अऊं लड़ी सकदा गै नईं । कौरव गवां नेंदे न तां नेन देखो । जनानियां हसडन तां हस्सन । अऊं के करां ? एडी मजबूत सना कन्नै लड़ना मखौल ऐ ? ऐवें मूर्खता नईं कर । रथ परता । नईं रोकगा तां अऊं रथा उप्परा छाल मारियै परतोई जाड ।” ए आखियै उत्तर नै तीर कमान भुआं चट्टेया, रथै परा उतरी पेया ते शहरा पासै द्रौड़न लगा । ओ अतगै घावरी गेदा हा ।

ए कोई नेई गल्ल नईं जेड़ी कदें नईं होई । राजकमार उत्तर दी घबराट बी कोई बचित्तर गल्ल नईं । डर इक कुदरती भाव ऐ ते सारें इच हुन्दा ऐ । मनै दी शक्ति कन्नै डरै दी भावना उप्पर काबू पाई लैन्दे न जां फी प्रेमभाव, शर्म घृणा बड़ी उगगर होऐ तां डरै उप्पर काबू पान हुन्दा ऐ । जां फौजी नियमे दे बद्धे दे जरुरी काबू पाना पौन्दा ऐ । ओ लोक जेड़े अग्ने जाइयै बड़े २ शूरवीर होऐ जिस लै ओ पहली बारी जुद्धै इच आये तां ओ बी डरै कन्ने सहमी गे हे । उत्तर कन्नै बी ईऐ किश होआ । कुरुक्षेत्र दे जुद्ध इच ओ बड़ी बहादरी कन्नै लड़ेया ।

अर्जुन नुआड़े पिच्छें द्रौड़ेया । अर्जुन आखन लगा—भई

खड़ोई ते जा । क्षत्रियें आली गल्ल कर । जिसलै अर्जुन द्रौडै करदा हा तां ओदे सिरै दे बाल खुल्ली गे ते ओदे टल्ले बाऊ इच फर फर करन लगे । राजकमार ताईं तुआईं नस्सै अर्जुन फगड़ै तां ओ ओदे हत्थ छण्डै । कौरवें दी सैना ए दिक्खियै मौजू लैन लगी ।

द्रोणाचार्य होरें दिक्खेया जे ए कुण ऐ टल्ले जनाने लाये दे न पर ऐ मर्द । ए अर्जुन ते नईं ? जिसलै उनें इयां आखेया तां कर्ण बोलेया—ए अर्जुन कियां होई सकदा ऐ ? होऐ बी तां डर के ऐ ? बाकी पाण्डव कन्ने नईं तां इक्कला अर्जुन के करी सकदा ऐ ? राजा बिराट सारी सैना लेइयै सुशर्मा कन्नै जुद्ध करन गेदा ऐ ते पिच्छें अपने पुत्तरै गी छोड़ी गेदा ऐ । राजकमार जनान खाने दे चौधरी गी सारथी बनाइयै लेई आया ऐ । सारी गल्ल ते इत्ती गै ।

बचारा उत्तर बृहन्नला दे छन्दे करै मिकी जानदे । अऊं तुकी बड़ा धन देड । मालामाल करी ओड़ड । ओ तरले पान लगा—अऊं माऊ दा इक्कला पुत्तर आं । हजे माऊ दी गोदा दा बाहर आयां । मिगी बड़ा डर लगगा करदा ऐ ।

पर बृहन्नला ते उसी ओदी कमजोरी थमां वचाना चान्दा हा ओ उसी नईं छोड़ै । अर्जुन पिछें लगगा उसी फगड़ेया, ते खिन्चियै रथै उप्पर बहालेया । उत्तर डुस्कन लगा—बड़ा माड़ा होआ । में कैत फड़ मारी । हुण के बनग ?

अर्जुनै उसी धीरज दित्ता ते बड़े प्रेमै कन्नै आखेया—“डर नईं । अऊं कौरवें कन्नै लड़ड । तूं घोड़े दी दिक्ख भाल कर ते सारथी बनियै मेरी सहायता कर । फी में आपूं साम्बी लैड । जकीन कर, नस्सने कन्नै कक्ख नईं बनदा । अस दुश्मनें गी खिही लागे ते अपनियां गवां छड़काई लैगे । थुआड़ा जस्स होग ।” ए आखियै अर्जुनै उसी चुक्केया, रथै उप्पर बहालेया—ओदे हत्थें इच घोड़े दियां बागां दित्तियां ते उसी आखेया जे मसान घाटै कोल इक बूटे कछ रथ लेई चल ।

द्रोणाचार्य होर ओइयै ए सब दिक्खै करदे हे । ओ समभी

मे जे ईऐ नेए टल्ले लाने आला ए सारथी अर्जुन गै । उने भीष्म होरें गी सनाया । दुर्योधन कर्ण गी आखन लगा—असें गी के ? कोई होऐ । अर्जुन बी होऐ तामी साढ़ी चाल गै कामयाब होई । अर्जुनै दा पता लग्गी जाने उपपर पाण्डवें गी परतियै बारां बरे बनबास भोगना पौग ।

जिसलै ओ बूटे कच्छ पुज्जे तां अर्जुनै उसी रथै थमां उतरियै बूटे पर चढ़ने गी आखेया—उपपर छपैले दे शस्तर अस्तर तुआरी आन ।

राजकमार घावरे दा आखन लगा—लोक आखदे न इस बूटे उपपर इक बड़ी शकारनै दी लोथ टंगी दी ऐ । अऊं लोथै गी हत्थ कियां लां ? तुस मिकी नेआ कम्म की दसदे ओ ?

अर्जुन आखन लगा—राजकमार । ए लोथ नई ऐ । ए पाण्डवें दे छपैले दे शस्तर अस्तर न । जिगरा करिए उपपर चढ़ी जा ते तुआरी लेई आ । चिर नई ला ।

राजकमार उत्तर नै दिक्खेया—जे इत्थे शड़कने शुड़कने दा कोई फायदा नई । ओ बूटे पर चढ़ेया ते जियां बृहन्नला न आखेया हा ओ बद्धा दा बुशका तुआरी लेई आया—पर उसी घृणा बड़ी होई । जिसलै ओ चमड़े दा सन्दूक जनेआ खोलेया—ओदेचा शस्तर निकले जेड़े चम चम करदे लिशका करदे हे । उत्तर उनें लिशकदे शस्तरें गी दिक्खियै हरान होई गेया । ते अक्खीं मीटी बौठा ।

हौसला करियै उस शस्तरें गी हत्थ लाया । हत्थ लाने कन्ने गै ओदे मनै इच हीखी ते हौसला पैदा होई गे । ओ हौसले कन्ने बोलेया—सारथी-कमाल ऐ । तूं के आखना एं ए तीर कमान तलवारां सबकिश पाण्डवें दा ऐ ! उन्दा ते राज गै खसोई गेदा ऐ ते ओ वनवास भोगादेन । तूं ओ भाखें न ? ओ जोके कुत्थे न ?

अर्जुन होरें थोड़े इच गै सनाई ओढ़ेया जे सारे पाण्डव इत्थें बिराट हुन्दे कोल गै रौन्दे न । राजा दे साथी कनक होर युधिष्ठिर न । बलाल रसोइया—जेड़ा थुआड़े पिता गी पदार्थ बनाइयै खलान्दा ऐ ओ भीमसैन ऐ । ओ सैरेन्द्री जेदी बेज्जती करने

करी कीचक मरोई गया हा द्रोपदी ऐ। गवें दी दिखभाल करने आला धर्मग्रन्थी नकुल ऐ ते घोड़ें दी रखवाली करने आला तन्त्री-पाल सहदेव ऐ। अऊं अर्जुन आं। तूं डर नईं। तूं दिखदा चल थुआड़े सामने गै अऊं कौरवें गी हराड ते भीष्म, द्रोण ते अश्वत्थामा हुन्दे सामने गै गवां खुस्सी लैड। थुआड़ा नां होई जाग ते कन्नै तुगी लड़ने दी जाच आई जाग। उत्तर हत्थ जौले करियै आखन लगा—हे अर्जुन जी ! मेरे बड़े बड़े भाग न जे में तुसैं गी सामरतकख दिक्खा करनां। अर्जुन मेरे कन्नै ऐ तां गै हिरदे इच जोश ते हौसला आई गया ऐ। मेरे कछा जे किश भुल्ल चुक्क होई गेई ऐ सो माफ करेओ।

जिसलै ओ कौरवें दी सैना कोल पुज्जे तां अर्जुन होरें अपनी बहादरी दिया किश गल्लां उत्तर गी सनाइयां जे नमां नमां आये दा जोश कुतै ठण्डा नईं होई जा। कौरवें दी सेना सामने जाइये ओ रथ परा उतरेया। परमात्मा दी बन्दना कीती। अपने डुण्डुएं परा सैखे दे गजरे तुआरे, ते चमड़े दे दस्ताने लाये। अपने खिल्लरे दे बालें गी टल्ले कन्ने बन्नेया। चढ़दे पासै मुंह कीता, अपने शस्तरें अस्तरें गी धोइऐ दिक्खेया, फी रथे उपपर चढ़ेया। ते अपने पुराने मित्तर गाण्डीव धनखै गी हत्थे इच लेया। डोरी गी खिच्चेया ते त्रै बारी डोरी दी गूज पंदा कीती सारियां तरफां गूजन लगियां। गाण्डीव दी टंकार सुनियै कौरव सैना इक दूए गी आखन लगी—ए गाण्डीव दी बाज ऐ। जिसलै अर्जुन देवता आडू शरीर कन्नै रथे उपपर चढ़ेया ते उस अपना देवदत्त सैख बजाया तां कौरवें दी सैना दा धाका निकली गया ओ कर्लाई उट्टे “पाण्डव आई गे।”

राजकमार उत्तर दी कहानी, कियां उस मैह्लें दियें इस्त्रियें सामने फड़ां मारियां, ते फी शत्रू सैना गी दिक्खियै कियां नस्सन लगा महा भारत इच छड़ा हस्सने हसाने गित्तै गै नईं दिती दी।

ए मनुक्खै दा सुभा ऐ जे जोग्यता थमां खलक्के दर्जे दी गल्ल होऐ तां उसी घृणा कन्नै दिखदा ऐ। मीर लोक गरीबें कन्नै नफरत करदे न। श्लैपे आले बदसूरतें गी घृणा कन्नै दिखदे न। जोरै

आले कमजोरें गी घृणा करदे न । बहादुर लोक बुजदिलें गी नफरत करदे न । पर अर्जुन इयां गै सधारन—मनुक्ख नईं हा । ओ ते इक महात्मा हा । सच्चा शूरवीर हा । ओ समझदा हा जे ओदी बीरता ते बड़्याईं इसै इच ऐ जे कमजोर—उसी दिक्खिये अपनी कमजोरी गी भुल्ली जान । ओ जमान्दरू गै शूरवीर हा, उसी कोई खास जतन बी नईं करने पे हे पर ओदे इच महात्माएं आली नम्मरता ही । उस राजकमार उत्तर गी हौसला देने ते अपने कुलै माफक बीरता दस्सने गी तयार करी लैता ।

ए अर्जुनै दी खास सिफत ही । खास गुण हा । ओ अपनी शक्ति दा दुरुपयोग नईं हे करदे । अर्जुन दा इक नां बीभत्सु ऐ जेदा अर्थ ऐ ऐसा व्यक्ति जेड़ा माड़ी गल्ल करने थमां डरै । अर्जुन होरें कदें नामनासव गल्ल नईं कीती ।

०००

बचन तोड़ चढ़ेया

अर्जुन हुन्दा रथ चलेया—गड़गज्ज पई गई । धरत डोलन लगी । गाण्डीव धनखै दी टंकोर सुनियै कौरवें दे हिरदे कम्बन लगे ।

द्रोणाचार्य होर आखन लगे—अर्जुन आआ ऐ । फौजे गी साम्बियै तयार करो ।

द्रोणाचार्य हुन्दी चिन्ता दुर्योधनै गी चंगी नईं लगी अर्जुनै दा एडा मान के होआ । ओ कर्ण गी आखन लगा—पाण्डवें दा बचन हा जे बारां बरे बनबास ते तेरमां बरा छप्पिए गजारता । हजे तेरमां बरा नईं मुक्का । अर्जुन समें कशा पहलें गे जाहर होई गेया ऐ । असें गी डरने दी लोड़ के ऐ ? पाण्डवें गी परतिऐ बारां बरें बनबास जाना पौग । द्रोणाचार्य होर ऐमें अपने लायक चेलै गी दिक्खियै कम्बै करदे न । द्रोणाचार्य होरें गी पिच्छें रौन देओ । अस लड़ाई इच अगे होइयै मकाबला करने आं ।

कर्ण आखन लगा—ठीक ऐ ! साढ़ी फौजै इच किश लड़ने दी मरजी नई । ते ओ डरै कन्ने कम्बै दी ऐ । ओ आखदे न जे रथे उप्पर चढ़ियै ते धनखवान लइयै जेड़ा सामनै आई खड़ोता ऐ ओ अर्जुन ऐ । पर अस की डरचै ? ओ भायें परशुराम होर बी की नई होन ? औं उसी बदने थमां रोकनां । ते अपना वचन पूरा करनां । औं लड़ड भायें होर सारे पिछे खड़ोई रौन । ओ राजा बिराट दियां गवां लई चलन, औं अर्जुनै कन्ने जुद्ध करियै उसी ताई लाई रक्खड । ते कर्ण अपनियां फौड़ां मारन लगा ।

कृपाचार्य होरें कर्ण दियां गल्लां मुनियां तां आखन लगे—ए ते शड़ी मूर्खता ऐ । असें गी किट्टे मिलियै अर्जुनै उप्पर हमला करना चाही दा ऐ । तां गै साढ़ी सफलता होई सकदी ऐ । शड़ा आपूँ इक्कला गै ओदे कन्ने लड़ने दी फौड़ नई मार ।

कर्ण तम्शेया । आखन लगा—इनें गी ते अर्जुनै दियां तरीफां करने इच सुख मिलदा ऐ । ओदी गै बड़याई करदे न । पता नई ओदे कशा डरदे न जां पाण्डव कन्ने मता गै प्यार ऐ । जिनें गी डर लगदा ऐ ओ नई लड़न । ओ छड़े दिक्खी २ नन्द लैन । ते जिने नमक दा हक चकाना ऐ ओ लड़ाई इच आई जान । औं इक श्पाई आं । मित्तरें गी प्यार करनां ते शत्रुएं गी नफरत करनां । औं ते डटिए लड़ड ।

इत्थें वेदपाठियें दा ते शत्रुएं दे गुण गाने आलें दा के कम्म ऐ ? उस बड़ा ताना मारियै आखेया ।

अश्वत्थामा द्रोणाचार्य हुन्दे पुत्तर, ते कृपाचार्य हुन्दे भनेए हे । उनें गी ताना बड़ा चुब्बा । उनें कर्ण गी कड़किए आखेया—हजे दुर्योधनै गी अस हस्तनापुर बापस नई लेई गे दे । हजे लड़ाई मुक्की नई । थुआड़ी गल्ल ते निरी फौड़ ऐ । अस क्षत्रिय नई सई । अस वेद पढ़ने आले ते शास्तर घोखने आले सई । पर असें कुसे शास्तरै इच नई पढ़ेया जे राजे लड़िए नई जूआ खेडिए दूएँ दे राज जित्तन ।

जेड़े लड़दे न ते राज जितदे न ओ बी इन्नां कां कां नईं करदे । पर तू फौड़ां मारने जोगा के कम्म कीता ऐ ? अग्नी चुपचाप रौन्दी ऐ पर रुट्टी पकान्दी ऐ । सूरज चमकदा पर छड़ा अपने गित्तौ नईं । धरती माता सब किश साम्बदी ऐ । चल अचल सब चीजां अपने उप्पर जरदी ऐ । पर किश बोलदी नईं । इक क्षत्रिय गी फौड़ मारने दा के हक ऐ जिस धोखा दइऐ जूए इच दूए दा राज खुस्से दा होए । पाण्डवें दा राज खोई लैनां ते ऊंआं गै जियां कोई मसूम पक्खरुए गी फसाई लै ओ कर्ण तू दस्स, हे दुर्योधन तू दस्स । केड़ी लड़ाई इच तुसें पाण्डवें गी हराया ऐ ? तुसें द्रोपदी गी दबारि इच खिचची आन्दा । तुसें गी इस गल्लै दा मान ऐ ? तुसें ते कौरव बैसै दा नां डोवी ओड़ेया ऐ । तुसें उस मूखें आडू कम्म कीत्ता ऐ जिस बाशना गित्ते चन्दन दा बूटा बड्डी ओड़ेया हा । अर्जुनै कन्नै लड़ना कोई जूए दी बाजी खेडना नईं ऐ । उन्थें अर्जुनै दे गाण्डीव दे तीर चलने न चौपड़े दे दुक्के चौके पाससे नईं सुट्टने ।

फौड़ियो ! तुस के समझदे ओ जे शकुनि धोखें कन्ने तुसें गी इत्थें बी बाजी जित्ती देग ।

कौरवें दे जोधा आपू इच्चें ताने मीनें मारन लगे । ए दिक्खिए भीष्म पितामह होरें गी बड़ा क्लेश होआ । ओ आखन लगे—समझदार मनुक्ख आपने गुरु दी बेज्जती नईं करदे । भलेयां सोची समझियै गै लड़ाई इच उतरना चाही दा ऐ । समां दिक्खेया लोड़चदा ऐ, थां दिक्खेया लोड़चदा ऐ । हालात दिक्खे लोड़चदे न । भले भले स्यानै लोक कई बारी अपनी स्थिरता छोड़ी ओड़दे न । ज्ञान गवाई ओड़दे न । दुर्योधन बड़ा स्याना ऐ पर इसलै गुस्सै इच आइयै उसी भुल्ली गया ऐ जे साढ़ी फौजा दा मकाबला करने आला अर्जुन ऐ । ओदी बुद्धी पर रोहै दा परदा पेदा ऐ । ओदे आखने दा इन्नां मतलब ऐ जे साढ़े बजुगं जरा तेज होइऐ लड़न । इसलै आपू च दुश्मनियां पाने ते वैर बरोध बधाने दा समां नईं । द्रोणाचार्य

कृपाचार्य ते अश्वत्थामा हुन्दे अगें मेरी इऐ प्रार्थना ऐ जे भुल्ल चुक माफ करो ।

कौरव सारी दुनियां तुप्पी मारन उनें गी द्रोणाचार्य जनेह गुरु ते उन्दे पुत्तर अश्वत्थामा जनेह बीर नईं लब्धी सकदे जेडे बेद दे जानकार ते बीरता दे अवतार होन । परशुराम होरें गी छोड़िए होर कुण ऐ जेड़ा द्रोणाचार्य जी गी जित्ती सकदा ऐ । अस अर्जुन गी तां गे जित्ती सकनें आं जे अस सारे रलिये मकाबला करचै । हुण जेड़ा कम्म सामनें आई गेया ए उसी तोड़ चाढ़ो । जेकर आपू इचे लड़न लगे तां अर्जुन गी नईं जित्तन हुन्दा ।

इयां भीष्म पितामह होरें सारे गी उपदेश कीता । उन्दे उपदेसें सारें गी ठण्डे कीता ते उन्दा रोह ढलेया ।

भीष्म होरें दुर्योधन गी पुच्छेया—हे दुर्योधन तूं राजे इच सारें कशा चंगा एं । अर्जुन मकाबले उप्पर आया ऐ उन्दे बनबासै दे तेरां बरे कल पूरे होई गे न । थुआड़ा हिसाब गलत ऐ । नईं जकीन होऐ तां ज्योतशिये गी पुच्छी लै । जिसलै अर्जुन सँख बजाया हा में उससे बेल्लै समझी लैता जे बनबासै दी अवधि पूरी होई गई । लड़ाई निश्चित करने थमां पहलें किश सोची लैना चाही दा ऐ । जे ते पाण्डवें कन्ने सुलह करनी ऐ तां इसलै मौका ए । इक पास सुलह ऐ शान्ति ऐ ते न्यां दी गल्ल ऐ । दूऐ पास जुद्ध ऐ दोन पक्खे दा नास ऐ । भलेया सोचो ते फैसला करो ।

दुर्योधन आखन लगा—हे मन्नन थार पितामह जी ! मेरी ते सुलह दी बिन्द मरजी नईं । में ते पाण्डवें गी इक ग्रां बी नईं देना । असें ते लड़ाई दी तयारी करनी ऐ ।

द्रोणाचार्य होर आखन लगे—फौजै दा चौथा हिस्सा लइये तुस ते हस्तनापुर जाओ । दूआ हिसा गवें गी घेरे च लै ते कब्जा करी लै । जे असें गवां नईं नेतियां तां एदा मतलब ईए निकलना ऐ जे अस हारी गये ग्रां । बाकी फौजा गी लइये अस पंजे अर्जुन कन्ने जुद्ध करगे ।

कौरवों की सेना लड़ने गितौ उसै ढंगै कर्नैं तयार होन लगी ।

अर्जुन बोलेया—हे राजकमार उत्तर ! दुर्योधनै दा रथ नई लबदा ते न गै दुर्योधन आपू लबदा ऐ । भीष्म पितामह होर ते शस्तर अस्तर लईऐ तयार लबदे न । मेरा ख्याल ऐ जे दुर्योधन गवां लइयै हस्तनापुर जा करदा ऐ । आओ नुआढ़े पिच्छे चलचै ते गवां शड़काई लैचै ।

अर्जुनै कौरवों की सेना थमां बक्खी होइयै दुर्योधनै पिच्छे रथ दड़ाया । जिसलै अर्जुन चलया तां उस तीर चलाये जेड़े भीष्म पितामह ते गुरु द्रोण हुन्दे चरणें कोल जाइये लगगे । इयां उस अपने बडेरे गी पर्णाम कीता । फी दुर्योधनै पिच्छे रथ दड़ाया ।

अर्जुन भट उत्थे जई पुज्जा जित्थे गवां किट्ठियां कीती दियां हियां । उस सारी फौज गी नसाई ओड़ेया । गवालें गी आखेया—गवें गी अपनी गऊशाला इच लई जाओ । उनें भटपट गवां गेरियां ते अपने थार लई गे । अर्जुन फी दुर्योधनै पिच्छे द्रौड़ेया ।

भीष्म ते दूए कौरव जोधा दुर्योधनै की महती गी द्रौड़े । उनें अर्जुनै गी घेरी लैता ते तीर चलान लगगे । अर्जुनै डटिऐ मकाबला कीता । पहलें ते उस कर्णें पासै रख कीता ते उसी मदाना दा नसाई ओड़ेया । फी उस द्रोणाचार्य हुन्दे उप्पर हमला कीता ते उनें गी हराया । द्रोणाचार्य होरें गी हुट्टे दे ते हारदे दिक्खियै अश्वत्थामा अगगे वदेया । अश्वत्थामा हुट्टेया तां कृपाचार्य होरें हमला कीता पर हारी गे ।

सारी फौज गै खीस बीस होई गई । भीष्म पितामह होरें फौज किट्ठी कीती पर उन्दे इच साहसत नई हा रेदा । भीष्म पितामह ते अर्जुन दा खूब जुद्ध होआ ते देवता लोक बी ए जुद्ध दिक्खन आये ।

अर्जुनै गी दुर्योधनै कश नई पुज्जन देने दा जतन फेल होई गेया । अर्जुन दुर्योधनै कोल जाई पुज्जा ते हमला कीता । दुर्योधन हारी गेया ते लड़ाई थमां नट्टा । अर्जुनै बुजदिली दा तान्ना मारेया

तां फी परतोआ, जियां जखमी सप्प परतोन्दा ऐ, ते लड़न लगा । अर्जुनै खूब लड़ाई कीती । आखर उस इक दिव्व अस्तर चलाया लड़ाई इच सारे बेहोश होई गे । उसलै अर्जुनै उन्दे टल्ले तुआरी ले । लड़ाई इच शत्रू दे टल्ले तुआरी लैने दा अर्थ हुन्दा हा जे शत्रू भलेयां हारी गया ऐ ।

जिसलै दुर्योधन होशै च आया । भीष्म होरें उसी नगर भेजी ओढ़ेया सारी सैना हस्तनापुर परतोई । भली हार होई ।

अर्जुन बोलेया—हे उत्तर ! घोड़े परताओ । असें अपनियां गवां परताई लइयां न । साड़े शत्रू नस्सी गे न । अपने राज्जै गी बापस चलो । अपने शरीरै गी चन्दन दा लेप करो । ते फुल्लें दे हार पाओ । परतोन्दे होई अर्जुनै अपने अस्तर शस्तर फी साम्बिए ऊंआं गै रक्खी ओढ़े ते आपू मुड़िए वृहन्तला बनी गया । उस पहलें गै दूत भेजी ओढ़े जे राजकमार उत्तर नै लड़ाई जित्ती लई ऐ ।

०००

राजे बिराट दी गलत फैहमी

२५० त्रिगर्ते दे राजे सुशर्मा गी हराइयै जिसलै राजा बिराट होर अपनी राजधानी गी परतोए तां नगर बासियें बड़ा जै जं कार कीता । जिसलै ओ महलें पुज्जे तां उत्थें राजकमार उत्तार नईं लब्बा । जनानियें दस्सेया जे राजकमार होर कौरवें गी जित्तान मे दे न । उनें ते इत्थुं तोड़ी बड़याई ओड़ेया जे राजकमार सारे संसारै गी जित्ती सकदा ऐ । पर राजे दा मन अन्दरा दा घाबरन लगा । ए कदें बी नईं तोड़ चढ़ने आली गल्ल ही । उसी अपने कुंगले राजकमारै दे बक्खर पता हे । ते फी ओ कन्नै उस खुसरे गी लेई गेदा हा ।” साढ़ा लाडला मरोई गेदा होना ऐ । राजा नै अत्ता गै चिन्ता प्रगट कीती ।

राजा नै मन्तरियें गी आखेया जिन्नी बी होई सकदी ऐ सैना किट्ठी करो ते जे राजकमार मरोई नईं गेदा तां ओदी मदती गी पुज्जो । ते उसी बचाओ । ते कन्नै करियै लेई आओ । गुप्तचरै

गी बी भेजेया जे पता करो राजकमार ऐ कुदर ते ओदे कन्नै के बीती ऐ ?

युधिष्ठिर होर जेड़े सन्यासी कनक दा भेस धारियै राजे कन्नै रौन्दे हे बिराट गी दलासा देन लगे राजकमार गी किश नईं होन लगा—बृहन्नला सारथी बनिऐ कन्नै गेदा ऐ ।” बृहन्नला दा तुसैं गी पता नईं पर अऊं जाननां । ओ जिसदा बी रथ चलान्दा ऐ ओ कदैं नईं हारदा । ओदी जित्ता जकीनी हुन्दी ऐ । सुशर्मा दी हारै दी खबर बी उत्थैं पुज्जी गई होनी ऐ इस करी कौरव परतोई गे होऊन ।

इन्नै इच जुद्ध भूमि दा गुप्तचर खुश खबरी लेइ आयै जे राजकमार उत्तर नै कौरवें गी हराई ओड़ेया ऐ । ते अपनियां गवां परताई लैतियां न । राजा खबरै उप्पर विश्वास गै नईं करै । पर युधिष्ठिर होरें मुस्कराइयै फी जकीन कराया ।

“महाराज ! कोई शक नईं करो । दूत ठीक गै आखा करदे न । बृहन्नला सारथी बनिऐ जा तां जित्त जरूरी हुन्दी ऐ । राजकमार होर जित्ती गे न ए कोई बड़ी गल्ल नईं । मिकी पता ऐ जे राजे इन्द्र ते भगवान कृष्ण हुन्दा सारथी बी बृहन्नला दा मुकाबला नईं करी सकदा । राजा बिराट आखन लगा—ए के फजूल गल्लां करा करदा ऐ । पर ओ मौका नराज होने दा नईं हा । राजे नै खबर आनने आलें गे हीरे मोतियें दी बकशीश दित्ती ते हुकम दित्ता जे सारी जनता खुशी मना । ‘मेरा सुशर्मा गी जित्ती लैना कोई बड़ी गल्ल नईं । राजकमारै दी जित्त असली जित्त ऐ । सारे मन्दरें इच प्रार्थना करो । सारे बड़ें बजार सजाओ । भण्डियां लाओ ते बाजे बजाओ । मेरे शेर दिल राजकमारै दा सुआगत करने गित्ते जलूस बनाइयै अग्रे जाओ ।

राजा बिराट नै अपने मन्तरी, सैना ते मैह्लें दियां इस्त्रियां राजकमारै दे स्वागतै गी भेजियां । राजा मैह्लें अन्दर गया ते सैरेन्द्री गी आखन लगा—चौपड़ लेई आ । महात्मा कणक होरें गी

आखन लगा—मेरा मन बड़ा गै पसोआ करदा ऐ । आओ चौपड़ै दी बाजी लाचै ।' चौपड़ै दी बाजी लग्गी पेई ।

खेड़दे जान ते गल्लां करदे जान । राजा राजकमारै दी जितै थमां सच्चै गै मती फूक लेई गया । आखन लगा दिक्खो उत्तर नै कमाल कीता ऐ । कौरवें गी नसाई ओड़ेया ऐ युधिष्ठिर होर मुस्कराइयै आखन लगे—तुन्दा राजकमार सच्चै गै बड़ा खुश किस्मत ऐ । एडी चंगी किस्मत नई हुन्दी तां उसी बृहन्नला जनेआ सारथी कुत्थुआं थोना हा ।

राजे गी बड़ा रोह चढ़ेया । गल्ल राजकमार उत्तर दी बहादुरी दी करनां ऐ बृहन्नला दे गीत गै गाई जा करदा ऐ । “तूँ उस खुसरे गी इन्ना बड़या करनां एं ? अऊं राजकमार दी बहादुरी दी गल्ल करनां तूँ बृहन्नला दे गुण गान शुरू करी दिन्नां एं । ओदा सारथी बनना गै तुगी सब किश लबदा ऐ । जियां ए बी कोई बड़ी गल्ल हुन्दी ऐ ।

जिसलै युधिष्ठिर होरें फी आखेया जे मिगी पता ऐ बृहन्नला कोई सधारन सारथी नई । ओ जेदा रथ चलान्दा ऐ ओ कदें हारदा गै नई । जुद्ध करने आला भायें कोई होए । भायें कनेआ कठन समां की नई होए ओ कदें नई हारदा ।

राजे विराट गी बड़ा रोह चढ़ेया । उस थमां नई जरोआ ते उस चौपड़ै दे पासै युधिष्ठिरै दे मुंएँ उप्पर मारे । युधिष्ठिर होरें गी चोट आई ते लहू बगन लगा । सैरेन्द्री नै दपट्टे कन्ने उन्दा मुंह पूजेया ते मुन्ने दे कौलै इच खून पड़छी लैता ।

ए के करा करनी एं ? कौलै इच खून की किट्टा करा करनी एं ? राजे गी बड़ा रोह चढ़ेया हा ते उस रोहै कन्ने पुच्छेया ।

इस सन्यासी महात्मा दी रत्त भुजा नई पौनी चाही दी । रत्तू दे जिन्ने तोपे भुजा डिगडन उन्नै बरे थुआड़े राजै इच बरखा नई होग । इस करी में कौलै इच पुड़छी लैता ऐ । तुसें महात्मा कणक हुन्दा पता नई ओ केडे बड्डे महात्मा न ।

इन्ने इच द्वारपाल नै आखेया—राजकमार उत्तर ते बृहन्नला आये न । राजकमार होर अन्दर औना चान्दे न । राजा बड़े उत्साह कन्नै उठेया—उन्नै गी अन्दर लेई आओ । युधिष्ठिर होरें द्वारपाल गी आखेया—उत्तर गी लेई आ । बृहन्नला गी बाहर गै रौन देओ ।

उन्नै सोचेया कोई नर्थ नई होई जा । उन्नै गी पता हा जे अर्जुनै उन्दे मु'एँ दी चोट दिक्खियै जरोनी नई । जुद्ध इच लग्गी दी चोटै गी छोड़िऐ ओ होर कुसै चाली दी चोट युधिष्ठिर हुन्दे शरीर उपपर नई हा दिक्खी सकदा ।

उत्तर अन्दर आया ते उस राजे गी पर्णमि कीता । जिसलै ओ महात्मा कणक होरें गी पर्णमि करन लगा तां उन्दे मु'है उपपर खून दिक्खियै ओदा ध्राका निकली गया ते ओ डरी गया । उसी युधिष्ठिर हुन्दा पता लग्गी गेदा हा ।

“हे महाराज ! इन्नै महात्मा होरें गी कुस मारेया ऐ ? बिराट अपने उत्तरै पासै दिक्खियै आखन लगा—“एडी के गल्ल ऐ ? ए में मारेया ऐ । थुआड़ी जित्तै दी खबर सुनियै अऊं अत्त गै खुश होआ । अऊं जिसलै बी थुआड़ी बड़यार्ई करां तां ए ब्राह्मण उस खुसरे सारथी—बृहन्नला दी तरीफां गुरु करी देऐ । आखै जित्तै उससै करी होई ऐ । ए के पाजीपन ऐ ? माढ़े कशा लग्गी गेई ऐ । पर लग्गी गेई ऐ । छोड़ो इस गल्लै गी ।

उत्तर बड़ा घाबरी गेदा हा—आखन लगा तुसैं ए बड़ा माड़ा कीता ऐ । झटपट इन्दे पैरें पेई जाओ ते माफी मंगी लौ नई तां जड़ मूलै थमा नष्ट होई जागेओ ।

राजे बिराट गी किश थौह नई आवै जे के कीता जा । पर उत्तर इन्ना घाबरे दा हा जे ओ युधिष्ठिर दे पैरें पई गया ते माफी मंगन लगा—“महाराज खिमा करी ओड़ो ।”

राजे नै उत्तर गी गलें लाया, कोल ब्हालेया ते पुच्छन लगा—बेटा तू एडा शूरवीर ए । मिगी बड़ी हुक्कड़ हुक्कड़ लग्गी दी ऐ ।

ए सब किश कियां होआ ? तूं कौरव सैना गी कियां हराया ? गवां कियां परताइयां ?

उत्तर सिर सुट्टियं आखन लगा—में कोई जित्त नईं कीती । नां गै में गवां परताइयां । ए ते सब किश दिव्व राजकमारै कीता ऐ । उस मेरी मद्दत कीती, मिगी बर्बादी थमां बचाया, कौरवें दी सैना गी नसाया ते गवां परताइयां । मे किश नईं कीता ।

राजे गी जकीन कियां आवै ? ओ पुछन लगा—ओ दिव्व राज कुमार कुत्थें ऐ ? उसी सहो औं ओदा धन्नवाद करां । उस मेरे पुत्तरै गी बचाया ऐ । शत्रू दी सेना गी नसाई ओड़ेया ऐ । औं उसी अपनी धी 'उत्तरा' ब्याही देड । जाओ, उसी लई आओ ।

राज कुमार आखन लगा—इस बेल्लै ते कुतै गेदे न उन अज्ज जा कल औना ऐ ।” उत्तर नै ईयां जवाव इस करी दित्ता हा जे ओ दिव्व राज कुमार अर्जुन गै हा ते इसले ओ बृहन्नला बनी गेदा हा । बिराट हुन्दे दर्बारा इच सारे बड्डे २ शहरी ते, राजे राजकमारै दे स्वागतै गित्तै किट्ठे होए दे हे । कनक, रसोइया बलाल, बृहन्नला, तन्त्रीपाल ते धर्मग्रन्थी जिन्दे करी ए विजय प्राप्त होई ही आए ते राजकमारें दे आसनें उप्पर बेई गे । उनें कुसै गी नईं पुच्छेया । सारे दिक्खियै हरान होई गे । किश आखन लगे भई इनें सेवकें औखै मौकै बड़ी सेवा कीती ऐ इस करी इन्दी कदर होनी गै चाही दी ऐ ।

राजा बिराट दर्बारै इच आया । उस महात्मा कनक ते दूएं गी राजकमारें दे आसनें उप्पर दिक्खेया तां उसी बड़ा रोह चढ़ेया । ते अपनी नराजगी जाहर करन लगा । पाण्डव इन्ना चिर मजे कन्नै ए तमाशा दिखदे रे फी उनें आप गी जाहर करी ओड़ेया ।

बिराट गी जिसलै पता लगा जे ए पाण्डव राजकुमार हे ते द्रोपदी ही जेड़े भेस बटाइयै ओदे कश कम्म करदे रे न तां ओ बड़ा खुश होआ । ओ खुशी इच युधिष्ठिर हुन्दे गलें लगा । उस अपना सारा राजपाट उनें गी भेंट करी ओड़ेया । उन्दा स्थान थोड़ा मुक्की

सकदा हा । पाण्डवें उसी राज परताई दित्ता । बिराट आखन लगा में अपनी धी अर्जुन कन्नै व्याही दिन्तां ।

अर्जुन आखन लगा—ए गल्ल ठीक नईं । मेरे कशा राजकमारी नै नाच-गाना सिक्खेया । अऊं ते उन्दा गुरु ते कन्नै पिता सतुल्ल होआ ।”

उस उत्तरा दी कड़माई अभिमन्यु कन्ने मन्नी लैती । इन्ने इच दुष्ट दुर्योधनै दे दूत दर्बारै इच आये ते युधिष्ठिर हुन्दे आस्तै स्नेआ लेई आये—“हे युधिष्ठिर जी अर्जुन नै तौल कीती, तुस समें थमां पहलें जाहर होई गे । तुसैं गी परतिऐ बनवास जाना पौग । तुसैं बचन कीता हा जे तेरमां बरा छपिऐ रौनां । अर्जुन ओ बरा बीतने थमा पहलें जाहर होई गया ऐ इस करी तुस बारां बरे फी बनवास कटो ।”

युधिष्ठिर होर हस्सन लगे—दूतो ! तुस दुर्योधन हुन्दे कोल भटपट जाओ ते आखो जे भलेंया सोध करी लैन ।

भीष्म पितामह जनेह ज्योतिष विद्या दे जानकार उसी दसऊन जे जिसलै तुस गाण्डीव धनुखे दी टकार सुन्नियै त्राहे दे नस्से हे उस बेले तेरां बरे पूरे होई गे दे हे ।

०००

सलाह मश्वरे

तेरमां बरा जेड़ा पाण्डवें छप्पियै कटुना हा मुक्की गेदा हा ।
हुण उनें गी छप्पिए रौने दी कोई लोड़ नई ही इस करी ओ मत्स्य
राजै इच दूए थां 'उपप्लव्य' टुरी गे ते इत्थुआं उनें अपने मित्तरें ते
नाते साकें गी दूत भेजियै सदेया ।

द्वारका दा कृष्ण जी आये, बलराम जी आये, अर्जुनै दी लाड़ी
सुभद्रा ते पुत्तर अभिमन्यु आया । जिसलै पाण्डव ते राज कुमार
उत्तर भगवान कृष्ण ते उन्दे स्वागतै गितौ गे तां सैखें घडयोलें दी
गड़गज्ज पई गेई । इन्द्रसेन ते होर साथी तेरमां बरा शुरु होने
पर चली गे हे अपने रथें पर आवै दे हे । ओ बी उन्दे कन्ने रली गे,
ते उपप्लव्य आये । काशी राज ते शैव्य राज बी अपनियां फौजां
लइयै आये । पञ्चाल राजकुमार द्रुपद बी त्रै अक्षोनी सैना लइयै
ते शिखण्डी द्रोपदी दे पुत्तर ते अपने आऊ धृष्टद्युम्न गी लइयै आई
पुज्जा । होर किन्ने गै राजे उपप्लव्य आई किट्टे होए ते उनें पाण्डवें
गी सहायता दा जकीन दलाया ।

वेंदिक रीति रवाज कन्ने अभिमन्यु दा व्याह राजकुमारी उत्तरा कन्ने होई गया । सारे राजे एदे इच शामिल होए । जिसलें व्याह थमां फारग होए तां विराट दे मंहलें इच मीटिंग होई । सिंघासनै उपपर महाराजा युधिष्ठिर, दूए नम्बरै उपपर कृष्ण होर फी विराट ते दूए थारै बलराम, सात्यकि ते द्रुपद बैठे । सारे बई गे तां कृष्ण जी खड़ोइए आखन लगे—तुसैं सारें गी पता ऐ जे के थोखा होआ हा । कौरवें युधिष्ठिर होरें गी जूआ खडाइयै राजपाट खुस्सी लैता ते सारें पाण्डव भ्राय गी ते द्रोपदी गी बनबास टोरी ओड़ैया । पाण्डवें अपने बचन पालने गित्तै तेरां बरे बनें इच कष्ट भोगे न । इस करी भलेयां सोचो ते नेआ रस्ता कड़ो जेड़ा धर्मै दी पालमा करै । पाण्डवें ते कौरवें दा कल्याण होऐ ते कन्ने दौनें धड़ै दा जस्स बदै । युधिष्ठिर होर कोई नेई गल्ल नई चान्दे जेड़ी धर्म ते न्यां कन्ने उन्दी नई होऐ । ओ धृतराष्ट्र दे पुत्तरें दा कल्याण चान्दे न भायें उनें बड़ी बेन्याई कीती ऐ, ते नकसान पजाया ऐ । सलाह दिन्दे बेल्लै कौरवें दी दुष्टता दा ते पाण्डवें दे धीरजै दा बी ध्यान रखेओ । कोई न्यां आला ते दौनें दी इज्जत रही जा नेआ हल तुप्पो । दुर्योधनै दे मनै दा ते असैं गी पता नई, मेरा बचार ऐ जे अस कोई बड़ा स्याना दूत दुर्योधनै कोल भेजचै जेड़ा उसी समझा ते आखै जे सुलह सफाई कन्ने अद्धा राज पाण्डवें गी दई ओड़ ।”

उन्दे पिछुआं बलराम होर उट्टियै आखन लगे—तुसैं कृष्ण हुन्दी सलाह सुनी लई ऐ । उनें जेड़ा हल कड़ुआ ऐ ओ बड़ा न्यां आला ते समझदारी आला ऐ । में समझनां ए दुर्योधन ते युधिष्ठिर दौनें आस्तै बड़ा चंगा ऐ । जे पाण्डवें गी उन्दा हिस्सा शान्ति कन्ने थोई जा तां उन्दे गित्तै, दुर्योधनै गित्तै बाकी सारें गित्तै बड़ा चंगा ऐ । तां गे देसै इच शान्ति ते ऐमनी होग ।

हुण कोई युधिष्ठिर हुन्दा स्नेआ लई जा, दुर्योधनै गी समझा ते ओदा जबाब लई आवै । ऐसा व्यक्ति भेजो जेड़ा शान्ति ते ऐमनी कन्ने सुलह सफाई कराई देऐ ।

नेआ दूत जा जेड़ा भीष्म पितामह, धृतराष्ट्र, द्रोणाचार्य ते

बिदुर, कृपाचार्य ते अश्वत्थामा हुन्दी सहायता बी लै ते पाण्डवे दा पक्ख समझा । कर्ण ते शकुनि दी सहायता बी लैन होऐ तां लै । ऐसा व्यक्ति होना चाही दा ऐ जिसी रोह नईं चढ़ै । युधिष्ठिर होरें गी सारे नतीजें दा पता हा फी बी भित्तरें दे ठाकने दे बाबजूद जूआ खेडेया ते सब किश हारेया । उनें गी पता हा जे ओ शकुनि दे मकाबले इच किश नईं । फी बी उनें ओदे कन्ने जूआ खेडेया । हुण युधिष्ठिर होर शकैत ते नईं करी सकदे पर प्रार्थना करी सकदे न जे मेरा हक दई ओड़ो ।

दूत नेआ होना चाही दा ऐ जेड़ा जुद्ध दा शकीन नईं होऐ । कनेई बी कठनाई आवै ओ शान्ति कन्ने गै कम्म लै ते शान्ति आला रस्ता गै तुप्पै । इसलै दुर्योधनै कन्ने कुसै ढंगै कन्ने गै गल्ल करनी चाही दी ऐ । अपना सारा जोर लाइयै जुद्ध नईं होन देना चाही दा । जेड़ी चीज शान्ति कन्ने प्राप्त होई जा ऊए चंगी ऐ । लड़ाई विचा किश प्राप्त नईं हुन्दा ।”

बलराम हुन्दा सोचने दा ढंग ए हा जे जिसलै युधिष्ठिर जूए इच सारा राज हारेया तां उसी सब किश पता हा । हुण राज मंगने दा कोई हक नईं । बनबास भोगने दा इन्ना गै अर्थ ए जे ओदे पिच्छुआं उनें गी अजादी होई गई ऐ । परतिये बनबास भोगने दी लोड़ नईं । पर राज बापस मंगने दा कोई हक नईं । युधिष्ठिर प्रार्थना करी सकदे न । उनें गी राज बापस मंगने दा कोई हक्क नईं ।

बलराम होर नईं हे चान्दे जे इक्कै कुलै दे लोकें इच जुद्ध होऐ ते ओ लड़ी मरन । जुद्ध कन्ने सर्वनास गै हुन्दा ऐ ।

इयां कवि नै बलराम हुन्दे मुंहा म्हेसा सच्च रौने आली गल्ल ग्लाई ओड़ी ऐ ।

सात्यकि यादव योधा आये दा हा । उस बलराम दा भाषण सुनेया ते नईं जरोआ । ओ रोहै इच उट्टेया ते तमशिऐ आखन लगा—”

बलराम हुन्दी गल्ल मिकी बिन्द बी ठीक नईं लगगी ।

स्यानापन होऐ तां आदमी कुसै गल्लै गी बी ठीक सिद्ध करी सकदा ऐ। पर भायें दुनियां दा सारा स्यानापन कठ्ठी करी लौ गलत गल्लै गी ठीक नई आखन हुन्दा। बेन्याईं गी न्यां नईं आखन हुन्दा। बलराम होरें जियां गल्लै गी पेश कीता ऐ मिकी ओदे कन्ने बरोध ऐ। ओदे कन्ने मेरे मनै इच घृणा गै पैदा होई ऐ। अस इक्कै बूटे उप्पर कई बारी शाखां दिक्खने आं, इक फलें कन्ने लदोई दी निन्दी होई दी लबदी दूई इयां गै व्यर्थ उच्चि हुन्दी ऐ। उसी कोई फल नई हुन्दा। इऐ हाल इने दौनें भ्रायें दा ऐ। कृष्ण होरें धर्म सार्ई गल्ल कीती ऐ। बलराम नै नखिद्ध गल्ल आखी ऐ। ए ते तुस बी मन्नगेओ, एदे इच शक गै, किश नईं जे कौरवें युधिष्ठिर गी धोखा दइयै पाण्डवें दा राज खुस्ती लैता ऐ। उसी आखना जे ओ राज हुण उन्दा गै ए ते इयां गै गल्ल होई जे चोरी दा माल चौरै कोल गै रौन दित्ता जा। जेड़ा बी आदमी ए आखदा ऐ जे युधिष्ठिर होरें गलती कीती ऐ ओ दुर्योधनै कशा डरियै आखा दा ऐ। ऐदे इच न्यां आली गल्ल नईं।

मेरियां कौड़ियां गल्लां माफ करेओ। युधिष्ठिर होरें जूआ अपनी मरजी कन्ने नईं खेडेया। कौरवें उनें गी सहेया ते जोर पाया। युधिष्ठिर होर ते जूए दे एडे माहिर गै नईं। उनें गी मरजी नईं हुन्दे होई ऐडे भारे खडारी कन्ने की लाई ओड़ेया? ए ते धोखा देने आली गल्ल ही, बर्बाद करने आली गल्ल ही।

युधिष्ठिर दुर्योधनै अग्ने की भुक्त, की छन्दे करन, जे असैं अपना बचन पूरा करी ओड़ेया ऐ, हुण साढ़ा राज असें गी देओ। युधिष्ठिर होर कोई मंगते नईं। ओ की मंगन? उनें अपना बचन तोड़ चाड़ेया ऐ। उन्दे भ्रायें, बी बचन नभाया ऐ। बारां बरे बनबाम कट्टेया, बारां म्हीने छप्पियै गजारे। हुण बी दुर्योधन ते ओदे साथी धोखा बाजी ते बशर्मी नईं छोड़दे ते आखदे न जे इनें बचन नईं नभाया। औ ते इनें बदमाशें गी जुद्ध इच सिज्जड।

ओ जां ते युधिष्ठिर हुन्दे कोला माफी मंगडन। जां फी अपना कीते दा भोगडन। सचाई उप्पर होने आला जुद्ध कदें गलत नईं

होई सकदा । दुश्मनै कन्ने जुद्ध करने ते उनें गी बड्डी ओड़ने इच दोष नई । दुश्मनै अगगे बेनती करनी ते बेज्जती कराने आली गल्ल ए । दुर्योधनै दी मरजी जुद्ध करने दी ऐ तां चा चकाई ले । अस बी त्यार आं । हुण बलगने दी कोई लोड़ नई । जुद्ध दियां त्यारियां गुरु करी देओ । दुर्योधनै लड़ाई वगैर राजै दा अद्ध देना गै नई । समां नष्ट करना फजूल गै ।”

सात्यकि दे शब्द सुनियै द्रुपद हुन्दा मन बड़ा पसोआ । ओ उट्टियै आखन लगे—“सात्यकि होर ठीक आखदे न । औ उन्दा समर्थन करना । छन्दे करने ते तरले पाने कन्ने दुर्योधन नई समझने आला

असें गी युद्ध दी त्यारियां रम्भी ओड़नियां चाही दियां न । ते समां नष्ट नई करना चाही दा । अपने मित्तरें गी आखना चाही दा ऐ जे अपनियां फौजां लइयै आई जाओ । शल्य होरें गी स्नेआ भेजो धृष्टकेतु, जयत्सेन ते केकय होरें गी सद्दो । धृतराष्ट्र हुन्दे कोल दूत बी भेजो । मेरे दबारै दा पण्डित जेड़ा धार्मिक कृतां करान्दा ऐ उसी हस्तनापुर भेजी सकदेओ उसी भलेआं समझाई लौ जे दुर्योधनै कन्ने कियां गल्ल करनी ऐ ते भीष्म धृतराष्ट्र ते द्रोणाचार्य होरें गी के ग्लाना ऐ ?

जिसलै द्रुपद होरें गल्ल खत्म कीती तां वासुदेव कृष्ण होर उट्टियै द्रुपद होरें गी आखन लगे—जे किश तुसें ग्लायै गल्ल ऊऐ होने आली ऐ । ए राज—नियमै दे मतावक बी ऐ । बलराम हुन्दे ते मेरे कौरवें ते पाण्डवें कन्ने इक्के नेए सर्वन्ध न । अस ते इत्थें राजकमारी उत्तरा दे व्याह उपपर आये हे । ते हुण अपने नगरें गी परतीई जागे । तुस सारे राजें इच बड्डे ओ । उमरी इच बी ते बुद्धि च बी । तुस सारें गी समझाई सकदेओ । धृतराष्ट्र होर भी तुसें गी बड़ा मनदे न ।

द्रोणाचार्य ते कृपाचार्य तुन्दे निक्के हुन्दे दे मित्तर न । इस करी ए बिल्कुल ठीक ऐ जे तुस अपना ब्राह्मण राजदूत इस शान्ति वार्ता गितौ भेजो । जे ओ दुर्योधनै गी ओदी गलती नई गै समझाई

सकेया, तां फी जुद्ध दी त्यारी ठीक गै। असें गी बी स्नेआ भेजी ओड़ेओ।

मीटिंग खत्म होई गई। कृष्ण जी अपने साथियें कन्नें द्वारका दुरी गे।

पाण्डव ते उन्दे साथी अपनिएं त्यारियें इच लग्गी पे। सारे मित्तर राजें गी दूत भेजी ओड़े ते फौजें दियां त्यारियां शुरु होई पेइयां।

तुआई, दुर्योधन ते नुआड़े आ बी बेले नईं हे बैठे दे। ओ बी जुद्ध दी त्यारी इच लग्गी पे। उनें बी अपने मित्तर राजें गी फौजां त्यार रखने गिते आखी भेजेया। जुद्ध दी त्यारी दी खबर सारे देस इच पुज्जी गई।” कुतै फौजां जा करदियां न, कुतै आका करदियां न, सारै गै हलचल मची गई ऐ। सारी धरती फौजें दे चलने कन्त कम्बन लग्गी ऐ।” कवि नै इयां वर्णन कीता दा ऐ।

इयां सेई हुन्दा ऐ जे पराने जमाने इच बी जुद्ध दियां त्यारियां इयां गै हुन्दियां हियां जियां हुण हुन्दियां न।

द्रुपद होरें अपने पण्डत होरें गी सद्देया ते आखन लगे—तुसें गी दुर्योधन दा सुभा ते पता ऐ ते पाण्डवें दे गुण बी तुस जानदे ओ। तुस पाण्डवें दे दूत बनिए दुर्योधन कोल जाओ। कौरवें अपने बबबै धृतराष्ट्र गी कन्ने गण्डियै पाण्डवें गी धोखा दित्ता। धृतराष्ट्र होरें बी महात्मा विदुर दी गल्ल नईं मन्नी। धृतराष्ट्र बड़ा बुढ़ा ते कमजोर राजा ऐ। उसी धर्म दी सिक्खमत देओ। अकल दस्सो। तुसें गी इस कम्में इच महात्मा विदुर होर मद्दत देडन। तुन्दे जाने कन्ने भीष्म पितामह, द्रोणाचार्य, कृपाचार्य ते होरें बड़ें २ जोधें इच बचार भेद शुरु होई जाग। ते जे इक बारी बचार भेद शुरु होई गया तां परतिएं नुकते उप्पर पुज्जने तोड़ी समां लग्गग। इन्ने समे दा पाण्डव अपने तयारी मुकम्मल करने गिते लाह कड्डी लैडन। जिन्ना चिर तुस उत्थ रौगेओ इन्ना चिर कौरवें दियां जुद्ध दियां त्यारियां रुकी जाडन ते इयां पाण्डवें गी लाह पुज्जग। ते जे कोई चर्ज गै होई गया ते सुलह दी गल्ल बनी पेई तां सगों चंगा। मिगी

बिन्द बी मेद नईं जे दुर्योधन सुलह सफाई दी गल्ल मन्नग । फी बी कुसै गी शान्ति दी गल्लै आस्तै भेजना साढ़े गित्तै चंगा गै ।”

दिसम्बर १९४१ इच जपानी, अमरीका आलें कन्नै शान्ति बार्ता करा करदे हे । शान्ति बार्ता भंग हुन्दे गै उनें चान चक्क पर्लहार्वर उप्पर हमला करी दित्ता । ते अमरीका आलें दा जंगी समुन्दरी बेड़ा बर्बाद करी ओड़ेया । द्रुपद हुन्दी दूत-पण्डतै गी सिक्खया कशा सेई हुन्दा ऐ जे ए कोई नमीं गल्ल नईं । पराने जमाने इच बी इयां गै चलदा हा । शान्ति आस्तै दूत भेजने, मने दे सच्चे भाव कन्ने गल्ल बी करनी ते लड़ाई दियां तयारियां बी करदे जानां । शान्ति दियां गल्लां ते शत्रू दे कैम्पे इच मतभेद पैदा करना ए बी चलदा हा । इस दुनिया इच किश बी नमां नईं ।

०००

अर्जुनै दे सारथी

द्रुपद हुन्दे पण्डित गी शान्तिवार्ता गितै हस्तनापुर भेजिये पाण्डवें, कनै गै अपने मितार राजें गी स्नेह बी भेजी ओढ़े जे साढ़ी मद्दत करो ते फौजां तयार रखो । द्वारका पासै अर्जुन आपूँ गया ।

अपने गुप्तचरें कोला सब किश पता करियै दुर्योधन बी चुप नई बंठा । जिसलै उसी पता लगा जे वामुदेव कृष्ण जी द्वारका आई गे न तां सारें कशा तेज चलने आले रथै इच बहियै ओ बी द्वारका दौड़िया । अर्जुन ते दुर्योधन दवै इक्कै दिन द्वारका पुज्जे । कृष्ण जी सुत्ते दे हे । नजीकी रिश्तेदार होने करी अर्जुन ते दुर्योधन दवै अन्दरले कमरे इच जाई सकदे हे । दवै जाइयै बेई गे ते कृष्ण हुन्दे जागने दी ऐन्तजारी करन लगे ।

पहले दुर्योधन गया ते सिरैन्दी पे दे रतनें जड़े सिंघासने उपपर बइ गया । अर्जुन हत्थ जोड़ियै परैन्दी बक्खी खड़ोई रेआ । जिसलै कृष्ण होर जागे तां उनें पहलें अर्जुन गी दिक्खेया जेड़ा सामनै

खड़ोता दा हा ते बड़ा स्वागत कीता । फी ओ दुर्योधन पास मुड़े तां ओदा बी स्वागत कीता ते पुच्छेया जे दवै जनें कियां द्वारका आयेओ ? पहलें दुर्योधन बोलेया “इयां बभ्रोन्दा ऐ जे साढ़े दौनें इच लड़ाई लग्गी पौनी ऐ । जे छिड़ी पेई तां तुसें मेरी मदत करनी ऐ । जनेआ तुसें गी अर्जुन ऊऐ नेआ में । तुन्दा प्यार दौने गित्तै इक्के नेआ ऐ । दौने दा रिश्ता बी इक्कै नेआ ऐ । तुस ए नई आखी सकदे जे इक तुसें गी मता प्यारा ऐ ते दूआ घट्ट प्यारा ऐ । अर्जुन कोला पहलें में आयां । परम्परा ते इऐ जेड़ा पहलें पुज्जै उस्से दी गल्ल मनोऐ । हे जनार्दन । तुस बड़ु इच बी सारें कशा बड़ु ओ । इस करी ए बड़ा जरूरी ऐ जे तुस मिसाल कायम करो । तुस अपने बर्ता कन्ने इऐ परम्परा आली गल्ल नभाओ । ते चेतौ रक्खो जे अऊं पहलें आये दां” भगवान कृष्ण होरें जवाब दिता— हे दुर्योधन ! आये दा भायें तू पहलें होगा पर जागने उपपर में पहलें अर्जुन गी दिक्खेया ऐ । फी बी तुन्दा दौनें दा मेरे उपपर हक्क इक्के नेआ ऐ अऊं दौनें दी मदत करड । पर दान देनं बेल्ले बी मेरी परम्परा थमां चलदी आवै दी नीति इऐ जे औं सारे थमां लौके गी पहलें दान दिनां । इस करी मंगने दा पहला हक्क अर्जुन दा ।

नारायण लोक मेरे कबीले दे न ते उन्दी इक बड़ी भारी फौज ऐ । ओ मेरी बरोबरी दी ऐ ते उसी कोई जित्ती नई सकदा । अऊं मदत इयां बण्डन लगां । मेरी ए फौज इक बक्खीं ते अऊं इक्कला इक बक्खी, ते कन्ने ए शत ऐ जे में कोई शस्तर नई चलाना ते न गै लड़ाई इच हिस्सा लेनां ऐ । अर्जुन गी पुच्छन लगे भलेयां सोचिए दस्स नारायण लोकें दी फौज लेनी ऐ जां निहत्थे मिगी लेना ई । तू लौका एं इस करी पहला मंगने दा हक्क थुआड़ा ।

कृष्ण होरें हवें गल्ल खत्म कीती गै ही जे अर्जुन बिना कुसें सङ्कोचै दे नम्मरता कन्ने आखेया—तुस आपू साढ़ी बक्खी रौ, भायें कोई शस्तर नई चलाओ । मिकी इऐ सन्दोख ऐ ।

दुर्योधन अर्जुन दी बेनती पर बड़ा खुश होआ । उस भगवान कृष्ण हुन्दी फौज चुनी लेती । दुर्योधन बड़ा खुश होऐ दा बलदेव

हुन्दे कोल गया ते उनें गी सारी कथा सुनाई । सारी गल्ल सुनिए बलराम होरें आखेया विराट दी कुड़ी दे व्याह उप्पर ओदी सभा इच जे किश गल्ल बात होई ओ तुगी पता लग्गी गेई होनी ऐ । में थुआड़ी हिमायत कीती ही ते थुआड़े पक्खै इच जे किश आखी सकदा हा आखेया हा । में कृष्ण होरें गी बी केई बारी आखेया ऐ जे साढ़ा कौरवें ते पाण्डवें दौनें कन्नै इक्कै नेआ सर्वन्ध ऐ । पर उन्दी तशफी नईं होई । गल्ल उनें गी जची नईं । ऐदे इच अऊं किश नईं करी सकदा । जिसदा बरोध कृष्ण होर करन अऊं ओदा पक्ख नईं करी सकदा । अऊं अर्जुन दी सहायता नईं करड पर कृष्ण हुन्दे मकाबले इच थुआड़ी बी मदत नईं करड । तूं बड़े उच्चे कुलै दा राजकमार एं ते सारे देसै इच तेरा मान ऐ । इस करी जे जुद्ध छिड़ी गै पेया तां क्षत्रिय धर्म मताबक गै जुद्ध करेयां ।

दुर्योधन बड़ा पसोए दा हस्तनापुर पुज्जा । ओ सोचन लगा—अर्जुन ते निरा बुद्धू गै निकलेया । द्वारका दी सारी सैना माढ़ी बक्खी लड़ग । बलराम हुन्दी शुभ कामना माढ़ी बक्खी ऐ । भगवान कृष्ण हुन्दे कोल कोई फौज नईं रेई ।

जिसलै नकेबले होए तां कृष्ण होरें मुस्कराइयै अर्जुन गी पुच्छेया—“तूं ए के मूर्खता कीती जे मेरी सारी तयार सैना गी छोड़िये ते मिगो निहत्थें गी चुनी लैता ई ?” अर्जुन आखन लगा—मेरी बड़ी ताड ऐ जे मेरा तुन्दे जनेआ मान होऐ । तुस इक्कलै गै सारें राजें दा ते उन्दी फौजें दा मकाबला करी सकदे ओ । औं बी मकाबला करी सकनां । इस करी मेरी मरजी ऐ जे अऊं लड़ां ते तुस बिना शस्तर लैते मेरे सारथि बनो । मेरा रथ चलाओ । ए मेरी बड़े चिरै दी इच्छया ही । अज्ज तुसें पूरी कीती ऐ । भगवान कृष्ण बड़े खुश होए ते उनें शीर्वाद दित्ता “तां तूं मेरी बरोबरी करा करनां एं । परमात्मा तुगी सफलता देऐ ।” ओ अर्जुन दे फैसले थमां खुश होए । इयां भगवान कृष्ण नै अर्जुन दा सारथि बनना मन्जूर करी लैता ।

शल्य होर अपने भनेएं दे वरुद्ध

मद्रदेसै दा राजा शल्य माद्री दा भ्रा हा जेड़ी नकुल ते सहदेव हुन्दी मा ही । उसी पता लगा जे पाण्डव उपप्लव्य नगरी इच आवा दे न ते जुद्ध दी तयारी करा करदे न । उस बड़ी फौज लैती ते पाण्डवें कन्नै मिलन चली पेया । शल्य दी सैना एडी बड्डी ही जे जित्थें बी पड़ां पौन्दा पन्दरे क्रोएं इच सैना दा फला हुन्दा हा ।

राजा शल्य ते ओदी सैना दे टुरी पौने दी खबर दुर्योधनै गी लग्गी । उस सोचेया कदें शल्य गी अपने पासै कीता जा तां ठीक गल्ल बनदी ऐ । उस अपने अफसरें गी हुकम दित्ता जे राजे शल्य गी ते उन्दी सैना गी खूब आराम पजाओ ते खूब खातरां करो । चावां पलाओ । इस करी राजे शल्य दे रस्ते इच बड्डियां बड्डियां सरां बनाई ओड़ियां ते राजे शल्य हुन्दा स्वागत होतं लगी पेया । खूब धामा उड्डन लगियां । राजा शल्य इस स्वागते थमां बड़ा खुश होआ पर उस समझेया जे ओदा भनेआ युधिष्ठिर गै ए सब किश करा करदा ऐ । राजा शल्य दी फौज अगें बददी जा करदी ही ते

उन्दे मार्च कन्नै धरत डोलदी ही । इन्हें खातरें कोला खुश होइयै
इक दिन शल्य होरें अफसरें गी सद्देया ते आखन लगा—तुसं मेरा ते
मेरी सैना दा बड़ा स्वागत कीता ऐ । तुस युधिष्ठिर होरें गी आखो
जे अऊं अफसरें गी इनाम देना चानां । तुस युधिष्ठिर हुन्दे कोला
पुच्छी आओ ।

उन्हें जाइये अपने स्वामी दुर्योधनै गी सारी गल्ल सनाई ।
दुर्योधन इस सारे बन्दोबस्तै इच कन्नै २ गै रौन्दा हा ते आपूँ सारा
किश दिखदा हा । उस सोचेया राजे शल्य गी मिलने दा बड़ा शैल
मौका ऐ । आखन लगा—“तुसैं कौरवें दी आओ भगत मन्त्री ए बड़ी
किरपा कीती ऐ ।” राजा शल्य ए सुनियै बड़ा हरान होआ । उसी
ते कोई सचाई दा शक गै नईं हा । ओ इस गल्लै थमां बी बड़ा
प्रभावित होआ जे दिक्खो दुर्योधनै पाण्डवें दे हिमायती दी इन्नी
खातर कीती ऐ

ओ आखन लगा—हे दुर्योधन ! थुआड़ी बड़ी किरपा ते
महानता ऐ । थुआड़ा बदला किया चकां ?

दुर्योधन आखन लगा—तुस ते थुआड़ी सैना माढ़ी बक्खी दा
लड़ो । मिकी इस्सै इच सब किश पुज्जी गया ।

शल्य चुप होई गया । किश थौह नईं आवै ! पुराणें इच
सदाचार दी सिख्या दित्ती दी ऐ ।

कुतै नेइयां कत्थां आई जन्दियां न जेड़ियां धर्मै बिरुद्ध
हुन्दियां न । धर्मै कन्नै कोई मेल नईं खन्दियां । पर उन्हें गी
थार थोई गेदा ऐ । धार्मिक ग्रन्थें इच इयां दोषें गी ठीक सिद्ध
करना कुत्थुं तोड़ी ठीक ऐ ?

बिन्दक बचार कीता जा तां असली गल्लै दा पता लगदा ऐ ।
गल्ल ए दस्सने आली ऐ जे बड़े धर्मात्मा ते नेक लोक बी खुञ्ज करी
जन्दे न । इस करी भायें पुराणें दा अर्थ धर्म भावना दा प्रचार करना
ऐ, उन्दे इच नेइयां कत्थां आई जन्दियां न जेड़ियां दसदियां न जे
नेक लोक बी धर्मै बिरुद्ध कम्म करी ओड़दे न । मरजी नईं हुन्दी
पर किश बज्जे दे पाप करी ओड़दे न । इस सचाई गी होर जोर

पाइयै सिद्ध कीता दा ऐ जे पापै थमां वचना होऐ तां बड़ी चतराई ते खबरगीरी दी लोड़ हुन्दी ऐ । बड़ा गै चौकस रौने दी लोड़ हुन्दी ऐ ।

साढ़े महां काव्ये रामायण ते महाभारतै इच भगवान राम चन्दर ते युधिष्ठिर हुन्दियां खामियां की दस्सी दियां न ? उनेंगी दस्सने दी लोड़ गै के ऐ ? पहलें दस्सनां फी उन्दा समाधान करनां ते ऐवें गै मनै इच खौदल पाने दी लोड़ गै के हुन्दी ऐ ? एबी गल्ल नई ऐ जे बाल्मीकि ते व्यास होरें गी उनें दोषें दा पता नई हा । ए दोष होरने गी पता हे ते ते बाल्मीकि ते व्यास होरें उन्दा समाधान कीता ऐ । ए कथां नेइयां कला पूर्ण ढंगे कन्ने दस्सी दियां न, खामियां इस चाल्ली वर्णन कीती दियां न, जे उन्दा वर्णन गै अपना असर दस्सी ओड़दा ऐ । खामियें आलियां गल्लां पढ़ने आलें दे मनै गी खूब कचोटदियां न, ते उनें गी सावधान करदियां न जे गल्लियां करगेओ तां तुसेंगी बी इयां गै बिपतां भोगनियां पौडन । ओ मनै इच नम्मर भाव पैदा करदियां न, समझने दी बुद्धि दिन्दियां न ते परमात्मा उपपर भरोसा करने गी प्रेरित करदियां न । परमात्मा दी गै किरपा होऐ तां मनुक्ख सम्भलदा ऐ ।

अज्ज सिनेमें इच बी मता भैड़ ते चरित्तर हीनता गै दसदे न । सिनेमें दे पक्खपाती भायें जिन्नियां मरजी दलीलां देन पर ए गल्ल ते पक्की ऐ जे बुराई गी बड़े शैल तरीके कन्ने सिनेमें इच पेश कीता दा हुन्दा ऐ । ओ तरीका मनै उपपर असर करदा ऐ ते मन बुराई पासै द्रौड़दा ऐ । पुराणें च इस चाली गल्ल नई । पुराणें इच ईऐ नेइयां कथां जरूर न जिन्दे थमां पता लगदा ऐ जे बड़े लोक बी खुञ्जदे न, गल्लियां करदे न, पर ए सब किश दस्सने दा अथ ए हुन्दा ऐ जे लोक बुराई नई करन । बुराई पासै नई जान । पुराणें इच ते जोके सिनमें इच इऐ फर्क ऐ । पुराण लिखने आले ते सिनमा बनाने आलें वे चरित्तरै इच इन्ना गै फर्क ऐ ।

“तुस ते साढ़े दौनें गित्तै इक्कै नेए ओ । अऊं बी ऊऐ नेआ आं जनेए पाण्डव न । तुस मेरी सहायता करो ।”

दुर्योधन आखन लगा ।

शल्य होरें आखेया :—खरा । इयां गै सेई ।

दुर्योधन दी खातरदारी कन्तै खुश होइऐ शल्य नै पाण्डवें दा साथ छोड़ी ओड़ेया । हालां के हक्क पाण्डवें दा हा । ओदा प्यार ते मान पाण्डवें गित्तै होना चाही दा हा । पर शल्य नै दुर्योधन दी बक्खी लड़ना मन्नी लैत्ता । राजे दी खातरदारी बड़ी खतरनाक हुन्दी ऐ । ए बड़ियां खतरनाक गल्लां कराई ओड़दी ऐ ।

शल्य होरें सोचेया हुण आये देयां युधिष्ठिर गी मिली गै चलचै । उस दुर्योधन गी आखेया—“जकीन रखेयां । में तुगी बचन दित्ता ऐ । उसी तोड़ चाढ़ड़ । पर अऊं युधिष्ठिर गी दस्सी आवां जे में के करी ओड़ेया ऐ ।

दुर्योधन आखन लगा—जाओ, मिली आओ पर तौले गे परतीई आवेयो । ते मिगी दित्ता दा बचन नईं भुल्लेओ ।

“थुआड़े भाग खरे न । तू हुण अपने मैहलें जा । अऊं तुगी धोखा नईं देड ।” ए आखियै शल्य उपप्लव्य नगरी गी गेया जित्थें युधिष्ठिर होर ठहरे दे हे ।

पाण्डवें मद्र दे राजे शल्य हुन्दा बड़ा स्वागत कीता । नकुल ते सहदेव हुन्दे पैर गै नईं भुजा पौन । ओ इन्नै खुश होए । उन्दा मामा आया हा । उनें अपने सारे कष्ट ते मुसीबतां सनाइयां जेड़ियां उनें भोगियां हियां । जिसलें उनें आखेया जे औने आले जुद्ध इच तुसें मदत करनी ऐ तां शल्य होरें सारी गल्ल सनाई जे कियां में दुर्योधन दी मदत करना मन्नी ओड़ेया ऐ । बचन करी ओड़ेया ऐ । युधिष्ठिर होरें सोचेया असें गल्ल गै सोचेया हा जे इनें साढ़ी मदत करनी गै । दुर्योधन ते इत्थें असें गी मात देई गेया । दुआस ते बड़े होए पर फी बी युधिष्ठिर होरें शल्य गी आखेया—“तुस बड़े बीर ओ । तुसें दुर्योधन गी बचन दित्ता ऐ तां पालना गै । तुस ते कृष्ण जी बरोबरी दे महारथी ओ । जिसलै कर्ण नै अर्जुनै उप्पर मारु हमला करना ऐ उसलै उस तुसें गी अपना सारथि बनाना ऐ ।

हुण के अर्जुन तुन्दे कारणै मरोग ? जां उसी कुसै चाली बचागेओ ?
 अऊं तुन्दे कशा ए गल्ल कियां मंगां । फी बी मंगना । शल्य नै
 उत्तर दित्ता :—बेटा ! दुर्योधनै मिगी धोखा दित्ता ते बचन लेइ लेया
 ऐ । अऊं तुन्दे बरुद्ध जुद्ध करड । पर जिसलै कर्ण अर्जुनै उप्पर
 चढ़ाई करग ते अऊं जेकर ओदा सारथि बनेया तां अऊं ओदा
 हौसला ढाई ओड़ड ते अर्जुन बची जाग । तूं डर नईं । जेड़ियां
 मुसीबतां ते बेज्जतियां द्रोपदी गी ते तुसें गै जरनियां पेइयां न उन्दा
 बदला चुक्की जाग । शेकड़ भाग थुआड़े गै खुल्लने न । जे किश
 बिद्धमाता नै लिखेदा सो पक्क होना ऐ । उसी कोई टाली नईं
 सकदा । में गलती करी बैठं । अम्मी पशता करनां तुस बी
 पशताओ । हुण जरने सवा चारा कोई नईं ।

०००

वृत्र

त्रैलोकी दे राजा इन्द्र गी इक बारी मानै दी नेई खमारी चढ़ी जे ओ देवतें आलें मिलनसारी दे तौर तरीके ग भुल्ली गया । देवते बड़े नम्मर ते मिलनसार हुन्दे आये न । देवतें दे गुरु बृहस्पति होर इन्द्र दी सभा इच आये । ओ सारे इलमें दे जानकार ते सारे देवतें ते असुरें दे पूजन जोग ते मन्नन थार हे । पर मस्ते दा इन्द्र अपने आसना उप्परा नई उठ्ठेया । उस गुरु हुन्दा स्वागत नई कीता । उनें गी बौने गित्तै बी नई आखेया । कोई शिष्टाचार नई दस्सेया । उसी किश बहम होई गया जे ओ देवतें दा राजा ऐ । कोई बी आई जा उसी उठ्ठने ते सत्कार करने दी कोई लोड़ नई । ओ सारें दा मन्नन थार ऐ । इन्द्र दे नरादरै करी बृहस्पति होरें गी बड़ा क्लेश होआ । उनें सोचेया इसी धनै मान्नै दा घमण्ड होई गया ऐ इसकरी चुप चपीते सभा दा टुरी गे ।

देवतें दे गुरु हुन्दी मजूदगी बगैर इन्द्र दी सभा बेनूर होई गई ।

ओदी ओ शान गै नईं रई । इयां गै लल्लू पञ्जुएं दा टोला जन बनी गया ।

इन्द्र नै अपनी गलती मसूस कीती ते डरेया जे गुरु हुन्दी ऋराजगी करी कोई विपता औग । उस सोचेया औ गुरु हुन्दे चरण बन्दिऐ माफी मंगी लैनां । ते सुलह करी लैनां । पर ए गल्ल होई न सकी । बृहस्पति होर रोहै इच लोप होई गेदे हे । हुण इन्द्र राजे दा मन घाबरेया । ओदी शगती खीन होन लगी । असुरें दा बल बदन लगा । ब्रह्मा होरें गी देवतें दी दीन दशा उणर तरस आया । उनें सलाह दित्ती तुस अपना नमां गुरु धारी लौ ।

उनें आखेया—तुसैं इन्द्र दी गलती कारण बृहस्पति होरें गी मुहाई ओड़ेया ऐ । हुण तुस त्वष्टा दे पुत्तर विश्वरूप हुन्दे कश जाओ ते उस महात्मा गी बेनती करो जे ओ तुन्दे गुरु बनी जान । फी तुन्दा सब किश ठीक होई जाग ।

देवतें गी किश हौसला होआ । ओ चढ़दी उमरै दे विश्वरूप हुन्दे कोल गे ते बेनती करिए आखन लगे—तुसैं लौकी बरेसै इच गै बेद पढ़ी लैते देन । तुस पूर्ण बिदवान ओ । तुस साढ़े गुरु बनी जाओ, ते साढ़ा मान बदाओ ।

देवतें दे चंगे भाग हे । विश्वरूप होर मनी गे । उन्दी सिखेया ते सलाह कन्ने देवते असुरें थमां हार खाने थमां बची गे ।

विश्वरूप हुन्दी मा असुरें दे कुलै दी ध्यान ही । इस करी इन्द्र गी विश्वरूप हुन्दे उपर किश शक्क होन लगा । इन्द्र डरेया जे मौरी दे कुलै भूजब होई सकदा ऐ जे विश्वरूप होर देवतें दे पक्के बफादार नईं होन । वल्लें २ उन्दा शक्क डूंगा गै हुन्दा गया ।

देवते दे शत्रुएं दे कुलै दा दोत्रा होने करी ओदा शक्क बदसा गया ते उस अपनिएं अप्सरें कशा विश्वरूप गी चरित्तर हीन करने दे जतन गुरु करी दित्ते । पर विश्वरूप होर ओदियें अप्सरें दे हत्थ नईं चढ़े । ओ जती सती महात्मा युवक हे । इन्द्र दियां अप्सरां उन्दा मन नईं डगाई सकियां । ओ अपने ब्रह्मचर्य ब्रतें

उप्पर पक्कै कैम रे । जिसलै इन्द्र नै दिक्खेया जे इयां फसाने दे जतन सफल नईं होए तां उस खतरनाक सोच सोची जे इसी बड्डी गे ओड़ो । उस अपने बज्जर कन्ने विश्वरूप होरें गी जियें मारी ओड़ेया ।

इन्द्र दे इस पापै दा फल सारी दुनियां गी भोगना पेया । लोक सनांदे न जे धरती दा कल्लरी होई जाना, ते फसल पैदा नईं करने जोग बनी जाना इससै पापै दा दोष ऐ । जनानिएं गी शरीरक कष्ट होंने ते उन्दा शुद्ध नईं रौना बी इससै कुकर्म दा फल ऐ । पानी इच भग्ग दे बुलबले होना बी इससै पापै दा नतीजा ऐ ।

त्वष्टा होरें गी बड़ा रोह चढ़ेया । उनें गी बड़ा गम होआ । इन्द्र नै एड़ा जुलम कीता जे उन्दा पुत्तर मारी ओड़ेया । उने मौती दा बदला लेने दी ध्याई । उने जग कीता । जगै दी अग्नि बिच्चा इन्द्र दा जान्नी दुश्मन वृत्र पैदा होआ । उसी उनें इन्द्र दे बिरुद्ध भेजेया । आखन लगे—“तू इन्द्र दा शत्रू एं । परमात्मा करै थुआड़ा बल बधै ते तू इन्द्र गी जियें मारी ओड़ै ।”

इन्द्र ते वृत्र दम्यानि बड़ा भारी जुद्ध लग्गी पेया । वृत्र जितदा गया । जिसलै इन्द्र हारण लगा तां देवते ते ऋषि किट्टे होइयै भगवान बिष्णु दी शरण गे । भगवान नै उनें गी दलासा दित्ता—डरो नईं । अऊं इन्द्र दे बज्जरै इच पर्वेश करी जाड । ते शेकड़ ओ लड़ाई इच जित्ती जाग ।

देवतें दे रुआं फिरे ते ओ खुश होए दे परतोए । ओ वृत्र कोल गे ते उसी आखन लगे—तू इन्द्र कन्ने सुलह करी लै । तुस दवें जोरै इच बरोबरी दे ओ ।”

वृत्र आदरै कन्ने आखन लगा—हे शुद्ध देवता लोको । इन्द्र ते अऊं कियां मित्तर बनी सकने आं ? मिगी खिमा करो । अस इन्द्रासनै गित्तै लड़ा करने आं । दोऐ बरोबरी दे आं । इक तलवारी इच दौ म्यानां कियां कट्टियां रेई सकदियां न ।

ऋषि लोक आखन लगे—तुस शक्क नईं करो । दो शुद्ध

ओदी ओ शान गै नईं रई । इयां गै लल्लू पञ्जुएं दा टोला जन बनी गया ।

इन्द्र नै अपनी गलती मसूस कीती ते डरेया जे गुरु हुन्दी नराजगी करी कोई विपता औग । उस सोचेया औ गुरु हुन्दे चरण बन्दिए माफी मंगी लैनां । ते सुलह करी लैनां । पर ए गल्ल होई न सकी । बृहस्पति होर रोहै इच लोप होई गेदे हे । हुण इन्द्र राजे दा मन घाबरेया । ओदी शगती खीन होन लगी । असुरें दा बल बदन लगा । ब्रह्मा होरें गी देवतें दी दीन दशा उपर तरस आया । उनें सलाह दिती तुस अपना नमां गुरु धारी ली ।

उनें आखेया—तुसैं इन्द्र दी गलती कारण बृहस्पति होरें गी मुहाई ओड़ेया ऐ । हुण तुस त्वष्टा दे पुत्तर विश्वरूप हुन्दे कश जाओ ते उस महात्मा गी बेनती करो जे ओ तुन्दे गुरु बनी जान । फी तुन्दा सब किश ठीक होई जाग ।

देवतें गी किश हौसला होआ । ओ चढ़दी उमरै दे विश्वरूप हुन्दे कोल गे ते बेनती करिए आखन लगे—तुसैं लौकी बरेसै इच गै बेद पढ़ी लैते देन । तुस पूर्ण बिदवान ओ । तुस साढ़े गुरु बनी जाओ, ते साढ़ा मान बदाओ ।

देवतें दे चंगे भाग हे । विश्वरूप होर मनी गे । उन्दी सिखेया ते सलाह कन्ने देवते असुरें थमां हार खाने थमां बची गे ।

विश्वरूप हुन्दी मा असुरें दे कुलै दी ध्यान ही । इस करी इन्द्र गी विश्वरूप हुन्दे उपर किश शक्क होन लगा । इन्द्र डरेया जे मौरी दे कुलै मूजब होई सकदा ऐ जे विश्वरूप होर देवतें दे पक्के बफादार नईं होन । वल्लें २ उन्दा शक्क डूंगा गै हुन्दा गया ।

देवते दे शत्रुएं दे कुलै दा दोत्रा होने करी ओदा शक्क बदश गया ते उस अपनिएं अप्सरें कशा विश्वरूप गी चरित्तर हीन करने दे जतन गुरु करी दिते । पर विश्वरूप होर ओदियें अप्सरें दे हत्थ नईं चढ़े । ओ जती सती महात्मा युवक हे । इन्द्र दियां अप्सरां उन्दा मन नईं डगाई सकियां । ओ अपने ब्रह्मचर्य ब्रतें

उप्पर पक्कै कैम रे । जिसलै इन्द्र नै दिक्खेया जे इयां फसाने दे जतन सफल नईं होए तां उस खतरनाक सोच सोची जे इसी बड्डी गे ओड़ो । उस अपने बज्जर कन्ने विश्वरूप होरें गी जियें मारी ओड़ेया ।

इन्द्र दे इस पापे दा फल सारी दुनियां गी भोगना पेया । लोक सनांदे न जे धरती दा कल्लरी होई जाना, ते फसल पैदा नईं करने जोग बनी जाना इससै पापे दा दोष ऐ । जनानिएं गी शरीरक कष्ट होंने ते उन्दा शुद्ध नईं रौना बी इससै कुकर्म दा फल ऐ । पानी इच भग्ग दे बुलबले होना बी इससै पापे दा नतीजा ऐ ।

त्वष्टा होरें गी बड़ा रोह चढ़ेया । उनें गी बड़ा गम होआ । इन्द्र नै एड़ा जुलम कीता जे उन्दा पुत्तर मारी ओड़ेया । उने मौती दा बदला लेने दी ध्याई । उने जग्ग कीता । जग्गै दी अग्नि बिच्चा इन्द्र दा जान्नी दुश्मन वृत्र पैदा होआ । उसी उनें इन्द्र दे बिरुद्ध भेजेया । आखन लगे—“तू इन्द्र दा शत्रु एं । परमात्मा करै थुआड़ा बल बधै ते तू इन्द्र गी जियें मारी ओड़ै ।”

इन्द्र ते वृत्र दम्यानि बड़ा भारी जुद्ध लगगी पेया । वृत्र जितदा गया । जिसलै इन्द्र हारण लगा तां देवते ते ऋषि किट्टे होइयै भगवान बिष्णु दी शरण गे । भगवान नै उनें गी दलासा दित्ता—डरो नईं । अऊं इन्द्र दे बज्जरै इच पर्वेश करी जाड । ते शेकड़ ओ लड़ाई इच जित्ती जाग ।

देवतें दे रुआं फिरे ते ओ खुश होए दे परतोए । ओ वृत्र कोल गे ते उसी आखन लगे—तू इन्द्र कन्ने सुलह करी लै । तुस दवें जोरै इच बरोबरी दे ओ ।”

वृत्र आदरै कन्ने आखन लगा—हे शुद्ध देवता लोको । इन्द्र ते अऊं कियां मित्तर बनी सकने आं ? मिगी खिमा करो । अस इन्द्रासन गित्तै लड़ा करने आं । दोऐ बरोबरी दे आं । इक तलवारी इच दौं म्यानां कियां कट्टियां रेई सकदियां न ।

ऋषि लोक आखन लगे—तुस शक्क नईं करो । दो शुद्ध

आत्मां कट्टे होई सकदे न । ते उन्दी मित्तरता बी पक्के पैरें होई सकदी ऐ ।

वृत्र मन्त्री गया । आखन लगा—खरा अऊं लड़ाई बन्द करी ओड़ड । पर मिगी इन्द्र उप्पर बिन्द बसाह नई । ओ माढ़े उप्पर चानचक्क गै आई पवै । पर मिगी ए बर देओ जे इन्द्र मिगी मारी नई सकै । न दिनें न रातीं, न सुक्के हथ्यारें कन्नें, न गिल्ले हथ्यारें कन्नें, न बट्टे कन्नें न लक्कड़ी कन्नें न कुसे धातें कन्नें ते न तीरें कन्नें । ओ मिगी मारी नई सकै ।

ऋषियें ते देवतें 'तथास्तु' आखी दित्ता । लड़ाई बन्द होई गई । पर वृत्र दे डर सच्चे निकले । इन्द्र उप्परा ते दोस्ती दा पज्ज करदा रेआ । पर बिच्चो बिच्च वृत्र गी मारी ओड़ने दा मौका ताड़दा रेआ इक दिन सत्रा बेल्लै इन्द्र गी वृत्र नदी कण्डै लब्बा । इन्द्र नै भुस मुसी लोई इच वृत्र उप्पर हमला करी दित्ता ।

बड़ा चिर जुद्ध हुन्दा रेआ । वृत्र नै भगवान बिष्णु दी स्तुति कीती ते इन्द्र गी आखेया—तू ते नीचे थमां बी नीच ए । थुआड़ा बज्जर अचूक शस्तर ऐ । उसी की नई चलान्दा ? ओदे इच भगवान बिष्णु दा बास ऐ । ओ चला भगवान बिष्णु हत्था मरियै माढ़ा कल्याण होऐ ।

इन्द्र नै वृत्र दा सज्जा हत्थ वड्डी ओड़ेया । वृत्र नई डरेया उस अपने खब्बे हत्थै कन्नें अपना लोहे दा गुर्ज चलाया । इन्द्र नै खब्बी बांह बी वड्डी ओड़ी । वृत्र नै मुंह बाकेया ते इन्द्र गी निंगली ओड़ेया । जिसलै इन्द्र लोप होई गया तां देवते बड़े घाबरे ।

पर इन्द्र मोआ नई हा । उस वृत्र दा ढिड्ड पाड़ी ओड़ेया ते बाहर निकली आया । ओ नदी कण्डै गया । उस पानी उप्पर अपना बज्जर चलाया पानी दी चादर वृत्र गी बज्जी । भगवान बिष्णु पानी दी भगै इच पर्वेश करी गे दे हे । ओ पानी दी चादर मारु चादर बनी गई । ते वृत्र मरी गया ।

ए लम्मी ते चरोकनी लड़ाई मुक्की । दुनियां नै रमानै दा

साह लेया । पर इन्द्र गी ते शड़ी बदनामी गै थोई ओदी जित्त धोखे ते फरेबै करियै होई ही । उसी बड़ी शर्म आई ते ओ छप्पी गया ।

इन्द्र दे छपन होने करी देवते ते ऋषियें गी बड़ा कष्ट होन लगा । की जे बिना राजा ते बजीरें दे सरकार नईं टुरदी, ते न गै लोकें गी सुख थोन्दा । न उन्नति हुन्दी । ओ राजा नहुष कोल गये । राजा नहुष बड़ा बलवान ते नेक राजा हा । उसी राजा बनाई लैता । ओ बड़ी हलीमी कन्नै आखन लगा—मिगी खिमा करो । अऊं थुआड़ा राजा नईं बनी सकदा । औं इन्द्र हुन्दा सिंहासन साम्बने जोग कुत्थें होई गेया । अऊं थुआड़ी रक्षा कियां करड । ए कम्म नईं होई सकदा ।” पर देवते ते ऋषि जोर लान लगे—तुस की पिछड़े हुन्दे ओ ? अस तुसैं गी राजा बनाने आं । साढ़े गुण ते साढ़ा तपोबल थुआड़ी सहायता करडन । थुआड़ा बल होर बदग । तुस जिसी बी दिखगेओ ओदा बल बी तुन्दे इच आई जाग । तुसैं गी कोई नईं जित्ती सकग । जिसलै सारें गै जोर लाया तां नहुष होर मन्नी गे ।

राजै दी तब्दीली होई जाना कोई नमीं गल्ल नईं । इस कहानी थमां ते ए पता लगदा ऐ जे देवतें दी दुनियां इच बी क्रान्ति हुन्दी ही । दिक्खो इन्द्र गी सिंहासन छोड़ना पेया ते देवतें नहुष गी ओदी थां राजा बनाई लैता ।

राजा नहुष दा कियां पतन होआ ए कथा बी बड़ी सबक देने आली ऐ ।

०००

नहुष

वृत्र गी बेन्याई कन्ने मारने दा दोस लगा ते इन्द्र गी देवतें दी राज गद्दी थमां उतरना पेया ते कुतै जाइयै छप्पना पेया । उन्दे थार राजा नहुष देवतें दी राज गद्दी उपपर बेठे ।

नहुष होरें पृथ्वी दा राज कीता दा हा । गुण हे, योग्यता ही, नां हा कम्म ठीक चली पेया ॥ पर फी उन्दे बी बुरे ध्याढ़े आये । उनें देवतें दी राजगद्दी ते सम्हाली पर किश मस्ती गे । ओ धीनगी ते नम्मरता लोप होई गई ते मनमानियां करन लगे ।

नहुष होर सुर्गे दै भोग बलासे बिच डुब्बी गे ते हर बेल्लै कामवासना दे बचार गै उन्दे मनै इच औन लगे । इक दिन उनें कुतै राजे इन्द्र दी रानी गी दिक्खी लैता बस मोहित होई गे । उसी प्रापत करने गित्तै आत्तर होई गे ते दर्बारे इच किट्टे होए दे देवतें गी हुकम देन लगे—“के गल्ल ऐ, इन्द्र दी रानी—शची हजे तोड़ी मेरे कच्छ कियां नई आई ? हुण में देवतें दा राजा आं । उसी तौले माढ़े मैह्लें इच भेजो ।”

जिसलै इन्द्र दी रानी गी ए गल्ल पता लगगी तां उसी बड़ा रोह चढ़ेया । किश डरी वी, सहमी दी बृहस्पति हुन्दे कछ गेई ते आखन लगगी—हे गुरु जी, मिगी इस दुष्ट कोला बचाओ । बृहस्पति होरें उसी हौसला दित्ता ते रखेया कीती ।

आखन लगे—डर नई । देवराज इन्द्र तौले गै परतोने आले न । तू मेरे कोल रौ । थुआड़ा पति हुण औने गै आला ऐ ।

जिसलै नहुष गी पता लग्गा जे शची नै नुआढ़ी गल्ल नई मन्त्री ते कन्नै ओ बृहस्पति उन्दी शरण गेई उठी ऐ तां ओ बड़ा तमशेया ते रोहें होआ ।

सारे देवता राजे दे रोहै थमां डरी गे । पर उनें राजे दी गल्ला दा बरोध कीता ते आखन लगे—हे महाराज, तूस रोहें नई होवो । तुन्दे रोहै करी सारी दुनियां गी दुखी होना पौग ।

शची देवी पराई औरत ऐ ओदी ताड नई करो । धर्म दे रस्तै दा नई खुज्जो ।

पर नहुष ते कामबासना इच अन्ना होआ दा हा । उस उन्दी गल्लै उप्पर ध्यान नई दित्ता । सडो तान्ना मारिए आखन लगा—जिसलै इन्द्र नै अहल्या गी पतारेया उस बेल्लै तुन्दे धर्म दे सिद्धान्त ते सदाचार कुथें गया उठी हा ? तुसें उसी की नई हा ठाकेया ? मिगी की ठाकदेओ ? जिसलै उस कुसै धर्म दी पवाहि नई कीती ते बिरवरूप गी बड्डी ओड़ेया उसलै तुसें के कीता ? हुन तुसें गी बड़ा सदाचार ते भौ लब्बा करदा ऐ उसलै ए सदाचार ते भौ कुथें हा जिसलै इन्द्र नै बृत्र गी धोखे कन्नै मारेया ? शची देवी आस्तै इक्कै रस्ता ऐ जे ओ आइऐ मेरे कोल रव । तुन्दी भलाई वी इस्सै इच ऐ जे तूस उसी मेरी गल्लै उप्पर राजी करी लौ । ते उसी मेरे कोल छोड़ी जाओ । इस करी तूस हुणै जाओ ते मेरा हुकम तोड़ चाढ़ो । देवते डरी गे उनें सोचेया—बृहस्पति हुन्दे कन्नै जाइयै बचार करनेआं । ते जिआं कियां शची देवी गी नहुष कोल लेई औनेआं । ओ बृहस्पति हुन्दे कोल गे ते जेकिश नहुष नै आखेया हा—सारी गल्ल

सनाई । ते कन्नै आखेया जे शची देवी नहुष दी गल्ल मन्नी लै तां खरी गल्ल ऐ ।

शची देवी ए सुनियै शरमै कन्नै भुजां गडोई गेई । ते डर कन्नै कम्बन लगी—हे परमात्मा ए अनहोनी की होन लगी ऐ ? हे ब्राह्मण देवता अऊं थुआड़ी शरण आई आं । मेरी रखेया करो । मिगी बचाओ ।

बृहस्पति होरें उसी दलासा दित्ता ते आखन लगे—जेड़ा कुसै गी शरणै इच लेइयै उसी धोखा देऐ ओदा सर्वनास होई जन्दा ऐ । ऐसा मानू धरती इच बी रा तां ओ नईं जमदा ।

अऊं तुगी खज्जल नईं होन देड । नहुष दी मृत्यु कोल आवा करदी ऐ । हुण तूं डर नईं । उन्नै बचा दा तरीका दस्सेया जे परमात्मा दा भजन कर । शची गल्ल समझी गेई ते नहुष दे मैह्लें गई उठी ।

जिसलै नहुष नै उसी दिक्खेया कामवासना ते अभिमानै उसी अन्ना करी ओड़ेया । ओ खुशी कन्नै पागल होन लगा । ओ अपने इच समीन नईं लगा—आखन लगा हे सुन्दरी ! तूं की कम्बनी एं ? अऊं त्रिलोकी दा नाथ आं । तूं मेरी लाड़ी बनी जा एदे इच कोई दोष नईं ।

उस बदमाशै दे शब्द सुनिए पहलें ते शची बिन्दक कम्बी । फी किश अपने आपै गी साम्बिए आखन लगी—थुआड़ी रानी बनने थमां पहले इक मेरी प्रार्थना ऐ । मिगी दस्सो जे इन्द्र देव जीन्दे न जा नईं ? जे ओ जीन्दे न तां ओ कुत्थें न ? जे पता थौ लाइयै ते तुप्पी तप्पियै ओ मिकी नईं लबदे तां फी मेरा कोई दोस नईं । मिगी कोई पाप नईं अऊं थुआड़ी रानी बनी जाड । मेरे मनै इच कोई खतोला नईं रोग ?

नहुष आखन लगा—तूं जे किश ग्लाय़ा ऐ सो ठीक ऐ । जा, उसी तुप्प । ते चेतै कन्नै परतोई आवेंयां । जे बचन कीत्ता ई सो पूरा करेयां । उसी तोड़ चाढ़ेयां । ए आखियै उस शची गी बृहस्पति हुन्दै डेरै भेजी ओड़ेया ।

देवता लोक भगवान् विष्णु कोल गे ते नहुष दी शकैत करन लगे महाराज ए तुन्दी शक्ति ही जिस वृत्र गी मारेया पर एदा पाप इन्द्र गी भोगना पवा दा ऐ । ओ बचारा शर्मसार होआ दा कुसै गी मुंह दस्सने जोगा नई रेदा । बचारा छपदा फिरदा ऐ । ओदा इस पाप थमां मुक्ति दा कोई लाज दस्सो । नारायण बोले—उसी आखो मेरा जप करै । ओदे पाप खीन होई जाडन । ते दुष्ट नहुष तौला गै नष्ट होई जाग ।

शची देवी नै पवित्तरता दी देवी दी बन्दना कीती ते ओदी किरपा कन्नै उत्थै जाई पुज्जी जित्थै इन्द्र देव इक परमाणु दा रूप धारियै कमल डण्डी दे रेशे इच बड़िऐ मानसरोवरै इच तपस्या करै दे हे ते भले मौके दा इन्तजार करै दे हे । शची देवी अपने पति दी दशा दिक्खियै फुट्टी पेई ते रोन लग्गी । उस अपनी सारी विपता सुनाई ।

इन्द्र नै उसी दलासा दित्ता । नहुष दा अन्तकाल कोल आवा करदा ऐ । तूं आपूं उसी जाइऐ आख जे मिगी थुआड़ी गल्ल मनजूर ऐ । अऊं तुन्दे कन्नै ब्याह करी लैड । तुस पालकी इच चढ़िऐ मेरे मैह्लै इच आई जाओ । पर उस पालकी गी महात्मा लोक चुक्कन । ईआं नहुष दा अन्त होई जाग ।

शची नहुष कोल गई ते जियां इन्द्र नै दस्सेया हा ऊंआं गै उसी आखन लगी—इयां पज्ज करन लगी जियां मन्त्री गै गई होऐ । नहुष बड़ा पसोआ जे ए आपूं गै मन्त्री गई ऐ ते आई बी गई ऐ । ओ ते भलेयां गै बुद्धू बनी गया, आखन लगा—अऊं ते थुआड़ा दास आं । ते तूं जे किश आखगी अऊं करड । तूं अपने बचनै दी सच्ची ऐ ।

ओ आखन लगी—दिक्खी लौ अऊं परतोई आई आं । हुण तुस माढ़े पति बनी जागेओ । इक गल्ल करो मेरी बड़ी गै मरजी करैदी ऐ । तुसते त्रीणें लोकं दे स्वामी ओ । मेरी ए मरजी ऐ जे तुस माढ़े मैहलें आओ पर इयां जियां विष्णु शिव ते महा असुर बी कद सौहरै नई गे होन । तुन्दी पालकी चुकने गी सत्त ऋषि

लगने चाही दे न । जिस लै सत्त ऋषि तुन्दी पालकी चुक्कियै औडन तां तुन्दा स्वागत करड ते खातर करड ।

नहुष गल्लें इच आई गया । आखन लगा—कमाल बचार ऐ । थुआढ़े सोचने दा ढंग कमाल ऐ । मेरा ते जी खुश होई गया ऐ ।

ए ठीक ऐ जे सत्त महर्षि मेरी पालकी चुक्कन । अऊं जिसी बी दिक्खां उस्सै माढ़ा कम्म करना चाही दा ऐ । अऊं ऊआं गै करड जियां तूं आखेया ऐ । तूं हुण घर जा । उस कामवासना इच मत्तू होए दे नहुष नै सत्तें ऋषिएं गी सद्देया ते आखन लगा मिगी पालकी इच चुक्की लई चलो । ए ऋषिएं दा बड़ा भारा अपमान हा । त्रिलोकी कम्बी उठी । पर जिसलै ओ पालकी चुक्कियै लेई चले तां विधना नै किश होर मिथेया । ओ शची दे बचारें इच डुब्बा दा हा । ओ मिगी बल्गा करदी होग । काम-वासना इच मस्त ओ बड़ा काह्ला पौन लगा जे अऊं झट्ट शची कोल पुज्जां । ऋषिएं गी आखें तौले चलो । ओ इन्ना काह्ला पेया जे पालकी इच लग्गे दे अगस्त्य ऋषि गी टोकी गया ते आखन लगा “सर्प सर्प ।” हुण सर्प सर्प मँने हुन्दा ऐ चलो चलो ते सर्प सर्प दा अर्थ ऐ जे सप्प फिलडर । ओ कामवासना इच इन्ना अन्ना होए दा हा जे ओदे पापें दा घड़ा भरोची गया । ऋषि गी बड़ा क्रोध चढ़ेया ते उनें श्राप दिता हे नीचें थमां नीच । तूं सप्प बनी जा ते धरती उपपर चली जा ।

भट गे नहुष सिरै दे भार सुर्गा दा भुआ पेया । ते अजगर बनी गया । कई हजार साल बीती गे उस जोनी इच । ते फी मसां खलासी होई ।

इन्द्र गी परतिऐ देवतें दी राज गद्दी थोई गई । ओ परतिऐ देवतें दे राजा बनी गे । शची दा संकट बी दूर होआ । बचारी दी बिपता मुक्की ।

पाण्डवें दा मामा शल्य उपप्लव्य तीर्थें उपपर युधिष्ठिर गी ते

द्रोणदी गी इन्द्र ते शची दी विपता दी कथ सुना दे हे । ते उनें गी दम दलासा देया करदे हे । जेड़ा सबर करे जित्त उसे दी हुन्दी ऐ । जेड़े धन पाइयै मान पाइयै, मस्ती जन्दे न ओ तौले गै नष्ट होई जन्दे न । तुसें, थुआड़े भ्रायें, ते द्रोणदी नै इन्द्र ते शची आङ्कू बड़े कष्ट भोगे न । तुन्दे कष्ट मुक्कने आले न । तुसें गी अपना राज वापस थोई जाग । दुष्ट कर्ण ते दुर्योधन नहुष आङ्कू नष्ट होई जाने न ।

०००

राजदूत सञ्जय

पाण्डव राजा बिराट हुन्दे राज्जे इच उपप्लव्य थां उप्पर रवा करदे हे । उत्थुआं उनें सारे मित्तर राजें गी दूत भेजे । चवक्खी देसा दा फौजां औनियां शुरु होइ गइयां । पाण्डवें कोल कोई सत्त अक्षोणी फौज होई गई । कौरव बी इयां गै करा करदे हे उनें कोई बारां अक्षोणी फौज किट्ठी करी लैती ।

जियां अज्ज कल वक्खरे दल मलाइयै इक डिविजन बनदी ऐ इयां गै कई भाग किट्ठे करिये अक्षोणी बनदी ही ।

उनें दिनें इक अक्षोणी सैना इच २१८७० रथ हुन्दे हे इन्ने गै हाथी, त्रीने घोड़े ते पंज गुणा प्यादे हुन्दे हे । उन्दे कोल लड़ाई दा सारा सम्यान हुन्दा हा ते सब्बै चाली दे अस्तर शस्तर हुन्दे हे । जियां जोकियां गड्डियां न इयां रथ हुन्दे हे ते जोके टैंक जदुआं दे हाथी समझी लौ ।

राजे द्रुपद हुन्दा ब्राह्मण राजदूत धृतराष्ट्र हुन्दे दर्बारै इच
महाभारत

आया । दर्वारें दियां राहरीतां पूरियां करियै ते सुख सान्द पुछी गिच्छियै उस पाण्डवें पासेया बोलना शुरु कीता—

“धर्म आदि काल थमां चलदा आवैं दा ऐ, ते धर्मैं दी अपनी सत्ता हुन्दी ऐ । तुस सारे ए जानदे ओ । तुसैं गी खास ए दस्सने दी लोड़ नई । धृतराष्ट्र ते पाण्डु दवैं विचित्रवीर्य हुन्दे पुत्तर न । ते परस्परा मूजब दौनैं दा अपने बन्वै दी जादाती उप्पर बरोवरी दा हक्क ऐ । ए गल्ल भलेयां जानदे होई बी धृतराष्ट्र दे पुत्तरें सारा राज खुस्सी लैता दा ऐ ते साम्बी लैता ऐ । पाण्डु दे पुत्तरें गी अपनी जद्दी जादाती बिच्चा कोई हिस्सा नई थोए दा । इस बेन्याईं गी कियां ठीक आखन हुन्दा ऐ । पाण्डव बी कुरु बँसैं दी लुआद न । ओ शान्ति ते ऐमनी चान्दे न । उनें जिन्ने कष्ट भोगे उनें गी भुल्लने गी तयार न ते जेड़ियां गल्लां होई बीतियां सो बी भुल्लने गी तयार न । उन्दी मरजी जंग करने दी नई । उनें गी पता ऐ जे जग कन्ने कदें भला नई हुन्दा । तबाही गै हुन्दी ऐ । इस करी जे किश उन्दा हिस्सा ऐ उनें गी दई ओड़ो इयै न्यां ऐ ते इऐ फैसला होए दा ऐ । एदे इच चिर लाने दी कोई लोड़ नई ।”

जिसलैं राजदूतै ए प्रार्थना कीती तां बृद्ध बीर भीष्म पितामह होर बोले—“ए परमात्मा दा बड़ा धन्नबाद ऐ जे पाण्डव राजी खुशी न । उनें गी मतें राजें दी पिट्ट ऐ ते ओ लड़िये बी अपना हिस्सा लई सकदे न पर फी बी ओ जंग नई करना चान्दे । ओ हजे बी शान्ति कन्ने हल्ल चान्दे न । उनें गी उन्दी जादात परताई देना गै बिल्कुल मनासब गल्ल ऐ ।”

भीष्म हुन्दी गल्ल सुनदे गै कर्ण तमशेया, ते उस बड़े रोहै कन्ने आखेया—“हे ब्राह्मण—तू इन्ना चिर बोलेया ए । नमी गल्ल के आखी ऐ ? पीह्न् पीह्न् दा के लाह ऐ ? युधिष्ठिर नै सारी जादात जूए इच हारी ऐ । ओ जूए इच हारी दी जादात कियां मंगी सकदा ऐ ?

जे युधिष्ठिर गी किसै चीजै दी लोड़ ऐ तां मंगिए लै । बक्शीश मंगी लै । उसी राजें दी मद्दतै दा गुमान ऐ ते उस करी

अपना हक्क अखियै ते हिस्सा मंगा करदा ऐ उसी मत्स्य ते पंचाल राजें दा बड़ा मान ऐ । अऊं सिद्धी २ गल्ल सनानां जे दुर्योधन होरें धमकियें इच आइयै किश नई देना । बचनै दी गल्ल आखदे ओ तां पाण्डवें गी तेरमां बरा छप्पिऐ रौना चाही दा हा । ओ बचन भंग होई गेदा ऐ ।

उनें गी परतिऐ बारां बरे बनबास भोगना चाही दा ऐ ते फी परतिऐ औन ते हिस्सा मंडन ।”

भीष्म होर बोले—“कर्ण, मूर्ख आलियां गल्लां की करनां एं ? जे अस राजदूत हुन्दे आखे मूजव नईं मनदे तां जंग लगग ते अस जरूरी हारगे । दुर्योधन ते अस सारे नष्ट होई जागे ।”

सभा इच रौला पेई गया । ते जोश आई गया । धृतराष्ट्र होर आखन लगे—“दुनिया दी भलाई ते पाण्डवें दी भलाई सामनै रखिऐ अऊं सञ्जय गी उन्दे कोल भेजन लगां । तुस तौले परतौई जाओ ते युधिष्ठिर होरें गी सुनाओ । धृतराष्ट्र होरें सञ्जय गी सदेया ते बक्खरे समझाया । संजय, तूं पाण्डवें कोल जा, मेरा शीर्वाद उनें गी देयां कृष्ण जी, सात्यकि ते बिराट हुन्दा कुशल समाचार पुच्छेयां । ते सारे राजें गी मेरा प्रणाम अखेयां । तूं मेरे पासेया जा ते सुलह दी गल्ल बात करिऐ लड़ाई गी टाल ।”

संजय होर शान्ति दा स्नेआ लइऐ युधिष्ठिर होरें गी मिलन चले । दर्बारी गल्लां करी उरिऐ सारें सामनै युधिष्ठिर होरें गी आखन लगे—हे धर्म पुत्तर, मेरे बड़े भाग न जे अपनो अक्खीं तुसैं गी दिक्खा करनां । तुस राजें इच बैठे दे देवराज इन्द्र गै लवदे ओ । मेरा मन बड़ा पसोआ दा ऐ । धृतराष्ट्र होरें अपना सुख सान्द भेजेया ऐ ते तुन्दा सुख सान्द पुच्छेया ऐ । धृतराष्ट्र होर जुद्ध करमा नईं चान्दे । उनें गी तुन्दी मित्तरता दी लोड़ ऐ । ओ ऐमनी चान्दे न ।”

युधिष्ठिर होर ए सुनिऐ बड़े खुश होए ते आखन लगे—जे ए गल्ल ऐ तां धृतराष्ट्र हुन्दा टब्बर बची गया समझो । ऊऐ नईं अस सारे गे इक सदमें थमां बची गे समझो । अम्मी शान्ति गे

चात्रां ते लड़ाई कन्ने नफरत करनां । जे असें गी साढ़ा राज परताई ओड़न तां अस पिछलियां भोगी दियां सारियां मुसीबतां भुल्ली जागे ।”

संजय परतिऐ बोलन लगा—“धृतराष्ट्र हुन्दे पुत्तर बड़े कबुद्धि न । ओ बन्वै दी गल्ल नईं मनदे । दादे दी गल्ल नईं मनदे । उन्दी दुष्टता इच कोई फर्क नईं आये दा । पर तुस धीरज नईं छोड़ो । हे धर्मराज, तुस सदा सदाचार दी रखेया करदे ओ । आओ लड़ाई दी गल्ल गै छोड़ी देचै । लड़ाई करिऐ जित्ती दी जादाती कन्ने सुख नईं थोन्दा । अपने रिश्तेदारें गी लड़ाई इच मारिऐ राज प्रापत करी बी लैता तां के फायदा ऐ ? इस करी लड़ाई गुरु नईं करो । जेकर अस सारी पृथ्वी जिसी चवक्खी दा समुन्दरें घेरे दा ऐ जित्ती बी लैचै तामी बुढ़ेपा ते मौत जरूर गै औने न ।

दुर्योधन ते ओदे भ्रा मूर्ख न । ओ मूर्ख न इस करी तुसें सचाई दा रस्ता नईं छोड़ना चाई दा । तुसें गी धीरज नईं छोड़ना चाही दा । ओ तुसें गी राज वापस नईं बी देन तुसें गी धर्मे दा रस्ता नईं छोड़ना चाही दा ।”

युधिष्ठिर होरें जबाब दित्ता—“हे सञ्जय जी ! तुस जे किश ग्लान्दे ओ, ओ सब ठीक ऐ । सचाई साढ़ा परम धन ऐ । पर असें गी ए दस्सो जे अस गल्ल के करा करने आं ? भगवान कृष्ण हुन्दे कशा बद्ध धर्मे दी गुत्थी गी कुण सुलभाई सकदा ऐ? ओ दौने दा भला मंगदे न । जियां भगवान् कृष्ण होर आखडन मिगी मन्जूर ऐ ।”

कृष्ण होर बोले—अऊ पाण्डवें दी भलाई चानां । मेरी ए बी मरजी ऐ जे धृतराष्ट्र हुन्दे पुत्तर बी सुखी रौन । ए समस्या बड़ी ओखी ऐ । मेरा वचार ऐ जे अऊं हस्तनापुर जाइयै ए गल्ल तय करी आवां । अऊं शरतां रक्खड जे ओ कौरवें गी मन्जूर होइयां ते पाण्डवें दा किश बनदा लब्बा तां मिगी बड़ी खुशी होग । तां समझो जे में बड़ी भारी गल्ल सिद्ध करी लैती । जे शान्ति दे ढगै कन्ने पाण्डवें गी उन्दा हक्क थोई जा तां ओ धृतराष्ट्र हुन्दे सेवक

बने रौडन । उन्हें गी होर कुसै चीजै दी लोड़ नई । पर (जे उन्दा हक्क नई थोआ तां) ओ लड़ाई गित्तै बी तयार न । हुण ते दो गै गल्लां न लड़ाई ते शान्ति धृतराष्ट्र हुन्दी मरजी ऐ जे किश मरजी ऐ चुनी लैन ।”

युधिष्ठिर होरें सञ्जय गी आखियां—तुस कौरवें दे दर्वारै इच जाओ ते धृतराष्ट्र गी मेरे पासेया आखो—तुसैं किरपा कीती ते असैं गी लौके हुन्दै अपने राज्जै दा हिस्सा दुआया । तुसैं मिगी राजा बनाया हां । हुण साढ़ा हक्क नई मारो । असैं गी भखारी नई बनाओ । ए दुनियां बड़ी बड़ी ऐ । अस कौरव पाण्डव दवै इत्थें ऐमनी कन्ने रही सकने आं । साढ़े इच बैर बरोध की होऐ ? तुस मेरे पासेया धृतराष्ट्र होरें गी प्रार्थना करेओ । पितामह होरें गी मेरी चरण-बन्दना आखिये प्रार्थना करेयो जे अपने पोतरें गी ऐमनी कन्ने रौने दा उपदेश देन । इऐ स्नेआ बिदुर होरें गी देना । बिदुर होर बड़े दूरन्देस न ते ओ जरूर कोई सवील कडु लैडन ।

दुर्योधन गी बी गल्ल समझायो ते मेरे पासेया आखियो—भाई साब ! अस राज कमार हे । तुसैं असैं गी जंगलें इच खज्जल कीता । बूटे दियां ते पशुएं दियां खल्लां पुआइयां । तुसैं राजें कन्ने भरोचे दे दर्वारै इच साड़ी धर्म पत्नी गी बेज्जित कीता । असैं ए सब किश जरेया । हुण तुस इन्ना ग करो जे साढ़ा हिस्सा असैं गी दई ओड़ो । दूएँ दे हिस्से उप्पर हत्थ नई मारो । अस पंज आं । असैं गी कम स कम पंज आं दई ओड़ो । ते साढ़े कन्ने सुलह करी लौ ।

अस इन्ने उप्पर गै सन्दोख करी लेंगे । दुर्योधन गी मेरे पासेया आखो—अऊं शान्ति गित्तै तयार आं ते लड़ाई गित्तै मजबूर आं । युधिष्ठिर होर जिसलै आखी बैठे तां सञ्जय नै भगवान कृष्ण ते पाण्डवें कोला छुट्टी लैती ते हस्तनापुर परतोई आये ।

सूई दे नक्के जिन्नी धर्त नई देनी

सञ्जय गी पाण्डवें पासै टोरिऐ धृतराष्ट्र गी चिन्ता कन्ने उस रातीं नीन्दर नई पेई । उसनै विदुर गी सद्देया ते सारी रात ओदे कन्ने गल्लां बातां करदा रेआ ।

विदुर होरें आखेया—सारें कशा चंगी स्कीम ते ईऐ जे पाण्डवें गी राज्जै विचा उन्दा हिस्सा देई दित्ता जा । इस चीजै इच दौनें दी भलाई ऐ । तुसं गी पाण्डवें ते अपने पुत्तरे कन्ने इक्कै नेआ प्रेम करना चाही दा ऐ । इस सम न्यां उप्पर चलना गै अकलमन्दी दी गल्ल ऐ । विदुर होर इस चाली धृतराष्ट्र गी समझान्दे रे ।

दूऐ दिन सञ्जय हस्तनापुर परतोई आया । उन पाण्डवें दे दबारें इच जे किश गल्ल बात होई ओदी पूरी रपोट दित्ती ।

सारें कोला मुख जे किश अर्जुनै दुर्योधनै गी आखी भेजेया ओ सुनी लौ—“कृष्ण ते अऊं मिलियै दुर्योधन ते ओदे साथियें गी जड़मूलै थमां नष्ट करी देगे । एदे इच बिन्द वी शक नई समझो । मेरा गाण्डीव लड़ाई गित्त बेचैन होआ करदा ऐ । खिच्चे बिना गै

मेरे धनखे दी डोरी कम्बा करदी ऐ। तीर तरकसै इचा भांकी २ दिक्खा करदे न कुसलै जुद्ध शुरु होऐ। दुर्योधनै दे ग्रह किश मन्दे लवदे न जे ओ कृष्ण जी ते मेरे कन्ने लड़ाई स्हेडै करदा ऐ। इन्द्र ते देवता बी असैं गी हराई नई सकदे।” इयां अर्जुनै आखेया हा।

भीष्म होरें धृतराष्ट्र गी सलाह दित्ती जे कृष्ण ते अर्जुन दी किट्ठी शक्ति दा बरोध नई करो। ए कर्ण जेड़ा फड़ां मारै करदा ऐ जे अऊं पाण्डवें गी बड्डी ओड़ड ए पाण्डवें दी शक्ति दा सोलमां हिस्सा बी नई। ओदी गल्लें दा बसाह करिए थुआड़े पुत्तर ढट्टे खूऐ पासैं द्रौड़ा करदे न। जिसलै थुआड़े पुत्तरें गी विराट उप्पर हमला करने बेल्लै पाण्डवें नठाई दित्ता हा उसलै कर्ण नै के करी लैत्ता हा। जिसलै गन्धर्वें थुआड़े दुर्योधनै गी बन्दी बनाई लैत्ता हा उसलै ए लसानी जोधा कुत्थें जाई छप्पेया हा? उसलै अर्जुनै गन्धर्वें गी नई हा नठाया? इयां भीष्म होरें कर्ण गी तान्ना मारेया ते कौरवें गी चेतावनी दित्ती।

साड़े कुलै दे बडेरे भीष्म होरें जे किश आखेया ऐ सो ठीक ऐ। सारे बुद्धिमान लोक ईऐ आखा करदे न ते अऊं बी इए मन्ननां जे शान्ति रखना गै ठीक गल्ल ऐ। पर अऊं करां के? अऊं भायें लक्ख समभां ए अपनी गै अड़ी तोड़ चाढ़ने आले न।

दुर्योधन सब किश सुना करदा हा—उट्ठी खडोता, आखन लगा—पिता जी, तुस साढ़ी रखेया दी चिन्ता नई करो ते नां डरै कन्ने कम्बो। असैं गी अपनी ताकती दा पता ऐ। साढ़ी जित्त पक्की गल्ल ऐ। युधिष्ठिर बी ए गल्ल भलेयां जानदा ऐ। इस्सै करी उस सारे राजै दी हीखी छोड़िये छड़े पंज ग्रां गै मंगे न। इस्सै थमां सिद्ध होई जन्दा ऐ जे ओ साढ़ी जारां अक्षोणी सैना कोला डरी गेया ऐ।

पाण्डव साढ़ी जारां अक्षोणी सैना दा के मकाबला करी सकदे न? तुसैं गी साढ़ी जित्तै इच की शक्क ऐ? दुर्योधन ए आखियै अपने बब्बै दा हौसला बधान लगा।

धृतराष्ट्र आखन लगा—बेटा असैं गी जुद्ध नई करना चाही दा । तूं अर्द्ध राज्जें उप्पर गै सन्दोख कर । इन्ने उप्पर गै भलेयां राज करन होऐ, ते काफी ऐ ।

दुर्योधन कच्छा नई जरोआ ते आखन लगा—“पाण्डवें गी सूई दे नक्के जिन्नी जमीन नई थोनी ।” ए आखियै ओ दरबारें चा बाहर उठी गया । पिछें दरबारें इच बड़ी हलचल मची ते दरबार भंग होई गया ।

तुआई पाण्डव बी आपू इच्चें मन्त्रणा करा करदे हे । जिसलै सञ्जय उपप्लव्य थमां हस्तनापुर टुरी आया—तां युधिष्ठिर होर भगवान कृष्ण गी आखन लगे—हे वामुदेव ! सञ्जय धृतराष्ट्र दा गै दूआ रूप ऐ । ओदी गल्लें थमां गै सेई करी लैता जे धृतराष्ट्र हुन्दे मनै इच के ऐ ? धृतराष्ट्र होर बगैर किश दिते दे गै शान्ति चान्दे न । अपने भोलेपन इच पहले ते अऊं बड़ा खुश होआ पर जिसलै सञ्जय बोलेया तां अऊं समझी गया—जे अऊं ऐवें गे खुश होआ हा । जिने शब्दें कन्ने उस अपना भाषण खत्म कीता ओ ते असैं गी गै संजम ते हलीमी रखने दा उपदेश हा । ओ भायें असैं गी किश बी नई देन तां बी अस हलीम गै रौचै । धृतराष्ट्र होर साढ़े कन्ने न्यां नई करा करदे । औखी घड़ी आई पुज्जी ऐ । तुन्दे सवा साढा कोई राखा नई । में आखी भेजेया ऐ जे छड़े पंज गां गै देई ओड़ो । असैं गी इन्ने उप्पर बी सन्दोख ऐ । पर कौरवें ए बी नई मन्नना । अस हुण कुत्थों तोड़ी बर्दाश्त करदे जाचै । हुण तुस गै इस बिपता चा कड़ो । तुन्दे कछा बड़ा धर्म दा मर्म कुण जानदा ऐ ? असैं गी न्यां दी गल्ल दस्सो ते राजनीति समझाओ ।

भगवान कृष्ण होरें आखेया—दौनै पक्खें दी भलाई गित्ते में फैसला कीता ऐ जे आपू हस्तनापुर जा । अऊं धृतराष्ट्र कोल जाड ।

दरबारें इच जाइयै बिना लड़ाई दे तुन्दे हक्क लैने दी कोशश करइ । जे मेरी गल्ल तोड़ चढ़ी गई तां एदे इच दुनियां दा भला ऐ ।

युधिष्ठिर होर बोले—“भगवान, तुस नईं जाओ । शत्रुएं द घरे इच जाने दा के लाह ऐ ?

दुर्योधन अपनी दुष्टता उप्पर डटे रौना ऐ । ओ सारे बे असूले आदमी न । थुआड़ा उन्दे कोल जाना मिगी चंगा नईं लगदा । अऊं तुन्दी जान खतरे नईं पाना चान्दा । कौरवें दूर नीचता तोड़ी पुज्जी जाना ऐ ।”

कृष्ण होर बोले—“मिगी पता ऐ जे दुर्योधन केड़ा दुष्ट ऐ । फी बी शान्ति कन्ने कोई रस्ता निकली आवै तां चंगी गै गल्ल ऐ । कोई असैं गी ए नईं आखै जे असैं शान्ति रखने गितौ कोई कसर छोड़ी ओड़ी ऐ । असैं अपने पासेया कोई कसर नईं रौन देनी । असैं गी पता ऐ जे साढ़ी गल्ल मनोनी ते नईं फी बी जतन करनां ऐ । मेरी चिन्ता नईं करो । अऊं शान्ति दूत बनिए जा करनां ते जे मिगी शान्ति दूते गी किश जर्ब पजाने दा जतन करडन तां अऊं उनें गी भस्म करी ओड़ड ।”

युधिष्ठिर होर बोले—तुस जानी जान ओ । तुसैं गी साढ़े मनै दा बी पता ऐ ते उन्दे मनै दी गल्ल बी थुआड़े थमां छपी गुज्जी नईं । कुसै गल्लै गी समझाने इच ते दूए गी मनाने इच तुन्दे कशा बद्ध होर नईं लबदा ।

कृष्ण होर आखन लगे—ठीक ऐ । अऊं दौनैं गी जाननां । तुस धर्म कन्ने मते चमके दे ओ ते ओ नफरत द्वेष ते शत्रुता इच खूब डुब्बे दे न । अऊं पूरा जोर लाड ते थुआड़े मनै दी गल्ल तोड़ चाढ़ने दी कोशश करड जे बिना लड़ाई दे मामला हल्ल होई जा भायें तुसैं गी किशा बी घट्ट की नईं थोए । पर लक्खन दसदे न जे लड़ाई टलनी नईं ।

फी बी साढ़ा फर्ज ऐ जे अस शान्ति गितौ जतन करचै ।

ए आखियै कृष्ण होरें पाण्डवें कशा बिदा लैती ते रथै उप्पर चढ़ियै हस्तनापुरै पासै दुरी पे ।

राजदूत श्री कृष्ण जी

सात्यकिनै भगवान कृष्ण हुन्दे कन्ने हस्तनापुरै दा साथ कीता । चलने थमां पहलें श्री कृष्ण होरें पाण्डवें कन्ने खूब खुल्लिए गल्ल कीती । किश हरानगी दी गै गल्ल ही पर भीमसैन बी आखन लगा—“जे शान्ति कन्ने मामला सुलभी जा तां खरी गल्ल ऐ । बैस कैत नष्ट होत ? शान्ति गै होनी चाही दी ऐ । ब्यास जी लिखदे न जे भीमसैनै दा ए ग्लाना सिद्ध करदा ऐ जे बड्डे जोधा लोक ऐमनी गै चान्दे न । उन्दा ऐमनी गित्तै जतन करना कमजोरी दी नशानी नई हुन्दा ।

पर द्रोपदी गी अपनी बेज्जती रड़का करदी ही । ओ अपने बाल हत्था इच पकड़िए कृष्ण हुन्दे सामनै आई खड़ोती ते दुःखै कन्ने कम्बदी बाजै इच आखन लगी—“कृष्ण जी, मेरे इतें केसैं गी दिक्खी लौ (कियां दुशासनै खिच्चे हे) ते जे किश मान्नै दी गल्ल हुन्दी ऐ सो करो । मान गुआइयं शान्ति के होई ? जे अर्जुन ते भीम लड़ाई

नईं चान्दे तां नईं सई मेरा बुड्डा बब्ब भायें खीन होई गेदा ऐ, मेरे जागतें दी मदती कन्ने लड़ाई करग ।

बापू होरें गी रौन देओ । मेरे पुत्तर, अभिमन्यु गी अपना नेता बनाइयै, कौरवें कन्ने लड़ाई करडन । धर्मराज हुन्दा खातर में अपने रोहै दा बलदा लोरा तेरां बरे अपने ढिड्डा इच दवाई रखेया ऐ । हुण में नईं जरोन्दा ।” ओदे कन्ने जे किश बीतेया हा उसी चेता करियै ओ डुस्कन लगी ।

कृष्ण होरें गी बड़ा तर्स आया ते आखन लगे—“तू रो नईं । धृतराष्ट्र दे पुत्तरें मेरी शान्ति दी गल्ल नईं मन्नी । उने सारें मरना ऐ, ते उन्दियें लोथें गी कायें कुत्तें खाना ऐ । तू आपू दिक्खी लेयां आखर असैं जित्तनां ऐ । थुआड़ी बेज्जती दा बदला चकाना ऐ । ए सब किश तोलें गै होई जाना ऐ ।” द्रोपदी गी तशफी होई ।

कृष्ण होरें पड़ां कुचस्थल नगरै इच कीता । जिसलै कृष्ण जी दे औने दी खबर हस्तनापुर पुज्जी तां बड़ी गहमा गहमी शुरु होई गई । धृतराष्ट्र होरें हुकम दित्ता जे शहर खूब सजाओ ते कृष्ण जी दे स्वागत दियां तयारियां करो । धृतराष्ट्र होरें आखेया जे दुशासन दा महल दुर्योधन दे महला कोला बड्डा ते शैल ऐ इसकरी कृष्ण जी गी ठहराने गित्तें उत्थें बन्दोवस्त करो । कृष्ण जी दा अमला फैला बी उत्थें गे टिकै । शहर दे बाहर बी शाम्याने लाई ओढ़े ते जिस रस्ते कृष्ण जी दा रथ औना हा खूब सजौट करी दित्ती

धृतराष्ट्र होरें बिदुर कन्ने सलाह कीती । उनें बिदुर गी आखेया—कृष्ण जी गी खूब रथ ते हाथी भेष्ट करो । होर बी नजरां नजराने तयार करो ।

बिदुर होर आखन लगे—इनें नजरानें ते भेट कन्ने कृष्ण जी गी नईं फरकान हुन्दा । उनें गो ऊऐ चीज देओ जिस गित्तो ओ हस्तनापुर आवा करदे न । ओ ते शान्ति कन्ने सुलह सफाई दी गल्ल करन आवा करदे न । उस बक्खी ध्यान देओ । कृष्ण जी इनें तोहफें ते नजरें कन्ने पतीन नईं लगे ।

जिसलै कृष्ण जी हस्तनापुर पुज्जे तां सारा शहर गै उन्दे स्वागतै लई ऋद्धी पेया । सारे लोक गलियें बाजारें इच आई गे ते इन्ती भीड़ होई जे रथ लंघना मुश्कल होई गेया ।

कृष्ण होर पहले धृतराष्ट्र गी मिलन गे । उत्थुआं विदुर हुन्दे कछ पुज्जे । विदुर हुन्दे कुन्ती देवी कन्ने गल्ल वात होई । पाण्डवें दे कष्टें गी सोचियै ते दुखी होइयै वचारी रोन लगी ।

कृष्ण होरें उसी दलासा दित्ता । फी ओ दुर्योधन दे महलै गी गे । दुर्योधन उन्दा स्वागत कीता ते धाम आखी पर कृष्ण होर आखन लगे—राजदूतें दी गल्ल तोड़ चढ़ी जा उन्दी ऊऐ धाम हुन्दी ऐ । जिसलै कम्म होई जन्दा ऐ तां तुन्दी धामै उप्पर औगे । इयां उने दुर्योधन दी धाम नई मन्नी ते विदुर हुन्दें रौन दुरी आयै ।

विदुर ते कृष्ण होरें सलाह कीती । विदुर होरें आखेया जे दुर्योधन इस करी जिद्द करा करदा ऐ जे उसी पक्का जकीन ऐ जे भीष्म ते द्रोणाचार्य दे हुन्दे उसी कोई नई हराई सकदा ।

भीष्म ते द्रोणाचार्य इखलाकी दवा करी उसी छोड़ी नई सकदे । उने आखेया—इस पानी गी छोलने थमां किश नई निकलना । अऊं ते समझनां जे उन्दे दर्बारें इच जाना गै फजूल ऐ ते सारें गी खतरा बी ऐ जे दुर्योधन ते नुआड़े भ्रा छल कपट करडन ते कृष्ण हुन्दी जिन्दगी बी खतरे इच ऐ ।

दुर्योधनै मतल्लक तुसैं जे किश आखेया ऐ सो ठीक ऐ । मिगी मांए दे दाने उप्पर सफेदी जिग्नी मेद बी नई जे जिस गल्लै लई अऊं आयां सो तोड़ चढ़ग । अऊं ते इसकरी आयां जे लोक आखन नई जे कृष्ण होरें किश कीता नई । जित्थू तोड़ी मेरी जिन्दगी गी खतरा ऐ उस पासेया तुस चिन्ता नई करो । अऊं साम्बी लैड ।

दूऐ दिन बड़ुलै दुर्योधन ते शकुनि आये ते आखन लगे—धृतराष्ट्र होर तुसैं गी बल्गा करदेन । कृष्ण होर विदुर हुन्दे कन्ने दर्बारें इच पुज्जे ।

जिसलै कृष्ण होर दर्बारै इच पुज्जे तां किठ्ठे होए दे सारे राजे उठ्ठी खड़ोते । कृष्ण होरें बड्डे बडेरें गी हूथ जौले करियै पणमि कीता । कइएँ गी किश आखियै ते कइयें पासै दिखियै ते मुस्कराइयै फर्ज पूरा कीता । फी कृष्ण होर अपनी कुरसी उपपर बई गे । परिचय दा कम्म खत्म होने परैन्त कृष्ण जी उठ्ठे ते धृतराष्ट्र गी सम्बोधन करियै अपने अने दी गजं दस्सन लगे । उनें बड़े साफ शब्दे इच दस्सेया जे पाण्डव के मंगदे न—“धृतराष्ट्र जी ! तुस अपने लोकें गितै तबाई दा सम्यान नईं करो । जेड़ी चीज भले दी ऐ उसी तुस मन्दा आखा करदे ओ, ते मन्दी चीजै गी चंगा आखा करदे ओ । तुन्दा फर्ज ऐ जे अपने पुत्तरें गी काबू इच रखो । पाण्डव जुद्ध गितै तयार न पर ओ शान्ति चान्दे न । ओ ऐमनी कन्ने तुन्दे मतैत रौना चान्दे न । उनें गी अपनी लुआद समझो । ते कोई ऐसा उपा कड्डो जे दौने दी इज्जत बनी रवै ते सारे लोक तुन्दी सराहना करन ।” धृतराष्ट्र होर आखन लगे—मेरे मित्तरें गी पता ऐ जे मेरा कोई दोस नईं । मेरी बी बड़ी मरजी ऐ जे सुलह सफाई कन्ने ते शान्ति कन्ने गल्ल सुलभी जां । पर मेरे कशा किश हुन्दा नईं । मेरे पुत्तर बड़े दुष्ट न ते मेरी गल्ल नईं सुनदे । कृष्ण जी ! तुस दुर्योधनै गी समझाओ ।

कृष्ण होरें दुर्योधनै गी आखेया—भाई दुर्योधन ! थुआड़ा बडा उच्चा कुल ऐ । धर्म दा रस्ता पगड़ो । तुस इस लै जे किश ते जियां सोचा करदे ओ तुसैं गी सोभदा नईं । बड़ी घटिया दर्जे दी गल्ल ऐ । तुन्दे करिए इस बड्डे कुलै दा नां खतरे इच पवै करदा ऐ । जे तुस न्यां आली ते सच्ची गल्ल सुनो तां पाण्डव धृतराष्ट्र होरें गी आपूँ गद्दी बहालडन ते तुसैं गी जुवराज बनाडन । तुस उन्दे कन्ने सुलह करी लौ ते अर्द्धा राज देई ओड़ो ।

भीष्म पितामह ते द्रोणाचार्य होरें बी आखेया जे कृष्ण जी जे किश आखा करदे न उसी मन लाइयै सुनो ते ओदे उपपर अमल करो । पर दुर्योधनै दा मन ढिल्ला नईं होआ ।

विदुर होर आखन लगे—मिगी ते धृतराष्ट्र ते गान्धारी दा

तर्स औन्दा ऐ जिनेंगी दुर्योधनै बजोग लाई जाना ऐ ते मसीबतै इच पाई जाना ऐ ।

धृतराष्ट्र होरें फी अपने पुत्तरै गी आखेया जे तूँ कृष्ण जी दे आखे उप्पर नईं चलगा तां साढ़ा बन्स नष्ट होई जाग ।

भीष्म पितामह ते द्रोणाचार्य होरें बी बार-बार समझाया जे करस्तै नईं चलो ते ए गलती नईं करो ।

दुर्योधन बड़ा तमशेया—“तुस सारे गै मिगी जोर ला करदे ओ जे सुलह सफाई करी लै । ओ खड़ोइयै आखन लगा—कृष्ण जी ! तुस पाण्डवें गी प्यार करदे ओ इस करी मिगी गलत आखदे ओ । बाकी सारे बी मिगी गै दोस ला करदे न पर मेरा इस मामले इच कोई दोस नईं । पाण्डवें अपनी मरजी कन्ने जूआ खेडेया ते अपना राज जूए उप्पर लाया । हारी गे ते राज खुआई बैठे । एदे इच अऊं कियां जिम्मेदार होआ ? जूए इच हारिये ते बचनै मूजब ओ बनवास गे । एदे इच मेरा के दोस ऐ ? हुण ओ मेरे कन्ने लड़ाई की करदे न ? ते असें गी मारना की चान्दे न ? में उन्दिये धमकिये हेठ नईं औनां । अऊं लौका हा तां साढ़े बड़्ठे बडेरें गलती करी ओड़ी । पता नईं उनें पाण्डवें गी राज्जै दा हिस्सा की देई ओड़ेया हा । उन्दा ते बिन्द बी हिस्सा नईं बनदा । उसलै ते में मन्नी गया हा । पर हुण ते ओ खेड इच हारे दे न, में उनें गी किश नईं देना । मेरा एदे इच बिन्द बी दोस नईं । में पाण्डवें गी इक इच बी जमीन नईं देनी । सूई दे नक्के जिन्नी धतं बी नईं देनी ।”

जिसलै दुर्योधनै आखेया जे में कोई गलती नईं कीती दी तां कृष्ण जी हस्सन लगे ते आखन लगे—शकुनि कन्ने मिलियै तुसें धोखे दी खेड़ रचाई । फी तुसें भरे दर्बारै इच द्रोपदी दी बेज्जती कीती । हबे बी ए आखदे शर्म नईं औन्दी जे असें के पाप कीता ऐ ? उनें होर बी गल्लां दस्सियां कियां २ दुर्योधनै पाण्डवें गी सताया ते तड कीता ।

दुशासनै दिक्खेया जे भीष्म पितामह ते द्रोणाचार्य ते बाकी

सारे कृष्ण जी कन्ने हामी भरा करदे न तां दुर्योधनै गी आखेया—
भाई साब । इनें कोई षड्यन्तर रचाये दा ऐ । इनें तुसें गी बन्नी
लैन्नां ऐ ते पाण्डवें कोल लेई जानां ऐ । इत्थुग्रां निकली चलो ।
इयां दुर्योधन ते ओदे भ्रा दवरै बिचा निकली गे ।

कृष्ण होरें फी दवरै इच आखेया—कंस ते शिशुपाल दे मरने
परैन्त यादव ते वृष्णी लोक रमानै कन्ने रवै करदे न । कई बारी
सारे राष्ट्र गी वचाने गित्तै व्यक्ति गी बलिदान करना पौन्दा ऐ ।
सारे देसै गी वचाने गित्तै ग्रां गी छोड़ना पौन्दा ऐ । जे तुसें अपना
कुल बचाना ऐ तां दुर्योधनै गी छोड़ना पौग । हुण इऐ रस्ता रेई
गेदा ऐ ।

धृतराष्ट्र होरें बिदुर गी आखेया—गान्धारी बड़ी दूरन्देस ऐ ।
उसी सद्दी भेजो ।

खबरै दुर्योधन माऊ दी गल्ल गै मन्ने । गान्धारी गी सद्दी
भेजेया । ओ आई तां दुर्योधनै गी सदाया । दुर्योधनै दियां अक्खी
रोहै कन्ने लाल हियां । गान्धारी नै बड़ा समझाया । सारे तरीके
बरते ते कोशश कीती जे समझी जा । पर दुर्योधनै इक्कै नन्ना
पगड़े दा हा । ओ 'नां' आखियै दवरै बिचा चली गेया ।

दुर्योधनै ते ओदे साथिये कृष्ण जी गी कैद करने दी चाल
सोची दी ही । एदी खबर दवरै इच पुज्जी । कृष्ण जी गी ए
पहलें गै पता हा । उने अपना दिब्ब चमत्कार दस्सेया ।

कृष्ण जी दी किरपा करी धृतराष्ट्र गी थोढ़े समे गित्तै दृष्टि
परतोई । उने कृष्ण जी दे विराट रूप दा दर्शन कीता ते आखन
लगे—हे कृष्ण जी ! तुन्दा विश्वरूप दिक्खियै हुण में होर किश
नई दिक्खना चान्दा । मिगी परतियै अन्ना करी ओड़ो । धृतराष्ट्र
होर परतिये ऊआं गै होई गे ।

धृतराष्ट्र होर कृष्ण जी गी आखन लगे—साढ़े सारें दे
जतन फेल होई गे न । दुर्योधन हठ नई छोड़दा । अऊं बेबस आं ।

कृष्ण होर उठे ते बिदुर ते सात्यकि गी कन्ने लेइयै दवरै
चा गे उठी ।

ओ सिद्धे कुन्ती कोल गे । उनें सारी गल्ल सुनाई । कुन्ती
नै पाण्डवें गी अपना शीर्वाद भेजेया ते आखेया पाण्डवें गी आखेओ
जिस समै गितै क्षत्राणियां पुत्तर जमदियां न ओ समां आई गया ऐ ।
माऊ दे दुद्ध दी लाज रक्खो । हे कृष्ण जी ! तुस मेरे पुत्तरें दी
रखेया करो ।

क्षत्राणियां पुत्तरें गी जुद्ध खेत्तरै इच लड़ने ते देसै गितै ते धर्म
गितै बलिदान होने गी जमदियां न ।

कृष्ण होर अपने रथै उपपर चढ़े ते उपप्लव्य टुरी आये । जुद्ध
दी गल्लै इच कोई शक्क नई रेआ ।

०००

मोह ते फर्ज

जेकर कोई शान्ति ते सुलह सफाई दी टिमकदी लो कुस हिरदे
इच ऐ ही सो कृष्ण हुन्दे हस्तनापुरै थमां परतोने उप्पर हिस्सली
गेई । उनें जे किश सनाया उस थमां शान्ति दी कोई मेद नई रेई ।
कुन्ती गी बड़ा गै दुख होआ सोचन लगी ऐ आ लड़िये मरी जाडन ।
ओ सोचन लगी—अऊ अपने पुतर गी किया आखां जे बेज्जतीन
जरी लौ ।

इयां लड़ाई ते नई होग । पर मेरे पुतर क्षत्रिये दी परम्परा
बरुद्ध गल्ल किया मनडन । कन्ने ग सोचन लगी—आपू इच
लड़ाई मरोइये के थोना ? ते लड़ाई पिछुआं अपना कुल नष्ट कारे
के खुशी प्राप्त होनी ऐ ? ए दुविधा किया हटै ? इक पास कुल दा
सर्वनाश हा ते दूए पास क्षत्रिये दी इज्जतू दा प्रश्न हा ।

मेरे पुतर भीष्म, द्रोणाचार्य ते कर्ण दी किट्टी शक्ति दा
मुकाबला किया करडन ? इनें जोधे कदे हार खादी गै नई । उन्दा

चेता आन्दे गै मन कम्बी जन्दा ऐ । दूएँ दी मिगी पर्वाह नई ।
 कौरवें दी सैना इच ए त्रै शूरवीर न जेड़े पाण्डवें कन्ने लड़िए उने ।
 गी हराई-सकदे न । इन्दे चा द्रोणाचार्य भायें अपने शगिर्द समझियै
 जां मोह ममता करी खबरै पाण्डवें मी नई- गै मारन ! भीष्म
 पितामह बी उने मारना नई चाडन । पाण्डवें दा सारें कशा बड्डा
 शत्रु कर्ण ऐ । ओ पाण्डवें गी मारिए दुर्योधन गी खुश करना चान्दा
 ऐ । ओ बड्डा भारा शस्त्र धारी ऐ । जिसलै पाण्डवें दी ओदे
 कन्ने लड़ने दी गल्ल सोचनियां तां इयां बभ्रुन्दा हिरदा भुज्जी गया
 ऐ । इसलै मौका ऐ जे अऊं कर्ण गी मिलियै ओदे जन्मै दी गल्ल
 उसी सनां । उसी सुनिए खबरै दुर्योधन दा साथ छोड़ी दे ऐ ।

इनें बचारें इच डुब्बी दी ते दुखी होई दी कुन्ती गंगा दे कण्डे
 गई । कर्ण उरथें रोज सन्ध्या बन्दन करदा हा । कर्ण पूजा करा
 करदा हा । पूरब पास मुंह करिए ते हथ्य चुक्कियै ओ समाधी इच
 हा । कुन्ती चुपचाप ओदे पिछें खड़ोती दी बलगदी रेई । कर्ण ध्यान
 मग्न हा उसी कुसै चीजै दा पतल नई हा । उसी पिढी उपपर धुप्पे
 दी तपश सेई होई ।

जिसलै ओदी पूजा मुक्की तां कर्ण पिच्छ दिक्खेया । कुन्ती
 खड़ोती दी ही । उस नुहाड़े धोती दे पल्लड़े कन्ने सूरजै दी तपशा
 कोला बचने गित्ते अपना सिर खट्टे दा हा । पाण्डू दी रानी ते
 पाण्डवें दी माता उरथें आइयै इयां उसी बलग उसी किश समझ
 नई आया ते हरान होआ ।

अऊं राधा दा पुत्तर ते अधिरथ सारथी दा पुत्तर तुसें गी
 पर्णाम करनां । मिकी हुकम करो अऊं तुन्दी के सेवा करां ? उस
 सम दे पर्णाम करने दे तरीकें अनुसार कर्ण पाण्डवें दी माता गी
 इयां आखेया, कुन्ती आखन लगी—कर्ण तू राधा दा पुत्तर नई । न
 गै सारथि दा पुत्तर एं । तू ए नई समझ जे तू कुसी लोकी जाते
 दा आदमी एं । तू ते सूरज भगवान दे अंश दा राजकमारी पृथा दे
 ढिड्डा दा जम्मे दा राजकमार एं । राजकमारी पृथा गी गै कुन्ती

आखदे न परमात्मा थुआड़ा भला करे । फी उसनै ओदे जन्मै दी कथा सनाई । तेरे सुन्ने दे कुण्डल ते कवच जमान्दरू न । तुगी पता नईं जे पाण्डव थुआड़े आ न । तू दुर्वोधनै कन्ने रलियै उनेंगी नफरत करनां एं । धृतराष्ट्र दे पुत्तरें दी नौकरी करना थुआड़े जोग नईं । अर्जुन कन्ने मिली जा ते राज्जै दा तुम्मी इक राजा बनी जा । तू ते अर्जुन दमै मिलियै दुष्टें दा दलन करो । सारी दुनियां थुआड़े अग्रे नौग । सारै पासै थुआड़ा नां चमकग । जियां कृष्ण ते बलराम हुन्दा नां जगत पसिद्ध ऐ ।

पजे भायें कन्ने थुआड़ी सोभा देवतें इच ब्रह्मा आडू होग । कठन मौकें उप्पर ऊऐ करना चाही दा ऐ जिस करी माऊ बब्वै गी सन्दोख होऐ । साढ़े शास्तरें मूजब ईऐ सारें कशा बड्डा धर्म ऐ ।

जिसलै पूजा दे परैन्त माऊ नै कर्ण गी इयां समझाया—तां उसी लग्गा जे सूर्ज भगवान बी एदा समर्थन करा करदे न । पर उस संजम रखेया । उस सोचेया जे सूर्य भगवान ओदी भगती ते मनै दी मजबूती दा इम्तहान ते नईं लैदे । इस परीक्षा बिच फेल नईं होना चाही दा ।

उस जी पक्का कीता ते अपने स्वार्थे दी भावना गी बी दबाया ते सैनन मौरी दे प्रेमै गी बी दबाया । बड़े बसोसै कन्ने पर मजबूती कन्ने आखन लगा—मां जी, तुसें जे किश आखेया ऐ सो धर्म दे बरुद्ध ऐ । जे अऊं करस्तै पवां ते धर्म छोड़ी ओड़ां तां मिगी इन्नी हानि होग जिन्नी कोई शत्रू मिगी जुद्ध खेतरे इच बी नईं पजाई सकदा । तुसें मिगी जमदे गै नदी इच रढ़ाई ओढ़ेया ते मेरा क्षत्रिय होने दा जमान्द्रू हक्क खुआई ओढ़ेया, ते हुण मिगी क्षत्रिय दा कर्तव्य दसदे ओ ? तुसें मिगी माऊ दा प्यार नईं दित्ता ते हुण अपने दूए पुत्तरें दे भले आस्तै मिगी ए कथ सनान लगे ओ ? हुण में पाण्डवें कन्ने मिलां तां दुनियां ए नईं आखग जे कर्ण डरिए पाण्डवें कन्ने मिली गया ऐ । में धृतराष्ट्र दे पुत्तरें दा निमक खादा ऐ । उन्दा मेरे उप्पर बसाह ऐ । उनें मेरे उप्पर बड़ी किरपा कीती दी ऐ ते

हुण जिसलै जुद्ध शुरू होने आला ऐ तुस मिगी आखदे ओ जे अऊं निमक हरामी करां ते पाण्डवें कन्ने मिली जां ? धृतराष्ट्र दे पुत्तर ते मिगी परलो समें बेरले दी मनु दी नौका समझदे न । मेरी सह उप्पर उनें जुद्ध रम्भेया ए । हुण अऊं उनें गी कियां छोड़ी ओड़ा ? एदे कोला बड़ी किरतघन्ता ते नाशुकर गजारी के होई सकदी ऐ ? इस दुनियां इच, जां परलोकी इच एदी बरोवरी दी के चीज ऐ ? मां जी ! मिगी अपना कर्ज तुआरन देओ, भायें मिगी जिन्द बी की नईं देनी पवै । अऊं अपना फर्ज नईं नभान्दा तां मेरे इच ते इक नाजै दे चोरै इक के फर्क रेआ । अऊं थुआड़े पुत्तरें बरुद्ध अपना पूरा जोर लाइयें लड़ड । इस ग्रौने आले जुद्ध च अऊं तुसें गी धोखा नईं देई सकदा । मिगी खिमा करो ।

ओ आखन लगा—फी बी तू मेरी मां एं । थुआड़ी बेनती इयां गै नईं सुट्टी पाड । अर्जुन गी छोड़िए होर कुस पाण्डवे गी नईं मारड । ओ भायें मिगी किश बी करन । इस जुद्ध इच कर्ण जां अर्जुन इक नै जरूर मरना ऐं । हे जोधें दी माता, थुआड़े पजे पुत्तर रौखन ।

कुन्ती नै अपने भलोठी दे जाये दे पक्के बचन सुने । ए सच्चे क्षत्रिय दे बचन हे । ओदे ढिड्डु इच बड़ा तफान मचेया । ओदे कशा किर नईं बलोआ । उस कर्ण गी घोटिए गलें लाया ते चुपचाप टुरी गई ।

जे किश विधाता नै लिखेदा ऐ उसी कुण मेटी सकदा ऐ । चलो इस बाकी चीनें पाण्डवें गी नईं मारने दा बचन ते दित्ता ऐ । ए बी बड़ी गल्ल ऐ ।

परमात्मा ओदा भला करे । कुन्ती परतोई आई ।

०००

पाण्डवें दे सैनापति

भगवान कृष्ण उपप्लव्य पुज्जे ते उनें पाण्डवें गी हस्तनापुर
जे किश होई बीती ही सो सनाई ।

“में सचाई दा पक्ख लइयै बड़ा जोर लाया ते उन्दे भले गित्तै
बी उनें गी समभाया । पर सब कूड़ गै गया । हुण ते चौथे रस्ते
बिना कोई चारा नई । हुण ते जुद्ध बिना कोई गति नई । दवरै
इच बड्डे बडेरे बी दुर्योधनै गी मता समभाया पर ओ मूर्ख कुसै दी
सुने गै नई । हुण असें गी चिर नई लाना चाही दा ते जंग दी
त्यारी करनी चाही दी ऐ । कुरुक्षेत्र दे मदानै इच ए जुद्ध होग ।

हुण शान्ति दी कोई आस नई रेई । युधिष्ठिर होरें अपने
भ्रायें गी आखेया ते फौजे गी जुद्धभूमि दे निजमे मताबक खड़ा करने
दा हुकम दित्ता ।

उनें सत्ते डिविजनै इच फौच खड़ी करी दित्ती । उनें द्रुपद,
विराट, धृष्टद्युम्न, शिखण्डी, सात्यकि ते भीमसैन होरें गी इक इक
डिबीजन दा सैनापति बनाई दित्ता । फी सोचन लगे जे बड्डा जर्नेल

कुण होऐ । युधिष्ठिर होर सहदेव गी आखन लगे—असे इनें सत्ते बिच्चा कुसै गी सर सेनापति चुनी लैता चाही हा ऐ । ओ ऐसा होना चाही दा ऐ जेड़ा भीष्म पितामह हुन्दा मकाबला करी सकै । जेड़ा शत्रुएं गी भस्म करी सकै । जेड़ा फौजें गी सम ते स्थिति दे मताबक तयार करी लै । थुआड़ा के बच्चार ऐ इस जिम्मेदारी गी कुण सारे कशा चंगा नंभाई सकदा ऐ ?

उनें दिनें ए निजस हा जे लोकें कशा पहलें सलाह लैन्दे हे । बड़ु गी पिच्छुआ पुच्छे दे हे । इयां नौजवानें इच बड़ा ब्रह्माह पैदा हुन्दा हा । ज बड़ु गी पहलें पुच्छी लौ तां दूएँ गी बोलने दा, अजादी कन्ने बोलने दा, समां गै नई मिलदा ते सच्चे मतभेद बी बजुं गे दी बेज्जती समझोन लगादे न ।

सहदेव नै जबाब दिता—राजा बिराट गी सेनापति चुनना चाही दा ऐ उनें साढी मदत कीती, असें उन्दे कोल अज्ञात बास दे दिन कट्टे, उन्दी मदत कन्ने गै अस अपने राज्जे दा हिस्सा मंगां करने आं ।

नकुल आखन लगा—मिगी ते जन्नदा ऐ जे द्रुपद होरें गी सेनापति बनाया जा । ओ उमरी इच, बुद्धि च, हौसले च, कुलें दी दृष्टि कन्ने ते ताकती इच बी बड़ु न । द्रोपदी दे पिता द्रुपद होरें भारद्वाज हुन्दे कशा धनष विद्या सिक्खी । ओ बड़े चिरै दे द्रोणाचार्य कन्ने दौं दौं हथ्य करने गी बल्गा करदे न । उन्दी सारे राजे इज्जत करदे न । ओ असें गी पुत्तरें आडू समझियै सहायता करदे न । भीष्म पितामह ते द्रोणाचार्य हुन्दे मकाबले इच उनें गी सेनापति बनौना चाही दा ऐ ।

फी युधिष्ठिर होरें अर्जुन गी ओदा मत पूछेया—“मेरा बच्चार ऐ जे जुद्ध खेतरे इच अस धृष्टद्युम्न गी अपना सेनापति बनौना चाही दा ऐ । ओ इन्द्रिये दा स्वामी ऐ उस्सं दे हथ्यें द्रोणाचार्य होरें मरना ऐ । भीष्म पितामह हुन्दे तीर ऊऐ जरी सकदा ऐ । ओदी शस्तर बिद्या दिविखयें परशुराम होर बी पिच्छें हटी गे हे । ओ साढे सेनापति होने दे पूरे काबल न । मिकी ते होर कोई नई लबदा ।”

भीमसैन आखन लगा—महाराज ! अर्जुन ठीक आखा करदा ऐ। पर ऋषि गलान्दे न जे शिखण्डी दा जनम भीष्म पितामह गी मारने गित्तै होए दा ऐ। मेरा ख्याल ऐ जे अस शिखण्डी गी सेनापति दा पद सौंपचं। ओदे मुं है उप्पर परशुराम हुन्दे आडू तेज ऐ। मिकी होर कोई नई लबदा जेड़ा भीष्म पितामह होरें गी हराई सकै।

आखर युधिष्ठिर होरें कृष्ण भगवान गी पुच्छेया—महाराज ! तुस अपनी रा दस्सो।

सारे जोधे जिन्दे नां ले न इक कोला इक बद्ध न। सारे सैनापति होने जोग न। कुसै गी बी सेनापति बनाई देओ। ओ कौरवें गित्तै त्राह होग। सारियां गल्लां सोचियै अऊं आखना जे अर्जुनै दा सोचना ठीक ऐ। धृष्टद्युम्न गी अपना सैनापति चुनी लौ।

इआं गै होआ द्रुपद दा पुत्तर धृष्टद्युम्न जिन स्वंवरै इच द्रोपदी दा हत्थ अर्जुनै गी पगड़ाया हा ते जेड़ा पिस्ले तेरां बरे अपनी भैनु दी दुर्योधनै दे दबारिं च होई दी बेज्जती उप्पर कुढ़दा रेआ हा, ते जिस बदला लैने दी टोह लाइ ही पाण्डवें दी सेना दा सैनापति नियुक्त कीता गया। बीरें दी सिंह गर्जना, ते शैख धुन ते हाथियें दी चंघाड़ नै गडगज्ज पाई दिती ते पाण्डवें दी सैना अपनी जुद्ध रचना बनाइयै कुरुक्षेत्र दे मदानै इच आई पुज्जी।

०००

कौरवें दे सैनापति

भीष्म पितामह होर कौरवें दी सैना दे सैनापति बने ।
 दुर्योधनै बड़ी धीनगी कन्ने उनेंगी चरणबन्दना कीती ते आखेया—
 महाराज ! तुस साढ़े नेता बनो सैना दा संचालन करो ते असें गी
 ऊआं गै जित्त ते जस्स दुआओ जियां स्वामी कार्तिक नै देवतें गी
 दुआया हा । तुस अगें ते तुन्दे पिच्छें अस ।

भीष्म पितामह होर आखन लगे—खरा इयां गै सेई । पर
 इक गल्ल सोची लै । ए माढ़ी टकोदी गल्ल ऐ । अऊं पाण्डु दे
 पुतारें गी उन्ना गै प्यार करनां जिन्नां तुसें गी । में बचन कीता दा
 ऐ इस करी थुआड़ा सैनापति ते बनी जाड ते अपना फर्ज बी पूरा
 करड । हजारां बीर जोधे मेरे तीरें कन्ने मरडन बी पर पाण्डवें गी
 में नई मारी सकदा । मेरी इस जुद्ध च कोई सम्मति नई । पाण्डवें
 गी अऊं मारन नई लगा ते लड़ाई दे बाकी फर्ज जरूर पूरे करड ।

इक गल्ल होर ऐ । थुआड़ा लाडला कर्ण नई चान्दा जे
 में सैनापति बनां । उसी मेरियां गल्लां चंगियां नई लगदियां ।

थुआड़ी मरजी होऐ तां उसी बेशक सौनापति बनाई लै की जे ओ गुरू थमां गै अपनी मरजी मताबक सौना दा संचालन करै दा ऐ । मिगी कोई इतराज नईं होग ।

भीष्म होरें गी कर्ण दे तौर तरीके नईं हे सखान्दे ।

कर्ण अपने थार बड़ा गमान करदा हा आखन “लगा जिन्नां चिर भीष्म होर सौनापति न अऊं जुद्ध नईं करड । ओ मरी जाडन तां लड़ाई इच औड ते अर्जुनै गी मारड ।”

भलोके समें इच बी बड्डे बड्डे लोकें इच ईखां ते दुःख हुन्दा हा ।

दुर्योधनै भीष्म हुन्दी शर्त मन्त्री लैती ते उनें गी अपनी फौजें दा सौनापति बनाई दित्ता । कौरवें दी सौना बी कुरुक्षेत्र गी चली आखो समुद्गर ठाठां मारदां अगें बधन लगा होऐ ।

०००

बलराम

बलराम होर कृष्ण जी दे आ हे । बड़े मन्ने तन्ने दे शूरवीर ।
ओ पाण्डवें दी छौनी इच आये । उनें नीली रेशमी पशाक लाई दी
ही ते उन्दी चाल बब्बर शेरै आड़ू रोबदार ही । युधिष्ठिर, कृष्ण जी
ते बाकी सारें उस बीर जोधा दा स्वागत कीता । द्रुपद ते बिराट
होरें गी प्रणाम करिऐ बलराम होर युधिष्ठिर हुन्दे कोल बेई गे ।

उनें आखेया—अऊं कुरुक्षेत्र आयां । में सुनेया ऐ जे भरत दे
वैशज लालच, रोह ते नफरत दी भावनें कन्ने दबोई गे न । सुलह
सफाई दी गल्ल त्रुट्टी गई ऐ । जुद्ध दी घोशना होई गई ऐ ।

बलराम हुन्दा गला भरोची गेया किश रुकिए आखन लगे—
हे युधिष्ठिर जी ! बड़ी भयंकर तबाही होने आली ऐ । धरती
उप्पर लहुऐ दा चिक्कड़ होई जाना ऐ । उसलोथें ते बढोए दे अंगें कन्ने
खटोई जाना ऐ । क्षत्रियें गी पता नई के पागलपन स्वार होऐ दा
जे उनें गी, अपना भविक्ख बी नई लबदा । बुरे दिन आये

महाभारत

दे लबदे न । में कृष्ण होरें गी बड़ा समझाया ऐ । जियां असें गी दुर्योधन ऊंआं गै पाण्डव । आये दे भगड़े इच असें गी पौने दी के लोड़ ऐ । पर ओ सुनदे गै नई । उनें गी अर्जुन कन्ने प्यार ऐ । ओबी सचाई दे रस्ते दा खुज्जी गे न । ते हुण तुन्दे पासौ आई बेठे न । उनें जंग गी गै ठीक समझेया ऐ । हुण में ते कृष्ण बरोधी दलें इच कियां होई जाचै । दुर्योधन ते भीमसेन दोऐ माढ़े शगिर्दे न । अऊं दौने गी प्यार करनां, दौनें दा मान करनां । हुण इकदा पक्ख देइयै दूए बरुद्ध कियां लड़ां । मेरे कशा कौरवें दा नास नई दिक्खन हुन्दा । इस करी में इस लड़ाई च हिस्सा नई लैनां । इस जुद्ध सब किश भक्खी ओड़नां ऐ । दुनियां गितौ ए बड़ी भारी दुघटना होने आली ऐ । इस करी अऊं ते तीर्थे चलेयां । उनें जुद्ध दी भीषणता दस्सी । उन्दा हिरदा दुख ते गमै कन्ने भरोचे दा हा । उनें परमात्मा उप्पर गै डोर सुट्टी । जो इच्छया भगवान दी । बलराम जी दा महाभारत दी लड़ाई थमां बाहर रौना बड़ी टकोदी मसाल ऐ जे सच्चे ते भले आदमी कनेई दुविधा इच फसी जन्दे न । दमै रस्ते ठीक लब्बन ते इक मजबूरी चुनना पवै तां नेए मानू गितौ बड़ी भारी दुविधा खड़ी होई जन्दी ऐ ।

पर ए मसीबत दयान्तदार मानू गितौ गै हुन्दी ऐ । बेइमान लोकें आस्तै ए कोई मुश्कल नई हुन्दी । उन्दे अपने स्वार्थ सिद्ध होने चाही दे न । उन्दी मरजी तोड़ चढ़नी चाही दी ऐ । उन्दा स्वार्थ सिद्ध होइ जा तां सब ठीक ऐ । पर जिनें कोई हीखी गै नई उनें महापुरुषें गी के ? महाभारत दी लड़ाई इच भीष्म, बिदुर, युधिष्ठिर ते कर्ण हुन्दे जीवन दिक्खी लौ । अस इस बड़ु ग्रन्थ इच पढ़ने आं जे इनें गी अपनी समस्या कियां ते कनेई स्थिति इच सुलझानी पेई । इन्दिये कठनाइयें दे समाधान कोई इक्कै नेए तरीके कन्ने नई होए । हर इक दा अपना चरित्तर हा ते उस मताबक गै उस समस्या दा हल कडुया ।

अज्जै कल्ले दे आलोचक ए बन्यादी गल्ल गै भुल्ली जन्दे न ते सारे गी इक्कै भा तोलन लगदे न । ए गलत हुन्दा ऐ । अस

रामायण पढ़चै तां असें गी सबक सिक्खना चाही दा ऐ जे दशरथ, कुम्भकर्ण, मारीच, भरत ते लक्ष्मण सामनै के समस्या ते कठनाइयां आइयां—ते उनें कियां उनेंगी सुलभाया ते पार पाया । इयां गै बलराम हुन्दा महाभारतै दी लड़ाई थमां वक्ख रौना वी इक बड़ा भारा पाठ ऐ जेड़ा असें सिक्खना चाही दा ऐ । दो राजे गे महाभारतै दी लड़ाई थमां बाहर रहे हे । इक बलराम होर ते दूए भोजकटै दे राजा रुकम होर । रुकम हुन्दी लौकी भैनुं नै कृष्ण हुन्दे कन्ने ब्याह कीता हा ।

उन्दी कथ अगले ध्या इच ऐ ।

०००

रुकमनी

भीषमक होर बिदर्भ दे राजा हे । उन्दे पञ्ज पुत्तर ते इक धी ही । राजकमारी दा नां रुकमनी हा ते श्लैपे इच ओपरी गे ही । उन्नी गै ओ शीलवती ते भलीलोक ही । उस कृष्ण जी दी मैहमा सुनी । उस मनै इच पक्का करी लैता जे कृष्ण जी कन्ने ब्याह करना ऐ । ए इच्छा ओदी रोज रोज पक्की हुन्दी गई । ओदे नातें साकें गी बी ए गल्ल चंगी बभोई । पर ओदा बड्डा भ्रा जेड़ा जुवराज हा ओ कृष्ण गी बिल्कुल नईं हा चान्दा । उस अपने पिता महाराजा भीषमक गी आखेया—में रुकमनी कृष्ण गी नईं ब्याई देनी । चेदी दे राजा शिशुपाल कन्ने रुकमनी दा ब्याह करी ओड़ने आं । महाराज बुड्डे होई गेदे हे जुवराज दी मरजी गै मनोनी ही उनें किश नईं आखेया । साफ होई गया जे रुकमनी गी शिशुपाल कन्ने जबर्दस्ती ब्याही दित्ता जाग ।

रुकमनी मनै कन्ने कृष्ण जी गी चान्दी ही । ओ ते लक्ष्मी दा अवतार ही । ओ दुखी होई । उसी जकीन होई गया जे बापू

होर ते बेवस न ओदा भ्रा गै बाऊ दे घोड़े उप्पर चढ़ेदा ऐ । उस बापू हुन्दी कोई गल्ल नई मन्ननी । ते ए ब्याह नई रुकना । उस मन दृढ़ कीता ते पक्का इरादा करी लैता जे किश उमा तुप्पेया गै लोड़चदा ऐ । उस क्वारपुने दा संकोच छोड़ैया ते इक ब्राह्मण दे कन्ने सलाह कीती ते उसी अपना दूत बनाइयं कृष्ण हुन्दे कोल टोरेया । उसी आखेया जे कृष्ण जी गी सारी गल्ल सनायां ते आखेयां जे मदती गी पुज्जो ।

ब्राह्मण द्वारका पुज्जा ते उस कृष्ण जी गी रुकमनी दी हालत सनाई ते ओदे पासेया प्रार्थना कीती ते कन्ने ओदी दिती दी चिट्ठी कृष्ण होरें गी दिती । चिट्ठी इच इयां लिखे दा हा—

“में मनै थुआं तुसैं गी अपना पति ते स्वामी धारी लैता दा ऐ । हुण ए तुन्दा फर्ज ऐ जे मेरी मदत करो । आओ, नईं तां शिशुपाल नै मिगी लई जाना जे । इस मामले इच चिर लाने दी गल्ल नईं । इस करी कल इत्थें पुज्जो, शिशुपाल ते जरासन्ध दियां फौजां तुन्दा बरोध करडन । ते जे मिगी लई जाना ऐ तां इन्दा मकाबला करना पौग । परमात्मा करै तुस सफल होवो ते मिगी लई चलो । मेरे भ्राऊ नै मिगी शिशुपाल कन्ने ब्याहने दा पक्का प्रबन्ध करी लैता दा ऐ । ते ब्याह दियें रस्में इच इक रस्मै मूजब में कल गौरां दी पूजा गित्तै मन्दर जाना ऐ । ऊऐ इक मौका जे, उसलै मिगी लई चलयो । बचाई लैयो । जे तुस नईं पुज्जे तां में आत्म हत्या करी लैड । चलो फी अगले जन्म तुन्दे कन्ने मिलड ।”

कृष्ण होरें पत्तर पढ़ेया ते भठ रथै उप्पर जाई चढ़े ।

राजे दे हुकमै मूजब विदर्भ दी राजधानी कुण्डिनपुर खूब सजाई दी ही ते राजकमारी दे शिशुपाल कन्ने ब्याह दियां त्यारियां जोरै कन्ने जारी हियां । होमै आला मराज ते ओदे साथी सारे कृष्ण हुन्दे शत्रु हे । ओ सारे राजधानी इच किट्टे होए दे हे ।

बलराम होरें गी कृष्ण जी दे इक दम ते चोरी दुरी जाने दा पता लग्गा । उनें सोची लैता जे विदर्भ दी राजकमारी दी गै गल्ल ऐ । उनें सोचेया ऐसा नईं होऐ जे कृष्ण जी इक्कले अपन

जान्ती दुश्मन कोला घिरी जान ते काबू आई जान । ओ ते कृष्ण जी दे लहुए दे प्यासे न । बलराम जी नै इक खासी फौज कठ्ठी कीती ते कुण्डिनपुर पासै मार्च करी दित्ता ।

रुकमनी अपने मेहलें चा निकली । अपनी सखियें कन्ने घिरी दी देवी दे मन्दरै पासै गौरां दी पूजा गित्तै चली ।

ओ प्रार्थना करन लगी—हे देवी माता, बौढ़ । अऊं थुआड़े चरणें इच आइयां तूं माढ़ी भगती जाननी एं । मिगी बर दे जे कृष्ण जी मेरे पति होन ।

जिसलै ओ मन्दरै दा बाहर निकली उसी कृष्ण ची दा रथ लब्बा । जियां लोहे दी सूई चुम्बक कन्ने खचोन्दी ऐ । इयां रुकमनी द्रौड़ी ते कृष्ण हुन्दे रथै इच बई गई । कृष्ण जी उसी लइयै ओ गये ओ गये बाकी सारे दिखदे गे रई गे ।

नौकर जुवराज रुकमन कोल द्रौड़े ते जे किश होआ हा सनाया ।

रुकमनै प्रण कीता—अऊं कृष्ण गी जियें मारियै परतोड । ओ इक बड़ी भारी फौज लइयै कृष्ण दे पिछे लगा । इन्ने चिरै इच बलराम हुन्दी सैना पुज्जी गई ही । दौने बरोधी दलें इच घोर जुद्ध होआ । रुकमनै दी सैना तित्तर बित्तर होई गई । कृष्ण जी ते बलराम जी जित्तिए घर परतोए । उत्थें रीति रवाजै कन्ने कृष्ण जी दा रुकमणी कन्ने व्याह होआ ।

रुकमन हारी गेदा हा उसी शर्म आई ओ कुण्डिनपुर नईं गया उस जित्थें कृष्ण हुन्दें लड़ाई होई ही उस थारै उपपर भोजकट नां दा नगर बसाई लैता ते राज करन लगा ।

उसी जिसलै कुरुक्षेत्र दे जुद्ध दा पता लगा । उस इक बड़ी सैना किट्ठी कीती ते उत्थें आई पुज्जा । उस सोचेया जे इयां कृष्ण हुन्दी मित्तरता प्रापत होई जाग । उस पाण्डवें गी अपनी सहायता पेश कीती । ओ अर्जुन गी आखन लगा—हे पाण्डवो ! दुश्मन दी सैना बड़ी बड्डी ऐ । अऊं थुआड़ी सहायता गित्तै आयां । मिगी आखो सैना दे जिस हिस्से उपपर हमला करना होऐ अऊं करां ।

अऊं द्रोणाचार्य, कृपाचार्य ते भीष्म होरें कन्ने बी लड़ी सकनां ।
अऊं तुसें गी जित्त कराई देड । तुस इक बारी अपनी मरजी दस्सी
ओड़ो । अर्जुनै कृष्ण हुन्दे पासै दिक्खेया ते हस्सन लगा । अर्जुन
आखन लगा—हे रुकम जी ! अस शत्रू दी बड्डी सैना कोला नई
डरदे । असें गी तुन्दी सहायता दी बी लोड़ नई । थुआड़ी सहायता
लेने दी साढ़ी खास मरजी बी नई । तुसें ठहरनां तां ठहरो, जाना
ते जाओ उठी । जां जियां तुन्दी मरजी ऐ अऊं करो ।

सुनिए रुकम गी बड़ा रोह आया । ते शर्म बी आई । फी
दुर्योधनै दी बक्खी गया । पाण्डवें मेरी मदत ठकराई दित्ती ऐ ।
मेरी फौज तुन्दी सेवा इच हाजर ऐ । दुर्योधन आखन लगा—
“पाण्डवें तुसें गी जवाब दित्ता तां तुस असें गी मददत देन आये ओ ।
मिगी तुन्दी सहायता दी लोड़ नई । में पाण्डवें दी जूठ नई
चखदा ।

इयां दौनें बक्खी दा शर्मसार होए दा रुकम अपने राज्जै गी
परतोई गया । ते उस महाभारतै दे जुद्ध इच हिस्सा नई लेया ।

जुद्ध इ तटस्थता किन्ने गै चाल्ली दी हुन्दी ऐ । इक ते मन
गै नई मनदा जे लड़ाई होऐ । दूए स्वार्थ ते अपना अभिमान हुन्दा
ऐ जेड़ा बक्ख रखदा ऐ । कई डरै मूजब जां सुस्ती कारण जुद्ध इच
नहीं लड़दे । बलराम होर जेड़े नई लड़े ओदा कारण उन्दी शान्ति
गित्तौ पक्की मरजी ही ।

रुकम नई लड़ेया एदे इच ओदा अभिमान हा उस धर्म दा
पक्ख नई लैता, ओ अपनी शान गित्तौ लड़ना चान्दा हा । उसी कुसे
बी नई रखेया ।

०००

मिगी के ?

दूए दिन लड़ाई शुरू होनी ही । कौरवें दे सैनापति, भीष्म पितामह होर अपनी बहादरी दियें गल्लें कर्णें दुर्योधन दे दिल बधा करदे हे । ओ कौरवें दी सैना दे जोधें दी बीरता, चतराई ते काबलीयत बक्खो बक्ख दस्सन लगे । दुर्योधन बड़ा खुश होआ । फी कर्ण दे बारे इच गल्ल बात चली :—

भीष्म होर आखन लगे—कर्ण थुआड़ा बड़ा प्यारा ऐ पर अऊं उसी कोई बड़ा जोधा नईं समझदा । उसी ते छड़ा पाण्डवें कन्ने नफरत करना औन्दा ऐ । ते कन्ने छड़ा घमण्ड भरे दा ऐ । घमण्ड बी कोई करै पर उसी ते दूएं दी निन्धा बगैर किछ औन्दा गै नईं । अऊं ते नईं समझदा जे उच्चे दर्जे दे जोधें बिच ओदा कोई थां होई सकदा ऐ । हुण ते ओदे कोल जमान्द्रू कवच कुण्डल बी नईं रे । इस लड़ाई बिच ओदा मिकी कोई खास लाह नईं होई सकदा । परसराम हुन्दा श्राप बी उसी ऐ । मौके बेल्लै उसी मन्तर गै भुल्ली

जाने न । ते अर्जुन कर्ण बिच जेड़ी लड़ाई होनी ऐ उस बिच कर्ण नै मरोई जाना ऐ । भीष्म होर सिद्धी सिद्धियां ते कोरियां गल्ला सना करदे हे दुर्योधन ते कर्ण कोला नईं जरोआ ।

बलदी उप्पर द्रोणाचार्य होरें तेल सुट्टेया ते आखेया—“भीष्म पितामह होर ठीक आखा करदे न । कर्ण ते छड़ा घमण्ड कन्ने भरोचा दा ते अपने इच फुल्ले दा ऐ । ए दौं नेए औगण न जेड़े जुद्ध दी सूखम कला पासेया मानू गी फरकाई ओड़दे न । इस इऐ नेईं लापर्वाही करनी ऐ ते मरोई जाना ऐ ।” कर्ण गी बड़ा रोह चढ़ेया ते भीष्म पितामह होरें गी आखन लगा । ओदियें अक्खीं चा लोरे बला दे हे । “तुसैं म्हेशां मेरी निन्द्या गै कीती । तुसैं गी मेरे कन्ने जिद ऐ, खार ऐ ते नफरत ऐ । तुसैं मिगी निन्दने दा कदें मौका नईं जान दित्ता । अऊं दुर्योधनै दा मुंह दिक्खियै ए सब किश तान्ने मीने जरदा रेआं ।

तुसैं आखेया ऐ जे इस लड़ाई इच अऊं किसे कारी दा सिद्ध नईं होन लगा । अऊं अपनी धारना दस्सनां मेरे करिए नईं तुन्दे कारण गै कौरवें दा भट्टा बौना ऐ । तुस अपने मनै दी सच्ची गल्ल की छपैलदे ओ ? सच्ची गल ए ऐ जे तुस दुर्योधनै गित्तै प्यार रखदे गै नईं । दुर्योधन ए गल्ल जानदा नईं । तुस मिगी नफरत करदे ओ इस करी जदू वी मौका थोन्दा ऐ तुस दुर्योधनै दे मनै इच मेरे बारै जहर भरदे ओ । अपना उल्लू सिद्धा करने गित्तै तुस मेरी शक्ति गी म्हेशां घटाइये दसदे ओ, मिगी सदा गराने दी कोशश करदे ओ । तुन्दा वर्ता ते नेआ होई गेदा ऐ जेड़ा क्षत्रियें गी नईं सोभदा । छड़ा उमरी इच बड्डा होई जाने करी जोधें इच मान नईं होई जन्दा । एदे गित्तै वीरता दी लोड़ हुन्दी ऐ । साढ़े तल्लकात नईं बगाड़ो ।

कर्ण फी दुर्योधनै गी आखन लगा—हे शूरवीर ! किश सोच ते अपना भला आपू दिक्ख । भीष्म पितामह हुन्दे उप्पर गै डोर नईं छोड़ी ओड़े । ए ते साढ़े बिच फुट्ट पा करदे न । इतें जियां

मेरा नकशा खिच्चेया ऐ ओदे कन्ने तुगी गै नुकसान पुज्जना ऐ । मेरी निन्द्या करिए ऐ मेरा उत्साह मट्टा करना चान्दे न । इन्दे इच हुण कक्ख नई रेदा—ए फांक होई गेदे न । इन्दा समां निकली गेदा ऐ । अभिमानी ऐ आपू न, ते उस घमण्डे इच ऐ दूए गी किश समझदे गै नई । इन्दी वृद्ध अवस्था दी कदर करनी चाही दी ऐ । इन्दे तजबे थमां लाह बी लैना चाही दा ऐ पर असें गी शास्तरें दी गल्ल बी नई भुल्लनी चाही दी जे बढेपे इच आदमी पतरी जन्दा ऐ । फल मता पक्की जा तां गली जन्दा ऐ, सड़ी जन्दा ऐ । तुसें उनें गी सौनापति बनाया ऐ । दूए दी बहादरी दा लाह इनें अपना नां चमकाने इच लैना ऐ पर अऊं सच आखनां जे इन्दी कमान इच ते इन्दे जीन्दे में लड़ाई इच हिस्सा नई लैनां । जिसलै ऐ मरी जाडन तां गै अऊं लड़ाई इच औंड ।”

सच्ची गल्ल ऐ ऐ जे घमण्डी गी ऐ बभोन्दा गै नई जे अऊं घमण्ड करा करनां । जिसलै कोई इआं उसी ओदा दोष दस्से तां ओ ऊऐ दोस दस्सने आले गी लान लगदा ऐ । ओदी न्यां बुद्धि उपपर पर्दा पेई जन्दा ऐ ते जेड़ा उसी ओदा दोष दस्से ओ उस्से गी अपराधी समझन लगदा ऐ ।

ए गल्ल इस कथं थमां भलेया सिद्ध हुन्दी ऐ । भीष्म पितामह होरें अपने रोहै गी काबू कीता ते आखेया—“हे कर्ण । ए मौका बड़ा कठन ऐ इस करी तू जीन्दा लब्बा करनां एं (नई ते अऊं तुगी इस्सै लै मारी ओड़दा) । कौरवें दी बुद्धि भ्रष्ट करने आलां तू एं । तू बड़ा भारा कुबुद्धि एं ।” दुर्योधन भली मसीबतें इच फसेया ।

आखन लगा—हे पितामह जी मिगी तुन्दी दौनें दी लोड़ ऐ । तुसें दौनें गै शूरवीरता दे कारनामे दस्सने न । एदे इच के शक्क ऐ । निक्की लो हुन्दे गै जुद्ध शुरू होई जाना ऐ । अपने गै मित्तरें इच लड़ाई की होऐ । इसलै ते शत्रू सामने आई खड़ोता दा ऐ ।

पर कर्ण अपने हठे उपपर डटेया रेआ ते आखन लगा जे जिन्ना

चिर भीष्म होर सैनापति न में लड़ाई नई करनी । आखर दुर्योधन गी कर्ण दी गल्ल मन्ननी पेई । ओदी धमकी अगें नौना पेया । दस दिन जुद्ध हुन्दा रेआ ते कर्ण नई लड़ेया । ओदी सैना सड़दी रेई । दस्सें दिनें परैन्त जिसलै भीष्म होर डिगो ते तीरें दी सेजा उप्पर पेई गे तां कर्ण उन्दे कोल गया, मत्था टेकेया ते माफी मंगी । भीष्म पितामह होरें माफी दित्ती ते शीर्वाद बी । फी ते कर्ण सहयोग देन लगा । उससै सुभा दित्ता जे द्रोणाचार्य होरें गी सेनापति बनाओ । भीष्म हुन्दे बाद द्रोणाचार्य होर कौरवें दे सैनापति बने । जिसल द्रोणाचार्य होर मोये तां कर्ण नै कौरवें दी सैना दी कमान साम्बी ।

०००

कृष्ण जी दा उपदेश

लड़ाई दी तयारी मकम्मल ही । दक्खी दे जोधा किट्टे होए
ते उनें प्रण कीता जे परम्परा थुआं चली औन्दे जुद्धे दे नियमें दा
पालन करगे । जंग दे तौर तरीके ते नियम समें समें उप्पर बदलदे
बी रौन्दे न । जे अस महाभारत दे समें गी अपने सामने नईं
रखचें तां असें गी महाभारत ग्रन्थ दियां किन्नियां गै गल्लां नईं
समभोन्दियां । ते किश गोरखधन्धा बभोन लगदा ऐ ।

जियां कथा चलदी ऐ उस थमां पता लगदा ऐ जे कुरुक्षेत्र दी
लड़ाई इच के नियम हे ते कियां उन्दा पालन होआ । जिसलै सूरज
अस्त हुन्दा हा तां जुद्ध बन्द होई जन्दा हा ते लड़ने आले इक दूए
गी मित्तरें आडू मिलदे गिलदे हे । बरोबरी दी टक्करै आलें दी
इक्कली २ लड़ाई बी हुन्दी ही उसी द्वन्द आखदे हे । पर कोई धर्म
बरुद्ध तरीके इस्तामाल नईं हा करी सकदा । जेड़े मदान छोड़ी
जान, जां पिछे हटी जान उन्दे उप्पर हमला नईं हे करदे । घुड़स्वार
कन्ने घुड़स्वार गै जुद्ध करदा हा । घुड़स्वार पयादे उप्पर हमला नईं

हा करदा । इयां रथें आले, रथें आलें कन्ने, हाथीस्वार, हाथीस्वारें कन्ने, ते प्यादे प्यादें कन्ने गै पलचदे हे । जेडे शरण आई जान, जां हार अन्नी लैन उन्दी जान बकशी होई जन्दी ही । जेडा लड़ाई च हथ्यार सुट्टी ओढे ओदे उप्पर बार नईं हे करदे । जेदे कोल शस्तर नईं हा हुन्दा उसी नईं हे मारदे । जेदा ध्यान कुसै होर पासै होऐ, जेडा पिछें हटा करदा होऐ, जेदा कवच त्रुट्टी गेदा होऐ उसी नईं हे मारदे । इक लड़ा करदा होऐ तां दूआ जेडा लड़ा नईं करदा होऐ ओ लड़ने आले उप्पर हमला नईं हा करदा । जेडे नौकर लोक लड़ा नईं करदे होन उन्दे उप्पर बी हमला नईं हे करदे । शंख बजाने आले ते ढोल बजाने आलें उप्पर बी हमला नईं हे करदे ।

कौरवें ते पाण्डवें इनें नियमे उप्पर चलने ते इन्दा पालन करने दा प्रण कीता । ठीक ते गलत दे बारे बिच मनुक्खें दे बचार बदलोन्दे रहे न । हुण जेडे जुद्ध हुन्दे न उन्दे इच कोई बी नईं बची सकदा । हुण ते मेखचीनें उप्पर हमले करदे न, वेजवान पशु घोडे, ऊंट, खच्चरां ते डिस्पैन्सरियां ते होर लोक जेडे मर्द बुड्डे जुआन ते बच्चे नईं बी लड़दे, लड़ाई दे लपेटे इच आई जन्दे न ते मरोई जन्दे न ।

कई बारी महाभारतै इच बी नियम त्रुट्टे । कुतै २ नियमें दा उल्लंघन होआ, भायें किश कारण बी होआ । आमतौर उप्पर मन्ने दें नियमें दा पालन गै होआ । जित्थें कुतै नियम त्रुट्टा उसी चंगा नईं समझेआ गया । उसी गलत ते शर्मेनाक गै आखेया गया ।

अपनी सैना दे सर्दार राजें गी भीष्म होर आखन लगे—बहादरो, तुन्दे सामनै शानदार मौका आया ऐ । तुन्दे आस्तै सुगुँ दे दर्वाजे खुल्ली गे न । इन्द्र देवता ते ब्रह्मा जी कन्ने रौने दा मौका आया ऐ । अपने बजुगें दे रस्ते उप्पर चलो ते क्षत्रिय धर्म दी पालमा करो । खुशी २ जुद्ध करो ते जस्स कमाओ । क्षत्रिय बीमारी कन्ने बिस्तरे उप्पर मरना चंगा नईं समझदा । ओ बुड्डा होइऐ ते अड्डियां रगड़िऐ मरना नईं चान्दा । ओ मदान जंग इच मरन

चंगा समझदा ऐ। सारे राजे आखन लगे ठीक ऐ ते उने दुन्दवियां बजाइयां अपनी हामी दस्सी ते कौरवें दी जय दे नारे लाये ।

भीष्म हुन्दे झण्डे उपपर ताड़ दा बूटा ते पंज तारे हे । अश्व-
त्थामा दे झण्डे उपपर बब्वर शेरै दी पूशलै दा नशान हा । द्रोणा-
चार्य हुन्दे सनहरी झण्डे उपपर कमण्डल ते धनखवानै दा नशान हा ।
दुर्योधनै दे झण्डे उपपर काले फिनियरै दा नशान चमका करदा हा ।
कृपाचार्य हुन्दे झण्डे उपपर बैलै दी तस्वीर ही । जयद्रथ हुन्दे ध्वजै
उपपर जंगली सूरै दा नशान हा । इयां गै होरनें दे बी नशान हे ते
झण्डे दा जलूस बने दा हा ।

कौरवें दी फौजै गी सज्जे दे दिक्खिए युधिष्ठिर होरें अर्जुन
गी आखेया—शत्रुएं दी फौज बड़ी ऐ । साढ़ी फौज घट्ट ऐ । असें गी
अपनी फौज किट्टी रखनी चाही दी । ओदा फला नई करना ऐ,
मता फला करने कन्ने अस खिल्लरी जागे ते कमजोर होई जागे ।
इसकरी अपनी फौजे गी सूचीमुख ब्यूह बिच खडेरो ।

हुण जिसलै अर्जुनै दौने बक्खी सैनां खड़ोती दियां दिखियां
तां ओदा मन बड़ा खराब होआ । कृष्ण जी नै ओदी बेचैनी दूर करने
गित्तै ते शक्क मटाने गित्तै उपदेस दिता जिसी गीता दा उपदेश
आखदे न ते जेड़ी करोड़ें हिरदें इच परमात्मा दे शब्दें दे रूपै इच
जगत्प्रसिद्ध ऐ । ऐ मनुक्ख मात्रै दे साहित्य दा अनमोल खजाना ऐ । एदे
इच कर्तव्य पालन दा उपदेश, निष्काम भावना कन्ने कम्म करना, ते
फलै दी इच्छेया नई करना ते सारें आस्तै अमीर गरीब विद्वान अनपढ़
ज्ञानी अज्ञानी आस्तै टकोदा उपदेश ऐ । इस जिन्दगी दियां समस्यां
सुलभाने आस्तै एदे इच सुन्दर प्रकाश ऐ ।

युधिष्ठिर जी की शीर्षाद थोआ

हर इक चीज तयार ही ते लड़ाई शुरू होने आली ही । ठीक ऐसे ओड़कशोए आले मौके फौजें दिखेया जे युधिष्ठिर होरें अपना कवच तुआरेया, हथियार छोड़े, अपने रथे थमां उतरे ते कौरवें दे सैनापति पास पैदल टुरी पे । “ए युधिष्ठिर होर के करा करदे न ? हर इक आदमी इऐ प्रश्न पुछदा हा ते हरान हा जे युधिष्ठिर चान-चक्क गै कियां टुरी पे न ते के करन लगे न ?

अर्जुन बी बड़ा हरान होआ । उस रथे उप्परा शड़ापी मारी ते युधिष्ठिर हुन्दे पास द्रौड़या । बाकी आ ते कृष्ण होर बी द्रौड़ । ओ डरे खबरै युधिष्ठिर होर अपने सुभा मतावक चानचक्क गै सुलह सफाई दा फैसला ते नई करी बंठे ते हुण ओदी घोषणा करन चले न ।

हे महाराज ! तुस शत्रुएं पास इयां की जा करदे ओ ? तुसें असें की किश दस्सेया गै नई । शत्रू लड़ाई गितै तयार न, उनें

शस्त्र सोत्रे दे न, ते तुस कवच तुआरिऐ ते शस्त्र त्रिट्टिऐ उन्दे पासै जा करदे ओ ? कुसै गी कन्ने बी नईं लेआ । असोंगी दस्सो तुस के करन लगे ओ ? अर्जुन होरें पुच्छेया । पर युधिष्ठिर होर झुगियें सोचें पेदे हे । ते चुपचाप अगें बधदे जा करदे हे । कृष्ण होर जानीजान ऐ । ओ सारें दे बक्खर जानदे हे । किश मुस्कराये ते आखन लगे—युधिष्ठिर होर जंग शुरु होने थमां पहलें बजुर्गे कशा शीर्वाद लैन जा करदे न । उन्दा बचार ऐ जे बजुर्गे दी शीर्वाद ते जाजत बिना जुद्ध शुरु नईं करना चाही दा । ओ भीष्म पितामह ते गुरु द्रोणाचार्य हुन्दे शीर्वाद लैन जा दे न । इस करी उनें शस्त्र नईं धारे । उन्दा इयां करना ठीक ए । उनेंगी सदाचार दा पता ऐ । सदाचार दे सहारै अस जुद्ध जितगे । दुर्योधनै दी सौना दे लोकें युधिष्ठिर होरें गी हत्थ जौले कीते दे इयां औन्दे दिक्खेया तां ओ सोचन लगे युधिष्ठिर होर साढ़ी ताकत दिक्खिऐ डरी गे न ते हुण सन्धि करन आवा करदे न । इनें क्षत्रियें गी लाज गै लुआई ऐ । ए साढ़ी कौमै इच नेआ डरपोक कियां जम्मी पेया ऐ इयां युधिष्ठिर हुन्दी निन्द्या करदे ओ खुश बी होन लगे जे असें बिना जुद्ध कीते गे लड़ाई जित्ती लेती ऐ ।

युधिष्ठिर होर सज्जी दी ते बिष्कुल लड़ने गी त्यार सौना बिचा लंघिऐ भीष्म पितामह हुन्दे कोल पुज्जे, उन्दे चरण छूइऐ प्रणाम कीता ते आखन लगे—

दादा जी—जुद्ध शुरु करने दी जाजत देओ । असें तुन्दे बरुद्ध लड़ने दा जिगरा कीता ऐ । तुसें गी कोई नईं जित्ती सकदा, तुन्दी बरोबरी दा कोई नईं । लड़ाई शुरु करने थमां पहलें असें गी शीर्वाद देओ ।

भीष्म पितामह होरें ओखेया—वेटा ! तूं भरत वंश दा जाया ए । ते क्षत्रिय धर्मे दे मतावक गै थुआड़ा कम्म करने दा तरीका ऐ । तूं मनासब गै गल्ल कीती ऐ । तुगी दिक्खियै मिगी खुशी हुन्दी ऐ ।

तू जुद्ध कर जीत थुआड़ी गै होनी ऐ । अऊं अपने थार स्वतन्तर नईं । अऊं महाराजा धृतराष्ट्र कन्ने मजबूरी करी बद्धा दां । ते में कौरवें भेठा गै जुद्ध करनां ऐ । पर ए पक्की गल्ल ऐ जे थुआड़ी हार नईं होग ।

भीष्म पितामह जी कोला जाजत ते शीर्वाद लेइयै युधिष्ठिर होर द्रोणाचार्य हुन्दे कोल गे ।

प्रदक्खन कीती ते प्रणाम कीता । द्रोणाचार्य होरें बी शीर्वाद दित्ता ते आखेया—हे युधिष्ठिर । अऊं कौरवें कन्ने किश नेआ बभोई गेदां जे हुण निकलन नईं हुन्दा । अऊं धनै दी बेवसी करी उन्दा सेवक बनी गेदां । में उन्दी भेठा गै लड़नां ऐ । पर शेकड़ जीत थुआड़ी गै होनी ऐ । फी युधिष्ठिर होर कृपाचार्य हुन्दे कोल गे ते मामा शल्य कोल गे ते उन्दे शीर्वाद बी प्राप्त करिए अपनी सैना इच परतोई आये ।

जुद्ध शुरु होआ । पहलें बरोबरी दे इक्कले इक्कले जोधें दे द्वन्द्व शुरु होए । भीष्म ते अर्जुन, सात्यकि ते कृतवर्मा, अभिमन्यु ते बृहत्बल, दुर्योधन ते भीमसैन, युधिष्ठिर ते शल्य, ते धृष्टद्युम्न ते द्रोणाचार्य हुन्दे घोर द्वन्द्व होए । इयां गै हजारों जोधा लोग बक्खरे २ लड़े । उनें उस समें दे सारे निजमें दा पालन कीता ।

इनें बड्डे जोधा लोकें दे इलावा सधारण फौजी बी जी खोलिए लड़े । इसी “संकुल जुद्ध” आखदे न । एदे इच फौजी दुगड़ियां बनाइयै शत्रू दी सैना उपपर जाई चढ़े न ते खुल्लिए जुद्ध हुन्दा ऐ, मारकाट हुन्दी ऐ । कुरुक्षेत्र दे जुद्ध इच इऐ नेह किन्ने गै संकुल जुद्ध होए, लड़ने दे मतवाले बेशमार जोधे खूब लड़े, लोथें दे ढेर लग्गी गे बेशमार रथ भज्जी गे हाथी ते घोड़े मरोई गे ते जुद्ध भूम लहुऐ कन्ने लथपथ होई गई । लहुऐ दा चिक्कड़ होई गया ते रथें दा चलना कठन होई गया । जोके द्वन्द्व नईं हुन्दे । हुन ‘संकुल जुद्ध’ गै चलदे न ।

कौरव दस्स दिन भीष्म पितामह दी कमान हेठ जुद्ध करदे रे ।

उन्दे बाद द्रोणाचार्य होर सैनापति बने । द्रोणाचार्य मरोए तां कर्ण सैनापति बने । सतारमें दिन बाद कर्ण मरोआ । ठारमें ते खीरले दिन शल्य होर सैनापति बने । जुद्ध दे खीरले दिनें च किश बे असूली दियां ते जालम गल्लां बी होइयां । बीरता ते जुद्ध दे निजम तौले नई बिसरी जन्दे । मनुक्खै दे अन्दर बड़प्पन दे बी हुन्दे न । पर कई बारी नेइयां कठन स्थितियां बनी जन्दियां न, जां नेऐ प्रलोभन आई जन्दे न जे कमजोर सुभा आलें कोला सबर नई हुन्दा खासकर जिसलै पहलें ऊऐ नेई गल्ल इक बारी होई गेदी होऐ । ते कन्ने घृणा ते लड़ाई दी बजह करी रत्तू दे पनलि बगा करदे हो न । उस बेल्लै बड्डे २ लोक बी धर्म दी गल्ल भुल्ली जन्दे न ते गल्लियां करी ओड़दे न, उन्दियां खुञ्जा दूए गित्तै मसालां बनदियां न । ओ धर्म गी पिच्छे सुट्टी ओड़दे न । दूए फी धर्म मनदे गै नई । इयां हिंसा बधन लगदी ऐ, पाप बधन लगदा ऐ, ते दुनियां बुराई पासे द्रौड़न लगदी ऐ, बुराई इच डुब्बी जन्दी ऐ ।

०००

जुद्धे दा पहला दिन

कौरवें दी सेना दा सर्दार दुशासन हा ते पाण्डवें दा भीमसैन ।
लड़ाई दा रौला मचेया ते गास फटन लगा । ढोल, दमामे नफीरियें,
नरसिंगे ते शैखें दे शब्द कन्ने वातावरण भरोची गया । घोड़े हिनकन,
हमला करने आले हाथी चंघाड़न, ते जोधे सिंह गर्जना करन । तीर
चलन जियां गासै इच बलदे तारे मकदे न । बब्व पुत्तरें गी,
चाचे ताये भतरीयें गी बडुन लगे । ओ रिश्ते नाते भुल्ली गे । बड़ा
पागलपन हा, भयानक खून खराबा हा ।

पहले दिन दपैहरी कशा पहलें गं पाण्डवें दी सैना गी कची
भुनक लगी । जताईं पासं भीष्म हुन्दा रथ जन्दा हा तुआईं गे
काल भगवान दा नाच होई जन्दा हा । अभिमन्यु कशा ए नईं
दिक्खन होआ, उस भीष्म पितामह उप्पर हमला करी दित्ता ।
जिसलै सबनें थमां बृद्ध ते सबनें थमां लौके जोधा दा जुद्ध शुरू होआ
तां देवता लोक बी ए लड़ाई दिक्खन आये । अभिमन्यु दे रथ उप्पर
गण्डीले दे फुल्लें आला सनैहरी झण्डा भुल्ला करदा हा । अभिमन्यु

दा इक तीर कृतवर्मा होरें गी लगा ते पञ्जवारी शल्य होरें गी ओदे तीरें दा नशाना बनना पेया । भीष्म होरें गी नौ वारी अभिमन्यु दे तीर लग्गे । दुर्मुखै दे रथ गी अभिमन्यु दी तलवार लग्गी ते ओदा सिर कटोए दा भुआ लुढ़कन लगा । इक होर तीरै नै कृपाचार्य हुन्दा धनश त्रोड़ी दित्ता । अभिमन्यु दे जुद्ध कौशल दे कर्तव्य दिखियै देवता लोक बी फुल्ल बरहान लग्गे । भीष्म ते दूए जोधा आखन लग्गे ए अर्जुनै दा नां कडुने आला बीर पुत्तर ऐ ।

कौरवें दे जोधा किट्टे होए ते रलियै इन्हें इस नौ जवानै उप्पर हमला करी दित्ता, पर अभिमन्यु सारें दा गै मकाबला करन लगा । उस अपने तीरें कन्ने भीष्म हुन्दे तीर कट्टी ओड़े । इक तीर उस नेआ चलाया जे भीष्म हुन्दा ताड़ वृक्ष आला झण्डा कट्टिऐ भुआ सुट्टी ओड़ेया । ए दिक्खियै भीमसेन बड़ा पसोआ । ते उस सिंह गर्जना कीती ते अपने बहादर भतरीये दा हौसला बधाया ।

भीष्म होर इस नौजवान जोधा दी वीरता दिक्खियै बड़े खुश होए । उन्दी मरजी ते नईं ही पर उनें गी अपना सारा जोर उस जातकै बरुद्ध लाना पेया ।

बिराट, हुन्दा पुत्तर उत्तर, द्रुपद हुन्दे पुत्तर धृष्टद्युम्न, ते भीमसेन उस नौजवान शूरवीरै दी सहायता गी आये ते उनें भीष्म पितामह हुन्दे उप्पर हमला कीता । भीष्म होर उन्दे पासै परतोए । बिराट दा पुत्तर उत्तर हाथी उप्पर स्वार हा । उस शल्य उप्पर जोरै दा हमला कीता । शल्य हुन्दे रथ दे घोड़े मधोई गे इस करी उस उत्तर हुन्दे उप्पर नेजा सुट्टेया । नेजा ठीक नशाने उप्पर लग्गा ते छाती चीरी गया । उन्दे हत्था दा अंगस बुड़की गया ते आपू लुढ़की गे । पर हाथी पिच्छें नईं हटेया ते हमले करदा रेआ । शल्य नै ओदी सुण्ड बड्डी ओड़ी ते तीरें दी नैई बरखा कीती जे हाथी नै जोरै दी चोक मारी ते डिग्गी पेया । शल्य कृतवर्मा दे रथ उप्पर चढ़ी गया । बिराट दे पुत्तरै श्वेत नै दिक्खेया जे शल्य नै नुआड़ा लौका आ मारी ओड़ेया ऐ उसी रोह चढ़ेया । जियां कुसै अग्नि इव धियो पाई दित्ता होऐ । ओ अपना रथ शल्य हुन्दे कोल लेई

गेया । सत्त शूरवीर इक वारी गै अपनी सैना लेइयै शल्य हुन्दी रखेया गी आई गे । ते सारें पासेया हमले गी रोकन लगे । श्वेत उप्पर तीरें दी बरखा होन लगी ते शस्तर इयां चलन लगे जियां काले डिगलें इच विजलियां चमकदियां न । श्वेत नै अपने आप गी खूब बचाया । उस तीरें दा जवाब तीरें कन्ने दिता ते उन्दे भाले कट्टी ओड़े ।

श्वेत दी जुद्ध कला ते चतराई दिक्खियै चक्कली जोधा चगत होन लगे । दुर्योधनै शल्य दी सहायता गी भटपट सैना भेजी । घोर जुद्ध होन लगा । हजारों सैनक मरी गे रथ त्रुट्टी गे ते वेशमार घोड़े ते हाथी मरोई गे । श्वेत नै दुर्योधन दी सैना नठाई ओड़ी, फी अग्रे बधेया ते भीष्महुन्दे उप्पर हमला कीता । भीष्म हुन्दा भण्डा डिगगी पेया । भीष्म पितामह नै श्वेत दा सारथि मारी ओड़ेया ते रथ त्रुट्टी ओड़ेया । फी दक्कली नेजे चलन लगे ते घोर लड़ाई होन लगी । श्वेत नै इक बड़ा लठ्ठ चुक्केया ते भीष्म हुन्दे रथै उप्पर सुट्टेया ते रथ भन्नी ओड़ेया । भीष्म होरें पहलें गै बुझी लैता हा जे उन्दे रथै उप्पर हमला होन लगा ऐ । ओ रथै परा उतरी होए । उनें कन्ने तोड़ी डोरी खिन्चिऐ श्वेत उप्पर तीर छोड़ेया ते श्वेत भुआ डिगगी पेया ते मरी गेया । एदे बाद भीष्म होरें बड़े जोरै कन्ने पाण्डवें दी सैना उप्पर हमला कीता ।

लड़ाई द्वे पहले दिन पाण्डवें दा भारी नुकसान होआ । युधिष्ठिर होर किश डरी गे । दुर्योधन बड़ा खुश हा । पाण्डव भ्रा किठे होइयै गम्भीरता कन्ने सोच बचार करन लगे ।

कृष्ण होर आखन लगे—हे युधिष्ठिर ! डरो नई । थुआड़े भ्रा बड़े शूर वीर न । तुसं डरने दी जां घाबरने दी के लोड़ ऐ । सात्यकि तुन्दे पास, बिराट, द्रुपद, ते धृष्टद्युम्न, तुन्दे पास फी औं बी ते कन्ने आं । तुसेंगी मन ढाने दी के गल्ल होई ऐ । तुस ए गल्ल की विसरी गेओ जे भीष्म हुन्दा काल शिखण्डी किन्ना आत्तार होए दा बल्गा करदा ऐ । इयां कृष्ण होरें युधिष्ठिर गी दम दलासा दिता ।

लड़ाई दा दूआ दिन

पहले दिन पाण्डवें दी सैना गी भारी नुकसान होआ हा इस करी दूऐ दिन सैनापति धृष्टद्युम्न होरें नेई योजना बनाई जे पहले दिनां आली गल्ल नईं होऐ। उनें सैना दी रचना इयां कीती जे सारें इच उत्साह ते बसाह पैदा होई गया।

पहले दिनां दी जित्तै कन्ने दुर्योधन खुशी कन्ने भड़ोला होऐ दा हा। ओ अपनी सैना दे बरकार खड़ोइयै आखन लगा—हे शस्तर धारी बीरो। साढ़ी जीत जकीनी ऐ। लड़ो ते जिन्दू दी पर्वाह नईं करो।

भीष्म पितामह हुन्दी कमानै इच कौरवें दी फौजें पाण्डवें दी सैना उप्पर हमला कीता। उन्दा ब्यूह त्रोंड़ी ओढ़ेया ते मते सैनक मारी ओढ़े।

अर्जुनै अपने सारथि कृष्ण हुन्दे पासै दिक्खेया ते आखन लगा जे इयां चलन लगा तां ते पितामह होर साढ़ी सैना मारी मकाई ओढ़ेदे न। जिन्ना चिर अस भीष्म होरें गी नईं मारी गरान्दे

उन्ना चिर साढ़ा जित्तना कउन ऐ । अस अपनी सैना बी बचाई नईं सकगे ।

कृष्ण होरें आखेया—तां फी तयार होई जा । अऊं तुगी भीष्म पितामह सामनै लेई चलनां । उनें रथ तुआईं पासे चलाया ते बिल्कुल उन्दे सामनै लेई गे ।

रथ पूरी गति कन्ने चलेया । भीष्म पितामह होरें तीर छोड़िऐ ओदा स्वागत कीता । दुर्योधन अपनी फौजें गी हुकम दित्ता दा हा जे भीष्म हुन्दी भलेयां रखेया करनी ते उनेंगी कदें खतरें इच नईं पौन देना । उस करी सारे जोधा भीष्म हुन्दे आसै पासै किट्टे होई गे ते अर्जुन उप्पर हमला करन लगे । अर्जुनै कोई पर्वाह नईं कीती ते जी खोलियै लड़न लगा ।

सारे जानदे हे जे कौरवें दी सैना इच त्रै गै जोधा न जेड़े अर्जुन दा मकाबला करी सकदे न भीष्म पितामह होर द्रोणाचार्य होर ते कर्ण, जेड़े दूए जोधा भीष्म पितामह हुन्दी मद्दत करन आये हे अर्जुनै उनें गी फण्डी ओड़ेया ।

अर्जुनै जिस चाली अपनी धनश विद्या दे जौहर दस्से उनें गी दिक्खियै सारे सैनापति बाह बाह करन लगे । ओदा रथ इयां चलदा हा जियां बदलें इच बिज्ज मिलकदी ऐ । जताईं जन्दा हा सैना गी चीरदा जन्दा हा । अक्खीं कन्ने भलेयां दिक्खन नईं हा हुन्दा ।

ए लड़ाई दिक्खियै दुर्योधनै दा दिज धड़कन लगा । भीष्म हुन्दे बारे इच ओदा मन डोलन लगा । आखन लगा—“हे पितामह तुन्दे ते द्रोणाचार्य हुन्दे २ गै कृष्ण ते अर्जुन दी जोड़ी साढ़ी सैना गी मकाई ओड़दी लवदी ऐ । कर्ण मेरा पूरा वफादार ऐ ते सच्चा साथ देने आला ऐ पर ओ वक्खी बैठा दा ऐ । छड़ा तुन्दे करी गै ओ नईं लड़ा करदा । जे तुसें अर्जुन गी तौले नईं मारेया तां साढ़े कन्ने धोखा होई जाना ऐ । असें इयां गै मरोई जाना ऐ ।

देवता भीष्म पितामह ते अर्जुनै दा जुद्ध दिक्खन धरती उपपर आये । ए दमै धरती दे सारें कशा बड्डे जोधा हे । दौनें दे रथें इच चिट्ठे घोड़े लग्गे दे हे । दक्खी दा तीरें दी भङ्गी लग्गी । तीर तीरें कन्ने भिड़न लग्गे ते कदें भीष्म पितामह हुन्दे तीर अर्जुन ते कृष्ण हुन्दी छाती इच बी जाई लगदे हे । खून बगदा तां इयां बभोन्दा हा आखो पलाहें उपपर टट्टए खिड़े दे होन । कृष्ण हुन्दी छाती इचा लहू बगदे दिक्खियै अर्जुन गी बड़ा रोह चढ़ेया । ओ कस्सी कस्सिए भीष्म पितामह हुन्दे उपपर त्रान छोड़न लगा । दोऐ बरोवरी दे जोधा हे इस करी लड़ाई लम्मी होई गेई । दौनें दे रथ एडे तौले तौले द्रौड़दे हे जे पता नईं हा रौन्दा जे भीष्म हुन्दा रथ केड़ा ऐ ते अर्जुनै दा केड़ा ऐ । छड़ा भण्डे कोला फर्क सेई हुन्दा हा । ताईं पासै ए विचित्र नाटक खडोआ करदा हा तुआईं मदान जंग दे दूए हिस्से इच द्रोणाचार्य ते उन्दे जमांद्रू दुश्मन धृष्टद्युम्न दी लड़ाई जारी ही । धृष्टद्युम्न पञ्चाल दा राजा हा ते द्रोपदी दा भ्रा हा । द्रोणाचार्य होरें जोरदार हमला कीता ते धृष्टद्युम्न बुरी चाली घाल होआ । फी उस बड़े जोरें कन्ने हमला कीता ते चम्बू बट्टिए द्रोणाचार्य हुन्दे उपपर तीरें दी बरखा करन लगा । द्रोणाचार्य होरें बड़ी कुशलता कन्ने अपने आप गी बचाया । उनें सारे तीर परताई सुट्टे ते भारे मुग्दर कट्टी सुट्टे । ओ उनें गी गास इच गै त्रौड़ी ओड़दे हे । द्रोणाचार्य होरें किन्ने बारी धृष्टद्युम्न दा धनश गै त्रौड़ी ओड़देया । फी इक तीर नेआ लग्गा जे धृष्टद्युम्न दा सारथि मरोई गया । धृष्टद्युम्न गी बड़ा रोह चढ़ेया । ओ रथें उपपरा कुद्देआ ते भारी लट्ट लेइयै द्रोणाचार्य हुन्दे कछ जाई पुज्जा । द्रोणाचार्य होरें तीर चलाइए ओ लट्ट हेठ सुट्टी ओड़देया ।

धृष्टद्युम्न तलवार सोत्री ते शेरै आडू द्रोणाचार्य उपपर भपटेया जियां शेर अपने शकार हाथी उपपर भपटदा ऐ । पर द्रोणाचार्य होरें उसी फी नकम्मा करी ओड़देया । ते अगें नईं बधन दिता । भीमसैनै दिक्खेया जे धृष्टद्युम्न कचा नर्गे इच आई गया ऐ तां उस द्रोणाचार्य हुन्दे उपपर तीरें दी बरखा कीती ते धृष्टद्युम्न गी

मसां अपने रथ तोड़ी पजाया ।

दुर्योधनै ए दिक्खियै कलिगा दियां फौजां द्रोणाचार्य हुन्दी मद्दती गी भेजियां । भीमसैने कई कलिग जोधा मारी ओड़े । ओ शत्रुएं इच काल भगवान आडू फिरन लगा । जेड़ा लवदा जा उस्सं गी ढान्दा जा । इन्नी तवाही होई जे सारी सैना डरै कन्ने कम्बी उट्टी ।

ए दिक्खियै भीष्म पितामह होर कलिग जोधें दी मद्दतै उप्पर ने सात्यकि अभिमन्यु ते दूए जोधा भीमसैनै दी सहायता गी पुज्जे । सात्यकि नै इक तीर चलाया ते भीष्म हुन्दा सारथि भुजा सुट्टी लेया । घोड़े वे काबू होई गे ते मदानै दा नस्सन लगे ।

पाण्डवें दी सैना जोश कन्ने पागल होन लगी जिसलै उनें दिक्खेया जे भीष्म हुन्दा रथ मदान जंग थमां बाहर दौड़ा करदा ऐ । उनें मौके दा फायदा उठाया ते कौरवें दी सैना उप्पर जोरदार हमला करी दित्ता । उस दिन कौरवें दी सैना दा बड़ा नुकसान होआ । अर्जुन दी बीरता नै उनें गी ढाई सुट्टेया । कौरवें दे सदाँर किश क्षुब्ध होए ते उन्दा पहले दिनां दा उत्साह गैब होई गेया । ओ सोचन लगे सूरज तौली अस्त होऐ जे अज्जे दा जुद्ध मुक्कै ।

जिस लै सूरज पच्छिम घरोता तां भीष्म होर द्रोणाचार्य गी आखन लगे अज्जै दी लड़ाई खत्म करो । साढ़ी सैना बड़ी हुट्टी गई ऐ ते किश हौसला बी ढाई बैठी ऐ ।

दूऐ पासै कृष्ण होर ते अर्जुन खुश खुश अपने तम्बुएं इच आये, बाजे बज्जन लगे । दूए दिनै दा जुद्ध खत्म होने उप्पर कौरवें दे मनै दा ऊए हाल हा जेड़ा पहले दिन पाण्डवें दा होआ हा ।

०००

जुद्धै दा त्रीया दिन

त्रीयै दिन बड्डै ले भीष्म होरें अपनी सैना गरुड़ व्यूह रचना इच खडेरी । सारें कोला अगें आपूं खड़ोते ते सबनें दे पिच्छें दुर्योधन गी खडेरया । उनें इक इक गल्लै उप्पर इन्ना ध्यान दिता जे कौरवें गी जकीन होई गेया अज्ज कोई गड़बड़ नई होग ।

पाण्डवें बी अपनी सैना दी रचना बड़ी चतराई कन्ने कीती । अर्जुन ते धृष्टद्युम्न होरें बचारेया जे सैना गी 'अर्धचन्द्र' दी रचना इच खडेरया जा । उनें सोचया जे 'गरुड़ व्यूह' रचना दा मकाबला इस रचना कन्ने ठीक होग । 'अर्धचन्द्र' रचना दे सज्जे पासै भीमसैन ते खब्बे पासै अर्जुन आपूं सैना दा संचालन करन लगा । जुद्ध शुरू होआ । सारे शस्तर चलन लगे खून दियां नदियां बगन लगियां, ते रथें घोड़े ते हाथियें दे दौड़ने करी इन्नी धूड़ उड्डी, जे सूर्ज खटोन लगा । अर्जुनै दा हमला जोरदार हा पर शत्रू बी डटेया रेआ ।

कौरवें अर्जुनै दी पोस्टै उप्पर दबा पाया नेजे भाले ते दूए शस्तर चलन लगे । ओ शस्तर इयां चमकन जियां गासै बिजली

मिल्कदी ऐ । उन्हें अर्जुनै दे रथै उप्पर तीरें दी नेई बरखा कीती आखो सुलेयां नै खेतर घेरी लैता होऐ । पर अर्जुनै बी कमाल कुशलता कन्ने अपनी सैना गी चलाया ते अपने गाण्डीव धनुषै कन्ने तीरें दी अनसम्ब बरखा शुरू करी दित्ती ।

इक होर थां शकुनि नै बड़ी सैना लेइयै सात्यकि गी ते अभिमन्यु गी घेरी लैता । सात्यकि दा रथ भज्जी ऋट्टी गया ते उसी अभिमन्यु दे रथै इच शरण लैनी पेई ते फी दमै जनै इक्कै रथै उप्परा लड़न लगे । उन्हें शकुनि दी सैना नष्ट करी ओड़ी ।

द्रोणाचार्य ते भीष्म होरें कट्टे रलियै युधिष्ठिर हुन्दे उप्पर हमला कीता । नकुल ते सहदेव बड्डे भ्राऊ दी सहायता करन लगे । ते द्रोणाचार्य दे हमले दा जवाब देन लगे । भीमसैन ते नुआढ़े पुत्तर घटोत्कच नै दुर्योधनै दी सैना उप्पर हमला कीता । उस दिन ते इयां बभोआ जे घटोत्कच अपने बब्बै थमां दौं कदम अगगे ऐ । भीमसैने दे गुर्जे दी मार कन्ने दुर्योधन रथै उप्पर ढेई पेया ते बेहोश होई गया । सारथि दुर्योधनै गी उत्थुआं लेई गया । उस सोचेया जे अपने सैना-पति गी इयां बेहोश दिक्खियै फौजा दा जिगरा नईं ऋट्टै । पर इन्नां करने करी बी बड़ी गड़बड़ मची । भीमसैन मौके दा फायदा ठुआया ते नसदे कौरवें उप्पर जोरदार हमला कीता । द्रोणाचार्य ते भीष्म होरें जिसलै अपनी सैना इच भगवड़ पेई दी दिक्खी तां भट्ट उत्थें पुज्जे ते उत्साह बधान लगे । उन्हें खिल्लरी गई दी सैना गी किट्टे कीता ते परतिए दुर्योधन कमान करन लगा ।

दुर्योधन भीष्म पितामाह होरें गी आखन लगा—अपनी सैना गी खीस बीस हुन्दे ते मार खन्दे तुस पता नईं कियां दिक्खी लैन्दे ओ ! तुस पाण्डवें दा बड़ा लिहाज करदे ओ । तुसें मिकी पहलें साफ दस्सी ओड़ना हा जे अऊं पाण्डवें गी प्यार करनां सात्यकि ते धृष्टद्युम्न मेरे मित्र न । में उन्दे उप्पर हमला नईं करना ते न गं उनें गी मारनां । तुसें ए सारी गल्ल पहले खोल्ली लैनी ही । ए कोई तुन्दे मकाबले दे बीर न ? तुन्दी मरजी होऐ तां तुसें इन्दा

चाण्डा थापा करी ओढ़े दा होऐ । हुण बी तुस ते द्रोणाचार्य मिगी साफ दस्सी ओढ़ो जे तुन्दा बचार के ऐ ।”

इक ते लड़ाई इच मार खादी दी ही, दूए उसी पता हा जे भीष्म पितामह होर ओदे तौर तरीके ठीक नईं समझदे इस करी दुर्योधन बड़ा त्रिक्खा होइऐ बोलेया । भीष्म होर बिन्द मुस्कराये ते आखन लगे—जिसलै में तुगी नसीहत कीती ही तां स्पष्ट नईं हा आखेया? ओ नसीहत ते तू मन्त्री नईं ते जुद्ध दा फैसला करी दित्ता । में जुद्ध रोकने दी कोशिश कीती पर हुण ते ढोल गल पेई गया ऐ । हुण ते अऊं थुआड़े कन्ने गै अपना फर्ज पूरा करड । अपनी पूरी शक्ति कन्ने । अऊ बुढ़ा आदमी आं ते जिन्नां अऊं करा करनां इस कशा बद्ध नईं करी सकदा ।

ए आखिये उन्हें अपनी जुद्ध दी कार्यवाई परतिऐ शुरु करी दिती ।

दपैहरीं कशा पहलें लड़ाई पाण्डवें दे हक्कै इच गै गई ही ते ओ खुशी इच किश लापवाह होई गे हे । उन्हें सोचे दा गै नईं हा जे भीष्म पितामह होर खिल्लरी दियां फौजां किट्टियां करियै परतियै जुद्ध करन आई जाडन । पर दुर्योधन दियें त्रिक्खियें गल्लें कन्ने भड़के दे भीष्म पितामह मदान जंग इच जोरदार हमला करन लगे । ओ इक अगग हे जताई जन्दे हे तबाही करदे जन्दे हे । ओ एडी फुरती कन्ने सारे पासै द्रौड़ा करदे हे जे पाण्डवें गी इयां बझोन लगा पता नईं किन्ने भीष्म पितामह होई गे न । जेड़े उन्दे मकावले उप्पर आये उन्हें मारी गराये । ऊआं गै जियां दिये दी लो पक्खर भस्म करी ओढ़ी ऐ । पाण्डवें दी सैना खीस बीस होई गई । ते नस्सन लगी । श्री कृष्ण, अर्जुन ते शिखण्डी नै बड़ा जोर लाया पर फौजा दा जिगरा नईं बधेया । कृष्ण होरें अर्जुन गी आखेया—लै भई ! कठन समा आई गया ऐ । हुण अपने फैसले उप्पर अटल होई चल ते भीष्म पितामह, द्रोणाचार्य ते दूए मित्तरें रिश्ते नातें ते साकें ते बड़्हे बडेरें दी पर्वाह नईं कर । ए तू पतिग्या कीती ही ते हुण इसी

पूरा कर । नईं तां साढ़ी फौज खत्म होन लगी आ । हुण तुगी भीष्म पितामह हुन्दे उप्पर हमला करना चाही दा ऐ ।

अर्जुन आखन लगा—खरा ! लेई चलो रथ अगगे ।

जिसलै अर्जुन दा रथ भीष्म पितामह हुन्दे सामनै आया तां उनें तीरें दी बरखा कन्ने ओदा स्वागत कीता । अर्जुनै अपना गाण्डीव भुकाया ते तीर चलाये । भीष्म पितामह हुन्दा धनष त्रुटी गया । उनें दूआ धनश पगड़ेया पर अर्जुनै ओ बी त्रुटी ओड़ेया । भीष्म पितामह होर अर्जुनै दी धनष विद्या दा कमाल दिक्खिय बड़े खुश होए ।

“कमाल ऐ बहादरा ! उनें अर्जुन गी शाबाश दित्ती ते होर धनश लइऐ अचूक नशाने लाने गुरु कीते । जियां अर्जुन मकाबला करा करदा हा कृष्ण जी गी ओ पसन्द नईं हा । उनें सोचेया फौज अगगें गै हौसला हारी बैठी दी ऐ, ए भलेयां तवाह होई जाग, ते मामला गै मुक्की जाना ऐ । ओ बड़ी चतराई कन्ने रथ चलान लगे फी बी किन्ने बारी गै भीष्म पितामह हुन्दे तीर उनें गी ते अर्जुन गी लगगे ।

कृष्ण होरें गी बड़ा रोह चढ़ेया आखन लगे अर्जुन ए नईं जरोन्दा । जे तू नईं लड़दा तां अऊं आपू भीष्म पितामह दा बध करनां । ए आखियै उनें घोड़े दियां बागां सुट्टियां, अपना चक्कर चुक्केया, रथ पर छाल दित्ती ते भीष्म हुन्दे पासै द्रौड़े ।

पर भीष्म होर नईं घावरे । ओ सगों बड़े नन्दै कन्ने आखन लगे—“हे कमल नयन कृष्ण जी तुस आओ । अऊं तुसें गी पर्णाम करनां । तुस दुनियां दे मालक ओ । तुस रथै दा उतरिए मेरे गित्तै हेठ आये ओ । अऊं तुसें गी अपनी जिन्दू दी भेटा दिन्नां । जे अऊं तुन्दे हत्था मरोआं तां ते अऊं त्रौणें लोके इच अमर होई गया । मिगी इऐ वर देओ, मेरी मृत्यु तुन्द हत्थें गै होऐ ते अऊ महेशां गित्तै अमर होई जां ।”

अर्जुन ए दिक्खिये किश घबारेया ओ । रथा दा कुद्दियै कृष्ण हुन्दे पिच्छे द्रौड़ेया । मसां उनें गी पगड़ेया ते छन्दे करिए परताया ।

तुस मेरे कन्ने नराज नईं होवो । तुस इयां नईं करो । अऊं नईं जरकदा । अऊं नईं सुस्ती करदा ।

अर्जुनै तरले मित्रतां करिऐ कृष्ण होरें गी बापस औने गी राजी करी लैता । कृष्ण होर परतिऐ सारथि बने ते उनें घोड़े दियां बागां साम्बियां । अर्जुनै कौरवें दी सेना उप्पर बड़ा भयंकर हमला कीता । हजारों सैनक मारी ओड़े । जुद्ध दे त्रीये दिन बी कौरवें गी हार होई । जिसलै तरकालां पेइयां ते ओ अपने कैम्पै इच गे तां ओ गल्लां करा करदे हे—अर्जुन दा मकाबला कुण करी सकदा ऐ ? ओदे जित्तने इच कोई शक्क गं नईं । उस दिन अर्जुनै कमाल गै बहादरी दस्सी ।

०००

चौथा दिन

जुद्ध ते हर इक दिन इक्कै नेआ हुन्दा हा ते रोजै दा इक्कै चाली दा वर्णन सुनि सुनि मनुक्ख अवकी जन्दा ऐ। ऊऐ लड़ाई ते मारकाट। फी बी महाभारत ग्रन्थै दा बड़ा भाग गै ए लड़ाई ऐ ते जे अस इस हिस्से गी छोड़ी ओड़चै तां अस पूरी चाली इस महान ग्रन्थै दे इन्ते बड़े जोधा लोकें गी नई समझी सकदे।

बड्डै लै भीष्म पितामह होरें फी कौरवें दी सैना दी रचना कीती। द्रोणाचार्य ते दुर्योधनै ते दूएँ कन्ते भीष्म पितामह होर इयां सोभा करदे हे जियां देवतें इच इन्द्र गुर्ज लेइऐ सोभदा ऐ। हाथी ते घोड़े कन्ते सज्जी दी ते ब्यूह रचना इच बज्जी दी कौरवें दी सैना इयां लबदी ही आखो गासै उपपर तफान चढ़े दा होऐ।

भीष्म पितामह होरें सैना गी अग्रे बधने दा हुकम दिता। अर्जुन अपने रथा उपपरा शत्रु दियां हरकतां दिक्खा करदा हा। अर्जुन दे रथे उपपर झण्डा झुल्ला करदा हा ओदे उपपर हनुमान दी तस्वीर ही। अर्जुन बी लड़ने गी तयार होई गया। लड़ाई शुरू

महाभारत

होई गई । अश्वत्थामा, भूरिश्रवा, शल्य चित्रसैन ते शल पुत्तर इनें पजे अभिमन्यु गी घेरी लैता ते हमला करी दित्ता । ओ शेर बच्चा बी इनें पजे हाथिये कन्ने डटी गया । अर्जुनै दिक्खेया जे इनें पजे मेरे पुत्तरै गी घेरी लैता ऐ, उसी बड़ा रोह चढ़ेया ते शेरै आडू गरजिए ओ बी लड़ाई इच शामिल होई गया । लड़ाई भखी पेई । धृष्टद्युम्न बी भारी सैना लइऐ आई पुज्जा । शल पुत्तर चित्रसेन मारा गया । हुण शल बी लड़ाई इच आई गया । शल ते शल्य नै रलियै धृष्टद्युम्न उप्पर हमला कीता । शल्य नै तीर चलाइऐ धृष्टद्युम्न दा धनश त्रोड़ी ओड़ेया । ए दिक्खियै अभिमन्यु नै शल्य उप्पर तीरें दी बरखा कीती । ओ बचारा कचा फसेया । दुर्योधन ते ओदे भ्रा शल्य दी सहायता गी द्रौड़े । उस बेल्लै भीमसैन होर बी उत्थें आई पुज्जे । जिसलै भीमसैनै गुर्ज चुक्केया तां सारे कौरव भ्रा कम्बन लगे । इक पर्वतै आडू खड़ोता रेआ । पाण्डव जोधा बी ओदी सहायता गी आई गे । दुर्योधनै दे किश तीर भीमसैनै दी छाती इच लगे । ओ फी अपने रथै उप्पर चढ़ी गया । भीमसैनै अपने सारथि गी आखेया हे विशोक ? बड़ा शैल मौका आया ऐ । धृतराष्ट्रै दे मते सारे पुत्तर इस लै सामने आये दे न । में इनें गी इयां गै भुजा सुट्टना ऐ जियां भुनकने कन्ने पक्के दे फल डिग्गी पौन्दे न । तू जरा घोड़ें दियां बागां मजबूती कन्ने साम्बी रखेयां । अऊं इनें गी जम लोक भेजन लगां ।

भीमसैन दे तीरें दुर्योधन गी उत्थें गे खत्म करी ओड़ना हा पर उस कवच पाये दा हा । उस दिन लड़ाई इच भीमसैनै दुर्योधनै दे अट्ट भ्रा मारे ।

दुर्योधनै बड़ी भयंकर लड़ाई कीती । उस भीमसैनै दा धनश त्रोड़ी ओड़ेया । भीमसैन नै तीर चलाया जेदे अग्गें किरच नेई लग्गी दी ही । ओदे कन्ने दुर्योधनै दा धनश दौं टोटे होई गया । दुर्योधन इस थमां घबराया नई । उस नमां धनश लेया ते नेआ कस्सिए तीर चलाया जे भीमसैनै दी छाती इच लग्गा ते उसी चक्कर आई गया ते ओ रथै इच पई गया । पाण्डव जोधा

बी तीरें दी बरखा करन लगे । घटोत्कच नै अपने पिता गी इयां दिक्खेया तां उसी बड़ा रोह चढ़ेया । ओ कौरवें दी फौजा उप्पर वृट्टिऐ पेई गेया । उन्दे कछा उस हमले दी ताब नई लान होई ।

भीष्म होरें द्रोणाचार्य गी आखेया अज्ज इस राकशे कन्ने नई लड़न हुन्दा । साढ़ी सैना बी हुट्टी गई ऐ । सूर्य अस्त होन लगा ऐ । रातीं दे न्हरे इच राकशें दी ताकत गं बधदी ऐ । कल एदा चाण्डा ठप्पा करगे ।

भीष्म पितामह होरें अपनी सैना गी परतोने दा हुकम दिता । दुर्योधन अपने कैम्पे इच सोचें पेदा हा । ओदी अक्खीं इच अत्थरूं हे ओदे किन्ने गै भ्रा अज्जे दी लड़ाई इच मरोई गे हे ।

तुआई धृतराष्ट्र सञ्जय गी आखा करदे ते अड़ेया तूं रोज मिगी भैड़ियां गै खबरां सनानां ए । हर रोज हार दुःख, ते अपने प्यारे रिशतादारें दी मृत्यु दे समाचार गै सनानां ए । मेरे कशा ए नई सुनन हुन्दा । केढ़ी योजना मेरे लोकें गी बचाई सकदी ऐ । इस जुद्ध इच अस कियां जितगे ? मिगी ते बड़ा डर लग्गा करदा ऐ । इयां बभ्रोन्दा ए जे भाग मनुक्खे दे जतनें थमां ज्यादा ताकतवर हुन्दे न ।

सञ्जय आखन लगा—महाराज ! ए सब किश तुन्दे दोसै दा फल नई ? हुण दुखी होई ऐ के फायदा ऐ ? अऊं तुन्दे आस्ते शुभ समाचार कुत्थां घड़ां । हुण ते हिम्मत ते धीरज कन्ने सचाई सुनदे जाओ ।

ओहो ! बिदुर हुन्दियां गल्लां सच्चियां निकला करदियां न ।”
बुद्धे अन्ने धृतराष्ट्र होरें दुःखी होए दे आखेया ।

पञ्चमा दिन

मेरी ते हालत उस मनुखै नेई होई गई दी ऐ जेदा जहाज तबाह होइ गेदा होऐ ते ओ समुन्दरै दे तफानै इच हत्थ पैर मारा करदा होऐ । मिगी इस शोक सागरै इच जरुर गै डुब्बना पौग ।

जिसलै सञ्जय जुद्ध दियां घटनां सनान्दा हा तां धृतराष्ट्र कोला बर्दाश्त नई हा हुन्दा ते ओ दुखी होइऐ बार बार इयां बुहासरदा हा ।

ओ आखदा—भीमसैनै मेरे पुत्तर मारी ओड़ने न । मिगी अपनी सेना इच एडा शूरवीर कोई नई लबदा जेड़ा भीमसैनै दा मकाबला करिऐ मेरे पुत्तरें गी बचाइ सकै । जिसलै साड़ी सेना इच डरै कन्ने अफरातफरी पेई ते ओ नस्सन लगी । उस बेलै भीष्म पितामह, द्रोणाचार्य, कृपाचार्य, अश्वत्थामा नकैबले बइऐ के करदे हे ? आखर उन्दी योजना के ऐ ? उनें दुर्योधनै दी कटू ते कियां सहायता करनी ऐ ? मेरे पुत्तरें तबाही कशा कियां बचना ऐ ?

ए आखदा धृतराष्ट्र फुट्टिए रोन लगी पेया ।

सञ्जय आखन लगा—राजन, शान्त होवो । पाण्डव सचाई उप्पर लड़ा करदे न । इस करी जित्ता करदे न । थुआड़े पुत्तरें दी बहादरी उप्पर कोई शक नई । पर ओ बड़ी दुष्टता दियां गल्लां सोचदे न । इस करी किस्मत उन्दा साथ नई दिन्दी । उनें पाण्डवें कन्ने बेन्याई कीती दी ऐ । ओदा फल भोगा करदे न । पाण्डव कोई जादू, दूना जा मैम्तरें कन्ने नई जित्ता करदे । ओ क्षत्रिय धर्म पालन करा करदे न । उन्दे पासै सचाई ऐ इस करी ओ शक्ति शाली न । भित्तरें ते हितचिन्तकें तुसें गी नेक सलाह दित्ती । तुसें उन्दी गल्ल ऐवें सुट्टी पाई । बिदुर, भीष्म पितामह, द्रोणाचार्य ते में तुसें गी समझान्दे हे पर तुसें ध्यान गै नई दित्ता । ते अपनी मन मरजी करदे रे । जियां कोई मूर्ख बमार कौड़ी दवाई नई पीन्दा, इयां गै तुसें साढ़ी नसीहत नई मन्नी । जेकर तुस मन्नी लैन्दे तां तुन्दे लोक नई हे मरोने । पर तुसें अपने पुत्तरें दी गै गल्ल मन्नी । हुण तुस दुःख पा करदे ओ । कल रातीं दुर्योधन बी भीष्म होरें गी इऐ प्रश्न पुच्छेया हा । ते भीष्म होरें इऐ उत्तर दित्ता हा जेड़ा में तुसें गी दित्ता ऐ ।

चौथै दिन जिसलै लड़ाई बन्द होई तां दुर्योधन आपू भीष्म हुन्दे तम्बू इच गया ते चरण बन्दना करिए आखन लगा—हे पितामह जी ! दुनियां जानदी ऐ जे तुस ऐसे जोधा ओ जिने डर भाखा गै नई । इयां गै द्रोणाचार्य, कृपाचार्य, अश्वत्थामा, कृतवर्मा सुदक्षिण, भूरिश्रवा, विकर्ण ते भगदत निडर जोधा न । इनें शूरवीरें गी मृत्यु दा डर गै नई । इन्दी शूरवीरता दी कोई हद्द नई । तुन्दे बरोबर गै । सारे पाण्डव बी किट्टे होई जान तां बी तुन्दे चा कुसें गी नई हराई सकदे । फी एदे इच के भेत ऐ जे हर रोज पाण्डवें कोला असें गी हार हुन्दी ऐ ।

भीष्म होर आखन लगे—हे दुर्योधन ! ध्यान दइऐ सुन ! में हर समें तुगी चंगी नसीहत दित्ती ऐ । पर तू बड्डे बडेरें दी कोई गल्ल नई मन्नी । अऊं तुगी फी नसीहत करना जे पाण्डु दे

पुत्तरें कन्ने हुण बी सुलह करी लौ ।

एदे इच तेरा बी भला ऐ ते दुनियां दा बी भला ऐ । इऐ रस्ता ऐ जेड़ा ठीक ऐ । तुस इक्कै राज परिवार दे लोक ओ । ए सारा देस तुन्दा अपना ऐ । में पहले बी तुसें गी नसीहत कीती ही पर तू ध्यान नईं दित्ता । इयां गै मुट्ठी पाई । एदे करी पाण्डवें कन्ने बड़ी भारी बेन्याईं होई ऐ । ओदा फल तू हुण भोगा करना एं । कृष्ण भगवान् आपू पाण्डवें दी रखेया करा करदे न । थुआड़ी जित्तेने दी हीखी मूर्खता ऐ । हुण बी सुलह दा वकत लंघी नईं गया । इयां तू राजा बनेया रौगा पाण्डव भ्रा थुआड़े मित्तर होडन । शत्रु नईं । ते जे तू कृष्ण जी ते अर्जुन दी निन्द्या गै करदा रौगा तां तबाही गै तबाही ऐ । ओ ते साख्यात् नर ते नारायण न । दुर्योधन उत्थुआं उट्टेया ते अपने तम्बू इच आई गया । पर उसी सारी रात नीन्दर नईं आई ।

दूऐ दिन फी जुद्ध शुरु होआ । भीष्म होरें सैना दी बड़ी मजबूत रचना कीती । इयां गै धृष्टद्युम्न पाण्डवें दी सैना दी रचना कीती । पाण्डवें दी सैना इच सारें कोला अगें भीमसैन हा । ओदे पिछे शिखण्डी, धृष्टद्युम्न, ते सात्यकि खड़ोते । ए जोधा ते बाकी सर्दार सारी सैना दी रखेया करन लगे । सारें कोला पिछें युधिष्ठिर ते नकुल सहदेव हे । भीष्म होरें अपना धनश चुक्केया ते तीर चलाने शुरु करी दित्ते । भीष्म जी दे हमले करी पाण्डवें दा खूब नकसान होआ । अर्जुन ऐ दिक्खेया ते भीष्म हुन्दे उप्पर कस्सी कस्सिए तीर छोड़न लगा ।

दुर्योधन द्रोणाचार्य हुन्दे कोल गया ते जियां ओदी आदत ही जवर्दस्त शकत करन लगा । द्रोणाचार्य होरें उसी खूब फण्डेया— तू बड़ा जिदी एं । बगर जाने दे गै तू बोलना शुरु करी दिन्नां एं । तुकी पाण्डवें दी शक्ति दा पदा नईं । अस जिन्ना जोर होर सकदा ऐ ला करने आं ।

द्रोणाचार्य हुन्दा जोरदार हमला सात्यकि उप्पर हा ।

सात्यकि वी बुद्धों बुद्धों जवाब देया करदा हा । भीमसैन ओदी सहायता करन लगा । जुद्ध खूब भली पेया । भीष्म पितामह, द्रोणाचार्य ते शल्य होरें किट्टे होइये सात्यकि उप्पर हमला करी दित्ता शिखण्डी नै भीष्म हुन्दे उप्पर तीरें दी बरखा गुरु कीती । जिसलै शिखण्डी सामनै आया तां भीष्म होर दुरी गे । उन्दा सिद्धान्त हा जे औरत दा मकाबला नईं करनां, ना गै हमला करनां । शिखण्डी जमदे ते कुड़ी हा । ए सिद्धान्त उन्दे गित्तै आखर इच मृत्यु दा कारण बनेया । जिसलै द्रोणाचार्य होरें दिक्खेया जे भीष्म होर उठी गे न तां उनें शिखण्डी उप्पर जोरदार हमला कीता । ते शिखण्डी गी नसाई दित्ता ।

पञ्चमे दिन दपैहरी कशा पहलें गै जोरदार लड़ाई होई । ते मते लोक मरोए । सजा दुर्योधनै सात्यकि दा मकाबला करने गी फौज भेजी । पर सात्यकि नै उसी तबाह करी ओड़ेया ते भूरिश्रवा उप्पर हमला करने गी अगें बधेया । भूरिश्रवा बड़ा शक्तिशाली जोधा हा । उसनै सात्यकि गी इन्ना दवाया जे ओ घाबरी गया । सात्यकि दे दस पुत्तर वी लड़ा करदे हे । उनें पिता गी मुसीबतै इच दिक्खेया ते उनें गी मदत देन लगे । उनें भूरिश्रवा उप्पर हमला कीता । पर भूरिश्रवा उन्दे कोला डरने आला नईं हा । उसनै उन्दा किट्ठा हमला परताई दित्ता ते बिल्कुल नईं जरकेया । उसनै नेए कस्सिए तीर चलाये जे ओ सारे मरोई गे । ओ बचारे मदान जंग इच इयां डिग्गीपे जियां बिजली कन्ने ढट्टे दे बूटे हुन्दे न ।

सात्यकि गी बड़ा दुख होआ ते रोह चढ़ेया ओ भूरिश्रवा अगें बधेया । दौनें दे रथ इक दूए कन्ने टकराये ते चकनाचूर होई गे । दौनें तलवारां सोत्रियां ते इक दूए दे सामनै आई गे ते भयकर द्वन्द गुरु होआ । भीमसैन आया ते सात्यकि गी जोरेयां पगड़िये परें लई गया । भीमसैन जानदा हा जे भूरिश्रवा बड़ा भारा तलवार दा धनी ऐ ते सात्यकि नै ओदे हत्थें मरोई जानां ऐ ।

उस सत्रा अर्जुनै बी हजारों जोधा जमलोक पजाये । दुर्योधन जिन्नी सैनां ओदे बक्खी भेजदा हा ओ दिये उप्पर पक्खरें आडू भस्म हुन्दी जन्दी ही ।

जिसलै दिन घरोता भीष्म होरें अपनी सैना गी जंग बन्द करने ते परतोने दा हुकम दित्ता । पाण्डवें दे सहायक राजे बी अर्जुनै कोल किट्टे होए ते उनें जोरै कन्ने ओदी जय दे नारे लाये । दबक्खी दियां फौजां, घोड़े हाथी अपने अपने कैम्पें इच उठी गे ।

०००

छेमां दिन

युधिष्ठिर हुन्दी आज्ञानुसार धृष्टद्युम्नै पाण्डवें दी सेना मगरमच्छ-ब्यूह दी रचना इच खडेरी । कौरवें दी सेनां क्रौंच-ब्यूह दी रचना इच ही । जियां सैना दे ब्यूहें दे नां न इयां गै शरीरक बर्जशें ते आसनें दे बी नां न । सैना दी बड्डी रचना गी ब्यूह आखदे न । केड़ा ब्यूह कुस बेलै बनाना ऐ ए मौका ते स्थिति दिक्खियै ते हमला करने जां अपने आप गी बचाने दी योजना मताबक हुन्दा हा । कुत्थें किन्नी फौज खड़ी करनी ते कियां करनी जियां जियां स्थिति बदलदी जन्दी ही ऊंआं ऊंग्रा करदे जन्दे हे ।

छेमां दिन बड़ा घोर जुद्ध होआ ते बड्डलै गै बड़ा खून खराबा होआ । द्रोणाचार्य हुन्दा सारथि मारेया गया । द्रोणाचार्य होरें आपू गै बागां समालियां ते तीरें दी बरखा बी शुरू करीदित्ती । उनें बड़ी तबाई मचाई । ओ जताई जन्दे हे तबाही करदे जन्दे हे । आखो कोई अग्गी दा लोरा होऐ जेड़ा रूएँ दे ढेरें इच फिरा करदा होऐ ।

दौनै फौजें दियां फार्मैशनां ब्रुट्टी गइयां । ते अन्धा धुन्द भयंकर लड़ाई शुरू होई गई । रत्तू दे परनाले बगन लगे ते मदान लोथें कन्ने ते मोए दे घोड़े हाथी ते भज्जे ब्रुट्टी दे रथें कन्ने खटोई गया ।

भीमसैन शत्रू दी सेना च धुस्स दिन्दा अगें बधी गया । ओ दुर्योधनै दे भ्रायें दी तलाश इच हा । ओ उनें गी खत्म करना चान्दा हा । उनें गी तुप्पने दी लोड़ नईं पई । उनें सारें किट्टे होइए भीमसैनै उप्पर हमला करी दित्ता । दुशासन, दुर्विषय, दुर्मत, जय, जयत्सेन, विक्रम, चित्रसैन, सुदर्शन, चारुचित्र, सुवर्मा, दुष्कर्ण ते होर सारे किट्टे होए । भीमसैनै दे खल्लड़े इव त्राह गै नईं हा । ओ सारें कन्ने लड़न लगा । उन्दी मरजी ही भीमसैनै गी कैद करी लैचै । ते भीमसैन उनें गी जियें मारना चान्दा हा ।

बड़ा भयंकर जुद्ध होण लगा । जियां भलोके समें इच देवतें ते असुरें दा जुद्ध हुन्दा हा । भीमसैन बड़ा काह्ला पई गया । उस रथै दा छाल दित्ती गुर्ज पगड़ेया ते सिद्धा कौरवें पासै द्रौड़या । ओ ते बस उनेंगी खत्म ग करनां चान्दा हा ।

जिसलै धृष्टद्युम्न होरें भीमसैन हुन्दा रथ शत्रु दी फौजें इच लोप हुन्दा दिक्खेया तां उसी चिन्ता होई । ते ओ द्रौड़या । ओ रथै कोल पुज्जा तां भीमसैन रथै बिच नईं हा । ओ रनाका होई गया । उस सारथि गी पुच्छेया—विशोक ! भीमसन कुत्थें ऐ ? ओ मिगी जिन्दू थमां बी प्यारा ऐ । धृष्टद्युम्न नै समझेया जे भीमसैन मरोई गया ।

विशोक नै मत्था नुआया ते द्रुपद दे पुत्तर गी आखेया भीमसैन होरें मिगी रुकने गी आखेया ते बिना बलगे गै अगें बधी गे । उन्दे हत्थै इच गुर्ज ऐ । ओ शत्रु दी सेना बिच धसी गे दे न । धृष्टद्युम्न घाबरेया जे भीमसैनै घिरी जाना ऐ ते मरोई जाना ऐ । ओ भीमसैन गी तुपदा शत्रु दी सेना पासै टुरी पेया । भीमसैन जताईं दा बधे दा हा उत्थ हाथी बढोए दे पेदे हे । जिसलै उनें भीमसैन गी दिक्खेया तां ओ शत्रुएं कन्ने घिरी गेदा हा । शत्रु रथें परा लड़ा करदा हा । ओदे हत्थै इच गुर्ज हा । ओदा शरीर जरूमी होई गेदा हा । ते ओ रोहै कन्ने गर्जा करदा हा । धृष्टद्युम्न नै उसी गलें लाया ते रथै उप्पर बहालियै लइ आया । उस ओदे शरीरै इच लग्गे दे तीर कडुने शुरू कीते ।

दुर्योधनै अपने सदरिं गी हुकम दिता जे धृष्टद्युम्न ते भीमसैनै उपपर हमला करो। उन्दे परतोइयै हमला करने गी नईं डीको। उनें किट्टे होइयै हमला करी दिता। बिचा उन्दी मरजी नईं ही जे होर लड़ाई होए। धृष्टद्युम्न कोल इक गुप्त शस्तर हा। ओ उनेंगी द्रोणाचार्य हुन्दे कोला थोए दा हा। ओदे चलाने कन्ने शत्रु दी सेना स्तब्ध होई जन्दी ही। पर दुर्योधन आपू वी आइयै शामिल होई गया। उस नेए शस्त्र चलाये जिन्दे कन्ने स्तब्ध करने आले धृष्टद्युम्न दे शस्तर नकारा होई गे।

ठीक उसै वेल्लै युधिष्ठिर हुन्दी भेजी दी सैना आई पुज्जी। बारां रथ हे ते अभिमन्यु उन्दी कमान करा करदा हा। अभिमन्यु आइयै भीमसैन हुन्दी सहायता करन लगा। धृष्टद्युम्न ए दिक्खियै बड़ा खुश होआ। इन्ने चिरै इच भीमसैन होर वी ताजा दम होई गेदे हे। ओ परतिथै लड़ने गी तयार हा। ओ वी केकय राजा दे रथै उपपर चढ़ियै अपने साथिएं दी बक्खी खड़ोइयै लड़न लगा।

उस दिन द्रोणाचार्य होर बड़े भयकर बने दे हे। उनें धृष्टद्युम्न दा सारथि मारी ओड़ैया। घोड़े मारी ओड़े। ते रथ भन्नी ओड़ैया। धृष्टद्युम्न अभिमन्यु दे रथै पर जाई बैठा। सैना किश थिड़कन लगी। कौरव सैना द्रोणाचार्य दी जय दे नारे लान लगी।

उस दिन अन्ने बाहू खून खराबा हुन्दा रेआ। इक मौका आया जे दुर्योधन ते भीमसैन आमनै सामनै होई गे। दौनें इक दूए गी सनाइयां। ते फी तीरे दे बरखा करन लगे। दुर्योधन गी तीर लगा ते ओ बेहोश होई गया कृपाचार्य नै बड़ी चतराई कन्ने उसी उत्थुआं अपने रथै उपपर कड़ी नेता। भीष्म पितामह होर आपू उत्थै पुज्जे, हमला कीता ते पाण्डवें दी सैना गी तित्तर बित्तर करी दिता। सूरज अस्त होआ करदा पर लड़ाई जारी ही। बड़ा भयंकर जुद्ध हा हजारों लोक मरोए। रातीं लड़ाई बन्द होई। युधिष्ठिर होर खुश होए जे भीमसैन ते धृष्टद्युम्न सम्मे सीने अपने कैम्पें इच बापस आई गे न।

सतमां दिन

दुर्योधन बड़ा घाल होए दा भीष्म पितामह कोल पुज्जा ते आखन लगा—हर रोज लड़ाई साढ़े खलाफ गै जा करदी ऐ । साढ़ा ब्यूह वुट्टी जन्दा ऐ ते सर्दार मरोई जन्दे न । तुस किश करदे गे नई ।

भीष्म पितामह नै उसी दलासा दित्ता—तू जिगरा की छोड़ना एं ? साढ़े कोल सारे शूरवीर जर्नेल न द्रोणाचार्य, शल्य, कृतवर्मा, अश्वत्थामा, विकर्ण, भगदत्त, शकुनि, अवन्ती दे दवें भ्रा, त्रिगर्त दा राजा, मगध दे महाराज, ते कृपाचार्य । ए सारे शूरवीर तेरे गित्तै अपने प्राण देनं गी तयार न । तू की दिल ढाना एं ? इस नराशा गी छोड़ । ए आखियै उनें लड़ाई दे हुकम दित्तै ।

भीष्म पितामह नै दुर्योधन गी आखेया—ए हजारां रथ, घोड़े घुड़स्वार, ए जंगी हाथी, ए शस्तर धारी प्यादे जेड़े किन्ने राज्जें थमां आये दे न, थुआड़े गित्तै लड़न आये दे न । नेई सैना कन्ने तू देवतें गी हराई सकना एं । डर नई ।

इयां उनें दुर्योधनै दा हौसला बधाया ते जरुमें उप्पर लाने गी

मल्हम दित्ती । दुर्योधन नै मल्हम लाई । उसी बड़ा सुख लगगा । ओदे जखम भलोई गे । भीष्म पितामह दे शब्दें कन्ने ओदा हौसला बधेया । उस दिन सैना चक्कर व्यूह दी रचना इच ही । हर इक जंगी हाथी कन्ने सत घुड़स्वार सैनक हे । हर इक घुड़स्वार कन्ने दस दस धनष धारी हे । ते इक इक धनश धारी कन्ने इक इक ढाल-त्रन्द जोधा हा । हर इक नै कवच लाये दा हा । सैना बिच दुर्योधन इयां सोभै करदा हा जियां देवतें इच इन्द्र ।

युधिष्ठिर होरें अपनी सैना वज्जर व्यूह दी रचना इच खडेरी । अज्ज कई थारें उप्पर इक दम गै लड़ाई शुरू होई गई । भीष्म होर अर्जुन कन्ने आपू लड़न लगे । द्रोणाचार्य ते बिराट इक दूए कन्ने जटोई गे । शिखण्डी ते अश्वत्थामा दी बक्व लड़ाई होन लगी । धृष्टद्युम्न ते दुर्योधन आपू इच पलची गे । नकुल ते सहदेव नै अपने मामे शल्य उप्पर हमला कीता । अरुन्ती दे राजे युधामन्यु गी घेरेया ? भीमसैन नै कृतवर्मा, चित्रसेन, विकर्ण ते दुर्मर्ष कन्ने जुद्ध शुरू कीता । घटोत्कच ते भगदत्त, अलम्बश ते सात्यकि, भूरिश्रवा ते धृष्टकेतु, युधिष्ठिर ते श्रुतायु ते चेकितान ते कृपाचार्य सारे गै जुद्ध करन लगे । द्रोणाचार्य ते बिराट दी लड़ाई इच बिराट होर हारे । उन्दा रथ भज्जी गया ते ओ अपने पुत्तर 'शंख' दे रथे उप्पर चढ़ी गे । बिराट हुन्दे दौ पुत्तर उत्तर ते श्वेत पहले दिन मरोई गे हे । इस सतमें दिन 'शंख' बी मरोई गया । उस बेल्लै बिराट होर मसां ओदे रथे उप्पर चढ़े गै हे । द्रुपद हुन्दा पुत्तर शिखण्डी अश्वत्थामा हुन्दे कशा हारी गया । ओदा रथ चूटी गया ओ बचारा मसां रथा परा कुदेया ते तलवार ढाल लेइए मदान जग इच भुजा आई खड़ोता । अश्वत्थामा नै तीर चलाइये ओदी तलवार ते ढाल बी चोड़ी ओड़ी । शिखण्डी नै भज्जी दी तलवार गै अश्वत्थामा उप्पर चलाई । पर अश्वत्थामा नै ओ बी कट्टी ओड़ी । शिखण्डी भलेयां हारिये सात्यकि दे रथे पर चढ़िये पिछे हटी गया । सात्यकि ते अलम्बश दे बिच लड़ाई होई । पहलें ते सात्यकि गी हार होई । पर फी उस अलम्बश गी खिही ओड़ेया ।

धृष्टद्युम्न ते दुर्योधन दी लड़ाई इच दुर्योधनै दे घोड़े मारे गये । उसी अपने रथ परा उतरना पेया । फी बी ओ तलवार लइयै लड़दा रेआ । शकुनि आया ते उसी अपने रथे उप्पर बहालियै लई गया । कृतवर्मा नै भीमसैनै उप्पर जोरदार हमला कीता । पर उसी बुरी चाली हारना पेया । ओदा रथ भज्जी गया । घोड़े मारे गये । उस हार मन्त्री ते शकुनि दे रथे पासै द्रौड़िया । ओदे सारे शरीरै उप्पर तीर लग्गे दे हे । ओ शकुनि दे रथे पासै इयां द्रौड़िया जियां घायल सूर बनै गी द्रौड़दा ऐ ।

युधामन्यु नै अवन्ती दे दौनें भ्रायें विन्द ते अनुविन्द गी हराया उन्दी दौनें दी सैना नष्ट होई गई । भगदत्त नै घटोत्कच उप्पर हमला कीता ते ओदे सारे साथिऐं गी मारी ओड़िया । घटोत्कच इक्कला गै मकाबला करदा रेआ । पर आखर उसी बी नस्सना पेया । उसी नस्सदे दिक्खियै कौरवें दी फौज खुश होई ।

शल्य नै अपने भनेऐं उप्पर हमला कीता । नकुल दे घोड़े मरोई गे । उसी अपने भ्राऊ दे रथे उप्पर चढ़ना पेया । दमै जने इक्के रथे परा जुद्ध करदे रे । शल्य गी सहदेव दा तीर लग्गा ते ओ बेहोश होई गया । सारथि चतराई कन्ने उसी कड़िऐ लई गया । जिसलै शल्य गी मदानै थमां निकलदे दिक्खेया नां कौरवें दी सैना दा हौसला ऋट्टी गया । नकुल ते सहदेव जित्तै दे शंख बजान लगे । उनें मौके दा फायदा ठुआया ते कौरवें दी सैना गी खरा नकसान पजाया ।

दपैरीं युधिष्ठिर होरें श्रुतायु उप्पर हमला कीता श्रुतायु नै नेए नशाने दे ते कस्सियै तीर चलाये जे युधिष्ठिर हुन्दे शस्तर नकारा करी ओड़े । उन्दा कवच ऋट्टी गया ते ओ खूब जख्मी होई गे । युधिष्ठिर होरें गी बड़ा क्रोध आया उनें नेआ कस्सियै तीर चलाया जे श्रुतायु दा छाती दा कवच चरोई गया । युधिष्ठिर होर रोहै कन्ने बला करदे हे । श्रुतायु दा रथ भज्जी गया घोड़े मरी गे । ते ओ प्यादा गै मदानै दा नस्सेया । ओदे नस्सने कन्ने दुर्योधनै दी सैना भलेयां जिगरा छोड़ी बैठी ।

कृपाचार्य ते चेकितान दी लड़ाई इच चेकितान नै हमला कीता पर ओदा रथ ब्रुट्टी गया । ओ रथै परा उतरेया ते उस कृपाचार्य दे रथै उप्पर हमला कीता । कृपाचार्य होर बी भुआ उतरी आये । ते तीर चलान लगे । चेकितान बुरी चाली घाल होआ ।

उस अपना गुर्ज घमाया ते कृपाचार्य उप्पर चलाया, पर कृपाचार्य नै अपने तीरै कन्ने उसी नकारा करी ओड़ेया । फी दमै जनें आपूँ इच गुत्थम गुत्था होई गे । ते भुआ डिग्गी पे । भीमसेन होर आये ते चेकितान गी लई गे । शकुनि आया ते जखमी कृपाचार्य होरें गी लेई गया ।

भूरिश्रवा गी धृष्टकेतु दे छयानवे तीर लगगे हे । ओ बीर जोधा रत्तू कन्ने लब्डोए दा सूर्य भगवान लवदा हा । छाती इच लगगे तीरें कन्ने ओदी सोभा खूब लवदी ही । उस हालती विच उस धृष्टकेतु गी हार मन्नने ते नस्सने उप्पर मजबूर करी दिता ।

दुर्योधनै दे त्रौं भायें अभिमन्यु उप्पर हमला कीता, उस उनें गी बुरी चाली हराया पर जियें नईं मारेया । उनें गी मारने दी सगन्ध भीमसेन होरें चुक्की दी ही । फी भीष्म पितामह नै अभिमन्यु उप्पर हमला कीता ।

अर्जुनै ए दिक्खियै कृष्ण जी गी आखेया रथै गी भीष्म हुन्दे पासै लेई चलो ।

इस मौके उप्पर बाकी पाण्डव बी अर्जुन दी सहायता गितै आई गे । पर भीष्म पितामह होर इक्कले गे पजे दा मकाबला करदे रे । सूर्य अस्त होई गया, जंग बन्द होई गई । दक्खी दे जोधा अपने अपने कैम्पे इच ग उठी । ते अपने जखमें दी मल्हम पट्टी करान लगे । ते रमान करन लगे । कोई घण्टे आस्तै मधुर संगीत होन लगा जोधा लोकें गी किश सुख देने आस्तै । उस समै इच कुसै जंग दी गल्ल नईं कीती । नफरत दी गल्ल नईं कीती । ओ घड़ी सुगै दे नन्दै दी घड़ी ही । ओ नजारा दिक्खने आला हा । इसै गल्लै थमा पता लग्गी जन्दा ऐ जे महाभारत के शिक्षा दिन्दा ऐ ।

धृष्टद्युम्न ते दुर्योधन दी लड़ाई इच दुर्योधनै दे घोड़े मारे गये । उसी अपने रथ परा उतरना पेया । फी बी ओ तलवार लइयै लड़दा रेआ । शकुनि आया ते उसी अपने रथै उप्पर बहालियै लई गया । कृतवर्मानै भीमसैनै उप्पर जोरदार हमला कीता । पर उसी बुरी चाली हारना पेया । ओदा रथ भज्जी गया । घोड़े मारे गये । उस हार मन्त्री ते शकुनि दे रथै पासै द्रौड़िया । ओदे सारे शरीरै उप्पर तीर लग्गे दे हे । ओ शकुनि दे रथै पासै इयां द्रौड़िया जियां घायल सूर बनै गी द्रौड़दा ऐ ।

युधामन्यु नै अवन्ती दे दौनें भ्रायें विन्द ते अनुविन्द गी हराया उन्दी दौनें दी सैना नष्ट होई गई । भगदत्त नै घटोत्कच उप्पर हमला कीता ते ओदे सारे साथिएं गी मारी ओड़िया । घटोत्कच इक्कला गै मकाबला करदा रेआ । पर आखर उसी बी नस्सना पेया । उसी नस्सदे दिक्खियै कौरवें दी फौज खुश होई ।

शल्य नै अपने भनेए उप्पर हमला कीता । नकुल दे घोड़े मरोई गे । उसी अपने भ्राऊ दे रथै उप्पर चढ़ना पेया । दमै जने इक्के रथै परा जुद्ध करदे रे । शल्य गी सहदेव दा तीर लग्गा ते ओ बेहोश होई गया । सारथि चतराई कन्ने उसी कड़िऐ लई गया । जिसलै शल्य गी मदानै थमां निकलदे दिक्खेया नां कौरवें दी सैना दा हौसला ऋट्टी गया । नकुल ते सहदेव जित्तै दे शंख बजान लगे । उनें मौके दा फायदा ठुआया ते कौरवें दी सैना गी खरा नकसान पजाया ।

दपैरीं युधिष्ठिर होरें श्रुतायु उप्पर हमला कीता श्रुतायु नै नेए नशाने दे ते कस्सियै तीर चलाये जे युधिष्ठिर हुन्दे शस्तर नकारा करी ओड़े । उन्दा कवच ऋट्टी गया ते ओ खूब जख्मी होई गे । युधिष्ठिर होरें गी बड़ा क्रोध आया उनें नेआ कस्सियै तीर चलाया जे श्रुतायु दा छाती दा कवच चरोई गया । युधिष्ठिर होर रोहै कन्ने बला करदे हे । श्रुतायु दा रथ भज्जी गया घोड़े मरी गे । ते ओ प्यादा गै मदानै दा नस्सेया । ओदे नस्सने कन्ने दुर्योधनै दी सैना भलेयां जिगरा छोड़ी बैठी ।

कृपाचार्य ते चेकितान दी लड़ाई इच चेकितान नै हमला कीता पर ओदा रथ ब्रुट्टी गया । ओ रथै परा उतरेया ते उस कृपाचार्य दे रथै उप्पर हमला कीता । कृपाचार्य होर बी भुआ उतरी आये । ते तीर चलान लगे । चेकितान बुरी चाली घाल होआ ।

उस अपना गुर्ज घमाया ते कृपाचार्य उप्पर चलाया, पर कृपाचार्य नै अपने तीरै कन्ने उसी नकारा करी ओड़ेया । फी दमै जनें आपूँ इच गुत्थम गुत्था होई गे । ते भुआ डिग्गी पे । भीमसेन होर आये ते चेकितान गी लई गे । शकुनि आया ते जखमी कृपाचार्य होरें गी लेई गया ।

भूरिश्रवा गी धृष्टकेतु दे छयानवे तीर लग्गे हे । ओ बीर जोधा रत्तू कन्ने लब्डोए दा सूर्य भगवान लवदा हा । छाती इच लग्गे तीरें कन्ने ओदी सोभा खूब लवदी ही । उस हालती बिच उस धृष्टकेतु गी हार मन्नने ते नस्सने उप्पर मजबूर करी दित्ता ।

दुर्योधनै दे त्रौं भायें अभिमन्यु उप्पर हमला कीता, उस उनें गी बुरी चाली हराया पर जियें नईं मारेया । उनें गी मारने दी सगन्ध भीमसेन होरें चुक्की दी ही । फी भीष्म पितामह नै अभिमन्यु उप्पर हमला कीता ।

अर्जुनै ए दिक्खियै कृष्ण जी गी आखेया रथै गी भीष्म हुन्दे पासै लेई चलो ।

इस मौके उप्पर बाकी पाण्डव बी अर्जुन दी सहायता गितै आई गे । पर भीष्म पितामह होर इक्कले गे पजे दा मकाबला करदे रे । सूर्य अस्त होई गया, जंग बन्द होई गई । दक्खी दे जोधा अपने अपने कैम्पें इच ग उठी । ते अपने जखमें दी मल्हम पट्टी करान लगे । ते रमान करन लगे । कोई घण्टे आस्तै मधुर संगीत होन लगा जोधा लोकें गी किश सुख देने आस्तै । उस समै इच कुसै जंग दी गल्ल नईं कीती । नफरत दी गल्ल नईं कीती । ओ घड़ी सुगै दे नन्दै दी घड़ी ही । ओ नजारा दिक्खने आला हा । इस्सै गल्लै थमा पता लग्गी जन्दा ऐ जे महाभारत के शिक्षा दिन्दा ऐ ।

अठमां दिन

अठमैं दिन भी भीष्म पितामह होरें अपनी सना दी रचना कछोपड़ ब्यूह दी बनाई । युधिष्ठिर होरें धृष्टद्युम्न गी आखेया शत्रू नैं कछोपड़ ब्यूह दी रचना बनाई ऐ तुस नेई रचना बनाओ जेदे कन्ने ए भटपट त्रुटै ।

धृष्टद्युम्न अपने कम्मै इच जटोई गेया । उस पाण्डव सैना गी त्रिनुक्करा बनाया । इक सिरे उपपर भीमसैन दूए उपपर सात्यकि ते त्रीये मभाटले उपपर युधिष्ठिर होर । साढ़े बजुर्गे जुद्ध बिद्या इच बड़ी उन्नति कीती दी ही । ए छड़ी लिखियै नई ही हुन्दी परम्परा मतावक क्षत्रियें गी अपने कुलै इच गै थोई जन्दी ही । ऊऐ ने कवच ते ऊऐ ने तरीके बर्तोंन्दे हे जनेह मौके दी जरूरत हुन्दी ही ते जां शत्रू बर्तदा हा ।

कुरु क्षेत्रै दा जुद्ध किश हजार साल पहले होआ । अज्जै दे जंगै दे तरीके दिक्खियै असैं गी महाभारतै दे जमाने दे जुद्ध दे वर्णन गी छड़ा गप्प जा कपोल कल्पना नई आखना चाही दा ।

कोई डेढ़ सौ साल पहले अंग्रेज जनैल नैल्सन ने समुन्दरी लड़ाइयां लड़ियां ते अमर शोहरत हासल कीती । अज्ज कल्ले दे समुन्दरी जुद्धे इच बर्तने आले अस्तर शस्तर दिक्खिये नैल्सन दे समे दे अस्तर शस्तर बिल्कुल अजीब ते मजाक गे लबडन । जेकर डेढ़ सौ बरे इच इत्ती तब्दीली होई सकदी ऐ तां ते महाभारत दे समे दी गल्ले ते अज्जे दी तब्दीलिये गी दिक्खिये चर्ज करने दी कोई लोड़ नई ।

दूई गल्ल असें गी होर बी सामने रखनी चाही दी ऐ जे कविये दी वृत्तिये ते साहित्यिक लेखके दे लेखे इच असें गी शस्त्रे ते जुद्ध दे तरीके दी बिल्कुल ठीक ते लौकी लौकी व्याख्या दी मेद नई करनी चाही दी । जंगी कम्म पुराने समे इच जंगी अफसरें गोचर गे हुन्दे हे । क्षत्रिये दा ए कम्म हुन्दा हा । सिक्खना सखाना क्षत्रिये दा अपना कम्म हुन्दा हा । जुद्धे दे तौर तरीके ते भेत खानदानां भेत हुन्दे हे ते परम्परा मतावक पुस्तदर पुस्त चले औन्दे हे । पिता पुत्तर गी सखान्दा हा । सैनिक शिक्षा दे ग्रन्थ नई हुन्दे हे । कविये ते ऋषिये दे ग्रन्थे इच ए चीजां कुत्थों औनियां हियां । अगर कुसै उपन्यासै इच कुसै बमारी दा हाल होऐ ते ओदा इलाज बी दस्से दा होऐ ओदे कन्ने जरूरी नई जे कुसै डाक्टर गी सन्दोख होईजा । ते ए बी कोई जरूरी गल्ल नई जे जुद्धे दे तरीके ते टंग, कहानिये विच बी दस्से दे होन ।

इस करी ब्यास हुन्दा महाभारत पढ़िये कोई टकोदा नई दस्सी सकदा जे 'कछोपड़' ब्यूह के चीज ऐ जा कमल ब्यूह के चीज ऐ । साढ़े कोल एदा कोई जवाब नई जे तीरे दी बरखा करिऐ अपने गिर्द रखेया कियां बनाई लैन्दे हे । जां औन्दे शस्त्रे गी कियां कट्टी ओड़दे हे । जां सारा शरीर तीरे कन्ने छलनी होई जाने उप्पर बी व्यक्ति कियां जी सकदा हा । पाये दा कवच सौनके गी जां जनैले गी कुत्थों तोड़ी बचाई सकदा हा । जखिमएं गी जुद्धे चा कियां लेई जन्दे हे । जां मुर्दा शरीरे दा के करदे हे । प्राचीन जुद्धे इच इन्दे बारे इच के करदे हे पता नई लगदा भाये महाभारत इच बड़ा

शैल ते खुल्ला वर्णन दित्ता दा ऐ ।

भीमसैन धृतराष्ट्र हुन्दे उस दिन बड्डैलै गै अट्ट पुत्तर मारी ओड़े हे ।
 दुर्योधनै दा मन कम्बी उट्टेया हा । ओदे मितर समभन लगे जे
 अज्ज भीमसैनै बदला चुकाना ऐ ते अपनी कस्म पूरी करनी
 ऐ । ओ कस्म जेड़ी दर्बारै इच द्रोपदी दी भयानक दुर्घटना
 बेल्लै चुक्की ही । अठमें दिनै आली लड़ाई इच अर्जुन गी
 भारा सदमा पुज्जा । ओदा प्यारा पुत्तर इरावान मरोई गया ।
 इरावान नाग कन्या बिचा अर्जुनै दा पुत्तर हा ते पाण्डवें दी सहायता
 करन कुक्षेत्र दे जुद्ध आये दा हा । दुर्योधनै अपना राकश मितर
 अलम्बश इस नागा बीर दा मकाबला करन भेजेया । बड़ी सखत
 लड़ाई पिच्छों इरावान मारा गया । ए सुनियै अर्जुन दा हौसला त्रुट्टी
 गया । ओ कृष्ण जी गी आखन लगा—“बिदुर होर ठीक गै आखदे
 हे जे दौनें बक्खी नईं जरोने आले दुःख होडन । अस इक दूए दी
 तवाई कैदे आस्तै करा करने आं । जादातु आस्तै ? इस मारकाट
 ते खून खराबे बाद आखर असें गी जां उनें गी के खुशी प्रापत होनी
 ऐ ? हुण मिगी पता लगदा ऐ युधिष्ठिर होर छड़े पञ्ज ग्रां लैने
 उप्पर गै की सन्दोख करा करदे हे । बाकी सारा राज दुर्योधन गै
 साम्वै । जे ए गल मनोई जा तां लड़ाई नईं होनी चाही दी । दुर्योधन
 अपने हठे उप्पर अड़ेया रेआ उस पज ग्रां देने थमां बी इनकार
 कीता । एदा नतीजा ऐ जे दक्खी नेए पाप होआ करदे न ।
 अऊं लड़ा करनां जे मिकी लोक डरौकल नईं आखन । दिक्खो
 कनेआ डरौकल ऐ जे पापै सामनै भुकी गया ऐ । जिसलै अऊं बीरें
 गी घरती उप्पर मोए पे दे दिक्खनां मिगी बड़ा क्लेश हुन्दा ऐ । अस
 केडे पापी आं ते असें कनेआ खतरनाक ते पापै आला रस्ता
 चुनेया ऐ ।”

इरावान गी डिगदे दिक्खिये घटोत्कच नै बड़े जोरै दी सिंह
 गर्जना कीती । सारे उसी सुनियै कम्बन लगे । उस बड़ी संना लइयें
 कौरवें उप्पर हमला करी दित्ता । उस इन्नी तबाही मचाई जे कौरवें
 दी ब्यूह रचना कई थारें दा त्रुट्टी गई । ए दिक्खियै दुर्योधनै

घटोत्कच उप्पर आपूँ हमला कीता ।

हाथिं दी सौना लइयै बंगराज नै दुर्योधनै दा साथ दिता ।
दुर्योधन बड़ी बहादरी कन्ने लड़ेया । उसनै घटोत्कच दे मते बीर
मारी ओड़े । घटोत्कच नै दुर्योधन उप्पर बड़ा भारी गुर्ज मारेया
पर बंगराज नै अपना हाथी अगें करी दिता ते दुर्योधनै गी बचाई
लैता । हाथी मरी गया ।

भीष्म होरें गी दुर्योधनै दी बड़ी चिन्ता ही । उनें द्रोणाचार्य
गी मती फौज देइये दुर्योधनै दी सहायता गी टोरेया । बड़े बड़े शूर
बीरें घटोत्कच उप्पर हमला कीता । लड़ाई इन्नी सख्त ते भयंकर
मची जे युधिष्ठिर होरें दिक्खेया घटोत्कच दी जान खतरे इच ऐ ।
उनें भीमसैन गी सहायता गितौ टोरेया । लड़ाई होर भखी ।

उस दिन दुर्योधनै दे सोलां भ्रा मरोए ।

०००

नौमां दिन

नौमें दिन बड्डैलै गै लड़ाई शुरू होने थमां पहलें दुर्योधन भीष्म पितामह होरें गी मिलेया । उनेंगी आखन लगा जे मिगी ते बड़ी नराशा होआ करदी ऐ । ऐ लड़ाई कियां चला करदी ऐ ? उस बड़े त्रिक्खे ते कौड़े शब्द भीष्म पितामह गी आखे जिनें उन्दा क्लेजा बेधी ओड़ेया । फी बी उनें बड़ा हौसला दस्सेया, ओ बड़े दुखी होइऐ आखन लगे—

“जियां जगै दी अग्नि उप्पर घ्यो पान्दे न इयां अऊं अपनी जान थुआड़े गितै ला करनां । अऊं थुआड़े आस्तै इन्नां किश करा करनां ते तूं मिगी नेए शब्दे कन्ने की बेधना एं ? तूं ते बिल्कुल अनजान मनुक्खै आडू गल्लां करनां एं । तुगी इन्ना बी पता नईं जे ठीक के ऐ ते गलत के ऐ ? आखदे न जे काल नेडै आव तां मनुक्खै गी सुन्ने दा बूटा लबदा ऐ । हुण तुगी चीजां असली रूपे इच नईं लवदियां । थुआड़ी अक्खीं उप्पर पर्दा पेई गेदा ऐ । तूं जेड़ी नफरत दी फसल राही दी ऐ ओदा फल पा करनां एं । हुण ते तेरे आस्तै

इक्कै रस्ता ऐ जे जिन्ना चिर होई सकदा ऐ लड़दा जा । फर्ज पूरा करने दा बी हुण इऐ रस्ता ऐ । मेरा शिखण्डी कन्ने लड़ना सम्भव नई । अऊं जनानी उप्पर हथ नई चुक्की सकदा । न गै में अपने हथें पाण्डवें गी मारी सकनां । मेरा मन इस गल्ले दे बरुद्ध बगावत करदा ऐ । ए दो गल्लां में नई करनियां । बाकी जिन्ने जोधा थुआड़े खलाफ न उन्दे कन्ने लड़ड ।”

जी लौका करने दा कोई लाभ नई । क्षत्रियें आडू लड़ इज्जत थुआड़ी गै होग, भायें स्थितियां कनेइयां होन ।

उनें दुर्योधन गी ए आखेया ते प्यार भरे शब्द कन्दे ओदा मन पर्चाया । फी अगें वधियै फौजे दी रचना वारे इच हुकम देन लगे ।

दुर्योधन गी किश सहारा होआ । उस दुशासन गी सद्देया ते आखेया—“भ्रावा ! अज्ज लड़ाई इच जान लड़ाई देओ । मिगी जकीन होई गेया ऐ जे पितामह होर सच्चे दिल कन्ने साढ़ी बक्खी लड़ा करदे न । ओ आखदे न शिखण्डी दे खलाफ हथ्यार नई चुक्कना । तुस दिक्खो जे कुतै शिखण्डी कन्ने इन्दा मकावला नई होई जा । तुगी पता गै जे शेर नस्सन लगै तां जंगली कुत्ता बी दलेर होई जन्दा ऐ ते शेर गी ढाई लैन्दा ऐ ।”

अभिमन्यु ते अलम्बश दी घोर लड़ाई होई । अभिमन्यु नै सिद्ध करी दित्ता जे ओ कुसै चाली अपने बीर बब्बा कोला घट्ट नई, अलम्बश गी पुआन्हे पैरें नस्सना पेया ते उस मसां जान बचाई ।

सात्यकि ते अश्वत्थामा ते द्रोणाचार्य ते अर्जुन हुन्दी घोर लड़ाई होई । फी सारे पाण्डवें किट्टे होइयै पितामह हुन्दे उप्पर हमला कीता । दुर्योधन दुशासन गी भीष्म पितामह दी सहायता गित्तै भेजेया । भीष्म होरें कड़ाके दा उत्तर दित्ता ते पाण्डवें गी नसाई दित्ता । पाण्डवें दी सैना भलेयां हौसला हारी गई । ताईं तुआईं द्रौड़न लगे जियां वने इच पशु भुल्ली गये होन ।

कृष्ण होरें रथ खंडेरया ते अर्जुन गी आखेया—“तेरां बरे होए तुस इस मोके गी बल्गा करदे हे । इसलै खुज्जेयो नई । भीष्म गी मारी ओड़ो । सैनक दा फर्ज पछानों ।”

अर्जुन सिर भिगड़ा सुट्टिऐ आखन लगा—एदे कोला ते में बनवासौ इच गै रौन्दा ते ठीक हा । अपने प्यारे भीष्म पितामह गी नईं मारन हुन्दा । पर तुन्दा हुकम नईं मोड़दा । लेई चलो रथ गेडा । अर्जुनै दा मन लड़ाई इच नईं हा । ओ ते जबर्दस्ती ते मजबूरी कन्ने लड़े करदा हा । तुआईं पासौ भीष्म होर इयां भखे दे हे जियां दपैरीं दा सूरज ।

सौना नै जिसलै अर्जुनै दा रथ तुआईं जन्दे दिक्खेया तां किश हौसला होआ । ते परतिये ठीक चाली रचना इच खड़ोते । भीष्म होरें अर्जुनै दे रथ पर इयां तीरें दी बरखा कीती जे सारा रथ गै खटोई गया ते लब्बे गै नईं । कृष्ण होर नईं घाबरे ते बड़ी चतराई ते कुशलता कन्ने अगगे बधदे गे । अर्जुनै दे तीर भीष्म हुन्दे धनष गी लगे ते धनश ऋट्टी गया । भीष्म पितामह होर धनश बदलदे गे । कृष्ण होर आखन लगे—भई अर्जुन जियां लड़ने दा हक्क हुन्दा ऐ तू ऊंआं नईं लड़े करदा । ए आखिये उनें गुस्से कन्ने रथे उपपरा छाल दित्ती ते चक्कर चुक्किये भीष्म पितामह पासै द्रौड़े । भीष्म जी नै कृष्ण होरें गी औन्दे दिक्खेया । आखन लगे—“धन भाग न मेरे । मिगी मुक्ति देन तुस आपू आये ओ । आओ, आओ ।” अर्जुनै बी रथ परा छाल दित्ती ते अगगे बधिये कृष्ण होरें गी जाइयै पकड़ी लेया । उनें गी जफ्फी पाइयै आखन लगा—“बल्गी जाओ, रुकी जाओ । अपनी सगन्ध नईं ओड़ो । तुसें प्रण कीता दा ऐ जे लड़ाई इच शस्तर नईं चुक्कड । ए मेरा कम्म ऐ । अऊं उसी नभाड । अऊं प्यारे भीष्म पितामह उपपर तीर चलाइयै उनें गी जमपुर पजाड । तुस चलो रथे उपपर बई जाओ । बागां सम्हालो ।”

अर्जुन कृष्ण होरें गी परताई लई गया । लड़ाई परतिऐ शुरु होई । पाण्डवें दी फौज गी खरी भुनक लग्गी दी ही । पर हुण सूरज अस्त होई गया । ते लड़ाई दा समां समाप्त होई गया ।

भीष्म हुन्दा काल

लड़ाई दा दसमां दिन हा । शिखण्डी गी अगें रक्खिये अर्जुनै भीष्म हुन्दे उप्पर हमला करी दित्ता । जिसलै शिखण्डी दे बाण बज्जन लगे तां भीष्म हुन्दी अक्खीं चा लोरे निकलन लगे । पहले ते उनें गी रोह चढ़ेया ते इयां बली उट्टे जे शिखण्डी गी भस्म करी ओड़दे न । पर उनें भट गै संजम कर लेया । उनें आखेया शिखण्डी कन्ने नईं लड़ना ।

शिखण्डी जमदे बेल्लै कुड़ी हा, उने आखेया—जेदे कन्ने लड़ना मनासब नईं ओदा के मकाबला करनां ? पर ए उनें गी आगम होई गया जे अन्त समां आई गया ऐ । उनें अपने आप गी शान्त कीता ।

शिखण्डी बान चलान्दा गया । उसी के पता हा जे भीष्म पितामह हुन्दे मनै इच के लड़ाई होआ करदी ऐ ? अर्जुनै बी मन मजबूत कीता ते शिखण्डी पिच्छें होइये भीष्म पितामह दे कवचै इच कमजोर थायें उप्पर तीर चलान लगा । तामी भीष्म पितामह

नईं जरके । भीष्म पितामह हुन्दे उप्पर तीरें दी बरखा हुन्दी रई ते ओ मुस्करान्दे रे । दुशासनै गी आखन लगे—ए अर्जुनै दे बाण न । ए शिखण्डी दे नईं होई सकदे । ए मेरे शरीरै इच अगग पाई दिन्दे न जियां केकड़े दे शरीरै गी ओदे बच्चे गै चीरी ओड़दे न । उने अर्जुन दे तीरें गी अपने शगिर्दे दे बाण गै समभेया । उने दुशासन गी आखेया—चलो पई शगिर्दे दे बाण गै सई । उने अर्जुनै उप्पर इक नेजा सुट्टेया । अर्जुनै त्रै तीर चलाइयै इसी बाऊ इच उडदे गी कट्टी सुट्टेया । भीष्म होर इस लड़ाई गी खत्म करने दी गल्ल सोची । ओ ढाल तलवार लइयै रथै परा उतरी होए । पर अर्जुनै तीर चलाइयै उन्दी ढाल त्रोड़ी ओड़ी । भीष्म हुन्दे सारे शरीर इच तीर ग तीर लग्गी गे । इक इंच बी जगह खाली नईं रई । भीष्म होर रथै परा डिग्गी पे । जिसलै भीष्म होर सिरै भार डिग्गे तां देवता लोकें हत्थ जौलै करियै उनें गी प्रणाम कीता । ढण्डी नेई, सगन्धि आली बा बगन लग्गी ते सारे मदानै इच हल्की २ फुहार पौन लग्गी ।

इयां गंगा जी दा पुत्तर भीष्म पितामह युद्ध भूमि इच डिगी पेया । ए उस्सै गंगा दे पुत्तर हे जिस घरती पर आइयै मनुक्ख मात्तर दा कल्याण कीता । भीष्म होर ऐसे जोधा हे जित्दे उप्पर कोई दोस नईं लग्गा, जिनें बव्वै दी खुशी खातर एडा त्याग करी दित्ता, ऐसे धनश धारी जिनें परशुराम हुन्दा मान बी त्रोड़ी ओड़ेया जेड़े सचाई गित्तै निष्काम भावना कन्ने कम्म करदे हे । उनें अपनी जान दइयै दुर्योधनै दा ऋण चकाया ओ मृत्यु दी सेजा उप्पर पेदे हे, ओ जुद्ध भूमि गी अपने लहुऐ कन्ने पवित्तर करा करदे हे । भीष्म पितामह हुन्दे डिगदे गै कौरवें दी सौना दे दिल बी ढई गे ।

भीष्म हुन्दा शरीर भुवा नईं छोता उनें गी इन्ने तीर बज्जे दे हे जे तीरें दी गै सेजा बनी गई । उन्दे शरीरै दा तेज मत्ता होई गेया । ओ मान पतिष्ठा दे सिंहासनै उप्पर बैठे दे सेई हुन्दे हे । दक्खी फौजें युद्ध बन्द करी दित्ता । सारे जोधा द्रौड़दे आये ते उन्दे आसै पासै खड़ोई गे । सारे लोक सिर नीन्दे करिए उन्दे कोल खड़ोते दे हे

जियां ब्रह्मा कोल देवता खड़ोते दे होन । भीष्म पितामह होर आखन लगे—मेरे सिरै गी कौई स्थारा नईं । ए इयां गै लमका करदा ऐ । राजे द्रौड़ियै सरहाने लई आये । भीष्म पितामह नै उनें गी परें कीता ते अर्जुनै गी आखेया—बेटा जोधा गी देने जोग तकिये दा बन्दोबस्त कर ।

अर्जुनै दे तीरें उन्दे शरीरै इच जाला पाये दा हा । अर्जुनै त्रै तीर कड्डे ते इयां रखे जे भीष्म पितामह हुन्दा सिर ठीक चाली टिकी गया । भीष्म होर आखन लगे—मिगी सरहाने आस्तै अर्जुन दे तीरें दी लोड़ ही । इने गदेलें मिगी सन्दोख देना ऐ । सूर्य दे उत्तरायण हुन्दे तोड़ी में इयां गै रौनां ऐं । इन्ना चिर में शरीर नईं त्यागना । जिसलै अऊं मरड तां तुन्दे चा जेड़े बचे दे होडन मिगी दिक्खन आवेओ ।

भीष्म पितामह होर अर्जुन गी आखन लगे—बेटा मिगी त्रेह लग्गी दी ऐ । मिगी पानी पल्या । अर्जुनै धनुश चुक्केया, कन्ने तोड़ी खिच्चेया ते भीष्म हुन्दी सज्जी बक्खी धरती इच बाण मारेया । धरती चा इक धारा निकली ते भीष्म पितामह हुन्दे ओठ तर करन लग्गी । व्यास होर आखदे न जे ए गंगा माता आपूँ आई ही ते उस भीष्म दी त्रेह शान्त कीती ।

भीष्म होरें जल पीता ते बड़े खुश होए ।

भीष्म होरें दुर्योधनै गी आखेया—हे दुर्योधन—हुण बी समझदारी कन्ने कम्म लै । तूं दिक्खेया अर्जुनै मिगी कियां पानी पल्याया ऐ । धरती उप्पर होर कुन इयां करी सकदा ऐ ? एदे कन्ने सन्धि करी लै । चिर नईं ला । मेरी बलि कन्ने गै जुद्ध समापत होई जा तामी खरा ऐ । बेटा मेरी गल्ल मन्न ते पाण्डवें कन्ने सुलह करी लै ।

भीष्म हुन्दे शब्द दुर्योधनै गी चंगे नईं लगगे । बमार मरन बी लगै तामी उसी दवाई चंगी नईं लगदी । उसी कौड़ा सुआद चंगा नईं लगदा । सारे राजे अपने अपने कैम्पें इच दुरी गे ।

कर्ण ते भीष्म पितामह

जिसलै कर्ण सुनेया जे भीष्म होर जखमी होइ गे न ते मृत्यु सेजा उप्पर पेदे न तां ओ भटपट उन्दे कोल आया, उन्दे पैरें पई गया ते आखन लगा—हे पितामह जी, तुस कुलै इच सारें कोला बड्डे ओ। अऊं कर्ण तुसें गी प्रणाम करना, मेरे भाग जे में कोई दोस नईं कीता फी बी तुन्दी मेरे ऊप्पर नराजगी गै रई।

जिसलै कर्ण नै इन्नी धीनगी कन्ने प्रणाम कीता ते हत्थ जौले करिए खड्डोई गया तां पितामह गी बड़ा क्यास आया। उनें ओदे सिरै उप्पर हत्थ फेरेया ते शीर्बाद दित्ता। तूं राधा पुत्तर नईं। तूं कुन्ती देवी दा पहला पुत्तर एं। नारद होरें जिनेंगी दुनियां दिवें सारिएं गल्लें दा पता हुन्दा ऐ, आपूं मिगी सनाया हा। हे सूरज पुत्तर। में तुगी नफरत नईं करदा हा। पर थुआड़े हिरदे इच बिना कारण गै बधदी नफरत मिगी चंगी नईं ही लगदी। अऊं थुआड़ी बीरता जाननां ते ओदी कदर करनां। मिगी थुआड़ी कोरी कोरी सनाने दी आदत बड़ी चंगी लगदी ऐ। में जाननां

जे तू अर्जुन ते कृष्ण समान जोधा एं। बड़ा चंगा होऐ जे तू पाण्डवें कन्ने मिली जायें। ओ रस्ता थुआड़े गितौ बड़ा मनासब ऐ। तू उन्दा भ्रा एं। मेरे मरने दे कन्ने गै जेकर थुआड़ी दुश्मनी बी मुक्की जा ए मेरी बड़ी मरजी ए।

कर्ण बड़े मानै कन्ने सुनदा रेआ फी आखन लगा—पितामह जी ! मिगी पता ऐ जे अऊं कुन्ती दा पुत्तर आं। सारथि दे घर मेरा जन्म नईं। पर में दुर्योधन दा निमक खादा ऐ, ते निमक दा हक्क चकाना चाही दा ऐ। अपने क्षत्रिय धर्म दा पालन करना चाही दा ऐ। हुण पाण्डवें कन्ने जाई रलने दा ते प्रश्न गै नईं पैदा हुन्दा। हुण ते जिन्द दइऐ बी ओ ऋण चकाना ऐ। दुर्योधन जिन्ना मिगी प्यार करदा ऐ ते जिन्ना मेरा बसाह करदा ऐ ओ ऋण में जान दइऐ बी नईं चकाई सकदा। में किश गलाने इच ते किश करने इच गलितयां कीतियां होडन। मिगी खिमा करो ते शीर्वाद देओ।

भीष्म पितामह होर जिनें गी सदाचार ते सचाई दे सारे पक्ख पता हे किश देर सोचदे रे ते फी आखन लगे—जियां तेरी मरजी ऐ ऊआं कर। की जे ऊऐ ठीक रस्ता ऐ।

भीष्म पितामह होर सख्त जखमी होई गे ते मृत्यु दी सेजा उत्तर परई गे फी बी जुद्ध बन्द नईं होआ। कौरवें भीष्म पितामह हुन्दी गल्ल नईं मन्नी ते लड़ाई परतिऐ शुरु करी दित्ती। भीष्म पितामह हुन्दे बिना कौरवें दी सैना इयां ही जियां गडरिये बिना भिड्डां हुन्दियां न। जिसलै भीष्म होर नईं रे तां कौरवें दे साथी आखन लगे—कर्ण जी ! तुस साढ़े लीडर ओ। तुस साढ़ी रखेया करो।

कौरव जोधा जानदे हे जे कर्ण उन्दी कमान करै तां ओ जरूर जित्ठन। पहले दस दिन जिन्ना चिर भीष्म होर सैनापति रे कर्ण जुद्ध थमां बाहर रेआ। जियां पहले दस्सेया ऐ जे भीष्म पितामह हुन्दी भाड़ सुनिए कर्ण नै आखेया हा—जिन्ना चिर तुस जीन्दे ओ ते जुद्ध करा देओ अऊं जुद्ध इच हिस्सा नईं लैड। जे

तुस पाण्डवें गी मारी ओड़ो ते दुर्योधन जित्ती जा तां मिगी बड़ी खुशी होग । अऊं महाराजा कोला जाजत लइऐ बनवास टुरी जाड । पर जे तुस हारी गे, ते जमपुरी टुरी गे तां में जिसी तुस महारथी नईं मनदे, रथै उप्पर चढ़ड ते उन्दा मकाबला करड जिनें गी तुस समझदे ओ जे मेरे कशा बड़े बहादर न । उनेंगी हराइयै अऊं दुर्योधन गी जताड ।

कर्ण नै ए सगन्ध खादी ही । दुर्योधनै दी मरजी कन्ने ओ पहले दस दिन जुद्ध थमां बाहर रेआ । हुण ओ आपूँ पैदल चलियै भीष्म हुन्दे कोल आया जेड़े बाणें दी सेजा उप्पर पेदे हे । मृत्यु दियां घड़ियां गिना करदे हे उनेंगी प्रणाम करिऐ आखन लगा—

हे मन्ने प्रमन्ने दे पितामह जी, तुसें परशुराम होरें गी हराया । तुस जुद्ध भूमि इच पेदे औ । शिखण्डी नै तुसें गी ढाई लेया ऐ । तुसें सदाचार दा पूरा पालन कीता । तुस पवित्तरता दी मूर्ति हे । जे तुस इस चाली जुद्ध भूमि इच गिरी सकदे ओ तां ए टकोदी गल्ल ऐ जे दुनियां इच छड़ी योग्यता दे सहारे सब किश नईं बनदा । संसारै दियां मसीबतां पार करने गित्तै तुस कौरवें दी किशती हे । हुण पाण्डवें कौरवें उप्पर जोरदार हमले करने न ते कौरवें गी मते कष्ट भोगने पौडन । जियां अग ते वायू मिलिऐ बनें गी तबाह करी ओड़दे न इयां कृष्ण ते अर्जुनै कौरवें दी सैना नष्ट करी ओड़नी ऐ । ए गल्ल पक्की ऐ । तुस अपनी कृपादृष्टि मेरी उप्पर करो । हुण में फौजै दी कमान सम्हाली ऐ । मिगी शीर्वाद देओ ।

भीष्म होरें कर्ण गी शीर्वाद दित्ता—तू चंगे बी आस्तै धरती एं । तू लोकें आस्ते पानी आला बदल एं । तेरी वफादारी उप्पर शक्क नईं कीता जाई सकदा । दुर्योधन दी सेवा ते ओदी रखेया कर । तू दुर्योधनै गित्तै कम्बोज लोकें गी नष्ट कीता । तू पवतै इच रौने आले किरात लोकें गी हराया ते दुर्योधनै दे अधीन तू गिरिब्रजें गी हराया । तू होर मते कम्म कीते । हुण तू

कौरवों दी सैना दी कमान अपने हथै इच लै । ए तेरा हक्क ऐ ते इसी साम्भ । परमात्मा करै तू जित्ती जायें ते दुर्योधन विजयी होऐ । किस्मत थुआड़ा साथ देऐ । जाओ ते शत्रुएं कन्ने जुद्ध करो ।

कर्ण भीष्म पितामह हुन्दे कशा शीर्वाद लइऐ रथै उप्पर चढ़िऐ जुद्ध भूमि इच आया । जिसलै कर्ण रथै उप्पर चढ़िऐ मदान जंग इच आय तां दुर्योधनै दी खुशी दी हृद नई रई । भीष्म पितामह दे मरने दा गम बड़ी मात्रा इच घटी गया ।

०००

सैनापति द्रोणाचार्य

दुर्योधन ते कर्ण सोचन लगे जे सैना दा सैनापति कुण होऐ ?

कर्ण आखन लगा—साढ़े पासै लड़ने आले जिन्ने राजे न उन्दे बिच्चा कुसै गी बी सैनापति बनाई देचे ते ओ साढ़ी सैना दी कमान करी सकदा ऐ । ए सारे राजे बरोबरी दी शक्ति आले, हिम्मत आले, चतराई ते योग्यता आले, बीर ते खानदानी न । सारे बुद्धिमान न । इन्हें सारें गी ते किट्टा सैनापति बनान नईं हुन्दा । ते जेकर इन्दे चा कुसै इक गी बनाया तां दूएँ हेठी समझनी ऐ । ते फी होई सकदा जे अपनी सारी ते पूरी शक्ति जुद्ध ईच नईं लान । इयां असें गे हानि होग । इस करी मेरा सुभा ऐ जे इन्हें सारे राजें दे गुरु द्रोणाचार्य होरें गी सैनापति बनाया जा । अज्जै दे शस्त्र धारियें च ओ सारें कशा बड्डे न । सैनापति बनने आस्तै जेड़ें गुण लोड़चदे न ओ होर कुसै क्षत्रिय च सारे नईं । उन्दे च सारे न । आओ उनें गी सैनापति बनाचै । दुर्योधन मन्त्री गया जे इयां गै करना ठीक ऐ । ए फंसला होई गया । दुर्योधन द्रोणाचार्य हुन्दे कोल गया । सारे राजे उत्थे

किट्ठे होए दे हे । उस आचार्य होरें गी प्रणाम कीता ते धीनगी कन्ने आखन लगा—हे गुरु जी ! तुस साढ़े सारें बिच खानदानी लिहाज कन्ने, वर्णाश्रम दी दृष्टि कन्ने, जुद्ध बिद्या दी निपुणता दी दृष्टि कन्ने, अवस्था ते बुद्धि, वीरता ते योग्यता दी दृष्टि कन्ने सारें कशा बड्डे ओ । मेरी बेनती ऐ जे तुस सैनापति दा पद सम्हालो । तुन्दी लीडरशिप इच साढ़ी सैना जरूर जित्तग ।

किट्ठे होए दे सारे राजें ताड़ियां मारिए इस प्रस्ताव दा स्वागत कीता ते जयकारे बुलाये । दुर्योधन बड़! खुश होआ ।

सारें सामनै बड़ी शान कन्ने द्रोणाचार्य जी गी सैनापति बनाया गया । दर्वारिये दी प्रशंसा ते दुन्दुवियें दे वज्जने कन्ने कौरवें दी सैना गी इयां बभोन लगा जे शत्रू गी नष्ट करी ओड़ैया ऐ । उन्दी द्रोणाचार्य हुन्दे बारे इच बड़ी श्रद्धा ही ते मता बसाह हा ।

द्रोणाचार्य नै चक्रव्यूह दी रचना बनाई । कर्ण जेड़ा पैहलें बक्ख बक्ख रेआ हुण अपने रथे उपपर चढ़िये सैना इच फिरै करदा हा ते सारे उसी दिक्खिये बड़ा उत्साह लै करदे हे । कौरवें दी सैना दा हौसला बड़ा बधी गया । फौजें इच ए गल्ल फैली गई जे भीष्म होर पाण्डवें गी नई मारना चान्दे हे इस करी ओ पूरे दिलै कन्ने नई लड़े हुण कर्ण मदानै इच आई गया ऐ । हुण पाण्डवें दे नाश होने इच कोई शक्क नई ।

पञ्च दिन द्रोणाचार्य होर सैनापति रे । भायें ओ बृद्ध हे पर युद्ध भूमि इच हर थार पुजदे हे । ते इक नमें जोधा आङ्ग अपना उत्साह ते बहादरी दसदे हे । जिसलै द्रोणाचार्य हमला करदे हे तां पाण्डवें दी फौज खिल्लरी जन्दी ही जियां तफान औने उपपर बदल उड़ी जन्दे न । ओ पाण्डवें दे बड्डे २ सदारें कन्ने आपू लड़े । ओ सात्यकि, भीमसैन, अर्जुन, धृष्टद्युम्न, अभिमन्यु, द्रुपद ते काशीराज कन्ने लड़े ते कई बारी उनें गी हराया । पञ्च दिन ओ सैनापति रे इन दिनें इच उनें पाण्डवे दी सैना गी खूब परेशान कीता ते बड़ी मार चाढ़ी ।

युधिष्ठिर होरें गी जीन्दे पकड़ने दी चाल

जिसलै द्रोणाचार्य होरें कौरवें दी सैना दा सैनापति दा पद सम्हाली लेया तां दुर्योधन, कर्ण ते दुशासन नै किट्ठे बइऐ इक स्कीम बनाई। दुर्योधन ओ स्कीम लइयै द्रोणाचार्य हुन्दे कोल गेया। आखन लगा गुरु जी ! साढ़ी मर्जी ऐ जे तुस असें गी युधिष्ठिर गी जीन्दा पगड़ी देओ ते साढ़ै हवालै करी देओ। असेंगी होर किश नई लोड़चदा। असें गी मुकम्मल जित्तू दी बी लोड़ नई। जे तुस असें गी इत्नां करी देओ तां असें गी बड़ी तसल्ली होग जे तुस लड़ाई दा संचालन ठीक करा करदे ओ।

जिसलै द्रोणाचार्य होरें दुर्योधन गी इयां आखदे सुनेया तां उनें गी बड़ी खुशी होई। पाण्डवें गी मारी ओड़ने दा बचार उनें गी बी पसन्द नई हा। फर्ज नभाना हा इस करी द्रोणाचार्य कौरवें कन्ने साथ देया करदे हे। मनै दा ओ पाण्डवें गी प्यार करदे हे खास करी पवित्तर हिरदे आले युधिष्ठिर गी बड़ा चान्दे हे। इस करी जिसलै दुर्योधन आखेया जे युधिष्ठिर गी जीन्दा पगड़ी देओ तां

उन्दे मने दा मता भार हल्का होई गया ।

द्रोणाचार्य होर आखन लगे—दुर्योधन, थुआड़ा भला होऐ । तुम्मी चानां एं जे युधिष्ठिर गी जीन्दा गै पगड़ेया जा । मिगी ए सुनिए बड़ी खुशी होई ऐ । सच गै युधिष्ठिर दा कोई दुश्मन नईं ते ओदा नां 'अजात शत्रु' बिल्कुल ठीक गै लोकं पाये दा ऐ । थुआड़े फैसलै नै ते इसदी होर तसदीक करी ओड़ी ऐ । जिसलै तुम्मी आखी ओड़ेया जे उसी जिये नईं मारो, जीन्दा पगड़ी लौ एदे कन्ने युधिष्ठिर दा मान सगों होर बधेया ऐ ।

द्रोणाचार्य होर फी आखन लगे—मेरा ख्याल ऐ जे तू पाण्डवें गी लड़ाई इच हराइयै ते फी उनेंगी उन्दा अद्धा राज परताना चानां एं । ते उन्दे कन्ने शान्ति ते ऐमनी कन्ने रौने दा थुआड़ा बचार ऐ । युधिष्ठिर गी जीन्दा पगड़ने दी इच्छेया दा होर के प्रयोजन होई सकदा ऐ ?

द्रोणाचार्य होर बड़े गै खुश होऐ ते फी आखन लगे—सच्चें गै युधिष्ठिर संसारै इच बड़े भागें आला ऐ । देवता लोक बी युधिष्ठिर उपपर अपनी किरपा बरान्दे न । उस शत्रुएं दे दिल बी जित्ती लैते न ।

पर युधिष्ठिर गी जीन्दा पगड़ने दा दुर्योधनै दा मतलब ते किश होर हा । जिसलै द्रोणाचार्य होर मन्त्री गे ते उनें प्रण कीता जे अऊं युधिष्ठिर गी जीन्दा पगड़ी देह तां ओ अपना प्रयोजन दस्सन लगा—“जे अस युधिष्ठिर गी मारी ओड़चै तां किश लाभ नईं होना । सगों पाण्डवें दा रोह गै भड़कना ऐ । लड़ाई पहलें थमां बी भयंकर होग । ते एदा नतीजा दुर्योधनै गी पता गै हा जे लड़ाई लग्गी बी रई तामी दौने फौजें दा गै नास होना ऐ । कृष्ण होरें ते फी बी जीन्दे रौना ऐ । उनें द्रोपदी जा कुन्ती गी राज सौपी ओड़ना ऐ । इस करी युधिष्ठिर गी मारने दा कोई फायदा नईं । हां जेकर युधिष्ठिर जीन्दा पगड़ोई जा तां लड़ाई बी भट बन्द होई जाग ते अस जित्ती बी जागे । फी अस युधिष्ठिर दी क्षत्रिय धर्म पालन करने दी परम्परा दा फायदा ठुआगे । ओदी नेकी ते सदाचार दा लाभ

उठागे उसी परतिऐ जूआ खड़ागे ते बनवास पजागे । इनें दस्सें दिनें दी लड़ाई नै दुर्योधनै गी सिद्ध करी दित्ता जे कुलै दा नास पक्क ऐ । ओदी इच्छा पूरी नई होई सकदी । जिसलै दुर्योधनै अपना असली मक्सद दस्सेया तां द्रोणाचार्य होरें गी बड़ी नराशा होई । उनें दुर्योधनै गी मनै इच फटकार दित्ती । पर इस गल्लै दा उनें गी सन्दोख होआ जे युधिष्ठिर गी मारी ओड़ने आली गल्ल ते मुक्की ।

द्रोणाचार्य हुन्दे प्रण दी खबर जे ओ युधिष्ठिर गी जीन्दा पगड़ी देङन पाण्डवें दे गुप्तचरें भट उनें गी जाई सनाई । पाण्डवें सोचेया जे द्रोणाचार्य होरें प्रण कीता ऐ युधिष्ठिर होरें गी जीन्दा पगड़ने दा तां ओ करी गुजरङन ।

उन्दे नेआ तीरन्दाज कुण ऐ ? ए बड़ी माड़ी गल्ल होई ऐ । उनें भटपट फौजा दी रचना इयां बनाई जे युधिष्ठिर होर इक्कले नई रौन । ते भायें कनेआ मौका की नई आई जा उन्दे उप्पर चान चक्क हमला बी होऐ तामी उन्दे कोल मती फौज रवै ।

सैनापति बनने आले रोज गै द्रोणाचार्य होरें अपनी चतराई ते कुशलता भलेयां दस्सी । जिया अग सुक्के दे घा गी फूकदी जन्दी ऐ इयां गै द्रोणाचार्य होर पाण्डवें दी सैना गी समान्दे जन्दे हे । ओ एडी फुर्ती कन्ने सारे मोर्चे उप्पर जन्दे हे जे पाण्डवें गी सेई हुन्दा हा जे द्रोणाचार्य होर हर थां गै मजूद न । ते तीरें दी बरखा बरहा करदे न । ते धरती गी जमराज हुन्दे नच्चने दा नाच घर बना करदे न । जित्थें धृष्टद्युम्न खड़ोता दा हा उत्थें हमला करिऐ द्रोणाचार्य होरें फौजें गी दौं टुकड़िएं इच बण्डी दित्ता । बड़े बड़े जोधा लोकें दे द्वन्द होए । शकुनि ते सहदेव दा माया जुद्ध होआ ? जिसलै उन्दे रथ त्रुट्टी गे तां ओ भुजा उतरिऐ लड़न लगे । ते गुर्ज लेइऐ इयां लड़न लगे आखो जे दौं पर्वतें मनुक्ख रूप धारे दा होऐ । भीमसैन ते विविशति दे दम्पनि बी घोर जुद्ध होआ । दौनों दे रथ त्रुट्टी गे । शल्य ते भनेए नकुल दा जुद्ध होआ । उस नकुल गी बड़ा शकाया । ओ बड़ी शतानी कन्ने मुस्करान्दा हा । आखरकार शल्य दा भण्डा भज्जी गया । रथ त्रुट्टी गया । उस हार मन्नी ते

चली गया। कृपाचार्य ते धृष्टकेतु दा जुद्ध होआ। कृपाचार्य होर हारी गे। सात्यकि ते कृतवर्मा बी लड़े, विराट ते कर्ण बी लड़े। अभिमन्यु पौरव, कृतवर्मा, जयद्रथ, ते शल्य कन्ने इक्कला गै लड़ेया ते उनें गी नसाई दित्ता। फी शल्य ते भीमसैन दे दम्यानि घोर जुद्ध होआ। शल्य होर हारे ते पिच्छे हटी गे। कौरव सैना दा दिल त्रुटन लगा। पाण्डव सैना नै ए दिक्खेया ते जोरदार हमला करी दित्ता। कौरवें दी सैना इच अफरा तफरी पई गई।

जिसलै द्रोणाचार्य होरें ए दिक्खेया तां उनें कौरवें दा जिगरा बधाने आस्तै युधिष्ठिर हुन्दे उप्पर हमला करी दित्ता। द्रोणाचार्य हुन्दे सनैरी रथै इच सिन्ध देसै दे चार घोड़े लग्गे दे हे। ओ युधिष्ठिर हुन्दे पासै गये। युधिष्ठिर होरें कण्ठें आले ते बाज दे परें आले तीर चलाये। द्रोणाचार्य होरें कोई पर्वहि नई कीती। ओ बड़ी तेजी कन्ने युधिष्ठिर हुन्दे पासै बधे। उनें युधिष्ठिर हुन्दा धनुष त्रोड़ी ओड़ेया। द्रोणाचार्य होर बिल्कुल गे कोल जाई पुज्जे धृष्ट-द्युम्न नै रोकने दी कोशश कीती पर किश पेश नई गई। सारी फौज कलाई उठा युधिष्ठिर होर पगड़ोई गे। द्रोणाचार्य होर सिरै उप्पर गै आई पुज्जे।

उस्स लै अर्जुन होर उस जुद्ध भूमि इच आई पुज्जे। ओदे रथै दे धमाके कन्ने धरत कम्बन लगी। ओ लहू भरोची जुद्ध भूमि ते हड्डियें दे ढेरें गी शड़दा उत्थें आई पुज्जा। द्रोणाचार्य किश रुकी गे। अर्जुन आई पुज्जा हा। गाण्डीव बिचा तीरें दी नदी बगन लगी। पता नई हा लगदा जे तीर कडदा कुस बेल्लै ऐ ते चढ़ान्दा ते छोढ़दा कुस बेल्लै ऐ। तीर लगातार निकलदे जा करदे हे। तीरें दी बरखा कन्ने जुद्ध भूमि इच न्हेरा होई गया।

द्रोणाचार्य होर पिच्छें हटी गे। युधिष्ठिर होर नई पगड़ोई सके। लड़ाई बन्द होई गई। कौरव सैना दी भली झण्ड बैठी दी ही। ओ अपने कैम्पे इच गई पाण्डव सैना बी शान कन्ने गई। कृष्ण होर ते अर्जुन बी गल्लां करदे कैम्पे इच गे।

इयां बारमा दिन मुक्केया।

०००

बारमां दिन

युधिष्ठिर होरें गी जीन्दा पगड़ने दा जतन सफल नईं होआ ।
द्रोणाचार्य होर दुर्योधनै गी आखा करदे हे—ए टकोदी गल्ल ऐ जे
अस युधिष्ठिर होरें गी जीन्दा पगड़ने इच कामयाब नईं होई सकदे
जिन्ना चिर अर्जुन उन्दे कोल ऐ । ए इस करी नईं जे साढ़ी मरजी
नईं । कुसै चाली अर्जुन गी जुद्धभूमि दे कुसै होर पासै लई जाओ
तां में पाण्डवें दी सेना दियें पंगतिएं गी त्रोटिये अगगे जाड उठी ते
युधिष्ठिर होरें गी पगड़ी आनड । अऊं बचन दिन्नां जे युधिष्ठिर
होरें गी पगड़ी आनड ते तुगी सौंपी देह पर शर्त ऐ जे ओ मान
त्यागिए जुद्ध भूमि चा नस्सी नईं जा । जेकर ओ ऊंआं करग तामी
इक चाली अस गै जितै । ठीक ऐ नईं ?

त्रिगर्त दे राजे नै द्रोणाचार्य हुन्दी ए गल्ल सुनी ते अपने भ्रायें
कन्ने गल्ल कीती । उनें इक स्कीम सोची । उनें योजना बनाई
जे संशप्तक व्रत धारण करगे ते अर्जुन गी ललकारगे । आपू पिये
हटदे जागे ते इयां अर्जुनै गी युधिष्ठिर हुन्दे कोला दूर परें लई
जागे ।

योजना मताबक उनें इक बड़ी फौज लैती अग्नि सामनै बई गे, घा दे बने दे टल्ले लाई ले । फी मरने बेले दे सारे संस्कार कीते । फी उने सगन्ध चुक्की—अर्जुन गी मारे बिना अस नई परतो गे । जे अस जुद्ध चा नसचै तां असें गी महान पाप लगै ।

इयां अग्नि सामनै सगन्ध चुक्कियै ओ दक्खनै पासै जेड़ी जम राज दी दशा ऐ, गे ते अर्जुन गी ललकारन लगे । ए उस जमाने दा 'आत्म घाती' दल समझी लौ । द्रोणाचार्य नै बड़ा जरूरी समझियै ए दल बनाया हा ।

अर्जुन युधिष्ठिर होरें गी आखन लगा—संशप्तक व्रतै आले मिगी ललकारा करदे न । जे मिगी कोई ललकारै तां अऊं ओदा मान जरूर चोड़ड । जरूर लड़ड । त्रिगर्त दा राजा सुशर्मा मिगी ललकारा करदा ऐ । अऊं इने सारें गी नष्ट करिऐ परतोनां । मिगी जाने दी जाजत देओ ।

युधिष्ठिर होर आखन लगे—प्यारे भाई ! तुगी द्रोणाचार्य दे इरादे दा पता ऐ । ओदा ख्याल करी लै ते जे मनासब ऐ करो । उनें मिगी दुर्योधनै कोल जीन्दा पगड़ी लई जाने दा बचन दित्ता दा ऐ । ओ लासानी बीर ऐ । शक्ति शाली ऐ, चतर ऐ, तीर चलाने दी हर कला दा माहिर ऐ । उस हुट्टन भाखा दा गै नई । हर इक चीजै उप्पर ओदी नजर रौन्दी ऐ ।

अर्जुन आखन लगा—सत्यजित कोल गै खड़ोता दा ऐ । ओदे जीन्दे जी तुसें कोई हत्थ नई लाई सकदा । तुसें गी किश नई होई सकदा । अर्जुनै पञ्चवाल बीर सत्यजित गी युधिष्ठिर हुन्दी राखी गित्तै छोड़ेया ते आपू संशप्तकें दा मकाबला करन गया । जियां शेर अपने शिकारै गी जन्दा ऐ ।

“कृष्ण जी ! ओ दिक्खो संशप्तक त्रिगर्त आले खड़ोते दे न । इनेंगी अपनी सगन्ध चुक्कने दा नशा चढ़ेदा ऐ । इनेंगी दरअसल सुर्ग जाने दा मता चा चढ़ेदा ऐ ।”

कृष्ण जी गी इयां आखिये अर्जुन संशप्तकें दी सैना कोल आई गया ।

अज्ज लड़ाई दा बारमां दिन हा । बड़ी घोर लड़ाई ही । थोड़ें समै बाद गै अर्जुनै संशप्तकें ते सत्थर लुआई ओड़े । पर सुशर्मा नै उनें गी अपनी चुक्की दी सगन्ध चतै कराई—“हे वीरो ! असे पवित्तर अग्नि सामनै ते सारी सैना सामनै सगन्ध चुक्की दी ऐ । एडी सख्त कस्म चुक्कियै हुण पिच्छे हटना मनासव नई । हुण पिच्छे नस्सिए सैना कोला मखौल नईं करायो । संशप्तकें खुशी खुशी अर्जुन दा मकाबला कीता । बड़ी दलेरी कन्ने ते बहादरी कन्ने । ते मृत्यु गी स्वीकार कीता ।

हे कृष्ण जी ! इनें मरने दा पक्का निश्चा कीता दा ऐ । तुस रथै गी अगें लई चलो ।

कृष्ण हुंदे सारथि बने दे अर्जुन दा रथ इयां फौजें इच फिरै करदा हा जियां देवासुर लड़ाई इच इन्द्र दा रथ चलदा हा । ताईं तुआईं ते जताईं रथ जन्दा हा त्रिगर्ते आलें दा सफाया हुन्दा जन्दा हा ।

उन्दी छाती चा खून इयां निकलदा लबदा हा आखो टट्टए खिड़ा करदे होन । लड़ाई भयंकर ही । इक बारी ते अर्जुनै दा रथ बी तीरें दी बरखा कन्ने खटोई गया ।

कृष्ण होरें पुच्छेया—अर्जुन ! हैं एं न ? अर्जुन नै तीर चलाइयै तीरें दा न्हेरा दूर कीता । प्रलय वेल्ले दा रुद्र दा ताण्डव नृत्य सेई हुन्दा हा । जुद्ध खेतर बढोए दे अंगें ते कटोए दे सिरें कन्ने बड़ा भयानक लबदा हा ।

जिसलै अर्जुन संशप्तकें पिच्छे गया—तुआईं द्रोणाचार्य होरें पाण्डवें दी सैना उप्पर खासकरी जित्थें युधिष्ठिर होर हे जोरदार हमला करी दित्ता । युधिष्ठिर होरें ए दिक्खिए पञ्चाल राज धृष्टद्युम्न गी आखेया ए ब्राह्मण मिगी पगड़न आवा करदा ऐ । फौजें आसै ध्यान देओ ।

द्रुपद पुत्तर द्रोणाचार्य दे अगें बधने तोड़ी नईं बल्लेया । उस रथ अगें बधाया ते द्रोणाचार्य होरें गी जाई रोकेया ।

द्रोणाचार्य होर धृष्टद्युम्न पासै नईं आये । उनें गी पता हा जे उन्दी मृत्यु ओदे हत्थें होनी ऐ । हजे उनें मरना नईं हा । उनें राजा द्रुपद पासै रथ फेरी लेया । द्रुपद दियें फौजें दा भारी नुकसान होआ । खूनै दियां नदियां बगी गइयां । द्रोणाचार्य होर फी युधिष्ठिर पासै फिरके । पाण्डव डटिए खड़ोते दे हे । उनें तीरें दी बरखा कन्ने जवाब दित्ता । सत्यजित नै द्रोणाचार्य हुन्दे उप्पर हमला कीता । सख्त लड़ाई होई । द्रोणाचार्य होर काल भगवान बनी गे । ओ जोधें गी समापत करन लगे । पञ्चाल राजकुमार वृक ते सत्यजित मरोई गे ।

ए दिक्खियै बिराट पुत्तर शतानीक अगगे वधेया । किश खिनें बिच गै ओदा कटोए दा सिर भुजां जाइ पेया, कन्ने पेदे कुण्डल भुजा रुलन लगे । इक होर सदीर केतम द्रोणाचार्य हुन्दे मक्कावले उप्पर आया, ओबी मरोई गया । द्रोणाचार्य होरें गी रोकने गी वसुधान अगगें आया ओबी मरोई गया । युधामन्यु, सात्यकि, शखण्डी उत्तमौजा सारे द्रोणाचार्य होरें गी पिच्छे हटान आये पर उनें सारें गी नसाई ओड़ेया ।

द्रोणाचार्य होर युधिष्ठिर हुन्दे कोल कोल जाई पुज्जे । उस बेत्लै द्रुपद राजे दा इक होर पुत्तर पंचाल्य आचार्य गी रोकने गित्तै अगगे आया ते बड़े जोरै कन्ने लड़ाई करन लगा । पर ओबी मरोई गया ते रथे परा इयां डिग्गा जियां गासा दा तारा वुटदा ऐ ।

दुर्योधन बड़ा खुश होआ ते पसोइयै कर्ण गी आखन लगा— हे कर्ण ! द्रोणाचार्य हुन्दी बीरता दिक्खो । पाण्डवें दी सैना दा दिल नईं रेआ । द्रोणाचार्य दे बार उन्दे कशा नईं भलोआ करदे ।

कर्ण नै मुण्डी मारी । “इन्ना बसाह नईं करो । पाण्डव एडी तौली नष्ट होने आले नईं । उनें कदें हार नईं मन्नती । उन्दे कन्ने जेड़ियां ज्यादितियां होई दियां न ओ उनें गी कदें नईं बिस्सरी सकदियां । तू उनें गी जहर दइयै मारने दी कोशिश कीती ।

तू उनें गी जीन्दे गै जलाने दी कोशश कीती । तू जूए दी खेडे उप्पर उन्दी बेज्जती कीती । तू इन्ना चिर उनें गी बनबास भेजेया । ओ हार नईं मन्नन लगे । ओ दिक्ख ओ सारे किट्ठे होआ करदे न ते द्रोणाचार्य उप्पर हमला करन लगे न । ओ दिक्ख भीमसेन, सात्यकि, युधामन्यु, क्षत्रधर्म, नकुल, उत्तमौजा, द्रुपद, बिराट, शिखण्डी, धृष्टकेतु ते बाकी सारे जोधा युधिष्ठिर हुन्दी रखेया गित्तै किट्ठे होई गे न । द्रोणाचार्य उप्पर जोर पा करदे न । असें गी इयां छड़ा दिखना गै नईं चाही दा । असें द्रोणाचार्य हुन्दे उप्पर बड़ा बोझ सुट्टेदा ऐ । ओ वड़े महान न, पर बोझ वर्दाश्त करने दी बी हद हुन्दी ऐ । भेड़िये किट्ठे होइयै इक वड़े भारे हाथी गी परेशान करी सकदे न । हाथी गी मारी बी सकदे न । आओ अगें चलचै । द्रोणाचार्य होरें गी बिना सहायता दे इक्कला छोड़ना ठीक नईं ।”

०००

शूरवीर भगदत्त

द्रोणाचार्य होरें युधिष्ठिर गी जीन्दा पगड़ने दे बड़े जतन कीते पर फेल होई गे । दुर्योधन हाथिएं दी बड्डी सैना लइयै भीमसैन कन्ने लड़न गया । भीमसैन रथै उप्परा तीर चलाइयै अपने आप गी बचान लगा । उस अद्ध चन्द्रमां दी शकला दे तीर चलाइयै दुर्योधनै दा भण्डा कट्टी ओड़ेया ते ओदा धनश त्रोड़ी ओड़ेया । दुर्योधनै गी बिपता इच दिक्खियै म्लेच्छ राज अंग भीमसैन हुन्दे कन्ने लड़न लगा । ओ इक बड्डे हाथी उप्पर चढ़ेदा हा । भीमसैन होरें नेए कस्सियै तीर चलाये जे हाथी डिग्गी पेया ते म्लेच्छ राज होर जमपुर दुरदे होए । कौरवें दी सैना इच त्राह पेई गया ते सैना खीसबीस होन लगी ।

जिसलै हाथिएं इच अफरातफरी मची तां उनें हजारों लोक जिल्ली ओड़े । घोड़े डरिऐ तां तुआं नस्सन लगे ।

ए अफरातफरी दिक्खियै ते सैना गी सारै पासै नसदे दिक्खियै प्रागज्योतिष दा राजा वीर भगदत्त बड़ा रोहें होआ । ओ अपने

प्रसिद्ध हाथी सुप्रतीक उप्पर चढ़ेया ते उस भीमसैन उप्पर हमला करी दित्ता । ओ ग्रांडील हाथी अपने कन्न खलारिए ते सुण्ड भुआड़िये द्रौड़ेया । उस भीमसैन दा रथ मली ओड़ेया, घोड़े दा मलीदा करी ओड़ेया । भीमसैन रथ बिच्चा निकली गया ते मसां बचेया । उसी हाथियें दे बारे इच सब किश पता हा ।

ओ हाथी दे हेठ बड़ी गया ते ओदे नर्म स्थाने उप्पर मुक्के मारन लगा । हाथी पागल जन होइयै भमीरियां खान लगा ते भीमसैन गी वट्टने दा जतन करन लगा । भीमसैन ओदी जड़े गी पलचे दा हा ते मुक्के मारी जा करदा हा । हाथी नीन्दा होआ ते सुण्डे कन्ने भीमसैन गी पगड़ी लैता । ते गोड़े हेठ दइयै मलीदा बनान लगा पर भीमसैन होरें कुसै चाली अपने आप गी शड़काई लेया । फी ओदे हेठ जाइयै ओदे नर्म स्थानें उप्पर मुक्के मारन लगा । हाथी बड़ा तड़फन लगा । भीमसैन समां गजारा करदा हा जे पाण्डवें दी सौना दा कोई हाथी आइये भगदत्त दे हाथी उप्पर हमला करे ते ओ ओदे हेठा निकलै ।

भीमसैन हाथी दी जड़े ओलै आये दा हा, सैनकें समभेया भीमसैन मरोई गया ऐ । ओ कलिये—भीमसैन मरोई गया । भगदत्त दे हाथी नै भीमसैन गी जिल्ली ओड़ेया ऐ । कुरुक्षेत्र दे मदानै इच हर थां इऐ बोल गूँजन लगे ।

युधिष्ठिर होरें ए बाज सुनी ते समभेया जे भीमसैन मरोई गया ऐ, उनें फौज गी हुकम दित्ता जे भगदत्त गी नष्ट करी देओ । दशार्ण दे राजा नै भगदत्त उप्पर हमला कीता । दशार्ण दा हाथी बी बड़ा भयंकर हा, ओदी ते सुप्रतीक दी घोर लड़ाई होन लगी । सुप्रतीक नै नेआ दन्द खोबेया जे दशार्ण दे हाथी दी बक्खी पाड़ी ओड़ी ते उसी मारी ओड़ेया । उस बेल्ले भीमसैन सुप्रतीक हेठा निकली आया । उसी सहीसलामत दिक्खियै पाण्डवें दी सौना बड़ी खुश होई । ते ताड़ियां बजान लगी ।

हुण भगदत्त उप्पर चक्खी दा हमला होआ । पर उस हिम्मत नई हारी । ओ अपने हाथी उप्पर बैठा दा इयां लबदा हा

जियां कुसै पहाड़ै उपपर अग्न लगी दी होऐ । उस शत्रुएं दी कोई पर्वाह नई कीती ते अपने हाथी गी सात्यकि दे रथे पिच्छे लाया । हाथी नै सुण्डे कन्ने रथ चुक्केया ते गासा पासै छण्डेया । सात्यकि ते भट रथ थमां बाहर आई गेया । ओदे सारथि नै बड़ा कमाल दस्सेया जे रथे गी ते घोड़े गी बचाई लैता ते परतिऐ सात्यकि हुन्दे कोल लइ आया ।

भगदत्त दे हाथी नै पाण्डवें दी सैना इच बड़ी तवाई मचाई । उस सुण्डे कन्ने पगड़ी पगड़ी किन्ने गै जोधा छण्डी सुट्टे । ते वेशमार मारी ओड़े । जताईं पासै जन्दा हा त्राह पई जन्दा हा । भगदत्त अपने हाथी उपपर बैठा दा इयां सेई हुन्दा हा जियां देवासुर लड़ाई इच इन्द्रदेव सोभदा हा । हाथी कन्न खलारिऐ ते रोहै इच आये दा हा । ओ अपनी सुण्ड भुआड़दा हा ते किन्ने गै रथें, घोड़े ते सैनकें गी पैरें हेठ मली ओड़दा हा । उस पाण्डवें दी सेना इच त्राहि त्राहि मचाई दिती । जिन्ने ओदे उपपर शस्त्र चलन उन्ना गै ओ होर भुङ्कै । जियां गुआला पशुएं गी बनै इच जतां मरजी होऐ खिदी लान्दा ऐ इयां गै भगदत्त पाण्डवें दी सेना गी खिदा करदे हे ।

भीमसैन दूआ रथ लेआ ते भगदत्त उपपर हमला करी दित्ता । हाथी नै अपनी सुण्ड बधाई ते एडे जोरै दी फुहार छोड़ी जे भीमसैन हुंदे रथे दे घोड़े त्राहियै नस्सी गे ते रथ बी छण्डोए दा परें जाइ पेया । भीमसैन कोला रथ नईं रुकेया ।

जुद्ध खेतरै इच बड़ी धूड़ उड़ी । उत्थे हाथियें दी घोर लड़ाई होआ करदी ही । अर्जुन होर संशप्तकें कन्ने जुद्ध करा करदे हे उनें उत्थुआं दा दिक्खेया ते भगदत्त दे हाथी दी चंघाड़ बी सुनी । उने सोचेया कम्म किश कसूत्तर होई गेया लबदा ऐ । उनें कृष्ण जी गी आखेया—ए सुप्रतीक हाथी दी चंघाड़ ऐ । प्रागज्योतिष दा राजा भगदत्त अपने हाथी कन्ने बड़ी तवाई पुट्टने आला ऐ । हाथिएं दी लड़ाई इच ओदा कोई मकाबला नईं करी सकदा । उस साढ़ सैनकें गी जरूर हराई ओड़ना ऐ । ते घबराई ओड़ना ऐ । असें तौले चलिए स्थिति सम्हालनी चाही दी ऐ । संशप्तकें गी खरी

मार दई लैती ऐ । तुस रथै गी उत्थें लई चलो जित्थें द्रोणाचार्य होर युधिष्ठिर कन्ने जुद्ध करा करदे न ।

कृष्ण होर तुआईं गै रथ लई गे जित्थें बड्डी लड़ाई होआ करदी ही ।

सुशर्मा ते ओदे भ्रा रथै पिच्छें द्रौडै ते आखन लगे—रोको, रोको । ते कन्ने गै अर्जुन दे रथै उपपर तीर चलान लगे ।

अर्जुन दे मनै इच किश दुविधा पैदा होई गई । ताईं सुशर्मा लड़ाई गी ललकारै करदा ऐ कोई ललकारै तां में कदें पिच्छें नई हटदा । पर उत्तरै बक्खी साढ़ी सैना दी रचना त्रुटी दी लबदी ऐ । उत्थें सहायता दी मती लोड़ ऐ । अर्जुन इन्ने सोचें पेदा हा जे इक नेजा अर्जुन गी ते दूआ कृष्ण होरें गी आइयै लग्गा । अर्जुन गी बड़ा रोह चढ़ेया । उस त्रै तीर कस्सिए मारे ते सुशर्मा गी नसाई ओड़ेया ।

उस समां नष्ट नई कीता ते झटपट उत्थें पुज्जा जित्थें भगदत्त तबाई मचा करदा । जिसलै पाण्डवें दी सैना नै अर्जुन गी दिक्खेया तां ओ सारे किट्टे होई गे ते भगदत्त कन्ने जोरदार लड़ाई शुरु होई गई । भगदत्त जमराज गै सेई हुन्दा हा । पर कृष्ण ओ नै भगदत्त दे सारे बार बचाये ।

भगदत्त कृष्ण जी ते अर्जुन उपपर तीरें दी बरखा करन लगा । अर्जुन नै हाथिए गी तीर मारिए ओदा कवच त्रोड़ी ओड़ेया । हुण तीर हाथी गी खुब्बन लगे । भगदत्त नै दिक्खेया जे हाथी ते नकारा होआ करदा ऐ उस कृष्ण हुन्दे उत्पर भाला चताया । अर्जुन नै तीर चलाइयै ओदे दो टोटे करी ओड़े भगदत्त नै दूआ भाला चलाया जेड़ा अर्जुनै दी हैल्मटै गी लग्गा ।

अर्जुनै अपनी हैल्मट ठीक कीती; अपना घनश कन्ने तोड़ी खिच्चेया ते कन्ने आखेया—लै भाई भगदत्त ! दुनियां गी आखरी बारी दिक्खी लै ते मरने गी तयार होई जा । भगदत्त नै इन्ने कम्मे

इच उमर खादी दी ही ओदे बग्गे बाल ते ते मुहें दियां भुडियां इयां लब्धियां हियां जियां बुड्डा शेर होऐ । ओ एडा बुड्डा हा जे ओदी अक्खीं दा मास हेठ ढिल्कदा हा । इस करी उस मरथें पट्टी बन्निऐ उसी उबढ़ा कीता दा हुन्दा हा जे मास लमकियै अक्खीं गी खट्टी नईं लै, ते लब्बै किश नईं । भगदत्त इन्ना शूरवीर नईं हा जिन्ना ओ सुच्चम दा बचार रखदा हा ते चरित्तर दी उत्तमता ते सदाचार दा ख्याल रखदा हा । ओ अपने समें दे शूरवीर इच सारें कशा प्रसिद्ध हा । ओदी महानता गी दिक्खियै लोक उसी इन्द्र दा मित्तर आखदे हे ।

अपने आसौ पासौ आखरी वारी दिक्खी लै । अर्जुन नै उस महापुरुष गी आखेया ते कस्सिये तीर चलाये । ओदा धनश वृट्टी, गया, तरकश भज्जी गया ते ओदे कवचै दे जोड़ वृट्टी गे ।

उने दिनें सारे जोधा कवच लान्दे हे ते लग्गे दे कवचै उप्पर बी कुत्थें बाण मारना, ए बी क्षत्रिय लोक बड़े ध्यान कन्ने सिक्खदे हे । की जे ए शस्तर बिद्या दा बड़ा जरूरी अंग हुन्दा हा । जिसलै शस्त्र नईं रेआ तां भगदत्त नै अपने हाथी दा अंगस गै अर्जुनै उप्पर सुट्टेया । इसी वैष्णव मन्तर कन्ने मैन्तरिए भगदत्त नै अर्जुन उप्पर सुट्टेया हा । अर्जुनै मरोई जाना हा । कृष्ण जी नै अग्रे होइए ओ शस्तर अपने उप्पर लइ लेया । ओ उन्दी छाती उप्पर फूल माला बनी गया । ओ वैष्णव मन्तर कन्ने मैन्तरे दा हा इस करी विष्णु जी गी ते नुकसान नईं पजाई सकेया ते कृष्ण जी दे गले दा हार बनी गया ।

अर्जुन रोह छण्डन लगा—कृष्ण जी ! मेरे उप्पर चलाये दा शस्तर तुस अपने उप्पर की लैन्दे ओ ? तुसें आखे दा ऐ जे तुस छड़ा रथ चलागे ओ । तुसें इयां की कीता ए ?

कृष्ण होर आखन लगे—प्यारे मित्तरा ! तुगी पता नईं । जे ए शस्तर तुगी लगदा तां तू मरी जाना हा । ए मेरी अपनी चीज ही मेरे कोल आई गई । कृष्ण होर हस्सन लगे । अर्जुन नै इक

तीर मारेया जेड़ा भगदत्त दे हाथी दे सिरै इच खुब्बी गया जियां सप्प बर्मी इच बड़ी जन्दा ऐ ।

भगदत्त नै हाथी गी चलाने दा बड़ा जतन कीता पर ओ जाम होई गया । उस बड़ा हुकम कीता पर किश असर नईं होआ जियां धनहीन आदमी दे बचनें दा ओदी लाड़ी उप्पर किश असर नईं हुन्दा ।

ओ हाथी इक बर्मी आड़ चुपचाप खड़ोता गै रेआ ते फी बई गया ते अपने दन्दें कन्ने भुज पुट्टन लगा । ते जौरै कन्ने चीकन लगा ।

अर्जुनै गी हाथी दे मरने दा किश बसोस होआ ।

ते कन्ने भगदत्त दे नईं मरने दा बसोस होआ । मरना हा भगदत्त ते मरोई गया हाथी ।

भगदत्त दे मत्थे बज्जी दी पट्टी त्रुट्टी गई । ते रेशमी रमाल फट्टी गया । भरमट्टे दा मास अक्खीं उप्पर दिल्ली आया ते अक्खीं किश लब्बना बन्द होई गया । इक अद्धे चन्द्रमा दी शकला दा तीर आया ते भगदत्त दी छाती इच लग्गा । छाती चरोई गई ते भगदत्त इयां डिग्गा जियां तफानै कन्ने कोई बड्डा बूटा ढौन्दा ऐ । ओदे मत्थे उप्पर पीला रेशमी रमाल इयां सोभा करदा हा जियां पटोए दे बूटे गी पीले फुल्ल सोभा दे होन ।

कौरवें दी सेना इच भाजड़ मची गई । शकुनि दे भ्रायें अचल ते वृष नै अर्जुन गी रोकने दा जतन कीता पर उन्दे रथ भज्जी गे तें ओ मरोई गे । जियां शेरनी दे दौं बच्चे मरोई जान । उन्दी दौनें दी नुहार इक्कै नेईं ही ते दमै बड़े शूरवीर हे ।

कवि व्यास होर लिखदे न जे दमै भ्रा मदानै थमां नईं नस्से ते इन्दी शोभा ओपरी गै सेई हुन्दी ही । शकुनि नै जिसलै अपने भ्रायें गी मोए दे दिक्खेया तां उसी बड़ा रोह चढ़ेया । उस अर्जुन उप्पर हमला कीता ते माया दे शस्तर चलाये । ओ बड़ा मायाधारी हा । ते माया दे शस्तर चलाने इच बड़ा माहिर हा । पर अर्जुन

दे तीरें ओदे सारे जादू बेकार करी ओड़े । शकुनि अपने घोड़े दड़ाइयें
ते मदान छोड़िए नस्सी गया ।

पाण्डवों की सैना नै सूर्य अस्त होने तोड़ी द्रोणाचार्य हुन्दे उप्पर जोरदार हमला कीता । ते बड़ी तबाई कीती । बारमें दिनै दी लड़ाई खत्म होई । द्रोणाचार्य होरें लड़ाई बन्द करने दा हुकम दिता । कौरवें दी सैना बड़ी नमोशी कन्ने ते निम्मोभान होई दी परतोई । पाण्डवें दी सैना इच बड़ा जोश ते उत्साह हा । पाण्डव दे जोधा अगग वालिये ते चवक्खी बइयै गल्लां करन लगे ते अर्जुन ते होर शूरवीरें दी तरीफां करन लगे । उनें अपनी योग्यता कन्ने जीत कराई ही ।

• • •

अभिमन्यु

हूए दिन बड़ु लै गै दुर्योधन द्रोणाचार्य हुन्दे कोल बड़े रोहै इच
गेया । चरणबन्दना करिऐ सारें सामनै आखन लगा—

हे पूजा जोग ब्राह्मण देवता । कल ते युधिष्ठिर बिल्कुल तुन्दे
कछ हा ते जे तुस पगड़ना चान्दे तां कोई तुसें गी रोकी नईं हा
सकदा । फी बी तुसें उसी नईं पगड़ेया । मिगी ते कल्लै दिये
गल्लें दी समझ गै नईं औन्दी । पता नईं लगदा जे अपना बचन
नभान्दे तुसें गी के दिक्कत पेश औन्दी ऐ ? महापुरुषें दी कोई गल्ल
समझ नईं औन्दी ।

ए अपमान करने आला इल्जाम सुनिए द्रोणाचार्य होरें गी
बड़ा बट्ट आया । आखन लगे—दुर्योधन । अपना पूरा जोर लाइऐ
ते अपनी पूरी जोग्यता कन्ने अऊं कम्म करा करनां । थुआड़े
बचार इक राजा गी सोभा देन आले बचार नईं । जिन्ना चिर
अर्जुन मजूद रौग अस युधिष्ठिर गी जीन्दा नईं पगड़ी सकदे । ए में
तुगी अगगे बी दस्सेया ऐ । ए तां गै होई सकदा ऐ जे अस कुसै

महाभारत

चाली अर्जुन गी मदान जंग थमां कुतै बाहर लई जाचै । तां थुआड़ी मरजी दी गल्ल सिद्ध होई सकदी ऐ । अऊं स्कीम ते बना करनां जे गल्ल तोड़ चढ़ै । इयां द्रोणाचार्य होरें ओदा रोह शान्त कीता ते उसी दम दलासा दित्ता ।

तेरमें दिन संशप्तकें फी अर्जुन गी ललकारेया अर्जुन उन्दे कन्ने लड़न ठुरी गया । ओ मदान जंग दे दक्खन पासै किट्टे होए दे हे । संशप्तकें ते अर्जुन दे दर्मयान घोर लड़ाई होई । इऐ नईं लड़ाई न कुसै दिक्खी ते न कदें होई ।

जिसलै अर्जुन संशप्तकें कन्ने लड़न दूए पासै गया तां द्रोणाचार्य होरें 'कमल व्यूह दी रचना बनाइयै युधिष्ठिर हुन्दे उप्पर करारा हमला करी दित्ता । भीमसैन, सात्यकि, चेकितान, धृष्टद्युम्न, कुन्तीभोज, द्रुपद, घटोत्कच, युधामन्यु, शिखण्डी, उत्तमौजा, बिराट, केकय ते श्रीञ्जय ते होर जनैलें मकाबला कीता पर द्रोणाचार्य हुन्दा हमला बड़ा जवर्दस्त हा । अर्जुन ते सुभद्रा दा पुत्तर अभिमन्यु हजे किशोर गै हा । हजे ओ पूरा जवान नईं हा । पर बड़ै जोधा लोकें च ओदा शमार हुन्दा हा । ओ मामा कृष्ण ते पिता अर्जुन समान गै जोधा गनोन्दा हा । युधिष्ठिर होरें उसी सद्देया ते आखेया—बेटा ! द्रोणाचार्य होरें साढ़ी सौना गी बड़ा परेशान करना शुरु कीता ऐ । अर्जुन इसलै मजूद नईं । ते जे ओदी गैर हाजरी इच अस हारी गे तां उसी बड़ा क्लेश होग । द्रोणाचार्य दी व्यूह रचना साढ़े चा कोई नईं त्रोड़ी सकेया । सिवाये तेरे होर कोई नईं तोड़ी सकदा । तुगी जाच ऐ । ए कम्म तूँ ऐं सम्हाल ।

अभिमन्यु आखन लगा—अऊं करी सकनां । इस व्यूह इच बड़ने दी जाच मिगी पिता जी नै दस्सी दी ऐ । ओ ते में करी सकनां । इक बारी अन्दर जाने दा रस्ता ते बनाई लैङ । पर जेकर मिगी बाहर आने दी लोड़ पई तां मेरे कशा किश नईं होना । में बाहर निकलने दी जाच नईं सिक्खी दी ।

‘हे शूर बीर पुत्तर । ए कुसै थमां नईं त्रुट्टने आली रचना

गी तूँ इक बारी त्रोट । ते साढ़े आस्तै रस्ता बना । अस थुआड़े पिच्छे २ दाखल हुन्दे चलगे । अस कोई बी खतरा भेलने गित्तै थुआड़े कन्ने होंगे । थुआड़े बाहर औने दा समां गै नईं औनां ।

भीमसैनै युधिष्ठिर हुन्दी गल्लै दा समर्थन कीता । अऊं बिल्कुल थुआड़े कन्ने २ पिच्छे चलड । ते जिसलै तूँ उन्दी रचना गी त्रोटगा तां अऊं भट दाखल होई जाड । ते कन्ने गै सात्यकि, पञ्चाल, केकय ते मत्स्य देश हुन्दियां फौजां बी दाखल होई जाडन । तूँ इक बार व्यूह रचना त्रोटि दे । की जे ए कम्म तूँ गै करी सकना एं । बाकी कम्म अस करी लैगे ते कौरवें दी सौना गी सम्हाली लैगे ।

अभिमन्यु नै अपने पिता गी याद कीता मामा कृष्ण जी गी सिमरेया, ते युधिष्ठिर होरें ते भीमसैन होरें जे किश आखेया हा ओ सोचेया । ते फी अपने उत्साह कन्ने इस कम्मै दा बीड़ा चुक्की लेया । उसने जोश कन्ने आखेया—में अपने पिता ते मामा गी खुश करी देड । में अपनी सारी बीरता इस कम्मै उपपर गै लाई देड युधिष्ठिर होरें उसी शीर्वाद दित्ता—परमात्मा थुआड़ा बल बधा ते बीरता बधा ।

अभिमन्यु नै अपने सारथि गी आखेया सुमित्र । ओ दिक्ख । द्रोणाचार्य हुन्दा भण्डा भुल्ला करदा ऐ । उत्थें मेरा रथ दड़ाइयै लई चल ।

जिसलै रथ द्रौडन लगा तां अभिमन्यु आखन लगा—होर तेज कर, होर तेज चला । सारथि आखन लगा—परमात्मा तुन्दा भला करै । युधिष्ठिर होरें तुसैं गी बड़ा भारा कम्म सौपेया ऐ । तुस द्रोणाचार्य हुन्दी व्यूह रचना गी त्रोटिऐ अन्दर जान ते लगे ओ पर सोची लौ । द्रोणाचार्य हुन्दी योग्यता ते चतराई दा कोई मकाबला नईं करी सकदा । तुस बहादुरी इच बेशक उन्दे बरोबर होंगे पर उमरी इच बड़े पिछें ओ ।

अभिमन्यु किश मुस्कराया ते आखन लगा—में कृष्ण जी दा भनेआ ते अर्जुन दा पुत्तर आं । एदे इच कोई भूठ ऐ ? ए जोग कुसी नसीब ऐ ? डर मेरे कोल नईं फड़की सकदा । ए शत्रु मेरी

शक्ति दा सोलमां हिस्सा बी नईं । तूं मिगी द्रोणाचार्य हुन्दी सैना सामनै लई चल । भिजक नईं ।

सारथि ऊंआं गै करन लगा । जिस लै सुन्दर घोड़ें आला सनैहरी रथ औन्दे दिक्खेया तां कौरवें दी सैना आखन लगी अभिमन्यु आवा करदा जे । अभिमन्यु आई गया जे । पाण्डव ओदे पिच्छें २ आवा करदे हे । कौरवें दे जोधा अभिमन्यु दा रथ तेजी कन्ने औन्दे दिक्खियै किश घावरे । ओ सोचन लग—ए अर्जुन कोला बी बड़ा शूरवीर ऐ । ते किश हौसला ढान लगे । अभिमन्यु इयां बधदा आवै करदा हा जियां हाथिए दे भुण्डै इच शेर आई जन्दा ऐ । ओ एडी तेजी कन्ने आया जियां कोई लहरां चीरदा औदा ऐ । कौरवें दी सैना ओदे हमले अगगे बेबस होई गई । द्रोणाचार्य हुन्दे दिखदे गै उन्दी अक्खीं सामनै ब्यूह रचना ऋट्टी गई । अभिमन्यु दाखल होई गया । पर जित्थुआं ब्यूह रचना ऋट्टी ही उत्थें सिन्धुराज जयद्रथ आई पुज्जा ते उस शगाफ पूरा करी दित्ता । पाण्डव योजना मतावक ब्यूह इच दाखल नईं होई सके । अभिमन्यु इक्कला गै दाखल होआ । कौरव ओदा बरोध करन लगे पर ओ अग्गी इच पक्खरें आङ्गू डिगदे गे ते भस्म हुन्दे गे । अभिमन्यु कवचें दे कमजोर थारें उपपर बाण मारदा हा ते शत्रुएं दे शरीर जुद्ध भूमि इच इयां पे दे हे आखो जग्ग भूमि इच द्रुब्बां खिल्लरी दियां होन । धनश, तीर, तलवारां, ढालां, भाले नेजे, रथ, छतर, कुहाड़े, गुर्ज, चाबकां शंख, बीरें दे कटोए दे सिर, ते अंगें कन्ने जुद्ध भूमि खटोई गई ।

ए तबाही दिक्खिये दुर्योधनै गी बड़ा रोह चढ़ेया ते ओ सैना लइयै आपूँ अभिमन्यु कन्ने लड़न आया । द्रोणाचार्य होरें दिक्खेया जे महाराज आपूँ अभिमन्यु कन्ने लड़न लगे न तां उनें गी चिन्ता होई ते उनें बीर जोधा सहायता गी भेजे । उनें बड़ी मुश्कलें दुर्योधनै गी बीर अभिमन्यु कोला बचाया । दुर्योधनै दे बची निकलने करी अभिमन्यु गी बड़ी नराशा होई । उसी बड़ा रोह चढ़ेया ते उस सारा रोह उनें जोधा लोकें उपपर तुआरेया । ते जिन्ने दुर्योधनै दी सहायता गी आये दे हे सारें गी नसाई ओढ़ेया ।

सारी बीरता ते लज्जेया परे सुद्वियै सारे महारथि किट्टे होइयै हमला करन लगे । अभिमन्यु सारें पासेया घिरी गया । ओ इक्कला हा । पर जियां समुन्दरै इच चट्टानै गी लहरां नईं हटाई सकदियां इयां गै अभिमन्यु चट्टानै आडू शत्रुएं इच वेधड़क होइऐ खड़ोता रेआ ।

द्रोणाचार्य, अश्वत्थामा, कृपाचार्य, कर्ण, शकुनि, शल्य, ते होर कई जोधा अस्तर शस्तर लइयै ते रथे उप्पर चढ़िऐ आये हमला कीता ते मार खाइयै परतोई गे । अश्मक बड़े तरारे कन्ने रथ लइयै आया पर अभिमन्यु दी तीरें दी बरखा अगें नईं खड़ोई सकेया । कर्ण दा कवच बी अभिमन्यु नै बेधी ओड़ेया । शल्य गी बी घाल करी ओड़ेया । शल्य दा भ्रा अपने भ्राऊ दी बेज्जती दा बदला चकान आया पर अभिमन्यु नै ओदा रथ बी त्रोंड़ी ओड़ेया इयां अभिमन्यु नै बिना कुसै दी सहायता दे बड़े बड़े जोधा लोकें गी हटाई ओड़ेया । ते अपने मामा ते पिता कोला जेड़ी शस्तर बिद्या सिक्खी दी ही ओदे जौहर दस्से । ए शूरवीरता दिक्खियै द्रोणाचार्य हुन्दी अक्खीं इच प्यार ते प्रशंसा दे अत्थरुं आई गे ।

दुर्योधन आखन लगा—गुरु होर अर्जुन दा पक्खपात करदे न । इस करी अभिमन्यु गी नईं मारदे । बजाये लड़ने दे सगों ओदियां तरीफां करदे न । जेकर गुरु हुन्दी मरजी होऐ तां अभिमन्यु गी मारदे कोई चिर लगदा ऐ ?

दुर्योधन भीष्म पितामह ते द्रोणाचार्य हुन्दे बारे इच इयां गै शक्क करदा हा ते शकैत करदा हा । उस अधर्म दी लड़ाई गुरु कीती दी ही इस करी ओ इऐ नेइयां गल्लां आखदा हा । ते गुरुएं दे भाव गी ठेस पजान्दा हा । भायें ओ ओदी दुष्टता दिखदे होई बी ओदे राजभगत हे ।

दुशासन रोहै कन्ने गर्जेया—ए जिदी जागत हुण जरूर गै मर्ग । ए आखियै ओ रथ लइयै अभिमन्यु पासै द्रौड़ेया । अभिमन्यु ते दुशासन दे रथ अजीब चालां चलन लगे । लड़ाई बड़ा चिर हुन्दी रेई । दुशासन अपने रथे इच बेहोश होई गया । ओदा सारथि बडी चलाकी कन्ने उसी जुद्ध भूमि चा कड़िऐ लई गया ।

कर्ण नै अभिमन्यु उप्पर हमला कीता । तीरें दी वरखा कीती । ते अभिमन्यु गी परेशान कीता । पर अभिमन्यु दा इक तीर लगा ते कर्ण दा धनश ब्रुट्टी गया । अभिमन्यु नै इस मौके दा फायदा लेइयै एडे जोरै दा हमला कीता जे कर्ण ते ओदे साथी नस्सी गे । कौरवें दी सैना ए दिक्खियै बड़ी नराश होई । सैना इच भाजड़ पेई गेई । ते ओ तां तुआं नस्सन लगी । द्रोणाचार्य होर उनें गी फटकारां देन लगे पर उनें किश नईं सुनेया ।

अभिमन्यु नै मकाबले उप्पर औने आले सारें गी खत्म करी ओडेया जियां अग गरमियें इच बनै गी नष्ट करी ओड़दी ऐ ।

०००

अभिमन्यु दी मृत्यु

पाण्डव अपनी योजना मतावक अभिमन्यु दे पिच्छें पिच्छें
आवा करदे हे । अभिमन्यु नै कौरवें दी ब्यूह रचना त्रोड़ी दित्ती
ही । पर धृतराष्ट्र दे जमात्रे जयद्रथ नै जेड़ा सिन्धु देश दा राजा
हा पाण्डवें उप्पर भपटिए ते अपनी फौजें कन्ने अभिमन्यु द्वारा कीता
दा शगाफ पूरा करी ओढ़ेया । पाण्डव अभिमन्यु पिच्छें ब्यूह इच
दाखल नई होई सके । युधिष्ठिर होरें जयद्रथ उप्पर भाला चलाया
ते ओदा धनश त्रोड़ी ओढ़ेया । पर जयद्रथ नै भट दूआ धनश पगड़ी
लेया । ते युधिष्ठिर हुन्दे उप्पर कस्सियै तीर चलान लगा ।
भीमसैन वी भयानक तीर चलाये ते जयद्रथ दा भण्डा ते रथ
त्रोड़ी ओढ़ेया । पर जयद्रथ अगें गै इस स्थिति गित्तै तयार हा ।
ओ भट दूए शस्तर अस्तर लेई लै । उस भीमसैन दे रथै दे घोड़े
मारी ओढ़े भीमसैन गी सात्यकि दे रथै उप्पर चढ़ना पेया ।

इयां जयद्रथ हठै कन्ने डटेया रेया ते उस पाण्डवें गी ब्यूह इच
दाखल नई गै होन दित्ता । ओ लौका वीर पाण्डवें कशा वक्खरा

महाभारत

होई गया ते कौरवें कन्ने घिरी गया ।

अभिमन्यु डरेया नई । ओ आसै पासै जोधा लोकें कन्ने मकाबला करदा रेया । ते किन्ने गै उस मारी ओड़े । जियां नदियां समुन्दरै इच जाइयें खत्म होई जन्दिआं इयां गै जेड़े बीर अभिमन्यु दे मकाबले उप्पर औन्दे हे मरोई जन्दे हे । कौरवें दी सैना गी अभिमन्यु सामनै चक्कर आई गया । दुर्योधन दा पुत्तर लक्ष्मण बी लौकी उमरी दा पर बड़ा शूरवीर हा अभिमन्यु उप्पर हमला करन आया । उस अभिमन्यु उप्पर तीरें दी भड़ी लाई दिती । अर्जुन दा बीर पुत्तर त्रिलकुल नई घावरेया उस अपना लिश्कदा तीर कहुँया ते लक्ष्मण उप्पर छोड़ेया । ओ तीर इयां गया जियां अपनी सपकंज तुआरिऐ सप्प निकलदा ऐ । उस लक्ष्मण गी जाइऐ बेधी ओड़ेया । ओ सुन्दर नक्कै आला, शैल भरमट्टे आला ते खूबसूरत वालें आला लक्ष्मण जुद्ध भूमि इच डिग्गी पेया । कौरवें दी सैना गमै इच डुब्बी गई ।

इस अभिमन्यु गी जमलोक पजाओ । दुर्योधनै हुकम दिता । ६ जोधा द्रोणाचार्य, कृपाचार्य, कर्ण अश्वत्थामा, बृहत्बल ते कृतवर्मा अभिमन्यु गी घेरन लगे ।

द्रोणाचार्य होरें कर्ण गी आखेया—एदा कवच त्रोड़ना कठन ऐ । ऐदे घोड़े दियां बागां बड़ी ओड़ो । इसी इयां निहत्था करो ते पिछले पासेया हमला करो ।

कर्ण नै इयां गै कीता । पिछुआं तीर चलाइयै उन अभिमन्यु दा धनश त्रोड़ी ओड़ेया । ओदा रथ त्रोड़ी ओड़ेया । ओदा सारथि मारी ओड़ेया । ओ नौजवान जोधा इयां निहत्था होई गया । ओ अपनी ढाल तलवार लेइयें शत्रुएं दा मकाबला करन लगा । ओ बेधड़क हा । क्षत्रिय धर्म दा साख्यात् अवतार सेई हुन्दा हा । सारे जोधा उसी दिक्खी २ चगत होन लगे । ओ अपनी तलवार घमान लगा ते उस अपने घेरने आले जोधा लोकें गी परेशान करी ओड़ेया । उनें गी बभोऐ जे ऐदे पर धरती कन्ने छोन्दे गै नई । ए खबरै बाऊ इच उड्डा करदा ऐ । द्रोणाचार्य होरें तीर चलाइयै ओदी

तलवार त्रोड़ी त्रोड़ी । कर्ण दे त्रिवखे तीरें ओदी ढाल त्रोड़ी त्रोड़ी ।

अभिमन्यु नै नीन्दे होइये अपने रथै दा पहिया चुक्केया ते चक्कर आडू घमाइयै अपने शत्रुएं दा ते घेरने आलें दा मकाबला करन लगा । रथै दे पहिये दी धूड़ै कन्ने ओदी सहज सुन्दरता होर मती लब्बन लगी । इयां सेई होन लगा जे विष्णु भगवान सुदर्शन चक्कर कन्ने लड़ा करदे न । पर सारे जोधें रलिये उसी दवाई लैता । ओदा पहिया बी चकनाचूर करी ओड़ैया । दुशासन दा पुत्तर आया ते ओदे कन्ने भयंकर जुद्ध करन लगा ।

दमै डिग्गी पे । पर दुशासनै दा पुत्तर पहलें उठ्ठी खड़ोता ते अभिमन्यु हजें पैरें उप्पर खडोआ गै करदा हा जे उस गुर्ज मारेया ते अभिमन्यु गी चित्त करी ओड़ैया ।

सुभद्रा दा पुत्तर अभिमन्यु इयां लड़ै करदा हा जियां कमलें दे सरै इच हाथी बड़े दा होऐ, उस कौरवें दी सेना इच तवाई मचाई दिती । उसी इनें बड़े जोधा लोकें घेरियै ते बेरहमी कन्ने मारी ओड़ैया ।

सञ्जय नै धृतराष्ट्र गी सनाया—इयां उसी मारियै थुआड़े लोक ओदी लौथै उप्पर नच्चन लगे जियां शकारी अपने शकारें गी ढट्टे दे दिक्खियै खुश हुन्दे न । सारे भले मानसैं दी अक्खीं इच अत्थरुं हे ते ओ बड़ा माड़ा समभा करदे हे । शकारी परिन्दे बी जेड़े गासैं उप्पर उड्डुरा करदे हे चीकी चीकियै आखा करदे हे उस चाली नई, इयां नई । जिसलै कौरवें दी सेना जयकारे व्लान लगी ते शंख बजान लगी उस बेल्ले धृतराष्ट्र दे पुत्तर युयुत्सु गी ए गल्ल चंगी नई लग्गी उस रोहै कन्ने आखेया—ए बड़ा नीच कर्म ऐ । हे सनको तुस अपना सदाचार ते नियम भुली गये ओ । तुसैं गी शर्म औनी चाही दी ही । उल्टे तुस जयकारे बुला करदे ओ । तुसैं बड़ा बुरा कर्म कीता ऐ । तुस बेवकूफी करी खुश होआ करदे ओ । अगगें औने आला ऐदा परिणाम तुसैं गी नई सेई होआ करदा ।

युयुत्सु नै बड़ी घृणा कन्ने अपने हथ्यार जुद्ध भूमि इच सुट्ठी ओड़ै ते टुरी गया । ओदे शब्द कौरवें गी कौड़े लग्गे । पर ओ सच्चा सुच्चा आदमी हा उस मनै दी गल्ल ग्लाई ओड़ी ।

इक पिता दा दुःख

युधिष्ठिर होर गमैं इच डुब्बी गे । “ओ बचारा नेई लम्मी नीन्दरा सुत्ता ऐ जे उस कदें नई जागना । उस द्रोणाचार्य, अश्वत्थामा ते दुर्योधनै गी हराई ओड़ेया । ओ शत्रू दी फौजें आस्तै फूकी देने आली अग हा । हे शूरवीर तू दुशासनै गी नसाई दिता हा । तू सच्चें मरी गया एं ? हुण में किस आस्तै लड़ना ते जित्तनां ? हुण असें गी राजै दी के लोड़ ऐ ? में अर्जुन गी के आखियं तसल्ली देड ? में सुभद्रा गी के आखड ? ओ बचारी उस गवै आडू ऐ जेदा बच्छा मरी गया होऐ । अऊं उनें गी के शब्द आखियै तशफी देड । इनें शब्दें कन्ने के बनना ऐ । सच ऐ जे नोभ मनुखै दी अकल मारी ओड़दा ऐ । इक मूर्ख आडू जेड़ा उप्पर मखीरै गी दिक्खियै हेठ गतै इच जाई पौन्दा ऐ ते नष्ट होई जन्दा ऐ । में जित्तै दी हीखी इच बचारे इस जागतै गी अगों करी ओड़ेया । उस बचारे हजे होना जीना हा । इस संसारै इस मेरे जनेआ मूर्ख कुण होना ऐ । में अर्जुनै दा प्यारा पुत्तर मारी

ओड़ेया ऐ । ओदा बब्ब मजूद नहीं हा मिगी ते ओदी रखेया करनी चाही दी ही ।

युधिष्ठिर होर अपने तम्बू इच बहिए इयां पशता करदे हे । उन्दे आसौ पासौ जोधा लोक बैठे दे हे । ओ बचारे गमगीन ते दुखी हे । नौजवान अभिमन्यु दी बहादरी ते बेरहमी कन्ने होई दी मृत्यु उपपर सोच करा करदे हे । व्यास हुन्दा नियम हा जे जिसलै पाण्डव बड़े दुःखे इच होन तां आइयै उनें गी दम दलासा दिन्दे हे । ओ उन्दे गुरु हे । ते कन्ने दादा लगदे हे । ओ युधिष्ठिर हुन्दे कोल आये । उनें ऋषि जी दा स्वागत कीता उनें गी आसन दित्ता ते आखन लगे—“में मनै गी शान्त करने दा बड़ा जतन कीता ऐ पर मिगी शान्ति हुन्दी नई ।”

व्यास होर आखन लगे—तुस बुद्धिमान ओ सब किश जानदे ओ । तुसें गी इयां गमै इच डुब्बी जाना सोभदा नई । तुसें गी मृत्यु धर्म पता ऐ, ते फी अनपढ़ें आडू बलापि करना मनासब नई लगदा । व्यास होरें दुखी युधिष्ठिर गी ढारस दित्ता—जिस लै ब्रह्मा जी नै सृष्टि बनाई तां उनें गी चिन्ता होई । ए जिन्ने जीव जन्तु पैदा होआ करदे न इनें बधदे जाना ते संख्या इन्नी होई जानी ऐ जे पृथ्वी नै सम्हालना मुश्कल होई जाना ऐ । एदा उपा के ऐ ? ब्रह्मा होरें इक ज्वाला दा रूप धारेया । ओ ज्वाला एडी बधी जे सारी सृष्टि दे भस्म होने दा डर होई गया । फी रुद्र होर आये ते उनें इस सर्वनासी अगै गी शान्त कीता । ब्रह्मा जी नै इस महान अग्नि गी अपने बसस कीता ते इक कनूने हेठ करी ओड़ेया जिसी मृत्यु आखदे न । ब्रह्मा दे इस नियमै दे मतेरूप न जंग, बमारी, ते दुर्घटना । ए पदाश ते मृत्यु बिच बरोबरी रखदे न । इस सृष्टि दी भलाई आस्तै मृत्यु दा नियम ऐसा बने दा ऐ जे हर इक गी भोगना पौन्दा ऐ । इस करी मृत्यु कन्ने बेसवरे होना अकलमन्दी नई । जां जेड़े मरी जान उन्दे गित्तै मता बसोस करदे रौना बी मनासब गल्ल नई । जेड़े मरी जन्दे न उन्दे उपपर अफसोस करने

दा कोई कारण नईं । जेड़े जीन्दे न उन्दे बारे इच बसोस करने दी लोड़ ऐ ।

अर्जुन ते कृष्ण संशप्तकें गी हराइयै ते मारियै अपने कैम्पै गी परतोआ करदे हे ।

अर्जुन आखन लगा—कृष्ण जी ! पता नईं के गल्ल ऐ जे मेरा मन शान्त नईं । मेरा मुंह सुक्का करदा ऐ । मेरा मन कल्पै करदा ऐ जे कोई भारा नकसान होई गया ऐ । मिगी चिन्ता ऐ जे युधिष्ठिर हुन्दे उप्पर कोई मसीबत नईं आई गई होऐ । मिगी किश डर लगगा करदा ऐ ।

कृष्ण होरें जबाब दित्ता—युधिष्ठिर हुन्दे बारे इच चिन्ता करने दी लोड़ नईं । ओ, ते थुआड़े भ्रा सुरक्षित न । ओ रस्ते इच रुके ते सन्ध्या बन्दन करन लगे । फी रथै उप्पर चढ़ियै ओ कैम्पे इच आई गे । जियां गै अर्जुन कैम्पे इच बढ़ैया मसीबतें बारे इच ओदी चिन्ता बधन लगी ।

“कृष्ण जी ! अज्ज कैम्पे इच रोज होने आला संगीत नईं चलै करदा । सैनक मिगी दिक्खियै मिर नीन्दा करी लै करदे न । ओ मेरे कन्ने नजर नईं मेलदे । अज्ज इन्दा ए कनेआ बर्ता ऐ ? मिगी बड़ा डर लगगा करदा ऐ । भायें दा सुख होना चाही दा ऐ । मिगी किश थौ नईं आवा करदा । अज्ज के गल्ल ऐ ? अभिमन्यु अपने भायें कन्ने द्रौड़दा स्वागतै गी नईं आया ।

ओ कैम्पे इच दाखल होए ।

अज्ज तुस सारे निम्मोभान की बैठे दे ओ ? अभिमन्यु कुत्थें ऐ ? अज्ज मिगी हसदे चेहरे की नईं लबदे ? मिगी पता ऐ जे द्रोणाचार्य होरें कमल ब्यूह दी रचना कीती ही । तुन्दे चा ते कोई बी उसी त्रौड़ी नईं सकदा हा । अभिमन्यु नै प्रवेश कीता होना ऐ ? जेकर ओ गया हा तां मरोई गया ऐ । में उसी बाहर औने दी जाच हजे नईं ही दस्सी दी । अभिमन्यु सच्चें गै ते नईं मरोई गया ? उन्दी सोगी चुपचाप, ते नीन्दियें नजरें, (ओ अर्जुन कन्ने अक्खीं

नईं हे मेला करदे) पक्क जकीन कराई ओड़ेया जे अर्जुन सच्चा गै डरा करदा हा । ओ फुट्टिए रोई पेया ते बर्लापि करन लगा—ओ । मेरा पुत्तर जमलौक ठुरी गया ऐ । युधिष्ठिर, भीमसैन, धृष्टद्युम्न ते महारथी सात्यकि दे हुन्दे बी शत्रुएं अभिमन्यु गी मारी ओड़ेया ऐ ? में सुभद्रा गी के तसल्ली देड ? द्रोपदी गी के आखड ? ते उस बचारी उत्तरा गी के तसल्ली देनी ऐ ते कुण देग ?

कृष्ण होर अर्जुनै गी समझान लगे—प्यारे अर्जुन । गमें अर्गें इयां हौसला नईं ढा । अस क्षत्रिय कुलै इच जम्मे देयां । असें शस्तरें कन्ने गै जीना ते शस्तरें कन्ने गै मरना । जिनें सैना वृत्ति धारण कीती ऐ ते जंग इच कदें नईं परतोने दा प्रण करी आये न मृत्यु ते उन्दी सदा दी सहेली ऐ ।

जोधा लोकें गी ते निक्की उमरी इच मरने गी त्यार रौना चाही दा ऐ । अभिमन्यु नै लौकी उमरा इच गै जुद्ध इच ओ थां प्रापत करी लेया ऐ जिस गित्तै बड़े ते महान जोधा तरसदे न । अभिमन्यु दी मृत्यु क्षत्रियें आस्ते इक नमूना ऐ । इऐ उन्दी मंजल ते आखरी हीखी हुन्दी ऐ । जे तूं इयां दुखी होगा तां तेरे भ्रा ते दूए राजे हौसला ढाई ओड़डन । सोग करना छोड़ो ते अपने जिगरे कन्ने दूए दे दिलें च उत्साह ते धीरज भरो ।

अर्जुन आखन लगा मिगी अभिमन्यु दी मृत्यु दी सारी गल्ल ते सनाओ ।

युधिष्ठिर होर सनान लगे—में अभिमन्यु गी शत्रू दे ब्यूह इच जाने दी प्रेरणा दित्ती । साढ़े इच ऊऐ इस ब्यूह इच दाखल होई सकदा हा । में आखेया—तूं इक बारी दाखल हो अस थुआड़े पिच्छें दाखल होई जागे । थुआड़े इस महान कम्म करी थुआड़ा पिता ते मामा बड़े प्रसन्न होडन ।

उस शेर बच्चे नै इयां गै कीता ते उन्दा ब्यूह त्रौड़ी दित्ता । ते अन्दर दाखल होई गया । अस योजना मताबक पिच्छें गये पर उसै लै दुष्ट जयद्रथ आई गया ते उस साढ़ा रस्ता रोकी दित्ता ।

उस ब्यूह इच होए दे शगाफै गी भरी दित्ता । साढ़ा अभिमन्यु दे पिच्छे जाना रुकी गया । जयद्रथ असेंगी बाहर रखेया ते इनें क्षत्रिये शूरवीरे के कीता ? इनें गी धिक्कार ऐ । बड़े बड़े महारथिये किट्टे होइऐ उसी घेरेया ते बक्ख करिऐ मारी ओड़ैया ।

जिसलै अर्जुनै ए गल्ल सुनी तां उसी फी बड़ा दुःख होआ ते गश आई गई ।

होश आई तां उस सगन्ध चुक्की कल सूर्य डुबबने थमां पहलें अऊं जयद्रथ गी जिस मेरे पुत्तरै गी मारी ओड़ैया ऐ । मारी ओड़ड़ जे द्रोणाचार्य ते कृपाचार्य होर अगें आये तां में उनें गी बी मारी ओड़ड़ । ए आक्खियै उस गाण्डीव दी टंकार कीती ते कृष्ण होरें पाञ्चजन्य शंख बजाया । भीमसैन आखन लगा गाण्डीव दी टंकार ते पाञ्चजन्य दी फूक धृतराष्ट्र दे पुत्तरें आस्तै मौती दा आला न ।

०००

सिन्धु राज जयद्रथ

अर्जुनै दी पतिग्या दी खबर शत्रु गी बी पुज्जी । गुप्तचरें
दुर्योधनै दे मित्तरें गी सनाया जे अर्जुन गी पता लगा ऐ जे जयद्रथ
अभिमन्यु दी मृत्यु दा कारण ऐ इस करी उस सगन्ध चुक्की ऐ कल
सूर्य डुब्बने थमां पहलें पहलें जयद्रथ गी मारी ओड़ड ।

सिन्धुराज वृद्धक्षत्र दे पुत्तरै दा नां जयद्रथ हा । ओदे जन्म
उप्पर गासबाणी होई ही—ए राजकमार बड़ा शूरवीर होग ते जुद्ध
भूमि इच बीरगति पाइयै सुर्ग लोक जाग ।

जोधा लोकें इच जेड़ा सारे कशा बहादुर होग ओ जुद्ध भूमि
इच एदा सिर धड़ै थमां बक्ख करग ।

मरना ते सारें गै हुन्दा ऐ पर भायें कोई केडा बुद्धिमान ते
शूरवीर की नईं होए मृत्यु गी घट्ट गै चान्दा ऐ ।

अपने पुत्तरै दी मृत्यु दी बाणी सुनिऐ वृद्धक्षत्र गी बड़ा क्लेश
होआ ते दुखी मनै कन्ने उस श्राप दित्ता—जेड़ा मेरे पुत्तरै दा सिर

महाभारत

धड़ै थमां बक्ख करग ते भुजा सुट्ठग ओदा अपना सिर बी टोटे टोटे होई जाग ।

जयद्रथ बड्डा होआ ते जिसलै उस राजकाज सम्हालेया तां वृद्धक्षत्र होर उमरी दा आखरी हिस्सा तपस्या इच गजारने गितै उस भूमि इच आइयै ते आश्रम बनाइयै रौन लगे जेड़ी पिच्छुआं कुरुक्षेत्र दा जुद्धक्षेत्र बनी । जिसलै जयद्रथ नै अर्जुन दी पतिंग्या सुनी तां उसी ओ भविष्यवानी चेतै आई ते उस समझेया जे अन्तकाल आई गेया ऐ ।

उस दुर्योधनै गी आखेया—में होर जुद्ध नई करना मिगी अपने देस परतोन देओ ।

दुर्योधन आखन लगा—डरो नई । तुसें गी खतरें थमां बचाने आस्तै कर्ण, चित्रसेन, विविशति, भूरिश्रवा, शल्य वृषसन, युधामित्र, जय, भोज, कम्बोज, सुदक्षिण, सत्यव्रत, विकर्ण, दुर्मुख, दुशासन, सुबाहु, कर्लिगराज ते अवन्तीराज, द्रोणाचार्य, द्रोणाचार्य हुन्दा वीर पुत्तर, शकुनि ते में आपू अस सारे होंगे ।

सारी सैना दा अज्ज इक मात्तर कम्म होग जे छड़ा तुसें गी अर्जुनै थमां बचाया जा । तुस असें गी छोड़ियै अज्ज नई जाओ । जयद्रथ रुकने गी मन्नी गेया । ओ द्रोणाचार्य हुन्दे कोल गेया ते आखन लगा—गुरु जी, तुसें मिगी ते अर्जुन गी पढ़ाये दा ऐ । तुन्दी साढ़े दौने दे बारे इच के रा ऐ ?

द्रोणाचार्य होरें आखेया—बेटा, में गुरु होने दा अपना फर्ज नभाया । तुसें दौनें गी पक्खपात बिना इक्के नेई शिक्षा दिती । पर ए गल्ल ठीक ऐ जे अर्जुन थुआड़े कोला ज्यादा काबल ऐ । ओदा अनुशासन कमाल ऐ ते अभ्यास बड़ा ऐ । पर तुगी जरकने दी लोड़ नई । तुगी उस सैना दे पिछे रखगे जिसी अर्जुन कदे नई त्रोड़ी सकग । तू अपने पुरखें दी परम्परा मताबक जुद्ध कर ।

मौत ते सारें गी आन्दी ऐ । बहादरें गी बी ते डराकलें गी बी । ते जेड़े शूरवीर जुद्ध भूमि इच वीरगति पान्दे न ओ सुर्ग लोक गी जन्दे न । बड़े बड़े शूरवीरें गी जुद्ध भूमि इच ए गति नई

थोन्दी । तू डर नई ते जुद्ध कर । द्रोणाचार्य होरें जयद्रथ गी
इयां आखेया ते अपनी सैना दी रचना करने गी अगें बधे ।

प्रमुख सना कोला बारां मील पिच्छें इक बड़ी सुरक्षित जगह
उनें जयद्रथ गी रखेया ते बड़ी मजबूत फौज ओदी सुरक्षा आस्तै
निश्चत कीती । भूरिश्रवा, कर्ण, अश्वत्थामा, शल्य, वृषसैन ते
कृपाचार्य अपनी अपनी सैना कन्ने उत्थे मजुद हे । पाण्डवें ते कौरवें
दी सैना दे दम्यानि द्रोणाचार्य होरें 'चक्र व्यूह' बनाया । इस गी
होर पक्का करने गित्तै उन्हे 'कमल व्यूह' बनाया । फी एदी मजबूती
आस्तै 'सूचीमुख व्यूह' बनाया । इनें सारे कशा परे जयद्रथ गी
रखेया । चक्र व्यूह दे सिरे उप्पर द्रोणाचार्य आपू खड़ोते । उनें
चिट्ठा कवच ते हैलमट पाई दी ही । ओ अपने रथै उप्पर बैठे दे
हे । रथै गी भूरे रंग दे घोड़े लगगे दे हे उन्दा झण्डा भुल्लै करदा
हा । झण्डे उप्पर बेदी दी तस्वीर ही ते कन्ने मृगछाला लग्गी दी
ही । कौरवें दी सैना गी उसी दिक्खी २ बड़ा जोश आवै करदा हा ।
दुर्योधन सैना दी रचना दिक्खी ते ओदा घोरज ते बसाह
बधेया ।

इक हजार सज्जे सजाये रथ इक सौ हाथी, त्रै हजार घुड़स्वार
दस हजार प्यादे पन्दरा सौ धनशधारी लइयै धृतराष्ट्र दा पुत्तर
दुर्मर्षण प्रमुख सैना थमां अगगे बधेया ते शंख बजाइयै आखन लगा—
कुत्थें ऐ अर्जुन ! जेदी बीरता ते रोहै दी बड़ी धाक ऐ । उसी
अगें औन देओ । जियां कुप्पड़ै उप्पर घड़ा भजदा ऐ इयां अज्ज
अर्जुन दा चाण्डा ठप्पा करी ओड़नां ऐ ।

अर्जुन किश फासले उप्पर आई गया ते उस अपना शंख
बजाया । सारी कौरव सैना इच शंख वज्जन लगे ।

अर्जुन आखेया—कृष्ण जी रथ बधाओ । हाथिएं दी
लाइन त्रोड़ने आं ।

दुर्मर्षण दी फौज हारी । जियां तफान बदलै गी खीसबीस
करी ओड़दा ऐ इयां कौरवें दी सैना खिल्लरी गई । ते तां तुआं
नस्सन लग्गी । दुशासन गी ए दिक्खियै बड़ा रोह चढ़ेया । उस

हाथिएं दी बड़ी सैना लई ते अर्जुनै गी घेरा पाया । दुशासन बड़ा दुष्ट हा पर बहादुर बी बड़ा हा । ओ अर्जुन कन्ने बड़ी बहादुरी कन्ने लड़ेया । मदानै इच लौथां गै लोथां होई गइयां । आखरकार ओ हारी गया ते पिच्छे हटी गया । ओ द्रोणाचार्य हुन्दी सैना कन्ने जाइ रलेया । सव्यसाची अर्जुनै दा रथ द्रोणाचार्य हुन्दे कोला लंघेया । ओ द्रोणाचार्य गी आखन लगा—हे गुरु जी, मिगी पुत्तरै दी मृत्यु दा सल्ल ऐ । में सिन्धुराज जयद्रथ कन्ने बदला लैन आयां । मिगी शीर्वाद देओ मेरी पतिग्या पूरी होऐ ।

द्रोणाचार्य होर मुस्कराये ते आखन लगे—जयद्रथ कोला लड़ने थमां पहले मेरे कन्ने जुद्ध कर । ए आखियै उनें अर्जुनै दे रथे उप्पर तीरें दी बरखा कीती । अर्जुनै बी तीर चलाये पर गुरु होरें नकारा करी ओड़े । फी अर्जुन ते कृष्ण दौनें उप्पर जलदे बाण चलान लगे । अर्जुन उन्दा धनश त्रोंड़ने गी गाण्डीव चलान लगा । इन्ने इच द्रोणाचार्य हुन्दा तीर लगंगा ते गाण्डीव दी डोरी कटोई गई । द्रोणाचार्य होर अर्जुन उप्पर, रथे उप्पर ते घोड़े उप्पर तीर चलान्दे रे । अर्जुन जवाब दिन्दा रेआ पर द्रोणाचार्य हुन्दे तीरें दी इन्नी बरखा होई जे रथ न्हेरे इच घिरी गया ।

कृष्ण होरें दिक्खेया जे कम्म कसूतर होआ करदा ऐ ।

ओ आखन लगे—अर्जुन, समां नष्ट नईं कर । आ अग्गे चलचै । इस ब्राह्मण शूरवीरै ते हुट्टना भाखा गे नईं । इसी छोड़ । ए आखियै उनें द्रोणाचार्य दे खब्बे पासै रथ बधाया ।

द्रोणाचार्य होर आखन लगे—भई ! दुश्मन गी हराये बगैर अग्गे नईं बधना ।

अर्जुनै आखेया—तुस मेरे गुरु ओ । शत्रु नईं । अऊं थुआड़े पुत्तरै सतुल्ल आं । इस दुनियां इच कोई नईं जेड़ा तुसै गी हराई सके । ए आखिये ओ रथ कड़िऐ अगगे लइ गया ।

अर्जुनै भोज दी सेना गी त्रोंड़ेया । कृतवर्मा ते सुदक्षिण जिनै रस्ता रोकेया उनेंगी हराया । श्रुतायुध नै बी रस्ता रोकने दी कोशश कीती पर ओदे घोड़े मरोई गे । उस कृष्ण जी उप्पर गुर्ज चलाया ।

ए गुर्ज ओदी माऊ गी बर थोए दा हा पर शर्त पूरी नई होने करी ओ गुर्जे परतियै श्रुतायुध गी लग्गा ते ओ मरी गया । गुर्जे दी कहानी इयां ऐ । परनसा नै बड़ा तप कीता । वरुण देवता प्रसन्न होए । उनें उसी बर दित्ता जे ओदा पुत्तर श्रुतायुध कुसे शत्रू कोला नई मरग । में थुआड़े पुत्तरै गी इक शस्तर दिन्नां । ओ सारियां लड़ाइयां लड़ै । कोई शत्रु उसी नई हराई सकग ते न गै मारी सकग । पर ए गुर्ज कुसे ऐसे व्यक्ति उप्पर नई चलाना जेड़ा लड़ा नई करदा होऐ । जे उस इयां कीता तां गुर्ज परतिये उसी गै आई लग्ग ते ओ मरी जाग । इस शर्त उप्पर उनें श्रुतायुध गी गुर्ज दित्ता हा । अर्जुनै कन्ने लड़दे श्रुतायुध गी ए गल्ल भुल्ली गई ते उस कृष्ण हुन्दे उप्पर गुर्ज चलाई दित्ता । कृष्ण होर ते छड़े रथ चला करदे हे । ओ लड़ा नई हे करदे । गुर्ज कृष्ण हुन्दी छाती इच लग्गा ते पड़कियै श्रुतायुध गी बज्जा ते जियां मन्तर कदे पुट्टा पौन्दा ऐ ते मन्तर सिद्ध करने आले गी पुट्टा करी ओड़दा ऐ इयां गे गुर्ज श्रुतायुध गी लग्गा ते ओ मरिये भुआ डिग्गी पेया जियां कोई बड़ा बूटा बाऊ कन्ने पटोई गया होऐ ।

फी कम्बोज राज अपनी सैना लइयै अर्जुन दे मकाबले उप्पर आये । भयंकर लड़ाई होई । ओ बी मरोइयै जुद्ध भूमि इच डिग्गी पेया जियां जगै बाद भण्डे दा डण्डा भुआ छोड़ी ओड़दे न ।

जिसलै कौरव सैना नै कम्बोज राज ते श्रुतायुध गी डिग्दे दिक्खेया तां उन्दे इच बड़ी भाजड़ पई । फी श्रुतायु ते ओदा भ्रा अश्रुतायु मकाबले उप्पर आये ते अर्जुन गी परेशान करन लगे । उन्दा हमला एडा जोरदार हा जे इक बारी ते अर्जुन गी बी अपने भण्डे दे डण्डे दा सहारा लैना पड़ गया । अर्जुन जखमी होई गया । कृष्ण होरें ओदा हौसला बधाया ते अर्जुन फी लड़ने गित्तै तयार होई गया । लड़ाई परतियै शुरु होई गई । ओ दोऐ भ्रा मारे गये । उन्दे पुत्तरें लड़ाई जारी रक्खी । ओबी मरोई गे ।

अर्जुन अगे बधेया । उस किन्ने गै जोधा मारी ओड़े । ओ जयद्रथ कोल पुज्जी पेया ।

दुहारा कवच

जिसलै धृतराष्ट्र नै संजय कोला अर्जुन दे जिताने दियां
खबरां सुनियां तां ओ आखन लगे—संजय ! जिसलै कृष्ण होर
सन्धि करन हस्तनापुर आये हे में दुर्योधन गी आखेया हा जे सन्धि
करी लै ते मौका नई खुआ । में आखेया—आयें कन्ने सन्धि करी
लै । कृष्ण होर साढ़े कन्ने नेकी गितौ गै आये न । उन्दी नसीहत
मुट्टी नई पा । पर दुर्योधनै इक नई सुनी । उसी कर्ण ते दुशासन
दी सलाह मेरी सलाह कोला मती चंगी लग्गी । ओदे सिरै उप्पर
काल स्वार हा उस अपना नास कराई लेया ऐ । द्रोणाचार्य होर
जुद्ध गी चंगा नई समझदे हे ते न गै भीष्म पितामह, भूरिश्रवा,
कृपाचार्य ते होर किन्ने गै । पर मेरे जिद्दी पुतरं कुसै दी नई
मन्नी । उसी बड़ा लालच होई गेदा हा । ओ घृणा, द्वेष ते रोहै
इच फसी गया ते ए सर्वनास करने आला जुद्ध स्हेड़ी बैठा ।

धृतराष्ट्र होर पशता करदे हे तां संजय आखन लगा—इसलै
पशताने दा के फायदा ऐ ? पानी ते सारा बगी गेदा ऐ हुण शगाफ

पूरिऐ के बनदा ऐ ? तुसें पाण्डवें गी जूआ खेडने थमां की नईं रोकेया ? जेकर तुसें उस बेल्ले मनासब गल्ल कीती दी हुन्दी तां इस सर्वनासै दा उगदे गै बी मरी जाना हा । फी बी जे तुस मजबूती कन्ने कम्म लैन्दे तां ए मुसीबत रुकी जानी ही । तुसें बुराई दिक्खी बी, पर अपनी ठीक रा गी पिच्छें सुट्टिऐ कर्ण ते शकुनि दी सलाह मन्नी । हुण कृष्ण होर, युधिष्ठिर ते द्रोणाचार्य होर तुन्दी उन्नी इज्जत नईं करदे जित्नी पहलें करदे हे । कृष्ण होर ते समझदे न जे तुन्दी सचाई दी गल्ल छड़ा फरेब ऐ । कौरव लड़ने दे बारे इच ते अट्टी चोटी दा जोर ला करदे न पर ओ अर्जुन, कृष्ण, सात्यकि ते भीमसेन दी शक्ति दा मकाबला नईं करी सकदे । दुर्योधन बी घट्ट जोर नईं ला करदा । हुण दुर्योधन ते ओदे साथिएं गी दोस देइऐ कोई लाभ नईं ।

धृतराष्ट्र होर आखन लगे—हे प्यारे सञ्जय । मैं अपना फर्ज नभाने इच सुस्ती कीती । तू जे किश आखनां ए सो ठीक ऐ । बिधना दा लिखेया कुसै कोला नईं मटोन्दा । मिगी दस्स के किश होआ । भायें कनेआ मन्दा बी की नईं होऐ मिगी सना । ओ बृद्ध राजा दुखै इच डुब्बे दा आखन लगा । सञ्जय इक आज्ञाकारी शर्गिदै आङ्ग अर्गों दी गल्ल सनान लगा—

जिसलै दुर्योधनै अर्जुन दा रथ जयद्रथ पासै बधदा दिक्खेया तां ओ बड़ा कुढ़ेया ते द्रोणाचार्य हुन्दे कोल जाइयै शकंत करन लगा— अर्जुनै साढ़ी फौजा इच शगाफ पाई शोड़ेया ऐ । ओ जयद्रथ दे थां तोड़ी पुज्जी चलेया ऐ । असें गी इयां पिच्छें हटदे दिक्खियै सिन्धुराज गी बचाने आले जोधा जी ढाई ओड़ल । उनें गी पक्का जकीन हा जे अर्जुन तुन्दे कशा नईं लघी सकदा । ओ जकीन भूठा पवा करदा ऐ । ओ थुआड़े दिखदे २ अर्गों बधी गया—तुसें उसी रोकने गित्ती किश नईं कीता । तुस पाण्डवें दी गै सहायता करा करदे ओ । में कची मसीबतौ इच फसेयां दस्सो में तुन्दा के बगाड़ेया ऐ ? तुस असें गी इसलै की मरवान

लगे ओ ? मिगी पता हुन्दा जे ते तुसें इयां करनां ऐं तां में जयद्रथ गी इत्थें रौने आस्तै कदे नईं आखदा । में बड़ी गलती कीती उसी जान नईं दित्ता । ओ अपने देस टुरी जन्दा तां खरा हा । हुण जे अर्जुनै ओदे उप्पर हमला कीता तां ओदा बचा मुश्कल ऐ । माफ करेयो । में बेवकूफी दियां गल्लां करा करनां पर मिगी बड़ा दुःख होआ करदा ऐ । तुस आपू जाओ ते जयद्रथ दी रक्षा करो । दुर्योधनै जिसलै इयां करारियां सनाइयां तां द्रोणाचार्य होर आखन लगे—

जियां तू फजूल गल्लां आखियां, में रोह नईं करन लगा । तू मेरे पुत्तरै आडू ऐ । अश्वत्थामा कोला बी मता प्यारा ऐ । जियां में आखना ऊँआ कर । ए कवच लै, इसी पा, ते अर्जुनै गी जाइये रोक । मैं उसी जाइयै नईं रोकी सकदा । मदानै दे इस हिस्से इच मेरी मजूदगी जरूरी ऐ । ए दिक्खो, तीरें दी वरखा । पाण्डव सैना भारी सख्या इच साढ़े उप्पर हमला करै करदी ऐ । इस बेल्लै युधिष्ठिर कोल अर्जुन बी नईं । साढ़ी योजना सफल होन लगी ऐ । में युधिष्ठिर गी पगड़न लगां ते थुआड़े हवालै करन लगां । हुण इस बेल्लै ए स्कीम नईं फेल होन देनी । में अर्जुनै पिच्छें नईं चलेया । जे में अर्जुनै पिच्छें द्रौड़ैया तां सारी रचना बिगड़ी जानी ऐ ते अस हारी जागे । में ए कवच तुगी लुआन्नां । तू बिश्वास कन्ने जा । बिल्कुल नईं डर । तू बीर ए चतर ऐ तजबेकार ऐ । ए कवच सारे शस्तरें थमां थुआड़ी रक्षा करग । कोई शस्तर थुआड़ा शरीर नईं बेधी सकग । लड़ाई इच अगें जा । जियां ब्रह्मा नै इन्द्र गी कवच दित्ता हा इयां औं तुगी कवच देया करनां । जा थुआड़ी जीत होऐ ।

दुर्योधन गी हौसला होआ । जियां द्रोणाचार्य होरें आखेया हा ओ मन्तरें दी शक्ति आला कवच पाइयै ते बड़ी भारी सैना लइयै अर्जुनै कन्ने लड़न चलेया ।

अर्जुन कौरवें दी सेना गी टप्पिए दूर जाई पुज्जा दा हा । ओ उस थां पासै बधा करदा हा जित्थें जयद्रथ गी बड़ी सुरक्षा कन्ने छपैलियै रक्खेदा हा ।

कृष्ण होर दिक्खेया जे घोड़ै किश हुट्टी गे न उनें रथ रोकेया ते हुट्टे दे घोड़े गी बसां देन लगे । उस्सैलै बिन्द ते अनुबिन्द दौं भ्रायें इक दम अर्जुनै उप्पर हमला करी दित्ता । अर्जुनै उनें गी हराया, उन्दी सैना गी नसाई ओड़ेया ते उनें दौनें गी मारी ओड़ेया । फी कृष्ण होरें रथ खोलेया, ते हुट्टे दे घोड़े भुआ बिलन लगे । किश बसां करिए ओ फी ताजा दम होई गे । अर्जुन ते कृष्ण फी अपनी योजना मताबक चलन लगे ।

अर्जुन, पिच्छें पासै दिक्ख । मूर्ख दुर्योधन आवा करदा ई । अज्ज किस्मत सैल ऐ । तुम्मी अपना रोह मत्ते चिरै दा दबाये दा ऐ । हुण मौका आया ई, कड्डी लै । इऐ ओ आदमी ऐ जिस सारी मसीबत पाई दी ऐ । हुण ओ आपू थुआड़े सामनै आई गया ऐ । पर इक गल्ल चेतै रक्खेयां । ओ बड़ा तीरन्दाज ऐ । धनश बिद्या दा माहिर ऐ, ते बड़ा मजबूत जोधा ऐ ।

कृष्ण जी नै ए आखेया ते दुर्योधनै दे मकाबले गित्तै खड़ोई गे । दुर्योधन बेधड़क होइऐ आई पुज्जा ।

आखन लगा—लोक आखदे न जे तू बड़ो बहादरी दे कारनामे करी दस्से न । में ते हजे कोई दिक्खेया नई । अम्मीं दिक्खी लै जे थुआड़ी शोहरत उन्नी गै जिन्नी थुआड़ी बहादरी ऐ ।

बड़ी घोर लड़ाई शुरु होई । कृष्ण होर बी हरान होए । आखन लगे—अर्जुन ! अज्ज तेरे तीरें गी के होई गया ऐ ? ए दुर्योधनै गी लगदे गै नई । ए में पहले वारी दिक्खा करनां जे गाण्डीव दे तीर नशाने उप्पर लगन ते असर नई करन । ए अजीब ऐ ? थुआड़ी बाहमें इच जोर नई रेआ ? जां गाण्डीव दा गुण खत्म होई गया ऐ ? थुआड़े तीर वज्जन ते इयां गै बगैर बेधे दे नकारा होई जान । किश समझ नई आवा करदी ।

अर्जुन मुस्कराया ते आखन लगा—मिगी पता लग्गी गया ऐ । दुर्योधन द्रोणाचार्य हुन्दा मन्तरे दा कवच लाइयै आये दा । गुरु होरें मिगी इसी बी बेधेने दी जाच दस्सी दी ऐ । इस ते कवच इयां

लाये दा ऐ जियां कुसै बैलै उप्पर टल्ला दित्ता दा होऐ । तुम बिन्दक मौजू दिक्खो । ए आखियै अर्जुनै तीर चलाये । पहले ओदे घोड़े मारे, फी सारथि ते रथ त्रोड़ी ओड़ेया । फी अर्जुनै तीर चलाइयै ओदा धनश त्रोड़ी ओड़ेया ते उसी निहत्था करी दित्ता । फी अर्जुन नेए पैन्ने ते त्रिक्खे तीर चलान लगा जे उनें थार्ये लगन लगे जित्थे कवच नईं हा । दुर्योधन कोला ए मार नईं भलोई ओ पिच्छे हटेया ते नस्सी गया ।

जिसलै दुर्योधन दी इयां गत बनी तां कृष्ण जी नै शंख वजाया । जयद्रथ दी सौना इच त्राह पई गया । जयद्रथ दी रक्षा करने आले जोधा चगत होई गे । ओ अपने रथे इच भटपट तैयार होई गे । भूरिश्रवा, कर्ण, वृषसैन, कृपाचार्य, शल्य अश्वत्थामा ते जयद्रथ अट्ट महारथी अर्जुन दे मकाबले गित्तै तयार होई गे ।

०००

युधिष्ठिर हुन्दी चिन्ता

जिसलै पाण्डवें दुर्योधनै गी अर्जुन पासै जन्दे दिक्खेयां तां
उनें कौरव सैना उप्पर जोरेयां हमला करी दित्ता जे द्रोणाचार्य होर
जयद्रथै दी सहायता गी नईं टूरी जान । नतीजा ए होआ जे कौरव
सैना गी त्रौं मोर्चे उप्पर लड़ना पेया । ओ बड़ी कमजोर पौन
लगी ।

अपने रथै गी तेज दड़ाइय द्रोणाचार्य हुन्दे पासै नेता ते
धृष्टद्युम्नै गुरु हुन्दे उप्पर हमला करी दित्ता । द्रोणाचार्य हुन्दे
भूरे घोड़े ते धृष्टद्युम्न दे फाखती रंगै दे घोड़े आपूँ इच पलची गे ।
इयां नजारा बनेया आखो सजा बेल्ले बदल घरोन्दे बक्खी किट्टे
होए होन । धृष्टद्युम्नै अपना धनश शण्डेया ते तलवार सोत्रियै
द्रोणाचार्य हुन्दे रथै उप्पर जाई चढ़ेया । कर्दे ओ रथै दी बाइयें
उप्पर जा, कर्दे घोड़े उप्पर चढ़ै ते कर्दे बागां पगड़ै ते बेतहाशा
द्रोणाचार्य हुन्दे उप्पर हमला करै । ओ उनें गी अपनी बलदी
अक्खीं कन्ने इयां दिक्खा करदा हा आखो उनें गी अक्खीं कन्ने गै
भस्म करी ओड़ग ।

बड़ा चिर जुद्ध हुन्दा रेआ । द्रोणाचार्य होरें रोहै कन्ने बाण कड़ुया ते चलाया । जे ए वान लग्गी जन्दा तां धृष्टद्युम्न होर जम लोक पुज्जी जन्दे । पर इक दम सात्यकि आई पुज्जा । उस आचार्य हुन्दा तीर गै परताई ओड़ेया । द्रोणाचार्य होर सात्यकि पासै मुड़े । इन्ने चिरै च पञ्चाल जोधा धृष्टद्युम्न गी कड़ियै लई गे । द्रोणाचार्य होर अक्खीं लाल करिऐ ते फिलडरै आडू फुंकार मारिऐ सात्यकि हुन्दे पासै बधे । सात्यकि पाण्डवें दी सेना इच प्रमुख जर्नेलें बिचा हा । जिसलै उस दिक्खेया जे द्रोणाचार्य होरें ललकार मारी ऐ तां उस उन्दे सामने उन्दा चैलंज मन्जूर करी लैता ।

सात्यकि नै अपने सारथि गी आखेया—ए ओ आदमी ऐ जिस अपना ब्राह्मणें आला कम्म छोड़ियै लड़ने आला कम्म साम्भे दा ऐ ते पाण्डवें गी बख्त पाये दा ऐ । एदी ब्रजह कन्ने गै दुर्योधन एड्डा भुड़कदा ऐ । ए अपने आप गी बड़ा महारथी समझदा ऐ । ए हर बेल्लै गमानै इच रौन्दा ऐ । इसी मजा चखाना ऐ । रथ तौले लई चल ।

सात्यकि दे सारथि नै चिट्टे घोटें गी चाबक मारी ते रथ तेज गति कन्ने चलेया । सात्यकि ते द्रोणाचार्य एडी तौली २ तीर चलान लगे जे सूरज खटोई गया ते जुद्ध भूमि इच न्हेरा होई गया । फुलादी तीर न्हेरे इच इयां लिस्कन जियां सप्पें नमीं नमीं सपकंज तुआरी दी होऐ । दौनें दे रथें दे छत्तर ते झण्डें दे डण्डे त्रुट्टी गे । द्रोणाचार्य ते सात्यकि लहुलुहान होई गे । दक्खी जोधा इन्दा द्वन्द दिक्खा करदे हे । न ओ शंख बजान, न नारे लान, न सिंह गजना करन । देवता, विद्याधर, गन्धर्व ते यक्ष उप्परा गासा दा लड़ाई दिक्खन लगे ।

सात्यकि नै तीर मारेया ते द्रोणाचार्य दा धनश त्रोड़ी ओड़ेया । उनें दूआ धनश लेआ । हबे उनें चढ़ाया बी नई हा जे सात्यकि नै उसी बी त्रोड़ी ओड़ेया । द्रोणाचार्य हुन्दे कोला इक तीर बी नई चलेया ते उन्दे सौ धनश सात्यकि नै त्रोड़ी ओड़े । द्रोणाचार्य होर सोचन लगे—ए सात्यकि ते श्री राम, कार्तवीर्य, अर्जुन ते भीष्म

हुन्दे दर्जे दा जोधा ऐ । ईऐ नेआ शत्रु थोना बी ते बड़े भागें दी गल्ल ऐ । ओदी धनश बिद्या दी चतराई दिक्खिये धनष बिद्या दे माहिर आचार्य द्रोणाचार्य होर बड़े खुश होए । द्रोणाचार्य होर जेड़ा बी तीर चलान सात्यकि उसी कट्टी ओड़ै । बड़ा चिर ए बरोवरी दा द्वन्द चलदा रेया । द्रोणाचार्य होरें निश्चा कीता जे सात्यकि गी मारी ओड़नां । उनें अग्नि बाण चलाया । पर सात्यकि नै उसै बेल्लै वरुण अस्तर चलाई दिता ।

हुण सात्यकि दा बल खीन होन लगा । ए दिक्खियै कौरव सैना बड़ी खुश होई । ते जयकारे बुलान लगी । जिसलै युधिष्ठिर होरें दिक्खेया जे सात्यकि दबोन लगा ऐ तां उनें अपने जोधा लोकें गी सात्यकि दी सहायता आस्तै टोरेया । द्रोणाचार्य होर सात्यकि गी परेशान करा करदे न । धृष्टद्युम्न । भटपट सात्यकि दी सहायता गी जाओ ।

इस ब्राह्मण शूर बीरै सात्यकि गी मारी ओड़ना ऐ । तू मङ्कोच की करै करनां एं ? झटपट जा । द्रोणाचार्य होर सात्यकि कन्ने इयां जुद्ध करा करदे न जियां बिल्ली पक्खरूऐ कन्ने खेडा करदी होऐ । सात्यकि इस बेल्लै जमराजै दे मुं है इच ऐ । सारे जाइये द्रोणाचार्य हुन्दे उप्पर जोरदार हमला करो ।

सात्यकि बड़ी मुश्कलें बचेया । उसै बेल्लै जित्थें अर्जुन लड़ा करदा हा उत्थुआं पांचजन्य शंख वज्जने दी बाज आई ।

युधिष्ठिर होर आखन लगे—सात्यकि ! पांच जन्य दी बाज ते आई ऐ । पर अर्जुन दे धनशै दी टंकार नई सुनोची । मिगी डर ऐ जे अर्जुन जयद्रथ दे साथियें कोला घिरी गेदा ऐ । ते खतरे इच ऐ । अर्जुन दे अगें पिच्छें कौरवें दियां फौजां न । उस बड़ुलै उन्दियां फौजां ओड़िये ब्यूह इच प्रवेश ते कीता हा पर हजे तीड़ी परतोआ नई । दिनै दा मता भाग मुक्की गया ऐ । छड़ी कृष्ण हुन्दे पांचजन्य दी बाज गै की आई ऐ ? मिगी डर ऐ जे अर्जुन मरोई गया ऐ ते कृष्ण होरें आपू हथ्यार चुक्के न । सात्यकि तू कोशिश नई करी सकदा ? थुआड़ा प्यारा दोस्त अर्जुन जिस तुगी

सखाया दा बी ऐ मौती दे मुं हैं इच ऐ । अर्जुन मते वारी थुआड़ी प्रशंसा करदा हा । थुआड़ी बीरता सरान्दा हा । सात्यकि नेआ होर कोई जोधा नई । जदू अस वनवास इच हे तां उस मिगी आखेया हा । तुआई दिक्ख । उत्थे धूड़ उड्डा करदी ऐ । मिगी जकीन पौन्दा ऐ जे अर्जुन घिरी गेदा ऐ । जयद्रथ बड़ा भारी शूरवीर ऐ । होर शत्रू जोधा ओदी सहायता करा करदे न । ओ जयद्रथ आस्तै जिन्द देने गी त्यार न । सात्यकि ! तू भटपट जा । युधिष्ठिर होरें कम्बदे २ आखेया ।

सात्यकि द्रोणाचार्य हुन्दे कन्ने जुद्ध करिऐ हुट्टी गेदा हा । आखन लगा— हे धर्म पुत्तर ! अऊ तुन्दा हुकम मन्नने गी त्यार आं । अऊं अर्जुनै गित्तै के नई करी सकदा ? अऊं ते अपनी जिन्द वारी देयां । तुस आखो अऊं देवतें कन्ने बी जुद्ध करने गी त्यार आं । पर इक गल्ल ऐ जे जन्दे जन्दे कृष्ण होर ते अर्जुन मिगी आखी गेदे न—जिन्ना चिर अस नई परतोन्दे तू युधिष्ठिर होरें गी इक्कला नई छोड़ेंयां ।

उनें गी बचाने गित्तै बड़ी हश्यारी कन्ने कम्म लेयां । अस युधिष्ठिर होरें गी थुआड़े हवालै छोड़ी चले आं । कौरवें दी सैना इच इक गै बीर ऐ जेदे कोला अस डरने आं । ओ द्रोणाचार्य होर न । तुगी पता ऐ जे आचार्य नै जेड़ी पतिग्या कीती दी ऐ । अस युधिष्ठिर हुन्दी सुरक्षा तुगी सौपी चले आं । इयां कृष्ण होरें ते अर्जुन नै मिगी आखेया हा । अर्जुन मेरे उप्पर बड़ा बसाह करदा ऐ । ओ मिगी इस जोग समझदा ऐ । अऊं ओदा हुकम कियां टाली ओड़ां । तुस अर्जुन दी सुरक्षा वारे कोई चिन्ता नई करो । उसी कोई नई हराई सकदा । जयद्रथ ते बाकी सारे रलिये बी ओदी शक्ति दे सोलमे हिस्से बरोबर नई । हे महाराज ! जे में जां तां तुसें गी कुसी सौपी जां । जे द्रोणाचार्य होर तुसें गी पगड़ने गित्तै आई गे तां मिगी कोई एडा जोधा नई लबदा जेड़ा उन्दा मकाबला करी लैग । मिगी जाने गित्तै नई आखो । मिगी हुकम देने थमां पहले भलेयां सोची लौ ।

युधिष्ठिर होर आखन लगे—सात्यकि में भलेयां सोची लेया ऐ। में अपने बारे इच, खतरे ते समैं दी जरूरतें बारे इच तुलना करी लई ऐ। मेरा इऐ फैसला ऐ जे तू जा। अऊं तुगी जाने दी आज्ञा दिन्नां। इत्थें भीमसैन मेरी रखवाली करी लगै। धृष्टद्युम्न बी इत्थें गै। होर मते जोधा लोक इत्थें न। मेरे बारे इच चिन्ता करने दी लोड़ नई।

ए आखिये युधिष्ठिर होरें तीरें दे भरोचे तरकश ते होर अस्तर शस्त्र दित्ते। ताजादम घोड़े रथें इच जोतरे ते सात्यकि गी शीर्वाद दइयै टोरेया।

भीमसैन जी ! युधिष्ठिर होर तुन्दे हवालै न। होशियार रवेओ। सात्यकि ए अखिये अर्जुन पासै दुरी गया।

सात्यकि जिसलै कौरवें दी सैना गी त्रोंड़िऐ अगगे बधन लगा तां ओदा बड़ा बरोध होन लगा। पर उन अपना रस्ता कड़ुी गै लैता। बरोध बड़ा सख्त हा। सात्यकि दा अगगें बधना हौली २ होआ करदा हा।

जिसलै द्रोणाचार्य होरें दिक्खेया जे सात्यकि युधिष्ठिर हुन्दे कशा दूर गया उठी ऐ तां उनें विन्द बी समां नष्ट नई कीतां ते पाण्डवें दी सैना उप्पर हमला करी दित्ता। पाण्डवें दी रचना नुटन लगी ते ओ पिच्छें हटन लगे। युधिष्ठिर होर घाबरे।

०००

युधिष्ठिर हुन्दी कोरी हीखी

युधिष्ठिर होर भीमसैन गी आखन लगे—न अर्जुन परतोआ ते न सात्यकि । मिगी बड़ी चिन्ता होआ करदी ऐ । मिगी पांच जन्य ते सनोचदा ऐ पर गाण्डीव दी टंकार नईं सनोचदी । सारें कशा बहादुर ते स्वामी भगत सात्यकि बी कोई खबर लेइयै नईं परतोआ । मेरी चिन्ता खिन २ बधदी गै जा करदी ऐ । भीमसैन आखन लगा—में तुसें गी नेआ घाबरे दा कदे नईं दिक्खेया । तूस अपना धीरज की छोड़दे ओ ? जे किश चान्दे ओ मिगी हुकम करो । अपने दिलै दे चक्करे गी चिन्ता दे खोबे इच नईं खुबन देओ ।

युधिष्ठिर होर बोले—प्यारे भीमसैन । मिगी डर ऐ जे अर्जुन मरोई गया ऐ । ते हुण कृष्ण होर शस्तर लइयै जुद्ध करा करदे न । मिगी पांचजन्य दी बाज ते औन्दी ऐ पर गाण्डीव दी टंकार नईं सनोचदी । मिगी डर ऐ जे अर्जुन जेदे उप्पर साढ़ियां सारियां मेदां न, जेड़ा लासानी बीर ऐ, मरोई गया ऐ । मेरा मन बड़ा क्षुब्ध ऐ । में जे किश आखनां जेकर तू करे तां भटपट उत्थे जा जित्थे अर्जुन

ऐ। ओदे कन्ने ते सात्यकि कन्ने जाइयै मिली जा । ते जे लोड़ पौन्दी ऐ कर । ते तौले परतिऐ आ । सात्यकि कौरवें दी सैना गी चीरदा अर्जुन पासै गया हा । तुम्मी ऊंआं गै कर । जे ओ जीन्दे होए तां जोरै कन्ने सिंह गर्जना करेयां । भीमसैन आखन लगा—तुस कल्पो नईं । अऊं भट जाइयै तुसें गी पता दिनां जे ओ सुरक्षित न । धृष्टद्युम्न गी आखन लगा—“हे पांचाल !” द्रोणाचार्य दा ख्याल रखेयां ओ युधिष्ठिर होरें गी जीन्दा पगड़ना चान्दा ऐ । साढ़ा परम कर्तव्य ऐ जे अस राजा दी रक्षा करचै । पर में उन्दा हुकम बी मन्ननां पौन्दा ऐ । इस करी में चलेयां । ते उनेंगी थुआड़ी रखवाली इच छोड़ी चलेयां ।

“भीमसैन जी तुस जाओ । निःशंक होइऐ जाओ । द्रोणाचार्य मिगी मारे बगैर युधिष्ठिर होरें गी नईं पगड़ी सकदे । द्रुपद पुत्तर ने भीमसैन गी जकीन दुआया । ओ द्रोणाचार्य दा मन्ने दा शत्रू हा । भीमसैन ठुरी गया । कौरवें भीमसैन गी घेरी लेया । ते पूरा जोर लाइयै भीमसैन गी अर्जुनै दी सहायता करने थमां रोकन लगे । पर जियां शेर पशुएं गी मारदा जन्दा ऐ इयां भीमसैन शत्रुएं गी मारदा ते अगें बधदा गया । धृतराष्ट्र दे उस कोई आरा पुत्तर मारी ओड़े । भीमसैन द्रोणाचार्य हुन्दे कोल जाई पुज्जा । द्रोणाचार्य होरें आखेया—भीमसैन रुकी जा । अऊं थुआड़ा शत्रु इत्थे खड़ोता दां । तूं मिगी हराये बगैर अगें नईं बधी सकदा । थुआड़े भ्राऊ (अर्जुन) गी में जान दित्ता हा । पर तुगी नईं जान दिन्दा ।

द्रोणाचार्य होरें सोचे दा हा जे भीमसैन बी अर्जुन आड़ू नम्मरता कन्ने बोलग पर भीमसैन बड़ा खौरा बोलेया ते घृणा कन्ने आखन लगा—“हे ब्राह्मण !” अर्जुन थुआड़ी मरजी कन्ने अगें नईं गया । उस थुआड़ा बरोध त्रोंडेया ते फौजां चीरियै अगें बंधेया ऐ । उस तुसें गी क्यास करिए नईं मारेया । पर में अर्जुनै आड़ू क्यास नईं करना । अऊं थुआड़ा शत्रुआं । इक समां हा तुस साढ़े गुरु हे ते पिता समान हे । अस तुन्दी ऊंआं गै इज्जत करदे हे । हुण तुस आपू आखा करदे ओ जे तुस साढ़े शत्रु ओ । इयां गै सई । ए

आखियै भीमसैन अपना गुर्ज मारेया ते द्रोणाचार्य हुन्दा रथ त्रोड़ी ओड़ेया । द्रोणाचार्य होरें गी दूए रथै उप्पर चढ़ना पेया । भीमसैन दूआ रथ बी त्रोड़ी ओड़ेया । ते सारें गी पिच्छें हटान्दा अगग बधी गया । उस दिन द्रोणाचार्य हुन्दे अठ रथ त्रुट्टे । भोज सैना सारी दी सारी तबाह होई गई । ओ शत्रुएं गी कटदा बडुदा अगगे बधदा गया । ते जित्थे अर्जुन ते जयद्रथ जुद्ध करा करदे हे जाई पुज्जा ।

जिसलै भीमसैनै अर्जुन गी दिक्खेया उस सिंह गर्जना कीती । गर्जना सुनियै कृष्ण जी ते अर्जुन बड़े खुश होए ते जयकारे बलान लगे । युधिष्ठिर होरें गर्जना सुनी । उन्दे शक दूर होए । चिन्ता मिटी । ओ अर्जुन गी शीर्वाद देन लगे । ओ मनै इच सोचन लगे—अज्ज सूरज डुब्बने कोला पहलें ओदी सगन्ध पूरी होई जानी ऐ । अभिमन्यु गी मारी ओड़ने आले गी उस खत्म करी ओड़ना ऐ । ते जित्तिये घर औना ऐ । जयद्रथ दी मृत्यु बाद दुर्योधन सन्धि आस्ते आखना ऐ ।

इन्ने भ्रा मरोए न, होई सकदा ऐ दुर्योधनै गी मत्त आवै । किन्ने गै राजें दियां जिन्दगियां जुद्ध भूमि इच नष्ट होइयां न । होई सकदा ऐ जे दुर्योधनै गी अपना दोष लब्बै ते ओ सन्धि आस्तै आखै । पर ए गल्ल होग बी ? भीष्म पितामह हुन्दी बलि लग्गी गई ऐ । दुश्मनी इस कन्ने गै नईं मुक्की जन्दी । पर अगगे होने आली तबाई ते रुकी जा । ताईं युधिष्ठिर होर कोरी हीखी दियां गल्लां सोचा करदे हे ते शान्ति आस्तै सुखने दिक्खा करदे हे । तुआईं पासै भीमसैन, सात्यकि, ते अर्जुन शत्रु कन्ने घोर जुद्ध करा करदे हे । ए संसार कियां चला करदा ऐ एदा उस भगवान गी गै पता ऐ । ओदी माया दा कुसै ऐन्त नईं पाया ।

०००

कर्ण ते भीमसैन

अर्जुन युधिष्ठिर होरें गी पिच्छें छोड़ी आया हा जे ओ कौरवें दी सैना ते द्रोणाचार्य दे हमले गी रोकडन । ते आपू अपना बचन पूरा करने गी अगें बधेया हा जे सूरज डुबबने थमां पहलें जयद्रथ गी जुद्ध भूमि इच मारी ओड़नां ऐ । जयद्रथ अभिमन्यु दी मृत्यु दा प्रमुख कारण बनेया हा । उससै अभिमन्यु गी पाण्डवें दी सहायता नई पुज्जन दित्ती । अभिमन्यु गी बक्ख करी ओड़ेया, ते घेरा पाइयै मरवाई ओड़ेया । युधिष्ठिर होरें पहलें सात्यकि गी टोरेया—फी भीमसैन गी टोरेया जे अर्जुन दी सहायता करो । भीमसैन उत्थे पुज्जा जित्थें अर्जुन ते जयद्रथ दी लड़ाई होआ करदी ही । उस जोरेयां सिंह गर्जना कीती । युधिष्ठिर होरें सिंह गर्जनां सुनी ते समझी गे जे अर्जुन जीन्दा ऐ ।

ए चौदमां दिन हा लड़ाई मते थारें ते बड़े जोरै कन्ने शुरु होई । सात्यकि ते भूरिश्रवा इक थार लड़े । भीमसैन ते कर्ण दूए थार । अर्जुन ते जयद्रथ त्रीये थार जुद्ध करन लगे । द्रोणाचार्य

होर बड़ु मोर्चे उप्पर गै हे । ते पांचाल ते पाण्डवें दे हमले रोकदे रे । ते उन्दे पर हमले बी करदे रे । दुर्योधन अपनी सैना लेइयै उत्थें पुज्जा जित्थें अर्जुन ते जयद्रथ दी लड़ाई होआ करदी ही । ओ तौले गै हारी गया ते पिच्छें नस्सी गया । इयां लड़ाई मते मोर्चे उप्पर ते भयंकर रूपै इच होआ करदी ही । फौजें दी रचना दक्खी इयां ही जे पिच्छुआं हमले दा बड़ा खतरा हा ।

दुर्योधन द्रोणाचार्य होरें गी आखन लगा—अर्जुन भीमसैन ते सात्यकि नैं असेंगी बड़ा पिच्छें सुट्टी ओड़ैया ऐ । ओ ते जयद्रथ दे सैक्टर इच जाई पुज्जे न । उनें सिन्धुराज गी दवाई लैता दा ऐ । ए बड़ा अजीब ऐ जे थुआड़ी कमानै इच साढ़ी रचना गी इयां त्रोड़ी ओड़ैया ऐ ते साढ़ी स्कीम गै फेल होई गई ऐ । हर इक पुछदा ऐ जे द्रोणाचार्य जी दे हुन्दे जेड़े जुद्धा इच माहिर न ए स्कीम कियां फेल होई गई । में के जवाब देयां ? तुसें मिकी धोखा दिता ऐ ।

दुर्योधनै इक बारी फी द्रोणाचार्य हुन्दी निन्द्या कीती ते दोष लाया । ओ क्षुब्ध होए बिना बोले—दुर्योधन ! तू फजूल दोष ला करना एं । इन दोषें दा कोई आधार नई । जे किश होई गया ए ओदा कोई उपा नई होई सकदा । हुण अगों दी सोचो । दुर्योधन बड़ा घावरे दा हा । उसी कक्ख समझ नई आवै दी ही ओ आखन लगा—तुसै सिक्खया देओ । दस्सो के होई सकदा ऐ ? मौके दी नजाकत दिक्खो ते सोचियै भटपट कम्म शुरू करो ।

द्रोणाचार्य होर आखन लगे—स्थिति ते बिल्कुल गंभीर ऐ । एदे इच कोई शक नई । साढ़ी स्कीमै गी फेल करिए त्रै जर्नेल अगों बधी गे दे न । पर उनें गी बी ते उन्नी गै चिन्ता ऐ जिन्नी असें गी ऐ । उन्दी लैना दा पिछला हिस्सा बी ऊंआं गै बगैर रक्षा दे ऐ जियां साढ़ा ऐ । अस उन्दे दौनें पासै आं । उन्दी स्थिति बिल्कुल सुरक्षित नई । हिम्मत रख । जयद्रथ कोल परतिऐ जा । ते जे किश बी होई सकदा ऐ ओदी मदत कर । पिछलियां हारां ते कठनाइयां धोखियै ते नराश होइये कोई फायदा नई । में इत्थें

रौत्रां ते जरुरत पई तां तुगी सहायता भेजड । में पांवाल ते पाण्डवें दी सेना गी इत्थें रोकी रक्खड । नईं ते अस मरोई जागे ।

दुर्योधन परतियै नमीं सैना लेइयै उत्थें पुज्जा जित्थें अर्जुन ते जयद्रथ लड़ा करदे हे । महाभारतै दी कथा थमां पता चलदा ऐ अज्जै दे घेरा पाने ते पिच्छे हटने दे तरीकें कुरुक्षेत्र इच बी बरतोए । ए तरीके उनें गी पता हे । दूए नेए तरीकें अपनाने ते उन्दे खतरे ते फायदें उप्पर खूब वचार होए दा ऐ । अर्जुन जेडे बक्खियें उप्पर हमले कीते उन्दे कशा शत्रू बड़े घबराये । भीम ते अर्जुन दे जुद्ध दा हाल पढ़िऐ अज्जै दे जंग दा वर्णन गै सेई हुन्दा ऐ । भीम दी मरजी नईं ही जे ओ कर्ण कन्ने पलचै जा मता चिर लड़दा रवै । ओ अर्जुन कोल पुज्जने गी काह्ला हा । पर कर्ण उसी जान नईं हा देया करदा । उस भीमसैन उप्पर तीरें दी बरखा कीती ते अगगे बधने थमां रोकी लैता । दौने बीरें दा मकाबला खूब हा । कर्ण दा चेहरा कमलै आडू खिड़े दा हा ते बड़ा शैल लत्रदा हा । उस मुस्करान्दे होई भीमसैन उप्पर हमला कीता ते आखेया—

“पिटु नईं दस्सेयां ।

डराकल बनिऐ नस्सेया नईं ।

भीमसैन गी बड़ा रोह चढ़ेया जे इयां तान्ना मारदा ऐ । ओ कर्ण गी मुस्करान्दे दिक्खियै पागल होई गेया । लड़ाई भयंकर छिड़ी पर कर्ण मुस्करान्दे गै कम्म करदा रेआ । भीमसैन दा चेहरा भखा करदा हा ते ओदियां हरकतां बड़ियां भयंकर हियां । कर्ण दूरा दा कस्सी कस्सियै तीर मारदा हा पर भीमसैन पर्वह नईं करदा । तीर भाले औन्दे ओ उनें गी परें करी ओड़दा ते कर्ण दे कोल टुरी जन्दा हा । कर्ण हर इक गल्ल शान्ति ते गंभीरता करने करदा हा पर भीमसैन रोहै ते काहली कन्ने अपनी बीरता ते शक्ति दा प्रदर्शन करदा हा । भीमसैन दे सारे शरीर उप्पर जरूम हे ते ओदा शरीर इयां सेई हुन्दा हा आखो अशोक बूटा लाल फुल्लें कन्ने टण्डार होए दा होऐ । पर भीमसैन कोई पर्वह नईं करदा हा उस कर्ण दा धनश जोड़ी ओड़ेया ते रथ भन्नी ओड़ेया । जिसलै कर्ण गी दूआ रथ लैना

पेया तां ओदा मुस्कराना दूर होआ । उसी बी रोह चढ़ेया । जियां चन्द्रमा गी दिक्खिये सागर उबड़ा होन लगा होऐ । उस भीमसैन उप्पर हमला कीता । दमै शेरे दी फुर्ती ते बाज दी तेजी दस्सा करदे हे । उन्दा रोह सप्पे आङ्ग भयंकर हा । भीमसैन गी ओ सारियां गल्लां याद आइयां । कियां कर्ण ते ओदे साथिएं पाण्डवें दा अपमान कीता, द्रोपदी दी बेज्जती कीती ते ओ जिन्दू दी पर्वाह नईं करिए लड़न लगा । दौनें दे रथ आपूँ इच टकराये ते कर्ण दे चिट्ठे घोड़े ते भीमसैन दे काले घोड़े आपूँ इच इयां भिड़ जियां तफानै इच बदल टकरान्दे न ।

कर्ण दा धनश त्रुट्टी गेया ओदे सारथि गी चक्कर आया ते ओ डिग्गी पेया । कर्ण ने भीमसैन उप्पर भाला चलाया । भीमसैन उसी परें हटाया ते तीर बरान्दा रेआ । कर्ण नै बी नमां धनश लेया । कर्ण दा रथ बार बार त्रुट्टन लगा । दुर्योधनै दिक्खेया ते अपने भ्राऊ दुर्जय गी आखेया—इस दुष्ट भीमसैन कर्ण गी मारी ओड़ना ई । भटपट जा । भीमसैन उप्पर हमला कर । ते कर्ण गी बचा ।

दुर्जय गेया ते उस भीमसैन उप्पर हमला कीता । भीमसैन सत्त तीर चलाये ते दुर्जय दा रथ घोड़े ते सारथि गी जम लोक पजाई दित्ता । दुर्जय बी सख्त जरूमी होआ । दुर्जय दे शरीर गी भुजा मिट्टी इच रुलदे दिक्खिये कर्ण गी मनै इच बड़ा किश होआ । उस प्रदक्खना करिए ओदा मान कीता ।

भीमसैनै जुद्ध बन्द नईं कीता ते कर्ण गी परेशान करदा रेआ ।

कर्ण नै नमां रथ लेया । उसनै कस्सिये तीर चलाये । भीमसैनै रोहै कन्ने गुर्ज मारेया ते कर्ण दा रथ त्रोड़ी ओड़ेया ते ओदा सारथि मारी ओड़ेया । घोड़े मारी ओड़े ते भण्डे दा डण्डा त्रोड़ी ओड़ेया । दुर्योधनै इक होर भ्रा कर्ण दी सहायता गी टोरेया । दुर्मुख गेया ते उस कर्ण गी अपने रथे उप्पर बहालेया ।

भीमसैनै इक होर धृतराष्ट्र दे पुत्तरै गी औंदे दिक्खेया ते ओठें उप्पर जीभ फेरन लगा ते उस जोश इच आनिये नौ तीर चलाये

कर्ण हजे रथे इच बैठा गै हा जे दुमुख दा कवच त्रुट्टी गया ते ओ मरी गया । कर्ण नै दिक्खेया जे नमां बीर बी मरोई गया एं लहुऐ इच लथपथ पेदा ऐ तां उसी बड़ा दुख होआ तो ओ सुन्न होई गया ।

भीमसैन कर्ण उप्पर हमले करदा गै रेआ । उस कर्ण दा कवच बेधी ओड़ोया ते उसी बड़ी पीड़ होई । उस बी भीमसैन उप्पर हमला कीता ते उसी जखमी कीता । फी बी भीमसैन कर्ण उप्पर हमला करदा गै रेआ । दुर्योधनै दे भ्रायें गी उप्परोतली अपने आस्तै मरदे दिक्खियै कर्ण गी बड़ा कष्ट होआ । इस गल्लै थमां ते शरीर दी पीड़ा करी ओ हौसला हारी बैठा ते हारिऐ पिच्छें हटी गया । पर जिसलै भीमसैन लहुलुहान होए दा मदान जंग इच अपनी जित्तू दी गर्जना करन लगा तां कर्ण कोला नईं जरोआ ते ओ परतिगै जुद्ध करन आई गया ।

०००

पतिग्या पूरी होई

धृतराष्ट्र अपने पुत्ररें दी मौत ते कर्ण दी हार सुनियै बड़ा दुखी होआ । आखन लगा—संजय ! मेरे पुत्रर ते अग्गी उप्पर पक्खरें आङ्गू भस्म होआ करदे न । दुर्योधनै दुर्मुख ते दुर्जय गी लड़ाई इच भेजिये मरवाई ओढ़ेया ऐ । मेरे पुत्रर हमेशां आस्तै गये । मूर्ख आखदा हुन्दा हा—कर्ण दा ते कोई मकाबला गै नई करी सकदा ओ साढ़ी बक्खी ऐ । असें गी कुण हराई सकदा ऐ ? जिन्नां चिर कर्ण साढ़ी बक्खी ऐ असें गी देवता बी नई हराई सकदे । ए पाण्डव मेरा के बगाड़ी सकदे न ? पर हुण ते उस कर्ण गी हारदे ते पिच्छे हटदे दिक्खी लैता ऐ । ओ भीम अगें नई टिकी सकेया । हवे बी उसी अक्ल आई ऐ जां नई ? बड़े दुखै आली गल्ल ऐ जे दुर्योधन बायुपुत्ररै कन्ने घोर घृणा करदा ऐ । भीमसैन कोल ते जमराज जिन्नी ताकत ऐ । साढ़ा ते सर्वनास गै होई गया ।

सञ्जय आखन लगा—हे महाराज ! ए तुस्सै ओ जिनें नई मुक्कने आली नफरत पैदा होन दिक्खी ऐ । तुस अपने जिद्दी पुत्ररें

दियां गल्लां की सुनदे रे ? इस मुसीबतै दी जड़ तुस ओ । तुसें भीष्म हुन्दी ते दूए स्यानें दी गल्ल सुट्टी पाई, उससे दा नतीजा भोगा करदे ओ । तुस अपने आप गी दोश देओ । कर्ण गी दोश देने दा के फायदा ? उस ते जुद्ध इच जे किश होई सकदा हा करी दस्सेया ।

इयां धृतराष्ट्र गी झाड़ फण्ड करिऐ संजय अगगे जे किश होआ कथा सनान लगा—धृतराष्ट्र दे पन्ज पुत्तर दुर्मर्ष, दुस्सह, दुर्मत, दुर्धर ते जय कर्ण गी नस्सदे दिक्खियै ओदी सहायता गी पुज्जे । ए दिक्खियै कर्ण गी हौसला होआ ते ओ लड़न आया । उनें भीम उपपर बड़ा जोरदार हमला कीता । भीम गी बड़ा रोह चड़ेया ते उस पजे गी गै जमपुरी पजाई दित्ता । ओ जुद्ध भूमि इच अपने रथें ते घोड़े समेत मोएदे पेदे हे । इयां बभ्रोन्दा हा जे तफानै कन्ने पटोए दे बूटे होन जिनें गी ताजे लाल फुल्ल पे हे ।

जिसलै कर्ण नै दिक्खिया जे होर राजकमार मेरे गित्तै मरोई गे न तां ओ बड़ा गंभीर होइयै लड़न लगा ।

भीमसैन भी पहलें थमां ज्यादा उगगर होई गया । ओ सोचा करदा हा जे पाण्डवें कन्ने जो बुराई होई दी ऐ ओदा कारण इऐ कर्ण ऐ ।

उस कर्ण गी भलेयां निहत्था करने दा बचार कीता । ओदा रथ ते घोड़े मारी ओड़े । कर्ण रथे परा उतरेया ते उस गुर्ज चलाया । भीमसैन उसी भेठा कीता ते तीरें दी बरखा कन्ने कर्ण गी खट्टी ओड़ेया ।

कर्ण प्यादा गै पिच्छें नस्सेया ।

दुर्योधनै ए द्वन्द दिक्खेया, उसी बड़ा सल्ल होआ । उस अपने सत्त आ चित्र, उपचित्र, चित्रक्ष, चारुचित्र, शरासन, चित्रायुध ते चित्रवर्मा, कर्ण दी सहायता गी भेजे । उनें भीम दा बड़ा मकाबला कीता ते अपनी रण कुशलता दस्सी पर भीमसैन दा रोह भड़की उट्टे दा हा । उस सत्तें गी इक इक करिऐ मारी ओड़ेया । भीम दा हमला सहन नई हा होई सकदा । जिसलै कर्ण नै दिक्खेया जे धृतराष्ट्र दे इन्ने पुत्तर मेरे गित्तै मरोई गै न तां ओ रुनाका

होई गया । उस नमां रथ लेया ते भीम कन्ने जुद्ध करन लगा ।
दमै जौधा इयां टकराये जियां बदल टकरान्दे न ।

कृष्ण होर, सात्यकि ते अर्जुन भीमसैन गी इयां लड़दे दिक्खियै
बड़े खुश होए । कौरव सैना दे भूरिश्रवा, कृपाचार्य, अश्वत्थामा,
शल्य जयद्रथ ते होर किन्ने गै सूरमा बी भीमसैन दा ढंग दिक्खियै
बाह बाह करन लगे । दुर्योधनै गी बड़ा सल्ल होआ । ओ रोहै
कन्ने जली उठ्येया । कर्ण दी दशा दिक्खियै उसी बड़ी चिन्ता होई ।
उस सोचेया अज्ज भीमसैन कर्ण गी मारी ओड़ेदा ऐ । उस सत्त
भ्रा होर भेजे ते आखेया—जे भीमसैन गी घेरी लौ ते बारी बारी
हमला करो ।

ओ सत्त भ्रा बी भीम उप्पर हमला करन लगे पर ओदे तीरें
दे शकार होई गे । विकर्ण जेड़ा सारे कशा पिळुआं मोआ ओ बड़ा
प्यारा हा । जिसलै भीमसैनै उसी डिगदे दिक्खेया तां आखन
लगा—ओ हो विकर्ण । तूं धर्म गी जानदा हा ते न्यां दा पक्ख देने
आला हा । तूं ते राजे दा हुकम पालन करने गित्त लड़ाई कीती ते
अपने कर्तव्य दा पालन कीता । में तुगी बी मारना पेया । ए जुद्ध
कनेआ श्राप ऐ जेदे इच थुआड़े नेए ते भीष्म पितामह नेए लोकें दी
बलि देनी पौन्दी ऐ ।

दुर्योधनै दे भ्रायें गी उप्परो तली मरदे दिक्खियै कर्ण बड़ा
परेशान होआ । उस कशा ए दृश्य नई दिक्खन होआ । उस
अक्खीं मीटियां ते भण्डे दे डण्डे दा सहारा लेया । फी उस
संजम कीता, जी सख्त कीता ते भीम उप्पर हमला करी दित्ता ।
ओदे धनश त्रुटदे गे पर ओ लड़दा गै गया । ठारां बारी उसी नमां
धनश लैना पेया । ओदा चेहग बी भीमसैन आङ्गुस्से कन्ने भयंकर
बनेया । ओ इक दूए गी बड़े खौफनाक तरीके कन्ने दिक्खन लगे ।

युधिष्ठिर होरें भीमसन दी गर्जना सुनी तां ओ बड़े जोश कन्ने
द्रोणाचार्य हुन्दे कन्ने लड़न लगे ।

जिसलै परतियै जुद्ध होआ तां भीमसैन दा रथ त्रुट्टी गया ते
घोड़े मरी गे ।

कर्ण दा रथ बी त्रुट्टी गया । भीमसैन अपना भाला चलाया । कर्ण नै इसी बवखी कीता । भीमसैन अपनी ढाल तलवार लइयै सामनै आया । कर्ण नै तीर चलाइयै ढाल त्रुट्टी ओड़ी । भीमसैन तलवार भुआइयै सुट्टी ते कर्ण दा धनश कट्टी ओड़ेया । ते ओ भुजा डिग्गी पेया । कर्ण नै नमां धनश लइयै भीम उप्पर तीरें दी बरखा कीती । भीमसैन रोहै कन्ने कर्ण उप्पर कुदेया । कर्ण भण्डे दे डण्डे पिच्छे होई गया । ते मसां बचा कीता । भीमसैन कर्ण दे रथें थमां उतरेया ते निहत्था मोए दे हाथियें गी चुक्की चुक्की त्रुट्टन लगा ते तीरें थमां अपनी रक्षा करन लगा । लड़ाई जारी रई । जे किश बी हत्थ आया ओ ऊए सुट्टन लगा—भज्जे दे रथें दे चक्कर, घोड़े ते हाथियें दे अंग ते होर जे किश लब्बा लगातार सुट्टदा गै गया पर ए किन्ता चिर चली सकदा हा । भीमसैन दा पक्ख कमजोर पौन लगा । कर्ण तांना मारियै आखन लगा—मूर्ख पेटुआ ! तुगी जुद्ध बिद्या ते औन्दी नई । तूं कैसी लड़ाई करा करनां ? जंगलै इच जा ते कन्द-मूल खाइयै होर मुट्टा हो । तूं ते जगली एं । क्षत्रियें दी लड़ाई दे जोग नई । द्रौढ़ी जा ।

उस तान्ने मारिए ओदी निन्धा कीती ।

ते भीमसैन बेवसी दे रोहै कन्ने जलन लगा । कर्ण गी कुन्ती गी दित्ता दा बचन याद आया । उस भीम गी मारेया नई ।

कृष्ण जी आखन लगे—अर्जुन ! दिक्ख कर्ण नै भीम गी कियां परेशान कीता दा ऐ । अर्जुन दियां अक्खीं रोहै कन्ने बलन लगियां । अपने वीर भ्राऊ दी ए दशा दिक्खियै ओ कर्ण उप्पर तीर चलान लगा । कर्ण बी भीमसैन गी छोड़िए तुआईं पासै मुड़ेया । उस कुन्ती कन्ने बचन कीता दा हा जे पाण्डवें चा इक गी मारड ते नशाना ओदा अर्जुन हा ।

सोमदत्त दी मृत्यु

कृष्ण होरें अर्जुन गी आखेया—ओ दिक्ख बीर सात्यकि आवा करदा ई । थुआड़ा मित्तर ते शर्गिद शत्रु दियां सौनां त्रोटदा अगें बधा करदा ऐ ।

अर्जुन आखन लगा—कृष्ण जी, ए मिगी चंगा नईं लगदा । ए उस चंगा नईं कीता । युधिष्ठिर होरें गी इक्कले की छोड़ी आया ऐ ? सात्यकि गी अपने थार डटे रौना हा । ओ ते उस कीता नईं ते ताईं द्रौडी आया ऐ । बुढ़े भूरिश्रवा नै सात्यकि गी रोकी लेता ऐ । युधिष्ठिर होरें सात्यकि गी टोरिये बड़ी गल्ली कीती ऐ ।

भूरिश्रवा ते सात्यकि बश्कार इक खानदानी भगड़ा चलदा आवे दा हा । इस करी ओ इक दूए दे घोर शत्रु बने दे हे । ए भगड़ा इयां शुरु होआ हा ।

श्री कृष्ण हुन्दी मां देवकी जदू हजे बोई दी नईं ही तां मते

राजे ओदे कन्ने ब्याह गित्तै जतन करदे हे । मकाबले इच सोमदत्त ते सिनी होर आये । सिनी जित्ती गया । ते वसुदेव हुन्दे पासेया देवकी गी रथै इच पाइयै लेई गया । जदूँ दी सिनी ते सोमदत्त दे खानदानें इच दुश्मनी चलदी आवै दी ऐ । सात्यकि सिनी दा पोत्रा ऐ । ते भूरिश्रवा सोमदत्तौ दा पुत्तर ऐ । जिसलै ओ कुरुक्षेत्र दे मदानै इच बरोधी दलें इच होए तां कुदरती हा जे भूरिश्रवा नै सात्यकि गी दिखदे गै ललकारेया—ओ सात्यकि ! मिगी पता ऐ जे तुकी बड़ी आकड़ ऐ । तूँ अपने आपै गी पता नई के समझना ए ? हुण मेरे कावू आयां ए । में तुगी रस्तै लान्नां । बड़े चिरै दा अऊं तुगी तुप्पा करदा हा । जियां दशरथ पुत्तर लक्ष्मण नै मेघनाद गी मारी ओड़ेया हा, इयां गै में तुगी अज्ज जमपुरी टोरड । ए दिक्खियै कई सूरमे दियां बिधवां खुश होडन । सात्यकि हस्सेया ते आखन लगा—फौड़ां नई मार । गप्प कन्ने कोई नई डरदा । किश करिए दस्स । कोई बहादरी दा कारनामा दस्स छड़ा फोके बदलें आडू गड़गड़ करिए नई दस्स ।

जवानी झड़फें बाद लड़ाई शुरू होई । ओ इयां जुद्ध करन लगे जियां शेर लड़दे न ।

उन्दे घोड़े मरोई गे । धनश त्रुट्टी गे । ते दमै रथें बिना रेई गै । ओ भुजा खड़ोइयै ढाल तलवार लेइयै जुद्ध करन लगे उन्दियां ढालां त्रुट्टी गेइयां ते तलवारां भज्जी गेइयां । फी दमै गुथमगुत्था होई गे । भुजा ढई पे ते कदें इक उप्पर ते कदें दूआ । फी उट्टी खड़ोन, लड़न ते डिंगी पौन । इयां मता चिर जुद्ध हुन्दा रेआ । अर्जुनै दा ध्यान जयद्रथ दी हरकतें पासै गै हा ते उस भूरिश्रवा ते सात्यकि दा जुद्ध नई दिक्खेया । पर कृष्ण होर सात्यकि बारे इच बड़ी चिन्ता करन लगे । उनें गी उन्दे खानदानी झगड़े दा पता हा ।

कृष्ण होर आखन लगे—अर्जुन ! सात्यकि हुट्टी गेदा ई । भूरिश्रवा उसी मारन लगा ई । अर्जुन फी बी जयद्रथ दी चाल ढाल ग दिखदा रेआ ।

कृष्ण होर आखन लगे—सात्यकि कौरवें कन्ने लड़ियें ते हुट्टे दा आवैं दा हा उसी मजबूर होई लड़ना पेया ऐ । ए बरोवरी दी लड़ाई नई । जे अस ओदी मदती गी नई पुज्जे तां उस मरोई जानां ई । कृष्ण होर ए आखैं गै करदे ऐ जे भूरिश्रवा नै सात्यकि गी चुक्केया ते जोरेयां भुजा त्रट्टेया । कौरव सौना जोरेयां नारे लान लगी । सात्यकि मरोई गया ।

कृष्ण होरें फी आखेया—सात्यकि भुजा डिग्गी पेदा ऐ जियां मरी गया होऐ । ए वृष्णी बंस दा हीरा ऐ । ऐ थुआड़ी सहायता गी आया हा इयां थुआड़ी अक्खीं सामनै मरोऐ करदा ऐ । तूं दिक्खा करनां एं ते किश नई करदा ।

भूरिश्रवा नै लम्मे पे दे सात्यकि गी घसीटेया जियां शेर अपने मारे दे हाथी गी घसीटदा ऐ ।

अर्जुन बड़ी दुविधा इच हा । भूरिश्रवा नै मिगी ललकारेया नई । न मिगी लड़ने गित्तै आखेया ऐ । में भूरिश्रवा उप्पर कियां तीर चलां ? दूएं कन्ने लड़दे आदमी उप्पर में कियां तीर चलां ? मेरे कशा एं कम्म नई हुन्दा । ए ठीक ऐ जे ओ मेरी मदती गी आया हा ते मेरे सामनै मरोआ करदा ऐ ।

अर्जुन कृष्ण होरें गी ए आखैं गै करदा हा जे जयद्रथ दे तीरें कन्ने गास खटोई गया । अर्जुनै बी तीरें दी बरखा कीती । पर ओ मुड़ी मुड़ी तुआईं दिक्खा करदा हा जताईं सात्यकि मौती कोला घिरे दा हा ।

कृष्ण होरें अर्जुन गी सात्यकि दी जिन्दगी दे बारे इच फी बास्ता पाया । आखन लगे सात्यकि दे सारे हथ्यार त्रुट्टी गे न ते ओ भूरिश्रवा दे पज्जे इच ऐ ।

अर्जुनै दिक्खेया जे भूरिश्रवा नै अपना पैर सात्यकि दी छाती उप्पर रखे दा ऐ ते तलवार सोत्तरिए बड्डन लगा ऐ । ओ फट्ट मारन गै लगा हा जे अर्जुनै नेआ कस्सिए तीर मारेया जे भूरि-

श्रवा दी बांह कटोई गई ते तलवार हथै इच पगड़ोई दी गै रई ।
भूरिश्रवा चगत होई गया । ए कुस कीता ऐ ।

ओ आखन लगा—अर्जुन ! ए थुआड़े कशा मेद नईं ही ।
पिच्छों दा तीर मारना बहादरें दा कम्म नईं । ए नीचता उनें गी नईं
सोभदी ।

में कुसैं होर कन्ने लड़ा करदा हा । तू बगैर आखे दे गै मेरे
उप्पर हमला करी दित्ता ऐ । सच ऐ जनेआ बुरा साथ होऐ उऐ
नेईं बुद्ध औन्दी ऐ । बुराई दा लोभ नईं जरोन्दा । थुआड़ी
करतूतै थमां इऐ सेई हुन्दा ऐ । जिसलै तू अपने भ्राऊ युधिष्ठिर
कोल जागा तां अपनी बहादरी दी इऐ फड़ मारगा ? तुगी ए नीचता
कुस सखाई ऐ ? ए तू अपने पिता इन्द्र कोला सिक्खी ऐ जा अपने
गुरुएं द्रोणाचार्य ते कृपाचार्य हुन्दे कोला ? ए केड़ा सदाचार ऐ जे इक
आदमी अग्रे गै लड़ा करदा हा ते उससे पासै ओदा ध्यान हा ते तू
उसी तीर मारी दित्ता ऐ ? तू बड़ा नीच कुलै आलें दा कम्म कीता
ऐ । अपने नां गी बट्टा लाया ऐ । जरूर तुगी कृष्ण नै प्लेरेया होग ।
थुआड़ा सुभा नेआ नईं हा । कोई बी व्यक्ति जेदी नाड़ियें इच
शाही खून होऐ नेआ नीच कर्म नईं करग । इस नीच कृष्ण दे
आखने उप्पर गै तू ए दुष्ट कम्म कीता ऐ ।” इयां भूरिश्रवा नै
कुरुक्षेत्र दे मदानै इच कृष्ण हुन्दी ते अर्जुनै दी निन्दा कीती ।

अर्जुनै आखेया—भूरिश्रवा ! तू बुड़ा होई गया एं ते थुआड़ी
अकल बी मारी गई ऐ । तू कृष्ण होरें गी ते मिगी फजूल गै दोश
दिनां एं । तू मेरे दोस्त गी मारन लगा हा ते में कियां उसी
मरोन्दे दिक्खी लैन्दा ? ओ मेरी सहायता गी आया ते उस अपनी
जिन्द खतरे इच पाई । ओ मेरा सज्जा हथ ऐ । तू उसी निहत्थे
गी भुजा सुट्टियै तलवार खोबन लगा हा । जे में उसी नईं
बनान्दा तां नर्क दा बासी बनदा । नू आखेया ऐ जे कृष्ण दे साथ
नै मेरा सत्यानास करी ओढ़ेया ऐ । इस ऐदी बड़ी दुनियां च कुण
तबाह नईं हुन्दा ? थुआड़ी बुद्धि ठकानै नईं रेई दी इस करी तू

इयां आखा करनां एं । सात्यकि जिसलै आया ते हुट्टे दा हा, ओदे कोल शस्त्र बी नईं हे । ते तूं उसी जुद्ध गित्तै ललकारी दित्ता । तूं उसी ढाई लिया । ओ बचारा हारिए भुआ ढई पेदा हा ।

डिगो दे शूरवीरै उप्पर तलवार चलाइयै उसी मारी ओड़नां केड़े पासे दा सदाचार ऐ ? जिस लै मेरा पुत्तर अभिमन्यु हुट्टी गेदा हा, ओदे कोल कोई हथ्यार नईं हा, ओदा कवच त्रुट्टी गेदा हा ते उस खड़ोन नईं हा होआ करदा तां तूं कियां ताड़ियां बजान्दा हा ?

भूरिश्रवा नै ए सुनियै जवाब नईं दित्ता उस खब्बे हथै कन्ने तीर भुआ बछाये ते समाधी लाने गित्तै थार बनाया । उस बुड्डे सूरमा नै समाधी लाई लई । सारी कौरव सेना दिक्खियै दुखी होई । ओ भूरिश्रवा दी बाह बाह ते कृष्ण अर्जुन दी निन्द्या करन लगे ।

अर्जुन बोलेया—बीरो ! में प्रण कीता दा ऐ जे कोई मित्तर मेरे तीरै दे नशाने दे अन्दर अन्दर होग तां उसी नईं मरोन देड । ए मेरी पवित्तर सगन्ध ऐ । तुस मिगी की दोष दिन्दे ओ ? बिना सोचे समझे दोष लाना ठीक नईं हुन्दा ।

सैनकें गी ए आखियै ओ भूरिश्रवा गी आखन लगा—हे बीर सूरमा ! अपने कोल आये दे कई बीरें गी तुम्मी शरण दित्ती होग । तुगी पता ऐ जे जेकिश होआ ऐ थुआड़ी गल्ती करी होआ ऐ । मिगी दोष लाने इच ते कोई न्यां नईं । जे तूं दोष देना ऐ तां क्षत्रियें दे धर्म गी दे जेड़ा हिंसा करना सखान्दा ऐ । भूरिश्रवा नै ए सुनेया ते भुकिऐ प्रणाम कीता ।

सात्यकि गी होश आई ते ओ उठ्येया । उस अपने जोशै ते रोहै इच तलवार चुक्की ते बाकी रौला गै पान्दे रे, कृष्ण होर ते अर्जुन उसी रोकने आस्तै द्रौड़ै बी पर उन्दे पुज्जने थमां पहलें उस फट्ट मारेया ते उस बुड्डे सूरमा दा सिर धड़ै थमा बक्ख करी ओड़ैया । ओदा शरीर समाधी दी स्थिति इच गै रेआ । देवता ते सिद्ध लोक जेड़े उप्परा गासै देया दिक्खा करदे हे भूरिश्रवा गी शीर्वाद ते सात्यकि दे कर्म दी निन्द्या करन लगे ।

सात्यकि आखैं में ठीक कीता ऐ । जिसलै में भुआ डिगिऐ
बेहोश होई गया हा इस मेरे खानदानी शत्रु नै मेरी छाती उप्पर पैर
रखेया ते मिगी मारने दा जतन कीता । ओ जिस बी स्थिति इच
हा में उसी बड्डी ओड़ेया । पर कुसै ओदी गल्लै दा समर्थन नई
कीता । भूरिश्रवा दा कतल नई स्थिति ऐ जित्थें नीति दा
वास्तविकता कन्ने भगड़ा होई जन्दा ऐ । ते कन्ने ए गल्ल सिद्ध
करदी ऐ जे जिसलै नफरत ते क्रोध उस दर्जो गी पुज्जी जान तां
सदाचार ते धर्म उनें गी संजमै इच रखने कोला बेबस होई
जन्दे न ।

०००

जयद्रथ दी मृत्यु

दुर्योधन कर्ण गी आखन लगा—फैसले दी घड़ी आई गई लबदी ऐ। जे अज्ज रातीं थमां पहले जयद्रथ दा बध नईं होआ तां अर्जुन दी खूब भद् होनी ऐ ते उस खुदकशी करी लैनी ऐ। ओदी पतिग्या पूरी नईं होनी। अर्जुन मोआ तां पाण्डवें दा नाश बिल्कुल पक्की गल्ल ऐ। ए राज साढ़ा होग कोई चूंचरां करने आला नईं होग ते अस इक छत्तर राज भोगगे। अर्जुन ए कदें नईं पूरी होने आली पतिग्या बेसमभी कन्ने चुक्की लैती। किश भागें दा गं फेर समझना चाही दा ऐ। बचारा अपने हत्थें गै मरोन लगा ऐ। मेरे ग्रह किश तेज लबदे न। हुण ए मौका हत्था नईं गुआना चाही दा। असें जोर लाना चाही दा ऐ जे ओदी ललकार फेल होऐ। थुआड़े सिरै दी गै लो ऐ। थुआड़ी रण कुशलता दा अज्ज इस्तयान ऐ। अज्ज अपनी बीरता सिद्ध करियै दस्स। दिक्ख ! सूरज घरोन्दे पासै ढली पेया ऐ। तरकालां पौनै इच थोड़ा गै समां रेई गेया ऐ। इन्ने थोड़े समें इच अर्जुन जयद्रथ कोल नईं पुज्जी

सकदा । तू अश्वत्थामा, शल्य, कृपाचार्य, ते अऊं जयद्रथ दी रखवाली करने आं । ते हर कोशश करिए वी अऊज सूरज डुब्बने कोला पहलें अर्जुन गी जयद्रथ कोल नईं पुज्जन देनां ।

कर्ण आखन लगा—अऊज भीम कन्ने जुद्ध करिये अऊं इन्ना हुट्टी गेदां जे मेरे अंगें इच बिल्कुल ताकत नईं रई दी । फी वी में सारी शक्ति लाई देड । मेरी जान गै थुआड़ी खातर ऐ ।

जिसलै कर्ण ते दुर्योधन इयां स्कीम बना करदे हे उसलै अर्जुन कौरवें दी सैना उपपर करारा हमला करा करदा हा । ते ओदी कोशश ही जे सूरज डुब्बने थमां पहलें फौजें गी त्रोड़िए जयद्रथ कोल जाई पुज्जां ।

कृष्ण जी नै पाञ्चजन्य मुंहें कन्ने लाया—ते ऋषभ स्वरै इच जोरै कन्ने बजाया ।

ए सूचना ही उन्दे अपने सारथि दारुक गी रथ लइयै तौले पुज्जने दी । जिसलै रथ आया तां सात्यकि ओदे इच बई गया । उस कर्ण उपपर जोरदार हमला करी दित्ता ते उसी तुआई लाई लेया ।

दारुक दी रथ चलाने दी कला ते सात्यकि दी धनष विद्या दी चतराई दिक्खने गी देवता लोक सुर्गा दा हेठ आई गे । कर्ण दे चारै घोड़े मारे गये ते सारथि डिग्गी पेया । भण्डे दा डण्डा ते रथ त्रुट्टी गया । कर्ण बिना रथ दे हा । सारी कौरव सैना हरान होन लगी । कर्ण त्रोड़िए दुर्योधन दे रथ उपपर बई गया ।

सञ्जय ए घटना धृतराष्ट्र गी सना करदा हा । सारे कशा मांहिर त्रै गै व्यक्ति न । कृष्ण, अर्जुन ते सात्यकि । उन्दे मकाबले दा चौथा हीर कोई जोधा नईं ।

अर्जुन कौरवें दी सैना दी रोक त्रोड़ी ते जयद्रथ कोल पुज्जी गया । अभिमन्यु दे बघ थमां भड़के दा ते कौरवें दे जुल्में गी याद करदा अर्जुन बड़ी भयंकर लड़ाई करन लगा । ओ दौनों हथें तीर चलान्दा हा । ओ गाण्डीव बिच्चा तीर छोड़दा हा ते शत्रु दे हिरदे इच डर ते दुविधा पेदा करदा हा । सारें गी इयां सेई होन लगा

जे मृत्यु मुंह खोलिऐ युद्ध क्षेत्रे इच आई गई ऐ। अर्जुन ते अश्वत्थामा विच जेड़ा जुद्ध होआ उसी व्यास होर गै व्यान करी सकदे न। जयद्रथ गी बचाने आले महारथिये ते अर्जुन दे दम्पनि भयंकर गै जुद्ध होआ। उनें सारें जोर लाया पर अर्जुन सारें गी हराइयै जयद्रथ कोल जाई गै पुज्जा।

जयद्रथ उप्पर हमला शुरू होआ। ते भयंकर लड़ाई होन लगी। दोऐ सैनां घड़ी घड़ी घरोन्दे पासै दिक्खा करदियां हियां। दिन मुक्कने आला हा। जयद्रथ बी कोई माड़ा जोधा थोड़ा हा। उस बी बड़ा जोर लाया ते अर्जुन दी ते वीरता दी परीक्षा गै होआ करदी ही। सूरज घरोन्दे पासै होआ ते लाल होई गया पर जुद्ध बन्द नई होआ।

हुण बिल्कुल थोड़ा समां रई गया ऐ। जयद्रथ बची गया समझो। अर्जुन दी पतिग्या फेल होई गई। हुण अर्जुन दी भद्र होई समझो। दुर्योधन मनै इच खुश होआ करदा हा।

न्हैरा होई गया ते दौने फौजें इच रौला पेई गया। 'सूरज डुब्बी गया ते जयद्रथ नई मरोई सकेया। अर्जुन हारी गया।' पाण्डवें दे दिल बई गे। ते कौरव खुशी दे नारे लान लगे।

जयद्रथ नै पच्छम पासै दिक्खेया ते मनै इच सोचेया—'बची गेयां'। उसी सूरज नई लब्बा ते उस सोचेया जे अर्जुन थमां खतरे दा समां टली गया ऐ।

उस बेल्लै कृष्ण होरें अर्जुन गी आखेझा—जयद्रथ पच्छम पासै दिक्खा करदा ऐ। ए न्हैरा में पायेदा ऐ। सूरज हजे है। डुब्बे दा नई। तू अपना कम्म कर। ईए मौका ई। इसलै जयद्रथ दी रखवाली नई होआ दी।

गाण्डीव दा बाण निकलेया ते जियां इल्ल चूए पर पौन्दी ऐ हियां जयद्रथ दा सिर लई गया।

अर्जुन सुन ! इन्ने तीर चला ते एडी तौली चला जे ए सिर भुजा नई डिगै ते बृद्धक्षत्र दी गोदै इच गै पवै। अर्जुन ने ए तीर चलाये जेडै सिरै गी बाऊ इच लई उड्डै। अजीब गै नजारा हा।

बृद्धक्षत्र आश्रमै इच बाहर बैठा दा हा। ओ सन्ध्या बन्दन करा करदा हा। अकखीं बन्द हियां। ओदे पुत्तरै दा काले बालें आला ते कन्ने सुन्ने दियें बालियां आला सिर बल्लें नेए ओदी गोदा इच पेया।

बुढा राजा सन्ध्या करिये उट्टेया तां सिर हल्लेया ते भुजा डिग्गी पेया। ते जियां भविष्य बाणी होई दी ही ओदा सिर बी सौ टोटे होई गया।

जयद्रथ ते ओदा बब्ब दमै जनें बीर लोक गी प्रापत होए।

कृष्ण जी, अर्जुन, भीम, सात्यकि, युधामन्यु ते उत्तमौजा अपने अपने शंख बजान लगे युधिष्ठिर होरें विजय दा शोर सुनेया तां समझी गे जे अर्जुन दी पतिग्या पूरौ होई गई ऐ ते जयद्रथ मरोई गया ऐ।

युधिष्ठिर अपनी फौज लइयै द्रोणाचार्य कन्ने लड़न लगे। रात पेई गई पर चौदमें दिन सूरज दे अस्त होने परैन्त जुद्ध समापत होने दे निजमै दा पालन नई होआ।

जियां जियां जुद्ध दा जोश बधन लगा इयां दिनो दिन लड़ाई दे निजम ते बन्धन इक्क इक्क करी त्रुटन लगे।

०००

द्रोणाचार्य होर बी चलदे होए

जिनें महाभारत दी कथा सुनी दी ऐ ओ घटोत्कच जी जानदे न । ओ भीमसैन दा पुत्तर हा ओदी मा असुर कन्या ही । दो नौजवान महाभारत दे बीरें इच बड़े प्रसिद्ध न जिन्दे च वीरता, धीरज, शक्ति, हौसला ते मिलनसारी कमाल गुण हे । ओ अर्जुन दा पुत्तर अभिमन्यु ते भीम दा पुत्तर घटोत्कच हे । दोनैं कुरुक्षेत्र दे मदाने इच अपनी बलि दित्ती ।

महाभारत दी लड़ाई दे खीरले हिस्से इच दक्खी बधी दी नफरत दिनें रातीं दी लड़ाई कन्ने बी शान्त नईं होई ।

चौदमें दिन जिसलै सूरज डुब्बा तां लड़ाई बन्द नईं होई । मसारें दी लोई इच लड़ाई हुन्दी रई । कुरुक्षेत्र दे मदाने इच अजीब गै नजारा हा । इऐ नेआ भारत देसै इच कदें नईं होआ । जोधा ते सैनक दोनैं बक्खी लड़ाई इच मशगूल हे । हजारों मसारे बला करदे हे ते रातीं बेल्लै इशारे बी होर बनी गेदे हे ।

घटोत्कच ते ओदी असुर सैना रातीं सबने कशा तेज हुन्दी ही

उनें गी न्हरे दी मौज बज्जी गई। उनें दुर्योधन दी सैना उप्पर खूब जोरेयां हमला कीता। घटोत्कच हत्थें हजारों लोक मरदे दिक्खियै दुर्योधन दा दिल बौन लगा। कटोत्कच दी असुर सैना बाऊ इच उडदी ही। ते अजीव २ तरीकें कन्नें हमले करदी ही। कौरव सारे कलाई उठे—कर्ण ! इसी तौले मारो। नईं ते साढ़ी सारी सैना गी समाई जन्दा ऐ। बिन्द चिर नईं लाओ। भटपट खत्म करो।

कर्ण गी आपूं बी रोह चढ़े दा हा। ओ असुरें दे वाणें कन्नें जरूमी होआ दा हा। ओदे कोल इन्द्र दी दित्ती दी शक्ति ही जेड़ी अमोघ ही पर एदा प्रयोग इक्कै बारी होना हा। कर्ण नै इसी साम्बियै रक्खे दा हा छड़े अर्जुन उप्पर चलाने गित्तै। उसी पता हा जे अर्जुन कन्ने खीरी फँसले आली लड़ाई होनी ऐ। ते जरूर होनी ऐ। पर दुविधा इच ते अद्धी राती दे हमले थमां चिड़ियै कर्ण गी किश नेआ बचार आया जे उस नौजवान घटोत्कच उप्पर ओ शक्ति चलाई दित्ती।

अर्जुन ते बची गया पर इस बचा दी कीमत बड़ी भारी देनी पई। भीमसैन दा प्यारा पुत्तर घटोत्कच जेड़ा श्माने दा कौरवें उप्पर अस्तर शस्तरें दी बरखा करदा हा भुजा आई डिग्गा ते मरी गया। पाण्डव शोक सागरै इच डुबबी गे।

पर लड़ाई बन्द नईं होई। द्रोणाचार्य अपने तेज हमले कन्ने पाण्डवें गी त्राह पान लगे।

कृष्ण होर आखन लगे—अर्जुन ! द्रोणाचार्य गी हराने आला कोई नईं। ओ जुद्ध दे निजमे दा पूरा पालन करदे न। जिन्ना चिर अस नियम नईं त्रुड़गे उन्दा मकाबला नईं करी सकगे। साढ़े गित्तै होर कोई रस्ता बाकी नईं। इक्कै गल्ल ऐ जिस कन्ने ओ जुद्ध करना बन्द करी सकदे न। जेकर ओ सुनी लैन जे अश्वत्थामा मरी गया तां द्रोणाचार्य हुन्दो जीवन बारे इच कोई दिलचस्पी नईं रोग। ते ओ हथ्यार सुट्टी ओड़डन। इस करी कोई जाइयै उनें गी दस्सो जे अश्वत्थामा मरी गया ऐ।

अर्जुन ए प्रस्ताव सुनिए कम्बी उठेया । ओ ते भूठ बोलने उप्पर राजी नईं होआ । होर बी साथी ए गल्ल नईं मन्ने । कोई बी इस धोखे धड़ी इच शामिल नईं होना चान्दा हा । युधिष्ठिर होर बी झुगिए सोचें इच पई गे—अऊं ऐ पाप चुक्कनां । उनें इस समस्या दा हल कड़ेया ।

ए बड़ी हरानगी दी गल्ल ही । जिसलै समुद्र मथेया तां ओदे चा भयंकर जहर निकलेया जेड़ा देवतें गी भस्म करन लगा । उस बेल्लै रुद्र होर उनें गी बचाने गित्तै अग्रे नईं आये ? अपने मित्तर गी बचाने गित्तै रामचन्दर जी नै बाली गी नईं हा मारेया ? नियमें ते सदाचार गी परे सुट्टी ओड़ेया । हुण युधिष्ठिर होरें ए पाप अपने सिर लैने दा जिम्मा लैता । होर कोई रस्ता गै नईं हा । भीमसैनै अपना गुर्ज चुक्केया ते इक हाथी जेदा नां अश्वत्थामा हा दे सिरै उप्पर मारेया । हाथी मरी गया ।

अश्वत्थामा हाथी गी मारने परेन्त भीमसैन द्रोणाचार्य हुन्दी सौता कोल जाइयै गजेंया—“में अश्वत्थामा गी मारी ओड़ेया ऐ ।” भीमसैनै अदू तोड़ी कोई नीच जां बुरा कम्म नईं कीता हा जिसलै उस ए आखेया तां बड़ा भलखोआ ।

ए शब्द द्रोणाचार्य दे कलेजे गी लग्गे पर ए सच्चे होई सकदे न ? द्रोणाचार्य होर ब्रह्म अस्तर छोड़न लग्गे हे जिसलै उनें ए शब्द सुनें । उनें युधिष्ठिर गी पुच्छेया—हे धर्म पुत्तर ! ए गल्ल सच्च ऐ जे मेरा पुत्तर मरोई गया ऐ ?

उनें सोचेया जे युधिष्ठिर कदें भूठ नईं बोलदा । त्रैलोकी दे राजें आस्तै बी भूठ नईं बोलदा ।

जिसलै द्रोणाचार्य नै युधिष्ठिर गी पुच्छेया तां कृष्ण होर बड़े घबराये—जे युधिष्ठिर होर जरकी गे ते भूठ नईं बोलेया तां अस मोये । द्रोणाचार्य हुन्दा ब्रह्म अस्तर कदें फेल होने आला नईं । सारे पाण्डव भस्म होई जाने न ।

युधिष्ठिर जे किश करन लगा हा उसी सोचियै कम्बदा २ उठेया । ओदे अन्दरलै मनै इच जित्तेने दी मरजी ही । उन सोचेया—चलो

पाप गै सई । उन अपना मन मजबूत कीता ते जोरेयां आखेया—
ठीक ऐ । अश्वत्थामा मरोई गया ऐ । पर जिसलै उने ए आखेया
तां बड़ी ग्लानि बुझ्भी ते बल्ले नेए कम्बदे सुरै कन्ने आखेया—
'अश्वत्थामा हाथी' ए शब्द रौले इच डुब्बी गे ते द्रोणाचार्य गी
नई सुनोचे ।

सञ्जय अन्ने धृतराष्ट्र गी लड़ाई दियां घटनां सना करदा हा
आखन लगा—“इयां बड़ा भारा पाप कीता गया ।”

जिसलै युधिष्ठिर होरें भूठ बोलेया—तां उन्दा रथ जेड़ा धरती
थमां सदा चार इंच उप्पर गै रौन्दा हा धरती उप्पर आई गया ।
जेड़े हजे तोड़ी धरती उप्पर ओपरे गै हे इक दम गै धरती दे मनुक्ख
बनी गे । उनें गी विजय दी इच्छा होई ते भूठ दे चिक्कडै बिच
फसना पेया । उन्दा रथ बी सधारण मनुक्खे दे रथें आडू धरती
उप्पर आई गया ।

जिसलै द्रोणाचार्य होरें सुनेया जे उन्दा पुत्तर मरोई गया ऐ
उन्दी जीने इच दिलचस्पी मुक्की गई । कोई हीखी गै नई रई ।
जिसलै ओ महारथी उस स्थिति इच हे भीमसैन बड़े कौड़े बोल
बोलेया—

तुसें ब्राह्मणें अपना उचित कर्म छोड़िये ते क्षत्रियें दा पेशा
पगड़ेया ते राजें गी मरबाई सुट्टेया ऐ । जे तुसें ब्राह्मणें अपने वर्ण
दे मतावक अपना जमान्दरू कर्म अपनायें दा हुन्दा तां क्षत्रियें दा
नास नई हा होना । तुस उपदेश दिन्दे ओ जे अहिंसा परम धर्म
ऐ ते ब्राह्मण इस धर्म गी पालने आले ते बड़ा बनाने आले हुन्दे न ।
तुसें अपनी जमान्दरू वृत्ति त्यागी ओड़ी ते बडुने टुकने ते मारने दा
पेशा पकड़ी लैता । ए साढ़ी बड़ी बदबस्ती ही तुस इस पापी जीवन
इच आये ।

भीमसैन दे इनें तान्ने कन्ने द्रोणाचार्य होरें गी बड़ी बेदन होई
उनें गी जीने दी चाह अगें गै मुक्की गई ही । उनें अपने शस्तर
छण्डी ओड़े । ओ अपने रथे उप्पर जोग समाधी लाइयै बई गे ते
ध्यान मग्न होई गे । उस बेखले घृष्टद्युम्न तलवार सोत्रिये आया,

रथे उपपर चढ़ेया । उस दूएं दी निन्धा ते गालियें दी पर्वाह नईं कीती, ओदे हत्थें गै द्रोणाचार्य दी मृत्यु लिखी दी ही, उस आचार्य हुन्दा सिर बड़ी ओढ़ेया । उन्दी आत्मा इक लोइ दा लोरा बनिये निकली ते सुगें गी गई उठी ।

महाभारत दी कथा बी बचित्तर कथा ऐ । मनुक्ख जीवन दियां मुसीबतां कमाल खूब सूरती कन्नें चित्तरी दियां न । ते बड़ु पैमाने उपपर वर्णन कीती दियां न । इनें गलित्यें ते मुसीबतें दे पिच्छें सच्चिदानन्द दे दर्शन बी दस्से देन । इस करी महाभारत छड़ी कथा नईं इक धर्म पुस्तक बी ऐ । इस ग्रन्थ दी कथा ते शैली होरने कत्थें ते कहानियें कशा बिल्कुल गै वक्खरी ऐ । जोके उपन्यासें, कहानियें ते नाटकें इच बड़े उकसाने आले दृष्य दस्से दे हुन्दे न, नायक बड़ी कठनाइयें ते मुसीबते चा लंघदा ऐ ते फी जाइये उस इस्त्री कन्ने ब्याह करदा जिसी ओ चान्दा ऐ । जां सब किश ठीक ठाक चला दा हुन्दा ऐ जे चान कक्क गै गड़बड़ होई जन्दी ऐ ते मसीबत पई जन्दी ऐ ते नाटक खत्म होई जन्दा रे ।

अज्जै कल्ले दिये सनसनी पैदा करने आली कहानियें दा इऐ प्लाट हुन्दा ऐ । रामायण ते महाभारत कला दियां ओपरियां गै कृतियां न । बचित्तर गै ग्रन्थ न । जिसलै अस उनें गी पढ़ने आं साढ़े मनै उपपर असर पौन्दा ऐ ते मन शुद्ध हुन्दा ऐ खुशी ते गमी बारोबारी औन्दियां जन्दियां न ।

अस दोनै स्थितियें थमां उपपर चकोई जन्ने आं । ते परमानन्द गी प्राप्त करने आं ।

०००

कर्ण दी मृत्यु

द्रोणाचार्य हुन्दी मृत्यु बाद कौरवें दे साथी राजें कर्ण गी सैनापति बनाया । कर्ण अपदे बड़ु जंगी रथै उप्पर चढ़ेया । शल्य ओदा सारथि बनेया । ओदा कुसै थमां नईं दबोने आला बसाह, ओदा रोबदाब, ते ओदी मरूहरी कौरवें गी बड़ा स्हारा देन लगी । जुद्ध परतियैं शुरु होई गेया ।

जोतशियें गी पुच्छियै पाण्डवें भयंकर लड़ाई रम्भी । अर्जुनै कर्ण उप्पर हमला कीता । भीमसैन ओदी सहायता गी पिच्छें सैना लेइयै खडोता दा हा । दुशासनै भीमसैनै उप्पर हमला कीता ते तीरें दी बरखा बराई । भीमसैन आखन लगा—अज्ज ए दुष्ट मेरे काबू आया ऐ । अज्ज द्रोपदी गी दित्ता दा बचन पूरा करनां । बड़ा चिर होआ अपना प्रण पूरा नईं कीता ।

जिसलै भीमसैनै गी द्रोपदी दी बेज्जती दा विचार आया तां उसी रोहै दी अगग भड़की उट्टी उस कशा नईं जरोआ । उस सारे

शस्तर छण्डे, रथै परा कुद्देया ते दुशासनै पर जाई भपटेया । जियां शेर अपने शकारै उप्पर भपटदा ऐ । उस दुशासनै गी भुजा त्रट्टेया ते हड्डी पसली इक्क करी ओड़ी । आखन लगा—दुष्ट बदमाशा—इऐ थुआड़ा हत्थ ऐ जिस कन्ने तू द्रोपदी गी वालें दा पकड़ेया हा । इसी अऊं थुआड़े शरीरे थमां गै बक्ख करी ओड़नां । जेकर कोई थुआड़ा हमायती ऐ तां अगों आई जा । बड़ी नफरत कन्ने दुर्योधनै पासै दिक्खियै उस गर्जियै आखेया ते दुशासनै दी बांह त्रोड़ियै मदानै इच सुट्टी । दुशासन लहु-लुहान होई गया । फी उस तेरां साल पहले जेड़ी भयंकर सघन्द चुक्की ही ओ पूरी कीती । उस शत्रु दे शरीरै थमां खून चूसेया ते पी गया । जियां चित्तरा अपने शकारै दा खून पीन्दा ऐ । ते उस जुद्ध भूमि इच गुस्सै कन्ने पागल होए दा नच्चन लगा । “में पूरी करी लैती ऐ । पापी गी मारी ओड़ने दी सघन्द जेड़ी में चुक्की ही पूरी करी लैती ऐ । हुण दुर्योधनै दे बारे इच जेड़ी कस्म कीती दी ऐ ओ बाकी रेई गई ऐ । जग्गै दी अग्नि तयार ऐ । बलि पाने दी तयारी करो ।

इस नजारै नै सबनें गी डराई ओड़ेया ।

कर्ण बी भीमसैन गी रोहै इच इन्ना भयंकर दिक्खियै कम्बी उट्टेया । शल्य कर्ण गी आखन लगा—जरक नईं । तुगी कोई इयै नेई हरकत नईं करनी चाही दी जिस थमां पर्तीत होऐ जे तू डरी गया एं । दुर्योधन ते नराशा कन्ने कम्बा करदा ऐ । पर तू की हौसला ढान्ना एं ? दुशासनै दे मरने पिच्छुआं तेरा गै ते कौरवें गी सहारा ऐ । तू महान जोधा एं, अर्जुनै कन्ने द्वन्द कर । ते अमर कीरति जित्त जां सुर्ग प्रापत कर ।

ऐ सुनिए कर्ण गी जोश आया । गुस्से कन्ने भरोची दी अक्खीं कन्ने उस शल्य गी हुकम दित्ता जे अर्जुनै सामने रथ लेई चल ।

अश्वत्थामा दुर्योधनै गी आखन लगा—“काफी लड़ाई होई गई ऐ । आओ इस भयंकर दुश्मनी गी खत्म करी ओड़चै । प्यारे मित्र ! पाण्डवें कन्ने सन्धि करी लै । जुद्ध बन्द करी दे ।

दुर्योधन आखन लगा—तुस ए के आखा दे ओ । तुसें जिद्दी भीम दे शब्द नईं सुने ? ओ ते मनुक्खें दा खून पीने आला भयंकर शेर ऐ । तुसें दिक्खेया नईं ओ दुशासन दे लहू लुहान शरीरै उप्पर कियां नच्चै करदा हा । हुण शान्ति दी के गल्ल होई सकदी ऐ ? तुस ए फजूल गल्ल आखदे गै की ओ ? ए आखियै उस नमीं फौजे गी हुकम दित्ता जे पाण्डवें उप्पर हमला करो ।

महान जुद्ध शुरू होआ । कर्ण नै इक अगग उगलने आला तीर अर्जुन उप्पर चलाया । ओ तीर इयां हा जियां दौं जीभें आला भयंकर सप्प होऐ । कृष्ण होरें रथै गी पज औंगलां हेठ करी ओढ़ेया । ओ तीर अर्जुन दे गले गी लग्गना हा, मुकटै गी लग्गा । अर्जुन गी बड़ी शर्म आई ते क्रोध चढ़ेया । उस कर्ण गी मारी ओढ़ने आस्तै तीर चढ़ाया । कर्ण दा खीरी मौका आई गेया हा । जियां पहलें भविष्य-वाणी होई दी ही ओदे रथै दा खब्बा पहिया धरती इच खुब्बी गेया । कर्ण रथै परा कुदेया ते पहिया बाहर खिच्चन लगा । ते आखन लगा—इक मिण्ट बल्गी जा । मेरा रथ खुब्बी गेया ऐ । तूं महान् जोधा एं । तुगी धर्म दा ज्ञान ऐ । तूं इस घटना दा अनुचित फायदा नईं लै । में भट गै रथ ठीक करनां ते फी तूं रज्जियै जुद्ध करी लेयां ।

अर्जुन किश भिजकी गेया । कर्ण पहिया खुब्बी जाने करी घाबरी गेया हा । उसी ओ श्राप चेतै आई गेया । ओ परतियै अर्जुन गी आखन लगा जे धर्म उप्पर चलेयां । कृष्ण होर बिच बोली उठे—“बाह कर्ण । तुगी बी ख्याल ऐ बीरता के हुन्दी ऐ ते धर्म के हुन्दा ऐ । हुण तूं मुसीबतै इच फसेयां एं तां तुगी धर्म चेतै औन लगा ऐ । पर जिस लै तूं ते दुर्योधनै, शकुनि ते दुशासनै द्रोपदी गी घसीटिऐ दर्बारै इच आन्दा हा ते बेज्जती कीती ही तां तुगी धर्म कियां भुल्ली गेया हा ? तूं युधिष्ठिर गी प्लेरेया । ओ खेडने दा शकीन पर चलाक नईं हा, उसी जूआ खडाया ते धोखे कन्ने सब किश खुस्सी लैता । उसलै थुआड़ा धर्म कुथें जाई छप्पेया हा ? युधिष्ठिर गी ओदा राज नहीं परताना धर्म हा ? जिसलै उनें बारां

बरे बनवास ते तेरमां बरा अग्यात बास बी भोगी लैता हा । जिस धर्म दा तू हुण बास्ता पा करना एं उसलै ओ धर्म कुत्थें गया हा ? तू दुष्टे कन्ने षडयन्त्र करिऐ भीमसैनै गी जहर दित्ता । ते मारन लाया । तू लाखा महल इच सुत्ते दे पाण्डवें गी जीन्दे गे फूकने दी चाल बनाई । उसलै थुआड़े धर्म गी के होआ हा ? जिसलै जोरा-जबी कन्ने द्रोपदी उपपर हत्थ पाया हा तां ते तू मजे कन्ने नजारा दिक्खा करदा हा । उसलै तू मखौल नईं हा कीता थुआड़े पति ते थुआड़ी रक्षा नईं करी सके तू होर पति करी लै ।

ओ जीभ जिसी ए गल्लां करदे शर्म नईं आई अज्ज ओ धर्म ते बीरता दा बास्ता पान्दी ऐ ? बीरता दी गल्ल बी खूब ऐ । जिसलै तुसैं सारें रलियै अभिमन्यु गी घेरेया तां उसी कत्तल करदे तुसैं गी शर्म नईं आई ? ऐ कोई बीरता ही ? हे दुष्ट ! बीरता ते धर्म दी गल्ल नईं कर । तू उनें दौनें चीज दा कदें मान नईं कीता ।

जिसलै कृष्ण होर उसी इयां फटकार देया करदे हे ते अर्जुन गी किश करने गी शह देया करदे हे कर्ण सिर सुद्रियै सब किश सुनदा रेया ते किश नईं बोलेया । ओ चुपचाप रथै उपपर चढ़ी गया पहिया धरती इच खुब्बा रौन दित्ता । अपना धनश चुक्केया ते कस्सियै तीर मारेया । अर्जुन गी चक्कर आई गया । कर्ण नै इस बिन्दक मौके दा फायदा उठाया, भठ रथै दा उत्तरेया ते खुब्बे दे पहिये गी बाहर कडुन लगा । पर श्राप बिरथा थोड़ा जाना हा । ते कन्ने ओदे भाग डुब्बी गेदे हे । पहिया हिल्लै नईं । उस बचारै नै अपना सारा जोर लाई ओड़ेया । उस महान अस्तर चलाने आले मन्तर चेतै कीते पर उस मुसीबतै दी घड़ी इच ओ भुल्ली गे गे । परशुराम होरें उसी इऐ श्राप दित्ता हा ।

कृष्ण होरें आखेया—अर्जुन समां नष्ट नईं कर । तीर चला ते शत्रु दा घाड़ा घड़ ।

अर्जुन किश दुविधा इच हा । जिस कम्मै इच बीरता नईं होऐ ओ कम्म करदे ओदा हत्थ कम्बदा हा । पर जिसलै कृष्ण होरें आखेया तां अर्जुनै हुकम मन्त्री लैता । ते ऐसा तीर

मारेया जे कर्ण दा सिर बक्खी जाई पेया । ब्यास हुन्दी मरजी नईं जे अर्जुन गी ए दोस लग्गै । अर्जुन ते बीरता दी मूरत ऐ । ए कम्म उस कृष्ण हुन्दे आखे उप्पर कीता । जिसलै कर्ण खोब्बे चा पहिया कड्डा करदा हा । उस बेल्लै अर्जुन गी आखियै उनें तीर चलवाया ।

उस समें दे जुद्ध नियमें मूजब ए बिल्कुल गलत हा । धमें गी इयां त्रोटने दी जिम्मेदारी भगवान बिना कुण लेई सकदा ऐ ? सच्ची गल्ल ऐ जे शारीरिक बल ते हिंसा कन्ने अत्याचार नष्ट नई हुन्दा । सचाई गित्तै बी शारीरिक बलै दा प्रयोग बुराइयें गी गै जन्म दिन्दा ऐ । ते नतीजा इऐ निकलदा ऐ जे पापे दा बाद्धा हुन्दा ऐ । अधर्म बधदा ऐ ।

०००

दुर्योधन

जिसलै दुर्योधनै कर्ण गी मरदे दिक्खेया तां ओदे गमै दी हृद नई रई । कृपाचार्य दुर्योधनै दे मनै दी हालत दिक्खिये आखन लगा—असैं लालचै ते लोभै इच आनियै अपने मित्तरें उप्पर जादा बसाह कीता । उनें बिना कुसौ चू चरां कीते सब किश जरेया, साढ़ा साथ दित्ता, ते अपनियां जान्नां बी दित्तियां । सुर्ग लोक बी गे । हुण ते इक गै रस्ता ऐ—जे पाण्डवें कन्ने सन्धि करी लौ । ए सर्वनासी जुद्ध मता नई चलाओ ।

उस झुगी निराशा बिच बी दुर्योधन गी ए सलाह पसन्द नई आई ।

“शायद एदे आस्तै वक्त हा, पर ओ गुजरी गया ऐ । साढ़े ते पाण्डव दम्यानि शान्ति दी के गल्ल होई सकदी ऐ । साढ़े प्यारे नाते साकें दा ते उन्दे प्यारे साकें मित्तरें दा किन्ना खून बगेया ऐ । जे में अपनी जान बचाने गित्तै हार मन्नां । में दुनियां दी फटकारें कोला कियां बची सकनां ? इस बेज्जती कन्ने जान बचाइये बी

मिगी के सुख होई सकदा ऐ ? उस राजै गी प्रापत करिए जेड़ा हार मन्नियै ते सन्धि करने पिच्छों थोग, इन्नै भ्रा ते रिश्तेदार मरवाइयै थोग, ओदे इच के सुख होई सकदा ऐ ?

दुर्योधनै दे ए शब्द सुनियै ओदे साथिएं खुशी प्रकट कीती । उने शल्य गी सौनापति चुनी लैता । शल्य बी बड़ा भारा जोधा हा ते जिन्ने सौनापति मोए उन्दे कशा घट्ट नईं हा । सौना दी रचना उन्दी कमान इच होई ते जुद्ध जोरै कन्ने शुरु होई गया ।

पाण्डवें पासेया युधिष्ठिर होरें शल्य कन्ने जुद्ध रम्भेया । सारे दिक्खियै चगत होन लगे जे इन्ने सील सुभा आले युधिष्ठिर एड्डी तेज लड़ाई करदे न ।

मता चिर बरोबरी दी लड़ाई हुन्दी रई । फी युधिष्ठिर होरें शल्य उप्पर भाला चलाया जेड़ा सिद्धा जाइयै उन्नै गी लग्गा । जियां जगै पिच्छुआं भण्डे दा डण्डा ढाई ओड़दे न इयां गै शल्य हुन्दा बेजान ते लहुलुहान शरीर भुआ डिग्गी पेया ।

जिसलै आखरी जनेल शल्य बी मरोई गया तां कौरव सौना बिल्कुल नराश होई गई । धृतराष्ट्र दे बाकी बचे दे पुत्तरें किट्टे होइयै भीमसैन उप्पर चवक्खी दा हमला कीता । भीमसैन सारे मारी ओड़े । भीमसैन गी धृतराष्ट्र दे पुत्तरें उप्पर बड़ा जैहर हा तेरां बरे पहलें उन्नै दबारै इच द्रोपदी बेज्जती कीती ही । भीमसैन मनै इच आखन लगा—इन्ना चिर जीन्दा रौना सुफल होई गया । पर दुर्योधन हबे जीन्दा ऐ । ओ किश गम्भीरता कन्ने मुस्कराया ।

शकुनि नै सहदेव दी सौना उप्पर हमला कीता । सहदेव नै इक बड़ा पैना ते तलवारी दे नक्के आला तीर चलाया ते आखेया—मूर्खा ! ए लै अपने पापै दा फल । तीर शकुनि दे गले गी लग्गा ते ओदी मुण्डी बढोईयै भुआ जाई डिग्गी । ए व्यक्ति सारी बुराई दी जढ़ हा ।

कोई सौनापति नईं रेआ तां बाकी बची दी सौना तां तुआं नस्सन लगी । ते पाण्डवें दी जितदी फौज उन्दे पिच्छे लगिऐ इक इक गी

मारन लगी । सञ्जय धृतराष्ट्र की सना करदा हा—इयां थुआड़ी ज़ारा अक्षोणी सौना स्वाह होई गई । हजारों राजे जेड़े थुआड़ी सहायता गित्तै आये हे बड़े माने ते शाने कन्ने हुण छड़ा दुर्योधन गै जुद्ध भूमि इच बचेया ऐ । बचारा जरूमी ऐ, घायल ऐ, ते बेहोश होआ करदा ऐ । हुण कोशश फजूल ही फी बी इक्कले दुर्योधन सौना किट्टी कीती, गुर्ज पकड़ेया ते इक नाले कण्डे गया उठी । ओदा सारा शरीर अग्नी आड़ू जला करदा हा । ओ पानी पासै गया । ओ सोचन लगा 'विदुर की ऐ सब किश पता हा, उसने पहले गै ऐ सब किश असें की दस्सी ओड़ेया हा ।' ओ पानी इच बड़ी गया ।

उस अकली दा के फायदा जेड़ी पिच्छुआं आवै । जे किश कीता दा ऐ ओदा नतीजा ते निकलना गै । ओ भोगना गै पौना ऐ । ऐ कम दा सिद्धान्त ऐ ।

युधिष्ठिर ते बाकी पाण्डव आ अपने बड़े शत्रु की तुपदे उत्थे आई गे ।

युधिष्ठिर होर आखन लगे—दुर्योधन ! परिवार ते खानदान मरवाइयै ते हुण अपने आप की बचाने गित्तै इत्थे तला इच आनी छप्पेया ऐ ? हुण थुआड़ा घमण्ड कुत्थे ऐ ? शर्म नई औन्दी तुगी ? बाहर निकल ते जुद्ध कर । क्षत्रिय होइये लड़ाई कशा डरना ऐ ? मौती थमां डरनां ऐ ?

ऐ शब्द बड़े चुब्बे पर दुर्योधन गम्भीरता कन्ने आखन लगा—युधिष्ठिर ! अऊं जिन्द बचाने गित्तै इत्थे नई छप्पेया । अऊं डरै करी इत्थे नई आया । मेरे अन्दर जेड़ी अग्न भड़का करदी ऐ उसी शान्त करन इत्थे आयां । अऊं मौती कशा नई डरदा, पर हुण की लड़ां ? इस धरती उप्पर किश नई रेआ जिस खातर में लड़ां । मेरे सारे साथी मरोई गे न । राजे दी इच्छा नई रई । हुण निष्कण्टक राज भोगी । कोई तुन्दा मुकाबला करने आला नई ।

हुण ते बड़ा दयाल ऐ । तू ते बड़ा बझारिऐ आखेया हा जे सूई दे तक्के जिन्नी धरत नई देनी । जिसलै असें शान्ति दी प्रार्थना

कीती तू साढ़ा प्रस्ताव रद्द करी ओढ़ेया । हुण आखनां एं सारा साम्बो । अस राजै गितै जां धरती गितै नई लड़ा करदे । में थुआड़े पाप गिनिएं सना ? तू जेड़ियां साढ़े कन्ने बेइनसाफियां कीतियां, द्रोपदी उपपर जेड़े जुल्म कीते उन्दा प्राहचित ते थुआड़ी मृत्यु कन्ने गै हुन्दा ऐ ।

सञ्जय बृद्ध ते अन्ने धृतराष्ट्र गी जुद्ध दियां घटनां सना करदा हा आखन लगा—जिसलै थुआड़े पुत्तर दुर्योधनै युधिष्ठिर दे ए कौड़े बोल सुने ओ अपना गुर्ज चुक्किये पानी इचा बाहर आई गया ।

पानी चा बाहर निकलिये बचारा आखन लगा—तुस सारे इक्क इक्क करिएं आई जाओ । में इक्कला आं ।

तुस पजै रलिये निहत्थे उपपर हमला नई करो । मेरा कवच बी है नई ते अऊं सारा जखमी ते घायल आं ।

युधिष्ठिर होरें करारा जवाब दित्ता—अगर मत्तें रलियै इक्कले उपपर करना गलत होऐ तां तुसें अभिमन्यु उपपर कियां हमला कीता हा ते उसी मारी ओढ़ेया हा । उसलै तू कियां जाजत देई ओढ़ी ही जे सारे मिलिये उस जागतै गी मारी ओढ़ो । ओ बचारा तुन्दे बश्कार इक्कला फसे दा हा । ठीक ऐ । जिसलै आदमी आपू मुसीबतै इच फसदा ऐ तां दूएं गी धर्म ते बीरता दा उपदेश देन लगदा ऐ । तू अपना कवच पाई लै । साढ़े चा जेदे कन्ने लड़ना ई पसन्द करी लै । मर ते सुर्गे गी जा, जां जित ते धरती दा राजा बन ।

इयां दुर्योधन ते भीमसैन दी लड़ाई शुरु होई । जिसलै उन्दे गुर्ज टकरान्दे हे तां चिंग्याड़ियां निकलदियां हियां । दुर्योधन ते भीमसैन इक्कै नेऐ जोधा हे ते उन्दे शारीरिक बल ते चतुराइयां इयां इक्कै नेइयां हियां । जुद्ध मता चिर हुन्दा रेआ । मामला चिन्ता-जनक हुन्दा जा करदा हा ।

दिक्खने आले बहसां करदे हे भई कुन जित्तग । कृष्ण होर आखन लगे—भीमसैन जेड़ी सगन्ध चुक्की ही (जिसलै द्रोपदी गी

द्वारै इच वेज्जत करन लगे हे) जे में दुर्योधन दे पट्ट त्रोड़ी ओढ़ऽ पुरी करनी ऐ ।

भीमसैन ए सुनी लेया ते उस अत्याचार दा नकशा ओदी अकखीं सामनै आई गया । ओ उच्छलेया ते उस गुर्ज मारिए दुर्योधन दे पट्ट त्रोड़ी ओढ़े । दुर्योधन भुजा डिगगी पेया ओ मरने आला होई गया हा भीमसैन उस बिछे दे शरीरै उप्पर नच्चन लगा, उस दुर्योधन दे सिरै उप्पर पैर रक्खेया ते भयंकर नाच करन लगा ।

युधिष्ठिर होर आखन लग—भीमसैन बस कर । तू ते कर्जा चकाई लेआ ऐ । दुर्योधन राजा ए ते भ्रा ऐ । ओदे सिरै उप्पर भार रखना ठीक नहीं । कृष्ण होर आखन लगे—इस दुष्टे दी आत्मा शरीर छोड़िये जाने आली ऐ । हे पाण्डवो ! दुर्योधन ते ओदे साथी मरोई गे न । हुण इत्थे की बल्गदे ओ । अपने रथे उप्पर चढ़ो ।

जिसलै कृष्ण होरें ए आखेया तां डिगगे दे दुर्योधन दा चेहरा गुस्से ते नफरत कन्ने अग्गी आडू जलन लगा । कृष्ण पासै दिक्खिये आखन लगा—कर्ण, भीष्म पितामह जा द्रोणाचार्य कन्ने धर्म जुद्ध करिए तुस कदें नईं जिती सकदे हे । तुसैं गी किश बी शर्म है जां नईं ?

मरदे मरदे बी दुर्योधन गी कोई बसोस नईं हा जे उस के कीता हा ।

कृष्ण होर आखन लगे—हुण तू फजूल दूए गी दोश लान्तां ए । लालच ते ताकती दे घमण्ड नै थुआड़े कशा बेशमार पाप कराये ते हुण तू जे किश कीता ओदा फल भोगा करनां ए । दुर्योधन आखन लगा—दुष्ट ! जिन्नां चिर अऊं जीन्दा रेआं महाराज रेआ, उदार मित्तर रेआ, ते खतरनाक दुश्मन रेआ । मनुक्खें आस्तै जिन्नियां खुशियां न, ते जिन्दे आस्तै बडे बडे राजे ललचोन्दे रौन्दे न ते देवते बी इच्छा करदे न, ओ खुशियां मेरियां हियां । पूर्ण रूप कन्ने मेरियां हियां । ते हुण बहादरें दी मौत मेरा मुकट बनेया ऐ ।

अऊं मरन लगां ते शानै कन्ने सुर्ग चलेयां । उत्थें अपने मित्तरें ते भ्रायें कन्ने मिलड । ओ सारे उत्थें अगें गै पुज्जे दे न ते मिगी बल्गा करदे न । तुस इत्थें धरती उपपर रौ, तुन्दे उद्देश्य फेल होई गे । सारे क्षत्रिय तुसैं गी फिट-फिट करडन भीमसैनै मेरे सिरै उपपर पैर रखेया तां के होआ ? मेरियां जडा ऋद्धि दियां न । किश मिण्टे बाद मेरे सिरै उपपर कायें इल्लें बौना ऐ ।" जिसलै दुर्योधनै ए आखेया तां देवतें उपपरा फुल्लें दी बरखा कीती ।

बेथवे लालच नै दुर्योधन गी करस्तै पाया । क्रोध ते पाप उत्थुआं गै निकले । ते अनेक पाप बी होए । पर ए कोई नईं इनकार करी सकदा जे धृतराष्ट्र दा पुत्तर अजेय भावना दा मालक हा ।

०००

पाण्डवें गी द्रण्ड फटकार

जिसलै लड़ाई खातमें उप्पर ही बलराम होर तीर्थ जात्रा करिऐ कुरुक्षेत्र पुज्जे । ओ उसलै पुज्जे जिसलै भीमसैन ते दुर्योधन आखरी लड़ाई लड़ा करदे हे । उनें भीमसैन गी घातक प्रहार करदे ते पट्ट त्रोंडदे दिक्खेया । उनें गी बड़ा रोह चढ़ेया । लड़ाई दा बड़ा बड़ा नियम भंग होआ हा । ओ आखन लगे धृगलानत ऐ । कोई क्षत्रिय धुन्नी हेठ बी गुर्जे दा प्रहार करदा ऐ ?' भीमसैनै बड़ी बुरी चाली नियम त्रोंडेया ऐ । ओ बड़े तरारे कन्ने कृष्ण हुन्दे कोल गये ते आखन लगे—तुस ए दिक्खा करदे ओ ते बर्दाश्त करा करदे ओ । इऐ नेई गन्दी लड़ाई में नई बर्दाश्त करी सकदा ।'

ए आखियै ओ भीमसैनै पासै बधे ते उनें अपना हल्ल शस्त्र चुक्केया । बलराम जी दा शस्तर हल्ल हा जियां कृष्ण हुन्दा चक्कर हा । कृष्ण होर ए दिक्खियै बड़े घबराये । उन्दे बड़ु भाई साहब भीमसैनै पासै बधा करदे हे । ते उनें गी बड़ा रोह चढ़े दा हा । ओ अगें बधे ते टोकिये आखन लगे—पाण्डव साढ़े मित्तर ते बड़े

नजीकी रिश्तेदार न । उन्हें दुर्योधन कशा दुःख भोगे न ते मुसीबतां पाइयां न । जिसलै दबाराँ इच द्रौपदी दी बेज्जती होई ही उसलै भीमसैनै कस्म खादी ही—इक दिन लड़ाई इच में थुआड़े पट्ट चोड़ी देड, ए उस बड़ी पक्की सघन्द चुक्की ही ते हर इक इस गल्लै गी जानदा ऐ । इक क्षत्रिय नै जे प्रण कीता होऐ उसी पूरा करना ओदा फर्ज हुन्दा ऐ । तुस रोहै गी गलत रस्तै नईं जान दे ओ । मसूम पाण्डवें उप्पर जुल्म नईं करो । भीमसैनै गी सजा देने कशा पहलें ओ सारे अत्याचार ते दिक्खो जेड़े कौरवें पाण्डवें उप्पर कीते न । जे कोई बिना कारण दिक्खे छड़ी इक घटना गी दिक्खियै फैसला करी ओड़ै तां गलत गै नतीजा निकलदा ऐ । जे अस इक घटना लइयै ते ओदे कारणे दा सिलसिला दिक्खे बगैर अपना फैसला देई ओड़नेआं तां बड़ी भारी बेन्याईं होई जाग । दुर्योधनै पता हा । उस भीम गी अपनी कस्म पूरा करने आस्ते गै ललकारेया हा । तुस कियां आखदे ओ जे भीम नै गलती कीती ऐ ?

कृष्ण जी दियें गल्लें कन्ने बलराम जी दी रा ते नईं बदली पर रोह ढली गया । दुर्योधन ते बीर लोकें दे सुर्गें गी जाग । भीम गी सदा आस्तै कलंक लग्गा रौग । ए हमेशा आखेया जाग जे भीमसैनै जुद्ध दे नियमें दा पालन नईं कीता । ए ओदे नां कन्ने कलंक रौग । में इत्थें बिल्कुल नईं ठहरड । ए आखिये बलराम होर द्वारका गी टुरी गै ।

कृष्ण होर पुच्छन लगे—युधिष्ठिर जी ! ए चुप्पी की ऐ ?

युधिष्ठिर होर आखन लगे—मिगी ए दिक्खियै बड़ा कष्ट होआ जे भीमसैन अपने भ्राऊ दी लोथा उप्पर नच्चा करदा हा ते उसी पैरें कन्ने शड़ा करदा हा । साढ़े कुलै दी शान गै मुकदी लवदी ऐ । कौरवें साढ़े कन्ने बेन्याईं कीती । मिकी पता ऐ जे भीम दे हिरदे इच हुण कलजुग आई गया ऐ । पिछले जुगै दे नियम लागू नईं हुन्दे । भीम नै जेड़ा धुन्नी थमां हेठ गुर्ज मारेया ते दुर्योधन दे पट्ट चोड़ी ओ गलत नईं हा । दुर्योधनै ओदी जान लैने दी किन्ने बारी कोशश कीती ऐ ।

ए दुर्योधनै गै आखेया हा तां कणें पिच्छुआं दा तीर मारिएँ अभिमन्यु दा धनश त्रौड़ी ओड़ेया हा । उसलै अभिमन्यु मते जोधा लोकें कन्ने धिरे दा हा । अर्जुन दे पुत्तरै गी जुद्ध भूमि च इनें किन्नै रलियै घेरेया हा, ओदा धनशबाण त्रौड़ी ओड़ेया रथ त्रौड़ेया ते बड़ी बुजदिली कन्ने मारेया हा । दुर्योधनै जम्मने थमां लेइयँ बुराई सोची, धोखा कीता ते अपने लोकें दा सत्यानास कराया ऐ । ऐसे आदमी गी भीम नै मारी ओड़ेया तां कोई बुरा नई कीता । भीमसैन १३ साल अत्याचार जरे, ते मनै इच रक्खे दुर्योधन जानदा दा हा जे भीमसैन ओदे पट्ट त्रौड़ने दी ते उसी मारी देने दी कस्म खादी दी ऐ । उस दुखी पाण्डवें गी ललकारेया । किन्ना गम ते गुस्सा ऐ । में उसी सारा दोश बी नई दिन्दा । असें दुर्योधनै गी मारी ओड़ेया ऐ । ओ बड़े लालचै इच फसे दा हा, उसी समझ घट्ट ही, पर हुण इस फिलास्फी उप्पर बहस करने दा के लाभ ऐ । उस साढ़े उप्पर जुल्म कीते असें बदला लेई लेया हुण उस मन्दा कीता ते असें चंगा कीता एदी बरोबरी करने दा कोई लाभ नई ।

युधिष्ठिर हुन्दे मनै उप्पर बोझ पेया । इक ते कोई नियम भंग करी ओड़ै ते फी सफाइयां पेश करै ! वहाने बनाने कन्ने मनै गी शान्ति नई थोन्दी । तेज बुद्धि आला अर्जुन चुप हा । ओ भीमसैन दे कम्मै गी चंगा नई समझदा हा । बाकी लोग दुर्योधनै दे अत्याचारें ते पापे गी चेतौ करा करदे हे ते निन्धा करा करदे हे । कृष्ण होर उनें गी आखन लगे—जेड़ा दुश्मन हारी गेया ते मरा करदा होऐ ओदी निन्धा नई करनी चाही दी । मरदे आदमी दी के बदखोई करनी ? ओ मूर्ख हा, उस अपनी मौत आपूँ स्हेड़ी । उस बुरें दा साथ कीता ते तबाह होई गेया । चलो अस चलचै ।

दुर्योधन अत्यन्त पीड़ा कन्ने पेदा हा जिसलै उस कृष्ण जी दियां गल्लां सुनियां तां रोहै कन्ने तड़फी उट्टेया ।

ओ हत्थें भार दनांक बैठा पीड़ अत्यन्त कष्ट देऐ करदी ही पर ओ आखन लगा—दुष्ट ! नौकर देया पुत्तरा । थुआड़ा बब्ब कंस दा नौकर नई हा ? तुगी राजें कन्ने उठने बौने दा हक्क गै के ऐ ? तुगी

गल्लां करदे शर्म नईं औन्दी ? में तुगी भीमसैन गी मेरियें जड़े उप्पर प्रहार करने दा इशारा करदे दिक्खेया हा । तू के समझनां जे जिसलै तू अर्जुन कन्ने गल्लां करा करदा हा ते अपने पट्ट बजा करदा हा तां तू भीमसैन गी मेरे पट्टे उप्पर गुर्ज मारने दा इशारा नईं हा करा करदा ? तू लड़ाई दे नियम नईं त्रोड़ै ? उस बेल्ले तोड़ी ते बरोबरी दी लड़ाई ही । न तेरे इच क्यास ऐ ते न तुगी शर्म ऐ । तू चलाकी करिऐ, छल करियै भीष्म पितामह दी मृत्यु नईं कराई ? तू शिखण्डी गी अगों करियै अर्जुन कोल तीर नईं मरवाये ? तुगी पता हा जे भीष्म पितामह कुसै इस्त्री कन्ने जुद्ध नईं करदे । ते इयां उनें गी निहत्था ते बिना मकाबले दे मरवाई सुट्टेया । तू द्रोणाचार्य हुन्दी मृत्यु करवाई । युधिष्ठिर कोला भूठ बुलवाया । ओ भूठ तुऐं घड़ेया हा जेड़ा युधिष्ठिर बोलेया । उससै गी सुनियै द्रोणाचार्य नै शस्त्र सुट्टी ओड़े हे । उसलै तू किश नईं आखेया ते सगों खुश होआ जिसलै दुष्ट धृष्टद्युम्न आचार्य उप्पर हमला कीता ते जिनें लड़ना बन्द करी ओड़े दा हा ते समाधो लाई दी ही उन्दा सिर बड़ी ओड़ेया । ए थुआड़ी गै चाल नईं ही जे कर्ण नै अपनी अमोघ शक्ति घटोत्कच उप्पर चलाई दित्ती जेड़ी उस चेचा अर्जुन उप्पर चलाने गी रक्खी दी ही । तू बड़ा पापी ऐ । तू ऐ सात्यकि गी प्लेरेया ते भूरिश्रवा गी मरवाई दित्ता । जिसले ओदी कपटै कन्ने बांह बढोई ते उस तीरें दी सेज बनाइये समाधो लाई ही । तू ऐ कर्ण गी मरवाथा । तू ऐ अर्जुन गी सुआकेया ते बुजदिलें आडू तीर चलाने गी आखेया । उस बेल्लै कर्ण दा पहिया भुजा खुब्बे दा हा । ओ निकम्मे आदमी ! तू ऐ साढ़े सर्वनास दा कारण ऐ ।

सारी दुनियां नै तुगी फिट फिट कीता जिसलै तू जादू कन्ने सूरज अस्त करी दित्ता ते जयद्रथ गी जकीन कराई दित्ता जे दिन घरोई गया ऐ ते उसी कोई डर नईं । ते इयां जिसलै ओ बेखबर होआ तां उसी मरवाई ओड़ेया ।”

इयां दुर्योधनै कृष्ण हुन्दे बारे इच मनै दा बुआल कहुँया, फटकार दित्ती, ते अत्यन्त पीड़ा कन्ने ते जखमें ते रोहै करी परतियै लेटी गया । कृष्ण होर आखन लगे—दुर्योधन । तू मता रोह करिऐ

आखरी मौके अपनी पीड़ कैत बधाना एं ? ए थुआड़े कुकर्म न जिनें थुआड़ा अन्त समां कोल आन्दा ऐ । मिगी दोश की दिन्नां ? भीष्म पितामह ते द्रोणाचार्य थुआड़े पापें करी गे मोए न । इयां गे कर्ण ते दूए दी मृत्यु दा कारण तूं आपूं एं । पाण्डवें कन्ने तूं जे अत्याचार ते पाप कीते उनें गी गिनिये सनां ? जे अत्याचार तूं द्रोपदी कन्ने कीता ओदी किन्नी बी सजा सखत होऐ घट्ट ऐ । दुश्मनियां तूं पाइयां । पाप तूं कीते ते नतीजा भुगतना पेया तां दोश दूए गी दिन्नां एं । जेड़े धोखे ते छल तूं साढ़े जिम्मे ला करनां एं ओ थुआड़ी दुष्टता ते मक्कारी नै असें गी अपनाने उप्पर मजबूर कीता । तूं अपने लालच दा नतीजा ते जुद्धभूमि इच भुगती लेया ऐ । पर तूं बहादुरें दी मौत मरा करना एं । बीर जेड़े जुद्ध भूमि इच प्राण दिन्दे न सुर्ग जन्दे न ।

दुर्योधन आखन लगा—कृष्ण में ते अपने मित्तरें ते रिश्तादरें कन्ने सुर्ग चलेयां पर तूं ते थुआड़े मित्तर इस दुनियां इच दुःख ते गम भोगे ओ । में बेद पढ़े । धर्म अनुसार दान दित्ते । समुद्ररै तोड़ी धरती उप्पर राज कीता । जिन्नां चिर जीन्दा रेआ शत्रुएं गी दबाइयै राज कीता । सारे दुनियां दे सुख भोगे देवते बी उनें सुखें दी लालसा करदे न । राजे उनें सुखें गी तरसदे न । सारी राज शक्ति मेरे हत्थ ही ।

हुण मरा करनां तां बीरें क्षत्रियें दी मौत मरा करनां । मेरे मित्तर ते रिश्तेदार पहले सुर्ग पुज्जे दे न । अऊं उने गी मिलन चलेयां । ओ मेरे स्वागतै गी बलगा करदे न । कुण खुशकिस्मत ऐ ? अऊं जां तुस ? तुसें पिच्छें रौनां, मोए दे रिश्तादारें गी कल्पी कल्पी दुखी होना, उज्जड़े दे घर दिक्खने । तुसें गी जीत ते थोई पर सिर सुआ गै पई ।” दुर्योधनै दे शब्द सुनियै देवतें उप्परा फुल्लें दी बरखा कीती । गंधर्व गीत गान लगे, ते गासै उप्पर लो होन लगी । कृष्ण जी ते पाण्डव किश हल्के पई गे । कृष्ण होर आखन लगे—दुर्योधनै जे किश आखेया ओदे इच सचाई ते ऐ । तुस उसी धर्म उप्पर चलियै नई हे हराई सकदे । ए दुष्ट आदमी जुद्ध इच नई हा जतोन्दा ।

अश्वत्थामा

जिसलै अश्वत्थामा नै सुनेया जे दुर्योधन मरने आला होई
गेदा ऐ ते द्वन्द्व इच भीम नै ओदे पट्ट त्रोड़ी ओड़े न तां उन्दा सच्चा
रोह समुद्रै आडू चढेया । पाण्डवें ओदे पिता गी मारने आस्तै
जेडा धोखा कीता हा ओबी ओदे मनै इच रडका करदा हा । हुण
जिसलै उसी पता लगा जे लड़ाई दे नियमें बरुद्ध दुर्योधन गी धुन्ती
हेठ गुर्ज मारिए ओदियां जडा त्रोड़ी ओड़ियां न तां ओ उत्थे पुज्जा
जित्थे दुर्योधन पेदा हा । उस कस्म चुक्की अज्ज रातीं पाण्डवें गी
जमलोक पजाई देड ।

दुर्योधन जेडा मौती दी सेजा उप्पर खीरी साह लै करदा हा
अश्वत्थामा दी कस्म सुनियै बड़ा खुश होआ । उस बाकी बचे-
खुचे सैनकें गी आखिये अश्वत्थामा गी सैनापपि बनाया ते आखेया—
तुस्सै मेरी आखरी-मेद ओ ।

सूरज डुब्बी गेदा हा । बनै इच डण्डकार हा । इक बडै
दे बूटे हेठ कृपाचार्य, कृतवर्मा ते अश्वत्थामा बसां लैन लगे । ओ

इन्ने हुट्टे दे हे जे कृपाचार्य ते कृतवर्मा पौन्दे गै सई गे । पर अश्वत्थामा नफरत, गम ते गुस्से दी अग्गी कन्ने जला करदा हा । उसी नीन्दर कुत्थें ? जियां जियां रात बधन लगी इयां बनै इच जंगली जानवरें ते उल्लुएं दियां डरौनियां बाजां सुनचोन लगियां । ओ मनै इच सोचदा जा जे दुर्योधनै कन्ने कीता दा बचन तोड़ कियां चाढ़नां ऐं ।

उस बड़ै उपपर जित्थे त्रैवै जने सुत्ते दे हे सैकड़े कां रौन्दे हे । ओ सारे सुत्ते दे हे जे इन्ने इच इक उल्लू आया ते इक इक उपपर हमला करिये उनें गी मारन लगा । जिसलै अश्वत्थामा नै उल्लू गी कां मारदे दिक्खेया तां उसी इक ख्याल आया । कायें गी रातीं नई लबदा ते ओ बचारे तां तुआं उडुन लगे ते उल्लू उन्दे उपपर खूब हमले करन लगा । ओ बचारे मरोन्दे जान ।

इनें पाण्डवें ते द्रुपद पुत्तर नै मेरे पिता गी ते सारे साथिएं गी मारी ओड़ेया ऐ । जे अस चानचक हमला करचै तां उनें गी मारेया जाइ सकदा ऐ । इसलै ओ पाण्डव वगैरा सुत्ते दे होने न । जियां ए उल्लू हमले करियै कायें गी नष्ट करा करदा ए इयां गै पाण्डवें उपपर हमला करने आं । उनें साढ़े कन्ने धोखे बाजी कीती अस ओदा बदला चकाने आं । इस उल्लू दा बड़ा धन्नवाद ऐ जिस मिगी सिख्या दित्ती ऐ । बदली दी स्थितियें मताबक अपनी सुविधा दिक्खियै शत्रु उपपर हमला करना कोई पाप नई । अगर ओ अपने शत्रु उपपर जेदी फौज हुट्टी दी होऐ, खिल्लरी दी होऐ हमला करी सकदे न तां अस जिन्दियां फौजा नष्ट होई गइयां न सुत्ते दे पाण्डवें उपपर की नई हमला करी सकदे ? एदे इच कोई गलत गल्ल नई । पाण्डवें छल कपट कन्ने विजय प्राप्त कीती ऐ । उनें गी हराना ते दण्ड देना जरूरी ऐ । साढ़े सामनै होर कोई रस्ता नई ।

अश्वत्थामा नै पक्का इरादा कीत्ता ते भटपट कृपाचार्य गी जगाया ते अपनी स्कीम दस्सी । कृपाचार्य नै सुनेया ते हरान होई गया ।

ओ आखन लगा—ए कदें नईं होई सकदा । ए बिल्कुल गलत ऐ । सुत्ते दे लोकें उप्पर हजे तोड़ी कुसै हमला नईं कीता । ए क्षत्रिय धर्म ते नियमें गी त्रोड़ने दी ऐसी मसाल ऐ जेड़ी कदें नईं होई । हे अश्वत्थामा ! अस कोदे आस्तै लड़ा करने आं ? ओ आदमी जेदे गित्तै अस जुद्धै इच शामिल होए अत्यन्त बुरी दशा इच ऐ ते मरने आला ऐ । ओदा अन्त समां आई पुज्जा दा ऐ । असें बफादारी कन्ने अपना फर्ज नभाई ओड़ेया ऐ । अस लालची ते बद दमाग दुर्योधनै गित्तै लड़े पर अस बुरी चाली हारी गे आं । हुण लड़ाई जारी रखने दा के लाभ ऐ ?

ए सरासर गलती ऐ । चलो धृतराष्ट्र ते निर्दोष गान्धारी कोल चलचै ते उनें गी सेवा पुछचै । जियां ओ आखन ऊंआं करचै । बिदुर हुन्दी नेक सलाह बी लैचै । ओ असें गी ठीक रस्तै पाडन ।

जिसलै अश्वत्थामा नै कृपाचार्य कोला ए सुनेया तां उसी बड़ा दुख होआ ते ओ रोहै कन्ने जलेदा बोलेया—हर इक आदमी इऐ मसूस करदा ऐ जे, जे किश ओ सोचदा ऐ ऊऐ ठीक ऐ । जिन्नी बुद्ध होऐ उन्नी दूर गै सोचन हुन्दा ऐ । उनें पाण्डवें भूठ बोलियै मेरे पूजा जोग पिता गी मारी ओड़ेया । उनें बीरता दे नियमें दी पर्वाह नईं कीती । ते दुर्योधनै गी मारी ओड़ेया ऐ ।

में सोचनां जे जेड़ी स्कीम में बनाई ऐ ओदे कन्ने पाण्डवें दे कुकर्मों दा बदला लैना बिल्कुल ठीक ऐ । इयां अऊं अपने पिता ते अपने राजा दा ऋण चकाई लैड । में फैसला करी लेया ऐ ते हुण तब्दील नईं करना । इसलै पाण्डव ते धृष्टद्युम्न अपने कवच तुआरिऐ सुत्ते दे होने न । अऊं तम्बुएं इच चलेयां ते उनें गी मारी ओड़नां ।

कृपाचार्य अश्वत्थामा गी इयां बोलदे सुनिए बड़ा दुखी होआ ।

कृपाचार्य होरें आखेया—जोधा लोकें इच थुआड़ा बड़ा नां ऐ । थुआड़े निष्कलंक चरित्तर उप्पर बड़ा धब्बा लगना ऐं । जियां

द्रुद्ध चिट्ठी चादरे उप्पर खून लग्गी जा । सुत्ते दे मनुक्खें गी कदें नईं मारना चाही दा । इस कर्म थमां वाज आई जा ।

अश्वत्थामा आखन लगा—छोड़ो जी ! तुस के आखा करदे ओ ? इन्हें पाण्डवें मेरे बब्बे गी जिसलै ओ शस्तर सुट्टी बैठे दे हे ते समाधी इच बैठे दे हे, कत्ल करी ओड़ेया ।

इन्हें धर्म दे बन्न त्रोड़ी ओड़े न । ते धर्म दा त्रोपा बी नईं रेआ । सब हाड़ै इच बगी गया ऐ । कर्ण जिसलै भुजा उतरिऐ रथ दा पहिया ठीक करा करदा हा इन्हें वेअसूले दुष्टें उसी मारी ओड़ेया । भीम नै धुन्नी हेठ गुर्ज मारिऐ दुर्योधनै गी मारी ओड़ेया ऐ, हुण पालन करने गित्तै धर्म रई के गया ऐ ? पाण्डवें हमेशा आस्तै धर्म दा बन्न गै त्रोड़ी ओड़ेया ऐ । इन्हें दुष्टें वीरता ते धर्म दे सारे नियम त्रोड़ी ओड़े न ।

इन्हें दुष्टें गी मारने दे बारे इच किश सोचने दी लोड़ के ऐ ? द्रुपद पुत्तर गी जिस मेरे पिता गी कत्ल कीता दा ऐ, जे में उसी सुत्ते दे बड्डी ओड़ां ते मिगी परतिऐ जन्म लइयै उल्लू बनना पवें जां गन्दगी दा कीड़ा बनना पवें मिगी मन्जूर ऐ । में चन्नां नेआ जन्म फी थोऐ । अश्वत्थामा नै ए आखिये अपना रथ तैयार कीता । ओ कृपाचार्य दे उत्तर गी नईं बल्गेया । जिस बेल्लै ओ चलन लगा तां कृपाचार्य ते कृतवर्मा कलिये—अश्वत्थामा, रुकी जा, तू के करन लगा एं ? अस इसी बिस्कुल ठीक नईं समझदे । पर तुगी छोड़ना बी नईं चान्दे । जिस रस्तै तू चलन लगा एं अस बी थुआड़े पिछे चलगे । थुआड़ा पाप अस बी बण्डागे । ओ बी ओदे कन्ने चली पे ।

इयां पाप बधन लगदा ऐ । इक गलती दूई गी जन्म दिन्दी ऐ । इयां पापै कन्ने पाप बधदा जन्दा ऐ । धर्म डुबदा जन्दा ऐ । पापै दा जिन्ना बरोध करो उन्ना गं बधदा ऐ । ओ पाण्डवें दे कैम्पै इच जाई पुज्जे । धृष्टद्युम्न अपना कवच तुआरिये अपने तम्बू इच घूक सुत्ता दा हा । अश्वत्थामा उस सुत्ते दे बीरै उप्पर झपटेया ते ओदे उठने थमां पहलें उसी बड्डी ओड़ेया ।

इयां उस सुत्ते दे सारे पांचाल ते द्रोपदी दे पुत्तर इक इक करिऐ मारी ओड़े ।

ए कम्म करिऐ जेदी सम्भावना कदें कुसै क्षत्रिय नै कीती गै नईं ही, कृपाचार्य, कृतवर्मा ते अश्वत्थामा तम्बू थमां बाहर निकले ते उनें तम्बू गी अगग लाई ओड़ी । जिसलै अगग भड़की तां सैनक जागियै तां तुआं द्रौड़न लगे । जियां बड़ै दे बूटे उपपर कां अफरातफरी इच घाबरे दे मरोए हे । अश्वत्थामा नै कई जोधा मारी ओड़े ।

अश्वत्थामा आखन लगा—असें अपना फर्ज नभाई ओड़ेया । चलो दुर्योधनै गी चलियै ए खुश खबरी सनाचै । तौले चलो मरने थमां पहलै ए खबर सुनियै उसी खुश होइयै मरन देओ ।

ओ त्रैवे दुर्योधनै कोल गये ।

०००

बदला मुक्केया

हे दुर्योधन ! तुस जीन्दे ओ । खबर सुनो ते खुश होवो । सारे पांचाल मरोई गे न पाण्डवें दे सारे पुत्तर मारी ओढ़े न । उन्दी सारी फौज तबाह करी ओड़ी ऐ । ओ सुत्तो दे हे । असें रातीं हमला कीता । हुण पाण्डवें पासै सत्त गै जोधा बचे न । साढ़ी बक्खी कृपाचार्य, कृतवर्मा ते अऊं बचे आं । अश्वत्थामा नै इयां दुर्योधनै गी सनाया । जेड़ा आखरी साह लै करदा हा । उस अक्खीं खोलियां, उसी साह लैन्दे बड़ा कष्ट होआ दा हा, बढी मुश्कलें बोलेया अश्वत्थामा । तूं दरअसल ओ कम्म कीता ऐ जेड़ा भीष्म-पितामह ते बीर कर्ण बी नई करी सके । तूं मेरा दिल बड़ा खुश कीता ऐ । अऊं सुखै कन्ने मरन लगां । ए आखियै दुर्योधन मरी गया ।

जिसलै युधिष्ठिर होरें सैना दी तबाही ते सुत्ते दे बीरें दी मौती दी गल्ल सुनी तां उनें गी बड़ा दुख होआ ते फुट्टियें रोन लगी पे । विजय दे मौके उप्पर साढ़ी हार होई ऐ । ओ हारे दे जित्ती गे न । द्रोपदी दे पुत्तर कर्ण दे हमले थमां बची गे हे ।

साढ़ी सुस्ती ते लापवाही कन्ने मरोई गे न । बचारे कीड़ें आडू जलोई मरोई गे न । साढ़ा ते उस जहाजें आला हसाब होआ ऐ जेड़ा समुन्दरै दे तफानें बिचा निकली आवै ते कण्डै पुज्जियै बन्दरगाह इच डुब्बी जा ।

द्रोपदी गी बड़ा भारी, नईं जरोने आला गम होआ । ओ युधिष्ठिर हुन्दे कोल आई ते रोन लगी । आखन लगी साढ़े इच कोई नेईं रेआ जेड़ा मेरे पञ्जें पुत्तरें दा बदला चका । इस पापी अश्वत्थामा दा बेड़ा गरक करै । पाण्डव भट गै अश्वत्थामा गी तुप्पन चढ़े । उनें सारे थार तुप्पे ते आखरकार गंगा जी दे कण्डै बेद व्यास हुन्दी कुटिया पिच्छें छुप्पे दा तुप्पी लैता । जिसलै अश्वत्थामा नै कृष्ण जी गी ते पाण्डवें गी औन्दे दिक्खेया उस इक तीला लैता ते उसी मन्त्रेया, ते सर्वनाश करने गित्तै सुट्टेया । आखेया—ए पाण्डवें दा बी गै मारी ओड़ै । ओ तीला सिद्धा उत्तरा दे गर्भ पासै च गया । उत्तरा दे पेट इच अभिमन्यु दा पुत्तर हा । पाण्डवें दा कुल गै नास होई जाना हा पर कृष्ण होर बिच आई गै ते उनें बच्चे गी माऊ दे ढिड्डै इच बचाई लेया । इऐ बच्चा परीक्षित हा जिसी पाण्डव बनवास जाने बेलै अपने थार राजा बनाई गे ।

अश्वत्थामा नै अपने सिरै दी मनी भीम गी देई ओड़ी ते आपूँ हार मन्नी लैत्ती । भीम ओ मनी द्रोपदी कोल लेई गया । ते आखन लगा—हे सुन्दरि ! ए मनी थुआड़े गित्तै ऐ । थुआड़े पुत्तरें गी मारने आले गी दण्ड देई ओड़ेया ऐ । दुर्योधन गी मारी ओड़ेया ऐ । दुशासनै दा लहू पी लैता ऐ । में अत्याचार दा बदला चकाई लैता ऐ । अपना ऋण मकाई ओड़ेया ऐ ।

द्रोपदी ओ मनी युधिष्ठिर हुन्दे कोल लेई गई ते आखन लगी—महाराज ! ए मनी थुआड़े राज मुकटै इच गै सोभा पाने जोग ऐ । तुसै इसी सम्हालो ।

कुन सहारा देऐ ?

जिसलै जुद्ध मुक्का तां हस्तनापुर शोक सागर बनी गया ।
सब इस्त्रियां, ते बच्चे अपने नजीकी रिश्तादारें दी मौती दा सोग
करन लगे । ढाओ पञ्जर पई गया । हजारें विधवा इस्त्रियें गी
लइयै धृतराष्ट्र जुद्ध भूमि इच आया । कुरुक्षेत्र दे मदानै इच पुज्जियै
उसी सारे मोए दे जोधा लोकें दा बचार आया ते ढाई मारियै रोन
लगा । पर हुण रोइयै के बनदा हा ?

सञ्जय धृतराष्ट्र गी आखन लगा—तसल्ली दे शब्दे कन्ने
जिन्दे घरै दे मरोई गे दे न, किश नई बनदा । उन्दा गम दूर नई
हुन्दा । हजारें राजें थुआड़े पुत्तरें गित्तें अपनियां जान्नां दित्तियां
न । हुण तुस सारें दा दाह कर्म संस्कार कराओ ।

बिदुर होर बी आखन लगे—जेड़े जुद्ध इच मरी गे उनें गी
रोनां ठीक नई । जिसलै शरीरै वा अत्मा निकली गई तां कोई
रिश्ता नई रौन्दा । कोई भ्रा, पुत्तर जां रिश्तादार नई रौन्दा ।
हुण थुआड़े पुत्तरें दा बी थुआड़े कन्ने कोई रिश्ता नई । मोए ते

रिश्ता खत्म । आत्मा दे अमर जीवन इच ए शारीरिक रिश्ता ममूली नेई घटना हुन्दी ऐ । ए जिन्दगी कुत्थुआं औन्दी ऐ ते कुत्थे जन्दे उठी ऐ कुसै गी पता नई । उन्दे आस्तै की रोना ? जेड़े जुद्ध इच मरदे न उन्दा ते राजा इन्द्र सुगँ इच स्वागत करदे न । जे किश होई गया ओदे आस्तै दुःख करने कन्ने न धर्म, न सुख ते न लाभ हुन्दा ऐ । इयां मती चाली बिदुर होरें धृतराष्ट्र गी उपदेश दित्ता ।

व्यास होर बी आये ते धृतराष्ट्र गी समझान लगे—तुगी सब किश ज्ञान ऐ । में तुगी के समझां ? सब जन्म लैने आले मरदे न । ए जुद्ध पृथ्वी दा भार हौला करने गित्तै होआ ऐ । भगवान् विष्णु नै मिगी दस्सेया हा । इऐ कारण ऐ जे जुद्ध रुकी नई सकेया ।

हुण युधिष्ठिर गै थुआड़ा पुत्तर ऐ । हुण उससै गी प्यार करो ते बाकी समां गजारो । गम गी परे हटाओ ।

रोन्दी कलान्दी इस्त्रियें बिचा लंघिऐ युधिष्ठिर होर धृतराष्ट्र कोल पुज्जे ते पैर बन्दन लगे—धृतराष्ट्र नै उसी गलै कन्ने लाया पर उस बिच कोई प्यार नई हा ।

फी धृतराष्ट्र होरें गी आखेया जे भीमसैन आया ऐ ।

धृतराष्ट्र आखन लगा—अगो आओ ।

पर कृष्ण जी बड़े जानी जान हे । उनें भीमसैन गी बल्लें गै वक्खी कीता ।

ते इक लोहे दा बुत्त अन्ने राजा दे सामनै कीता । उनें गी पता हा जे धृतराष्ट्र दे मनै इच बेहद् रोह ऐ । धृतराष्ट्र नै उसी गलै कन्ने लाया ते उसी ख्याल आया जे इऐ व्यक्ति ऐ जिस ओदे सारे पुत्तर इक इक करिऐ मारी ओड़े न उनें गी इन्नी चप्प चढ़ी जे उनें उसी घोटैया ते ओ लोहे दा बुत्त कड़ कड़ करी चूटी गया ।

धृतराष्ट्र आखन लगा—मेरा रोह मिगी धोखा दई गया ऐ । भीमसैन मेरे कशा मरोई गया ।

कृष्ण होर अन्ने राजा गी आखन लगे—मिगी पता हा जे ए ल ल होनी ऐ । में ए दुर्घटना नई होन दित्ती । भीमसैन नई

मरोआ। तुसें ओदे थार लोहे दा वुत्त भन्नी मरोड़ेया ऐ जेड़ा में तुन्दे अगे कीता हा। तुस अपना रोह ए वुत्त भन्नियै गै शान्त होआ समभो। भीमसैन जीन्दा ऐ।

धृतराष्ट्र गी किश शान्ति होई। उस भीमसैन गी शीर्वाद दित्ता। पाण्डव उन्दे कोला होइयै गान्धारी कोल गये।

व्यास होर गान्धारी कोल बैठे दे हे। ऋषि होर आखा करदे हे—हे रानी! पाण्डवें कन्ने रोह नईं करो। तूं पहलें गै उनें गी आखेया हा—जतां धर्म होग तुआं गै जित होनी ऐ। थुआड़े आखने मूजब ऊंआं गै होआ ऐ। हुण होई बीती गल्लें उप्पर सोची सोचिये ते रोह पालियै कोई लाभ नईं। हुण तूं धीरज ते सवर गै कर।

गान्धारी आखन लगी—हे भगवान् मिगी पाण्डवें दे जित् तू दा दुःख नईं। ए ठीक ऐ जे पुत्तरें दी मौती करी मेरी बुद्धि इच फर्क आया। ए पाण्डव बी मेरे गै पुत्तर न। मिगी पता ऐ जे शकुनि ते दुशासन नै साढ़े लोकें दी तवाई कराई ऐ। अर्जुन ते भीमसैन निर्दोष न। अभिमान करियै ए जुद्ध होआ। ते मेरे पुत्तरें गी मनासब सजा थोई। मिगी एदे वारे इच कोई शकत नईं। पर इक गल्ल दस्सो। कृष्ण हुन्दी मजूदगी इच दुर्योधन ते भीमसैन लड़े। ए गल्ल पक्क ही जे दुर्योधन भीम कोला तगड़ा हा ते भीम कोला कदें नईं हा हारदा। भीम नै धुन्नी हेठ गुर्ज मारिए दुर्योधन गी मारी ओड़ेया। कृष्ण होर दिखदे गै रे। ए बड़ी गल्ल गल्ल ही। ए गल्ल में माफ नईं करी सकदी।

भीमसैन सुना करदा हा ओ कोल आया ते आखन लगा—मां जी! में अपने बचा गित्तै कीता। ए भायें ठीक होआ जां गल्ल हुण ते जरना गै पौना ऐ। लड़ाई इच दुर्योधन गी जित्तन नईं हुन्दा। में अपने आप गी बचाने आस्तै जे किश कीता एदे इच कोई शक नईं जे ओ गल्ल हा। दुर्योधन नै युधिष्ठिर होरें गी जूआ खड़ाया ते छल कपट करिए धोखा दित्ता। थुआड़े पुत्तर साढ़े उप्पर किन्ने अत्याचार कीते। उस साढ़ा राज खोई लैता ते जबर्दस्ती कब्जा करी लैता। ओ असें गी किश बी देने गी त्यार नईं हा।

तुसें गी पता ऐ दुर्योधनै द्रोपदी कन्ने के अत्याचार कीता हा ? जिसलै उस दर्बारै इच साढ़ी दुर्गति कीती असें उसी उससै बेल्ले मारी ओड़े दा हुन्दा तां कुसै असें गी दोस नईं हा लाना । पर अस युधिष्ठिर हुन्दे बचनै दे बद्धे रे । असें बड़ी मुश्कल जवत कीता हा । ए साढ़ी गैरतू दा बदला हा जेड़ा असें जुद्ध इच चकाया । ते असें गी सन्दोख होआ ऐ । मां जी, हुण तुस असें गी माफ करी ओड़ो ।

गान्धारी आखन लगी—बेटा मेरे सौ पुत्तारें चा तूं सारे मारी ओड़े । इक गै जीन्दा रौन दिन्दा तां में ते बृद्ध धृतराष्ट्र उससै दे स्हारै बाकी जिन्दगी गजारी ओड़दे । युधिष्ठिर कुत्थें ऐ ? उसी सद्दो । ए सुनियै युधिष्ठिर होर कम्बन लगे । ओ हत्थ जोड़िऐ गान्धारी कोल आये गान्धारी दियां अक्खीं रमाला कन्ने बज्जी दियां हियां की जे उस बी प्रण कीता दा हा जे ओदे पति किश नईं दिखदे तां में बी किश नईं दिखना । ए तपस्या ओ उमर भर करदी रई ।

ओ आखन लगे—हे महारानी ! अऊं जालम युधिष्ठिर तुन्दे सामनै आयां । अऊं श्राप देन जोग आं । में बड़ा पाप कीता ऐ । मिगी श्राप देओ । मिगी न जिन्दगी दी लोड़ ऐ, न राजै दी । ऐ आखियै ओ भुजा लेटी गे ते गान्धारी दे पैर छून लगे ।

गान्धारी नै सूंक सुट्टी ते चुप रई । उस अपनी मुण्डी परताई लई । उस सोचेया जे बज्जे दे रमाले बिचा बी युधिष्ठिर उप्पर नजर पई गई तां उस भस्म होई जानां ऐ । फी बी मुं परतान्दे ते रमालै दी इक बित्था चा उन्दी नजर युधिष्ठिरै दे पैरे उप्पर पई । आखदे न पैर जलियै काला स्याह होई गया । अर्जुन गी गान्धारी दी शक्ति दा पता हा ओ कृष्ण हुन्दे पिछे जाई छपेया ।

गान्धारी बड़ी धर्मात्मा ते नेक औरत ही । उस अपने रोहै गी काबू कीता । पाण्डवें गी शीर्वाद दित्ता ते कुन्ती कोल भेजेया ।

गान्धारी द्रोपदी गी जेड़ी सारे पुत्तर मरी जाने करी रोआ करदी ही आखन लगी—धीऐ ! रो नईं । तुगी ते मिगी कुन दलासा दर्ई सकदा ऐ ? ए मेरा गै दोष हा जे सारा बंस नष्ट होई गया ऐ ।

युधिष्ठिर हुन्दी बेदन

पाण्डवें मोए दे जोधा लोकें गी तिलांजलि दित्ती ते गंगा जी दे कण्डै इक म्हीना ठहरे ।

इक दिन नारद मुनि होर युधिष्ठिर हुन्दे कोल टुरी आये । ते पुच्छन लगे—बेटा कृष्ण जी दी सहायता कन्ने ते अर्जुन दी बीरता कन्ने ते अपने धर्म दे बलै कन्ने तू जित्ती गया ते सारी धरती उपपर थुआड़ा इक छत्तर राज ऐ । हुण ते तू खुश एं ?

युधिष्ठिर होरें जबाब दित्ता:—हे महर्षि ! ए ठीक ऐ जे मिगी राज थोई गया ऐ । पर मेरे रिश्तादार सारे मरोई गे न । साढ़े प्यारे पुत्तर मरी गे । ए जीन मिगी बड़ी भारी हार सेई हुन्दी ऐ । नारद जी ! असैं अपने भ्राऊ गी बी शत्रु समझेया ते उसी मारी ओड़ेया । ओ कर्ण जेड़ा अपने बचनै उपपर चट्टान आङ्ग पक्का रौन्दा हा ते जेदी बीरता गी दिक्खियै दुनिया चगत हुन्दी ही । अपने भ्राऊ गी मारने दा महापाप बी जादात प्रापत करने दा गै

नतीजा हा । उस जेड़ा बचन साढ़ी माऊ गी दित्ता हा जे अऊं बाकी पाण्डवें गी नईं मारऊ पूरा नभाया । अऊं बड़ा पापी आं । बड़ा नीच आं जिस अपने आऊ गी मारी ओड़ेया । ओदा ध्यान आन्दे गै मनै गी बड़ा किश हुन्दा ऐ । कर्ण दे पैर साढ़ी माऊ दे पैरें कन्ने बड़े मिलदे हे । दर्बारै इच जिसलै एडा अत्याचार होआ तां मिगी गुस्सा चढ़ेया । पर जिसलै में कर्ण दे पैर दिक्खे जेड़े माता कुन्ती दे पैरें आडू हे मेरा रोह ढली गया । मिगी ओ गल्ल चेतै औन्दी ऐ ते मेरी बेदन बध्दी ऐ । ए आखिये युधिष्ठिर होर सूँक सुट्टन लगे । नारद होरें कर्ण दे बारे इच सब किस सनाया ते श्रापें दी कथा बी सनाई जे उसी कियां श्राप लगे हे ।

इक बारी कर्ण दिक्खेया जे अजुन धनश बिद्या इच ओदे कोला अगें ऐ । ओ द्रोणाचार्य कोल गया ते आखन लगा मिगी ब्रह्म अस्तर चलाना सखाओ । द्रोणाचार्य होरें जबाब देई ओड़ेया । आखन लगे—ए तुगी नईं सखाना, ए कोई निष्कलंक ब्राह्मण जां ओ क्षत्रिय जिसनै तपस्या कन्ने अपना आप शुद्ध करी लैता दा होऐ, सिक्खी सकदा ऐ । फी कर्ण महेन्द्र पर्वतै उप्पर गया । उस परशुराम होरें गी धोखा दित्ता ते आखेया जे अऊं ब्राह्मण आं ते उन्दा शर्गिद बनी गया । उन्दे कशा उस धनुश बिद्या सिक्खी ते होर अस्तर चलाने सिक्खे ।

इक दिन कर्ण परशुराम जो दे आश्रमै कोल अभ्यास करै करदा हा जे ओदे तीरें कन्ने इक ब्राह्मणै दी गौ मरी गई । गल्ल जानियै नईं ही होई पर ब्राह्मणै गी रोह चढ़ेया ते उस कर्ण गी श्राप दित्ता लड़ाई इच थुआड़े रथे दा पहिया धरती इच खुब्बी जाग ते तूँ बी इसै गवै आडू बेकसूर गै मरोई जागा ।

परशुराम होर कर्ण गी बड़ा चान्दे हे । उनें सारी धनुश बिद्या उसी सखाई । उनें उसी ब्रह्म अस्तर चलाना ते परताना बी सखाई ओड़ेया । इक दिन उनें गी पता लग्गी गया जे उन्दा शर्गिद ब्राह्मण नईं । ए गल्ल इयां होई इक दिन गुरु होर कर्णै दी गोदी इच सिर

रखियै सुत्ते दे हे जे इक कीड़ा बड़े जोरै कन्ने ओदे पट्टै गी पुड़ेया । कर्ण पीड़ जरी गया ते हिल्लेया नईं जे गुरु हुन्दी निन्दर नईं खुल्ली जा । गर्म खून पट्टे थमां बगन लगा ते परशुराम हुन्दी जाग खुल्ली गई । जिसलै उनें ए दिक्खेया तां उनें गी बड़ा रोह चढ़ेया ।

तू क्षत्रिय एं । नईं ते बिना हिल्ले इत्नी पीड़ नईं जरी सकदा । सच्चोसच दस । तू ब्राह्मण नईं । तू अपने गुरु गी धोखा दिता ऐ । मूर्ख ! जिसलै थुआड़ा अन्त समां औग तां थुआड़े अस्तर शस्तर कम्म नईं करडन ते जे किश तुं धोखा देइयै सिक्खेया ऐ सब किश भुल्ली जाग ।

कर्ण दान देने इच बड़ा दलेर हा । इक दिन देवराज इन्द्र जेड़ा अर्जुन दा पिता ऐ ब्राह्मण बनियै कर्ण कोल आया ते ओदे सुन्ने दे कुण्डल ते कवच जिन्दे समेत ओ जम्मेया हा मंगिऐ लेई गया । कर्ण नै ओ तुआरिऐ देई दित्ते । अदू दी ओदी ताकत घटी गई । कर्ण दा माऊ गी वचन जे अर्जुन गी छोड़ियै दूए पाण्डवें गी नईं मारड, परशुराम हुन्दा श्राप, जिस ब्राह्मणै दी गौ मारी ओड़ी ही ओदा रोह, सारथि शल्य दा हर समै उसी निन्दना ते हर बेल्लै उसी कमजोर आखना, ते कृष्ण हुन्दियां चालां इनें सारियें गल्लें रलियै कर्ण गी मारी ओड़ेया । तू अफसोस नईं कर जे शड़ा तू गै कर्ण गी मारेया ऐ ।

नारद हुन्दे उपदेश थमां युधिष्ठिर गी तसल्ली नईं होई । कुन्ती आखन लगी—कर्ण दी मृत्यु आस्तै तू की अपनै आप गी दोषी समझनां ए ? ओदे पिता—भगवान सूरज नै आपूं उसी समझाया हा जे दुष्ट दुर्योधनै दा साथ छोड़ी दे ते युधिष्ठिर कन्ने मिली जा । में बी बड़ा जोर लाया पर उस साढी गल्ल नईं सुनी । ओ अपनी मृत्यु दा कारण आपूं बनेया । युधिष्ठिर होर आखन लगे—माता । तू ओदे जन्म दा ए भेत छपैलिये असें गी धोखा दिता । तू इस पापै दा कारण एं । अगें जनानियां कोई भेत छपैली नईं सकडन ।

इयां युधिष्ठिर होरें सारी इस्त्री जाति गी श्राप दित्ता । उनें गी अपने भ्राऊ गी मारने दा बड़ा सल्ल हा । ए सधारण धारणा जे इस्त्रियें गी गल्ल नईं पचदी, ए कहानी इस्सै धारणा गी स्पष्ट करदी ऐ । दुनियां दारी इच भेत गुज्जा रखना लाभकारी हुन्दा ऐ पर इखलाकी दृष्टि कन्ने ए कोई बड़ा गुण नईं । इस्त्रियें गी इस त्रुटी कशा शर्मसार होने दी लोड़ नईं । कुन्ती आली कथा दी बरास्त भायें चलदी बी औन्दी होऐ उनें गी अफसोस करने दी लोड़ नईं ।

इस्त्रियें दा सुभा बड़ा प्रेम भरोचा हुन्दा ऐ ते ओ हमेशां खुल्ले मनै गल्ल करदियां न । किश इस्त्रियां भेत खूब रक्खी सकदियां न ते कई मर्द बी ए भेत नईं रक्खी सकदे । ए ते शिक्षा ते पेशे दी गल्ल हुन्दी ऐ ए आखनां जे इस्त्री जां मर्द इच ए खास गुण हुन्दे न गल्ती ऐ ।

०००

युधिष्ठिर गी दम-दलासा

युधिष्ठिर हुन्दी मानसिक बेदना दिनों दिन बधदी जन्दी ही ।
जिन्नां उनें गी अपने मोए दे रिश्तेदारें दा बचार औन्दा हा ओ मते
दुखी हुन्दे हे ।

उनें गी बड़ा प्राहचित होई गया हा । उनें सन्यास लेने दा
इरादा करी लैता । उनें बनै इच जाइयै तपस्या करिऐ पापे दा
प्राहचित करने दा बचार पक्का करी लैता ।

उनें अपने भ्रायें गी आखेया—मिगी राजा बनने जां दुनिया-
दारी दे मोऐ इच कोई खुशी नई । तुस राज करो ते मिगी बन
जाने दी छुट्टी देओ ।

अर्जुन आखन लगा—पारिवारिक जीवन बड़ा महान हुन्दा
ऐ । सन्यास लैते बगैर गै घरस्त जीवनै इच आदमी बड़ा किश
करी सकदा ऐ । भीम बी घरेलू जिन्दगी दे हक्कै इच बोलेया पर
किश तेज तरार होइयै ।

तुस ते उस मूर्खें आडू गल्लां करदे ओ जिस शास्त्र ते मते पड़े

दे होन पर समझ कुसै दी नईं आई दी होऐ । सन्यास क्षत्रिय दा धर्म नईं ऐ । ओदा फर्ज ऐ जे हर बेल्लै तयार रखै डटियै कम्म करै ते फर्ज नभा । कम्मकाज छोड़ियै बनै इच जाई रौना क्षत्रिय दा कम्म नईं ।

नकुल बी आखन लगा जे युधिष्ठिर हुन्दा सन्यास लैने दा प्रस्ताव ठीक नईं । कर्तव्य नभाना गै उचित गल्ल ऐ । सन्यास धर्म दे रस्तै इच बड़ी कठनाइयां न ।

सहदेव नै बी इऐ आखेया ते प्रार्थना कीती—तुसै साढ़े पिता, माता, गुरु ते भ्रा ओ । असैं गी छोड़ियै नईं जाओ । साढ़े कन्ने गै रवो ।

द्रोपदी बी आखन लगी—असैं दुर्योधनै गी मारेया ओदे साथियें गी मारेया । ए ठीक गै कीता ऐ । अस की पश्ताचै ? राजा दे कर्तव्यें इच उचित दण्ड देना बी ते कर्तव्य ऐ । ए कोई नईं छोड़ी सकदा । राजा दे कर्तव्यें इच ए जरूरी कर्तव्य ऐ । तुसैं दुष्ट कम्म करने आलें गी उचित दण्ड दित्ता ऐ । तुसैं गी अफसोस करने दा कोई कारण नईं । तुन्दा कर्तव्य ऐ जे धर्म दे अनुसार राजै दा प्रबन्ध करो ते धरती उप्पर शासन करो । पच्छोताना बन्द करो ।

व्यास होरें बी युधिष्ठिर गी बड़ा लम्मा उपदेश दित्ता ते समझाया जे उन्दा कर्तव्य के ऐ । होई दियां मसालां दस्सियां ते आखेया जे हस्तनापुर जाओ ते राजकाज सम्हालो ।

हस्तनापुर जाइयै युधिष्ठिर होरें गी राज गद्दी उप्पर बहालेया । राजकाज सम्हालने कशा पहले युधिष्ठिर होर उर्थें गे जित्थें तीरें दी सेजा उप्पर भीष्म पितामह पे दे हे ते मृत्यु गी बल्गा करदे हे । उन्दे कोला शीर्वाद लेया ते धर्म दी शिक्षा लेई ।

भीष्म जी दी युधिष्ठिर गी धर्म शिक्षा महाभारतै दा शान्ति पर्व ऐ ।

जिसलै भीष्म जी दा धर्म उपदेश मुक्का उन्दी आत्मा सुर्ग दुरी गई । युधिष्ठिर होर गंगा जी दे कण्डै गे ते उर्थें जाइयै तर्पण

कीता । जे उन्दी आत्मा गी शान्ति थोए । जिसलै सराध तर्पण करी बैठे तां गंगा जी दे कण्डै खड़ोइयै सोचन लगे । उनेंगी सारियां दुखदाई घटनां चेतै आइयां, ते मनै उपपर इन्ना दवा पेया जे बेहोश होइयै भुजा डिग्गी पे । जियां कुसै शकारी ने हाथी गी मारियै सुट्टी ओड़ेया होए । भीमसैन अपने भ्राऊ कोल गया, चिक्कन दवान लगा ते मिट्टियां २ गल्लां करन लगा । धृतराष्ट्र होर बी आये ते युधिष्ठिर गी आखन लगे—तुसें गी इयां दुखी नई होना चाही दा । अपने भ्रायें ते मित्तरें दी सहायता कन्ने राजकाज सम्हालो । हुण ते तुन्दा फर्ज ऐ जे राजें दे कम्म नभाओ । दुख मनाने गित्तें में ते गांधारी काफी आं । ए साढ़े हिस्सै रौन देओ । तुसें जुद्ध भूमि इच धर्म अनुसार बिजय प्राप्त कीती । उस बिजय कन्ने किश कर्तव्य बी ते ऐन । उनें गी नभाओ । में ते मूर्ख हा जे बिदुर हुन्दिएं गल्लें उपपर नई चलेया । ते बड़ी भारी गलती कीती । में दुर्योधनै दे आखे गी मन्नेया ते अपने आपगी धोखा दित्ता । जियां सुखने इच सुन्ना लब्बै ते नीन्दर खुलदे गै लोप होई जा इयां गै सारी शान खत्म होई गई ।

मेरे सौ दे सौ पुत्तर पता नई कुत्थें गे उठी । पर हुण ते तू गै मेरा पुत्तर ए । तू दुखी नई हो ।

०००

ईर्ष्या

भीष्म पितामह गी तिलाञ्जलि दई चुके तां ब्यास होरें
बृहस्पति हुन्दे जीवन दी इक घटना सनाई ।

सारें कशा स्याने मनुक्ख बी कदें कदें ईर्ष्या दे बस्स होई जन्दे
न । बृहस्पति होर देवतें दे गुरु हे, ते सारे ज्ञान भण्डार दे मालक
हे । ओ सारे वेद पढ़े दे हे ते सारे ज्ञान विज्ञान उनें गी औन्दे हे ।
फी बी इक बारी ओ इस नीच भावना हेठ आई गे ते उनें गी
शर्मिन्दा होना पेया ।

बृहस्पति हुन्दा लौका आ सम्बर्त बड़ा विद्वान ते भला
लोक हा । इस करी बृहस्पति होर ओदे कन्ने ईर्ष्या करदे हे ।
इस दुनियां इच लोक दुःख करन लगदे न इस करी जे दूए चंगे की
न । ओ आपूँ चंगे नई हुन्दे इस करी दूएँ दा चंगा होना उनें गी
नई सखान्दा । ओ इयां गै ईर्ष्यालू होई जन्दे न ।

ए बड़ी बचित्तर गल्ल ऐ लोकें गी दूएँ दे गुण बी बदरिस्त नई
हुन्दे । बृहस्पति होर सम्बर्त गी बड़ा परेशान करन लगे । जिसलै

सम्बर्त कोला नईं ग जरोआ तां वचारा पागल जन होई गया ते दर बदर होन लगा । ते इयां अपने भ्राऊ दे रोहे कोला बचने दा जतन करन लगा ।

इक्ष्वाकु कुलै दे सम्राट मरुत नै बड़ी तपस्या कीती ते शिवें कछा वरदान लेया । हिमालय पर्वतै इच सुन्ने दी कान थोई । इस धनै कन्ने उस बड़ा जगग करने दा बचार कीता । सम्राट मरुत नै बृहस्पति गी प्रार्थना कीती जे जगग कराओ ।

बृहस्पति होर डरन लगे जे ए जगग कराया तां उस देवतें कशा अगों होई जाना ऐ । ते देवते उन्दे चेले होए । उस सम्राट दी प्रार्थना नईं मन्नी । सम्राट नै बड़ी बेनती कीती ।

सम्राट मरुत फी सम्बर्त कोल गया ते प्रार्थना कीती जे जगग कराओ । पहले ते सम्बर्त नै जबाब दई ओढ़ेया । कुण ए पदवी लइऐ मुसीबत स्हेड़ै । पर फी मन्नी गया ।

बृहस्पति होर भ्राऊ कन्ने ईर्ष्या करन लगे ।

सम्बर्त मेरा शत्रु ऐ । ओ मरुत दा जगग कशन लगा ऐ । हुन में के करड ? बृहस्पति होर इयां सोचन लगे ते सोची सोची सेहत खराब करी लई । उन्दा स्वास्थ्य गिरी गया ते रंग पीला पई गया ।

दिनों दिन उन्दी हालत खराब हुन्दी गई । इन्द्र होरें बी दिक्खेया गल्ल के ऐ ? देवराज इन्द्र देवतें दे गुरु हुन्दे कोल पुज्जे ते प्रणाम करिऐ पुच्छन लगे—महाराज ! तुस की बमार ओ ? तुस की लिस्से हुन्दे जा करदे ओ ? तुसें गी नीन्दर ते ठीक औन्दी ऐ ? तुन्दे सेवक कम्म ते ठीक करदे न ? ओ तुन्दी इच्छा मताबक कम्म ते करदे न ? दस्सने उप्पर गै ते नईं पान्दे ? देवते ते तुन्दा मनासब मान करदे न ? उनें कोई मान दस्सने इच ते कमी नईं कीती ?

इन्द्र होर जिसलै इयां काह्ले होए दे पुच्छन लगे तां बृहस्पति होर बोले—देवराज ! अऊं शैल बिस्तरे उप्पर सौन्नां । ते ठीक समें उप्पर सौन्नां । सेवक वी पूरी श्रद्धा कन्ने सेवा करदे न । देवतें पासेया सेवा ते श्रद्धा दी कोई कमी नईं । उन्दे कशा अगो

नईं बोलन होआ । चुप गै होई गे । उन्दी भावना किश मती गै नीन्दी होई गई ही ।

इन्द्र होर बड़े प्यार कन्ने पुच्छन लगे—तुसैं गी के दुःख ऐ ? तुस लिस्से की होई गे ओ ? खून गै नईं रेआ ? तुन्दे मनै गी कष्ट के ऐ ?

बृहस्पति होरें इन्द्र गी सनाया—सम्बर्त इक बड़ा जग्ग करान लगा ऐ । उसै करी मिगी कष्ट होआ करदा ऐ । ते अऊं कमजोर ते लिस्सा होआ करनां । मेरे कशा ए बर्दाश्त नईं हुन्दा ।

इन्द्र बड़े हरान होए । आखन लगें—हे विद्वान ब्राह्मण । इच्छा मातर करने कन्ने हर इक चीज थुआड़ी होई सकदी ऐ । तुस विद्वान ते पढ़े लिखे ओ । देवतें दे तुस गुरु ते उन्दे सलाहकार ओ । सम्बर्त तुसैं गी के हानि पजाई सकदा ऐ ? ओद कारण तुसैं गी कोई घाटा नईं होई सकदा । शड़ी ईर्ष्या करी तुस ए बमारी कैत स्हेड़ी बैठे ओ ?

ए बी खूब मजेदार ऐ जे इन्द्र अपनियां गल्लां भुल्लियै ते दूए गी सदाचार दा उपदेश देन लगा । बृहस्पति होरें उसी चेत्ता नुआया जे थुआड़े शत्रु दी शक्ति बधै तां तुगी खुशी होग ? जे तुस मेरी जगह होवो तां कियां सोचो ? अऊं प्रार्थया करनां जे मिगी सम्बर्त कशा बचाओ । इस सम्बर्त गी जियां होई सकदा ऐ वेज्जित कराओ ।

इन्द्र नै अग्नि गी सदेया ते आखेया—‘जाओ ते जिआं होई सकदा ऐ मरुत दा जग्ग बन्द कराओ ।’

अग्नि देव मन्नी गे ते ए कम्म करन चले । जिस रस्तै अग्नि होर लंघदे गे बूटे ते बेलां सड़दियां गइयां । ते धरती उन्दी गर्जनां थमां कम्बन लगी । ओ अपनी दिब्ब शकला इच मरुत द सामनै खड़ोई गे ।

राजा अग्नि देव गी साख्यात् सामनै दिक्खियै बड़ा प्रसन्न होआ । उस सेवकें गी आखेया अग्नि देव दा पूरा सत्कार करो ।

इन्हें गी आसन देओ । इन्दे चरण पखारो । इन्हें गी नवेद

भेटा करो । सारियां गल्लां होई गइयां ।

अग्नि देव नै दस्सेया जे ओ की आये न । इसम्बर्त गी छोड़ी ओड़ो । जे तुसें गी पुरोहतै दी लोड़ ऐ तां अऊं बृहस्पति होरें गी लई औन्नां ।

सम्बर्त नै सुनेयां तां उस बड़ा रोह चढ़ेया । इक ब्रह्मचारी दे रोहै दा बड़ा असर हा । ओ बड़ी तपस्या करदे हे ते नियमें दा पालन करदे हे । उनें अग्नि देव गी आखेया—ए बकवास बन्द करो । नईं ते में अपने रोहै कन्ने तुगी भस्म करी ओड़ड ।

अग्नि सारी चीजे गी जलान्दी ऐ । पर ब्रह्मचर्य अग्नि गी बी जलाई सकदा ऐ ।

सम्बर्त दा रोह दिक्खियै अग्नि देव पत्तरै आडू कम्बन लगे । झटपट परतोई गे । उनें इन्द्र गी जाइयै सब किश सनाई दित्ता । इन्द्र गी विश्वास नईं होआ ।

“अग्नि देव ! तुस दुनियां दी सारी चीजें गी जलान्दे ओ । तुसें गी कोई कियां जलाई सकदा ऐ ? सम्बर्त दियें लाल अक्खियें कोला तुन्दे डरने दी के गल्ल होई ?”

“हे देव राज ! ए गल्ल नईं । ब्रह्मशक्ति ते ब्रह्मचर्य दी शक्ति दा तुसें गी पता गै । अग्नि देव नै इन्द्र होरें गी दस्सेया जे इन्द्र नै ब्रह्मशक्ति आलें कोला कियां कष्ट भोगेया हा । उन्दे रोहै थमां कियां मसीबत पाई ही ।

इन्द्र देव होरें बहस नईं कीती ते इक गन्धर्व गी सहेया ते आखेया—अग्नि देव ते सफल नईं होए । तू दूत बनिए जा ते मरुत गी आख जे सम्बर्त गी कड़ी लान । मरुत गी आख जे तू इयां नईं करगा तां तुगी मेरा रोह बर्दाश्त करना पौग ते अऊं तुगी नष्ट करी ओड़ड ।

गन्धर्व राजा मरुत कोल गोया ते इन्द्र दा स्नेआ ते चेतावनी दोऐ दई दित्ते ।

राजा नईं मन्नेया । “में इक विश्वास पात्तर ब्राह्मणै गी त्यागने दा पाप नईं करी सकदा । सम्बर्त गी नईं छोड़ी सकदा ।”

गन्धर्व आखन लगा—पर जिसलै इन्द्र नै बज्जर मारेया, तां कियां बचगे ओ ?

जिसलै ओ ए आखै करदा हा उससै बेल्लै बदल गर्जन लगे ते सब समझन लगे जे बज्जर हुण पेया जे हुण पेया ते सब डरै कन्ने कम्बन लगे ।

राजा डरेया ते सम्बर्त गी आखन लगा—मिगी बचाओ ।

सम्बर्त नै आखेया—राजा डर नई । उस अपनी तपस्या दा बल दस्सेया । इन्द्र जेड़ा लइन आया हा उसी सन्धि उप्पर मजबूर करी दित्ता । उसी जगै इच बौने उप्पर ते जगै दा देवता बनने उप्पर मजबूर करी दित्ता । इन्द्र नै जगै दियां औहितयां साख्यात् होइयै लैतियां ते फी सुगँ गी गेया ।

बृहस्पति हुन्दी ईर्ष्या आली गल्ल भलेयां फेल होई गई । ब्रह्मचर्य दी जीत होई । ईर्ष्या बड़ा घातक पाप ऐ । ए बमारी सारी दुनियां इच फैली दी ऐ । अगर बृहस्पति होर जेड़े सरस्वती देवी गी हराई सकदे न ईर्ष्या दा शकार होई जन्दे न तां बचारे इस संसारै दे मनुक्खें दी ते गल्ल गै जान देयो ।

०००

उत्तंक मुनि

जिसलै जुद्ध मुक्का तां कृष्ण होरें पाण्डवें कोला बिदा लैती ते द्वारका गे उठी। रस्तै इच उनेंगी उन्दे ब्राह्मण मित्तर उत्तंक होर मिले। कृष्ण होर रथा परा उत्तरे ते उनें मित्तर गी प्रणाम कीता। उत्तंक होरें बी प्रणाम कीता ते साकें रिश्ते ते मित्तरें दी खैर खरीयत पुच्छत लगे।

“कृष्ण जी !” तुन्दे भ्रा पाण्डव ते कौरव इक दूए गी खूब चान्देन न। ओ खूब फला फुल्ला करदे होने न ?

ए बचारा दुनिया कशा नकेबला रौने आला ब्राह्मण—इसी पता गे नई हा जे एडी बड्डी महाभारतै दी जंग होई गेदी ऐ। कृष्ण होर ब्राह्मण मित्तरें दे प्रश्न करी सुन्न होई गे। किश चिर चुप्प रे समझ नई आवे के जवाब देयां। फी उनें सारी गल्ल सनाई—“पाण्डवें ते कौरवें दी बड़ी भयंकर लड़ाई होई ऐ। में बड़ा जतन कीता ते हर तरीका लड़ाया जे लड़ाई नई होऐ ते सन्धि होई जा। पर उनें

नईं सुनेया । - सारे गै लड़ाई इच मरोई गे न । बिधना दे लेख कुन मेटी सकदा ऐ ? फी उनें सारा हाल सनाया ।

ए सारा वृत्तान्त सुनिये उत्तंक ऋषि बड़े रोहें होए । रोहै कन्ने अक्खीं लाल करिए बोले—

हे कृष्ण जी ! तुस उत्थें खड़ोते रे ते ए सब किछ होई गया ? तुस अपना कर्तव्य नभाने इच फेल होई गे ओ । तुसें जरूर धोखा कीता ऐ ते उन्दा सर्वनास कराई ओड़ेया ऐ । हुण मेरा श्राप लैने गी त्यार होई जाओ ।

कृष्ण होर मुस्कराये ते आखन लगे—“शान्ति । शान्ति ! महाराज शान्ति करो । अपनी तपस्या दा फल रोहै इच आनियै नष्ट नईं करी ओड़ो ।

जे किश में आखना ओ सुनो ते फी जे तुन्दी इच्छा ओए श्राप देई ओड़ेओ । कृष्ण होरें उस क्रोधी ब्राह्मणै गी शान्त कीता ते अपना विश्व रूप दस्सेया ।

में समें समें उपपर भिन्न २ शरीर धारन करनां ।

इस धरती गी बचाने गित्तै ते धर्म गी बचाने गित्तै । मिगी इस शरीरै दी प्रकृति मूजब गै कम्म करनां पौन्दा ऐ । जिसलै अऊं देव रूप इच जम्मना तां देवतें आले कम्म करनां ते जे यक्ष जां राकश दा रूप धारण करनां तां उन्दे कम्म गै करनां । जे अऊं मनुक्ख जन्म लैन्नां जां पशु जन्म लैन्नां तां उस्सै जोनि मतावक कम्म करनां में कौरवें गी बड़ा समभाया पर ओ (कौरव) बड़े मस्ती गे दे हे । उनें गी ताकतै दा नशा होई गेदा हा । उनें मेरी नसीहतै पासै ध्यान गै नईं दित्ता । में उनें गी दबकाने दी कोशश बी कीती । पर तामी कम्म नईं बनेया । में बड़ा रोह कीता । अपना विश्व रूप बी दस्सेया ओदा बी कक्ख असर नईं होआ । ओ अपनी गलती उपपर गै डटे रे । उनें जंग कीती ते नष्ट होई गे । हे ब्राह्मण श्रेष्ठ । तुस की नराज हुन्दे ओ !”

जिसलै कृष्ण होरें समभाया—तां उत्तंक होरें गी शान्ति होई । कृष्ण जी गी बी खुशी होई ।

कृष्ण जी आखन लगे—में तुसें गी वर देना चाह्वां । के मंगदे ओ ?
उत्तंक होर आखन लगे—तुन्दे दशन करी ले । तुन्दा बिश्व
रूप दिक्खी लेया । हुण कोई वर लैने दी इच्छा नई ।

पर कृष्ण होर जोर पान लगे । ओ बचारा रेगिस्तान ते
बियावान इच फिरने आला ब्राह्मण आखन लगा—महाराज ! तुसें
जरूर गै वर देना ऐ तां ए देई ओड़ो जे जिसलै मिगी त्रेह लगै
उसलै मिगी पानी थोई जा । मिगी इऐ वर देओ । कृष्ण जी
मुस्कराये । वस ? इऐ वर सेई ।' ए आखियै ओ अगें ठुरी पे ।

इक दिन उत्तंक होरें गी बड़ी त्रेह लग्गी । रेगिस्तान इच
कुतै पानी नई लब्बा । उनें गी जेड़ा वर थोआ हा चेतै आया ।
जिसलै उनें सोचेया उससै बेल्लै इक निषाद आई गया । उस बड़े गन्दे
टल्ले लाये दे हे । पंज कुत्ते ओदे कन्ने हे ते मूण्डे पर उस चमड़े दी
मश्क चुक्की दी ही । निषाद दन्द खलारन लगा ते आखन लगा
तुस तयहि दे लबदे ओ । ए लौ पानी पी लौ । उस गन्दे प्याले
कन्ने ब्राह्मणै गी पानी पीने गी आखेया । ब्राह्मणै गी निषाद, ओदे
कुत्ते, पानी आली मश्क दिक्खियै बड़ी कैक आई ते आखन
लगा—मिगी पानी दी लोड़ नई । तेरा धन्नवाद ऐ ।

ए आखदे उसी कृष्ण हुन्दा ख्याल आया ते मनै इच उनें गी
गालियां देन लगा । ईऐ वर दित्ता हा ?

बचारे शूदर निषाद नै परती परतिए आखेया—त्रेह शान्त
करी लौ । पर जिन्ना ओ जोर लान्दा गया ब्राह्मण उन्नां गै पानी
पीने थमां इनकार करदा गया । ओ निषाद ते ओदे कुत्ते छपन
होई गे ।

उनें गी इयां छपन हुन्दे दिक्खिये निषाद सोचन लगा—ए
कुण हा ? ए असली निषाद नई होई सकदा । ए मेरी परीक्षा ही ।
में बुरी तरां फेल होआं । बड़ी गल्ती कीती ऐ । मेरी फिलास्फी
नै बी साथ नई दित्ता । में निषाद दा दित्ता पानी नई लेया ।
अपने आप गी मूर्ख सिद्ध कीता ।

उत्तंक गी बड़ा पच्छोता होआ । भट गै कृष्ण जी शंख चक्कर लेइए प्रगट होए ।

हे भगवान् ! तुसैं मेरी कठन परीक्षा लेई । तुसैं मेरी नेई परीक्षा की लेई ? तुसैं इक शूदर कशा इक ब्राह्मण गी गन्दा पानी की पलान लाया हा ? ए कोई किरपा ऐ ? उत्तंक ऋषि नै रोहै कन्ने पुच्छैया ।

कृष्ण होर मुस्कराये ते आखन लगे जिसलै तू मेरे बर गी चेत्त कीता तां थुआड़ी खातर में इन्द्र गी आखेया जे तुगी अमृत पानी रूप इच पला ।

इन्द्र आखन लगा—अऊं मनुक्खै गी अमृत नई प्लान्दा । एदे कन्ने ते ओ अमर होई जाग । होर जे किश आखो करी दिन्नां । में उसी मजबूर कीता ते ओ मन्नी गया जे तुगी अमृत पानी रूप इच पल्या । पर ओ आखन लगा में चण्डाल रूप धारियै अमृत पल्याड । अऊं दिक्खड जे तुगी ज्ञान ऐ जां नई । तू चण्डाल कोला पानी पीन्नां जा नई । में ओदी शर्त मन्नी लैती । में समझेया जे तुसैं ज्ञान प्रापत करी लैता दा ऐ ते बाहरलिं गल्लें थमां उप्पर होई गेदे ओ । पर तुसैं ए के कीता ? मिगी इन्द्र कशा हराई ओड़ेया जे ?”

उत्तंक नै अपनी गलती समझी ते बड़ा भलखोआ ।

०००

आटे दा सेर

कुरुक्षेत्र दे जुद्ध पिच्छों युधिष्ठिर होरें अश्वमेध जग कीता ।
इस जगै उप्पर सारे राजें गी साहे भेजे ते उनें आइयै जगै दी सोभा
बधाई । बड़ी धूमधाम रई । ब्राह्मणें गी, दीन-दलिद्रें गी जेड़े
देसै दे सारें पासेया किट्टे होइयै उत्थे पुज्जे खूब दान दखना थोई ।
शास्तरें दी बिधि मतावक जग सम्पूर्ण होआ ते सारे बाह बाह
करन लगे ।

पता नई कुत्थुआं इक न्योला चान चक्क गै आया सारे
ब्राह्मणें ते अभ्यागतें दम्प्यान जाइयै भुआ बिलन लगा ते फी उस
मनुक्खें आडू इक गड़ाका सुट्टेया । आखो सारें गी फटकार पा
करदा होऐ । ब्राह्मण हरान होऐ, इऐ नेई गल्ल कदें नई होई । ओ
सोचन लगे ए कोई शै ते नई जां कोई भूत पिशाच ते नई जेड़ा
जगै इच बिघ्न पान आई गेया ऐ ।

न्योले दा शरीर इक बक्खी दा सुन्ने दा हा । ए ओपरा जीव
सारै पासै दिखन लगा ते देसै दे सारे हिस्सों दा किट्टे होऐ दे

ब्राह्मणों ते राजे गी आखन लगा—हे पण्डतो ते राजा लोको ! सुनो । तुस सोचदे होगयो जे जग्ग बड़ी शान कन्ने सम्पूर्ण होइ गया ऐ । इक बारी कुरुक्षेत्र इच इक ब्राह्मण सेर भर मक्कें दे आटे दा दान कीता हा । तुन्दी इस जग्गै दी सारी दान दक्खना उस लौके नेए दान कोला बी बड़ी घट्ट ऐ । तुसें गी अपने जग्गै दा बड़ा मान ऐ । एदी शान नईं करो ।

सारी सभा इस बचित्तर ते सुनहरी न्योले दी अक्खड़ बाणी उपपर हरान होई ।

सारे ब्राह्मण उस न्योले गी पुच्छन लगे—तू जग्गै इच कुत्थुआं ते की आयां एं ? ए जग्ग ते बड़े जोग्य ते भले लोकें कीता ऐ । शास्तरें दिथें त्रिधियें मतावक सम्पूर्ण होआ ऐ । जिन्ने बी लोक एदे इच शामल होए सारें दा भाग होआ । सारें गी दान दक्खना थोई ऐ । सारे प्रसन्न ते तृप्त होईऐ इत्थुआं जा करदे न । मन्तरें दे उच्चारण इच कोई त्रुटी नईं होई । औहत्तियां बी ठीक पइयां न । चारै वर्ण प्रसन्न होये न । तू इयां की बोला करना एं ? ए गल्ल ते समभा ।

न्योला हस्सेया ते आखन लगा—हे ब्राह्मणों ! में ठीक गै आखेया ऐ । में महाराज युधिष्ठिर हुन्दी जा तुन्दी बदखोई नईं करा दा । ए जग्ग जेड़ा तुसें एड़ी शान कन्ने कीता ऐ ओ उस गरीब ब्राह्मणे दे दान कोला बड़ा नईं । ओ में आपू दक्खया हा । उस दान दे देने करी ओ ब्राह्मण, ओदी लाड़ी, पुत्तर ते नूंह भट सुगें गी गे उठी हे । ओ कथा सुनो ए गल्ल मेरी अपनी होई बीती दी ऐ ।

तुन्दे जुद्ध कोला बड़ा चिर पहले कुरुक्षेत्र इच इक ब्राह्मण रौन्दा हा । ओ खेतरें चा बचे खुचे दे दाने चुनिये दिन टोरदा हा । ओदी लाड़ी, नूंह ते पुत्तर इसै पर गजारा करदे हे । हर रोज दपहरी पिच्छों ओ किट्टे बौन्दे हे ते भोजन करदे हे । जिस दिन उनें गी किश नईं हा थोन्दा उस दिन उन्दा बर्त होई जन्दा हा । ते दूऐ दिन गी बलगना पौन्दा हा । जिन्ना थोई जन्दा हा उन्ना खाई

लैन्दे हे ते दूए दिनैं आस्तै किश साम्बिए नईं हे रखदे । ओ बड़ी सख्त 'उच्छवृत्ति' दा पालन करदे हे । उनें इऐ बर्त धारे दा हा ।

इयां करदे उनें कई बरे कड़ी ओड़े । इक बारी सोका पेया ते सारे पासै काल पई गया । खेती बाड़ी दा कम्म बन्द होई गया । न कोई राह न कोई बाह ते खेतरें इच नाजै दे दाने कुत्थों थोन । ब्राह्मण ते नुआड़े टब्बरै गी किन्ने गै फाके लग्गी गे । इयां भुक्खे तर्याहे गरमी इच फिरदे फरान्दे उनें गी किश मक्कें दे दाने थोए । उनें दानें गी पीह्ता ते उस आटे दे चार बरोबर हिस्से कीते । परमात्मा दी प्रार्थना करिए खान गै लगे हे जे इक भुक्खा दा ब्राह्मण टुरी आया । चानचक गै अभ्यागत आई गया । उनें उट्टिये उसी प्रणाम कीता ते कन्ने गै भोजन करन ब्हाली लेया । ओ ब्राह्मण ते ओदा सारा टब्बर अतिथि गी दिक्खियै बड़े प्रसन्न होए । कुक्षेत्र दे ब्राह्मणै आखेया—हे सर्वोत्तम ब्राह्मण ! अऊं गरीब आदमी आं । ए मक्कें दा आटा असें बड़ी मेहनत करियै ते धर्म अनुसार बनाये दा ऐ । तुस इसदा भोग लाओ । परमात्मा तुन्दा भला करै । ए आखियै उस अपने हिस्से दा आटा अतिथि गी दई ओड़ेया । अतिथि हावड़े दा पेया ते खाई गया पर ओदी भुक्ख नईं चुक्की ।

ब्राह्मणै दिक्खेया जे ओ ब्राह्मण हजे भुक्खा ऐ ते तृप्ति नईं होई । उसी थौह नईं आवै जे के करां । इन्ने चिरं इच ओदी लाड़ी आखन लगी—हे स्वामी ! मेरा हिस्सा बी उस ब्राह्मणै गी दई ओड़ो । जे उसी तृप्ति होई जा तां बड़ी चंगी गल्ल ऐ । ए आखियै उस अपना हिस्सा ब्राह्मणै गी दई ओड़ेया ।

ब्राह्मण अपनी लाड़ी गी आखन लगा—हे पतिव्रता पत्ति ! जंगली जानवर ते पशु पक्खरू बी अपनी पत्तिएं दा पालन पोषण करदे न । मनुक्ख उन्दे कोला बी गया गुजरा होई गया ? मिगी थुआड़ी गल्ल मनजूर नईं । में इस लोकें इच जां परलोकें गितै के कमाया जे में अपनी पत्नी गी जेड़ी धिरस्ती इच ते जगै जपै इच मेरा साथ दिन्दी ऐ उसी भुक्खे मारी ओड़ेया ऐ । तू ते शड़ी हड्डियें दा ढांचा

रई गई एं। सुक्कियै तीला होई गई एं। तुगी भुक्खे मारियै मेरा केड़ा पुन्न कोज सफल होना ऐ ? मेरा कुस लोक भला होना ऐ ? में थुआड़ा हिस्सा नई दई सकदा ।

ओदी इस्त्री आखन लगी—हे महाराज ! तुस ते सारे शास्तर पढ़े दे ओ । ए गल्ल ठीक नई जे धर्म, अर्थ ते दुनियांदारी दे सारे कम्मे इच मेरा तुन्दा सांभा हिस्सा ऐ ? मेरा तुन्दा धर्म दा नाता ऐ । मेरे उप्पर किरपा करो । मेरा हिस्सा लइ लौ ते अतिथि दी लोड़ पूरी करो । तुस बी ऊंआं गै भुक्खे ओ जियां में । तुस अपने ते मेरे दम्पति फर्क की करदे ओ । अऊं बेनती करनी आं मेरी प्रार्थना नई सुट्टी पाओ ।

ब्राह्मणै गल्ल मन्नी लई । ते लाड़ी दा हिस्सा लइयै उस ब्राह्मणै गी दई ओढ़ेया । उस ब्राह्मणै झट लेया ते खाई ओढ़ेया । पर ओदी भुक्ख फी बी नई मुक्की ।

कुरुक्षेत्र दा ब्राह्मण बड़ा परेशान होआ । ओदे पुत्तरै ए गल्ल दिक्खी तां अगें होआ ते आखन लगा—बापू जी, ए मेरा हिस्सा लौ ते ब्राह्मणै गी दई ओढ़ो । बचारा हजे भी भुक्खा सेई हुन्दा ऐ । मिगी बी अपना कर्तव्य नभाइयै बड़ी खुशी होग ।

बचारा बब्ब बड़ा परेशान होआ । ओ आखन लगा—बेटा बुड़े भुक्ख जरी लैन्दे न । नौजवानें दी भुक्ख डाडी हुन्दी ऐ । मिगी थुआड़ी गल्ल मनै गी नई लगदी ।

पुत्तर जोर लान लगा—पुत्तरें दा फर्ज हुन्दा ऐ जे वढ़ेपे इच अपने बब्बै दी सेवा करन । पुत्तर बब्बै कशा बक्ख थोड़ा हुन्दा ऐ ? सारे आखदे न जे पिता गै पुत्तरै दे रूपे इच पुनर्जन्म हुन्दा ऐ । दरअसल मेरे हिस्से दा आटा तुन्दा गै । मेरी प्रार्थना मन्नो ते मेरा हिस्सा बी ब्राह्मणै गी देओ । ओदी भुक्ख शान्त करो ।

ब्राह्मण आखन लगा—थुआड़ी महानता ते इन्द्रियें दा संजम बड़े फखरै दी गल्ल ऐ । थुआड़ा भला होऐ । अउं थुआड़ा हिस्सा लई लैन्नां । ए आखियै उस पुत्तरै दा हिस्सा लेया ते अपने अतिथि

गी दई ओड़ेया । अतिथि नै त्रीया हिस्सा बी खाई ओड़ेया पर फी बी भुक्खा रेआ ।

बचारा 'उन्छ वृत्ति' आला ब्राह्मण बड़ा घबराया ।

ओदी परेशानी दिखियै ओदी नूंह आखन लगी—मेरा हिस्सा बी लई लौ ते अतिथि गी तृप्त करो । मेरी गल्ल मन्नो ते मेरा कल्याण करो ।

सौहरा बड़ा दुखी होआ ते । आखन लगा—हे नेक धीए, तू अग्गे गै भुक्खा कन्ने पीली ते लिस्सी फड होई गेदी एं । तू मिगी आखा करनी एं जे में थुआड़ा हिस्सा बी लइ लें ते अतिथि गी दइय पुन्न कमां । जे में थुआड़ा हिस्सा लइ लें तां थुआड़े उपपर बड़ा जुल्म करड । अऊं तुगी भुक्खा कियां दिखी सकनां ? तुगी भुक्खे मरदे कियां दिक्खी सकनां ?

ओ नई मन्नी ।

नूंह आखन लगी—पिता जी, तुस मेरे स्वामी दे पिता ओ । मेरे गुरु दे गुरु ओ । मेरे देवता दे देवता ओ । तुस मेरे हिस्से आला अन्न बी लई लौ । मेरा शरीर ऐ गै किस गित्तै । स्वामी दी सेवा गित्तै गै । मिगी बी नेक कम्म करने इच मदत देओ । में बेनती करनी आं । मेरे हिस्से दा आटा जरूर लई लौ ।

जिसलै नूंहै इयां जोर पाया—तां ब्राह्मण नै ओदे हिस्से दा आटा बी लई लेता ते उसी शीर्वाद दित्ता । परमात्मा तुगी नेकी देऐ ।

अतिथि नै चौथा हिस्सा बी लेया ते हावड़िये खाई ओड़ेया । हुण उसी सन्दोख होआ । “थुआड़ा अतिथि सत्कार धन्न ऐ । तू बड़ी पवित्तर भावना कन्ने ते अपनी पूरी भावना कन्ने सत्कार कीता ऐ । थुआड़े दान कन्ने अऊं बड़ा प्रसन्न होआं । ओ दिक्खो । थुआड़े इस ओपरे बलिदान उपपर देवते फुल्ले दी बरखा करा करदे न । ओ दिक्खो देवते ते गन्धर्व अपने चिट्ठे रथे उपपर चढ़िये ते अपने सेवकें कन्ने तुसें गी ते थुआड़े टब्बरै गी लैने गित्तै आवा करदे न । ओ तुसें गी उबड़े लोकै इच लई जाडन ।

थुआड़े दान कन्ने तुगी सुर्ग थोआ ऐ । थुआड़े पुरखे बी सुर्ग जाडन उठी । भुक्ख मनुक्खें दी अकल मारी ओड़दी ऐ । ओ उनेंगी धर्म दे रस्ते थमां डगाई ओड़दी ऐ । ओ उनें गी पाप करने गी सुआकदी दी । बड़े बड़े धर्मात्मा बी जिसलै भुक्ख सतान्दी ऐ तां अपना धीरज छोड़ी ओड़दे न । पर तू भुक्खे रईऐ बी अपनी पत्नी ते पुतरै दा मोह बी परें रक्खेया ते धर्म गी मानता दिक्ती । इस अतिथि सत्कार अग्रे बड़े बड़े राजसू जग्ग ते अश्वमेध जग्ग फिक्के पई जाडन । ओ दिक्खी रथ तुन्दे गित्तै बल्गा करदा ऐ । चढ़ो ते टब्बरै समेत जाओ । ए आखेया ते ओ अतिथि छपन होई गया ।

कुरुक्षेत्र दे ब्राह्मण दी जेड़ा दाने चुनियै गजारा करदा हा ए कथ सनाइयै न्योला आखन लगा—अऊं कोल गै हा । मिगी ब्राह्मणे दे आटे दी सगन्धी आई । मेरा सिर सुन्नै दा होई गया फी अऊं उस थार गया जित्थें ओ आटा खिल्लरे दा हा । अऊं उत्थे बिलेया । मेरी इक बक्खी सुन्ने दी होई गई । अऊं दूई बक्खी पासै बिलन नगा पर आटा गै नई हा रेदा । ए पासा इयां गै रेआ । मेरी बड़ी मरजी ऐ जे अऊं सारा गै सुन्ने दा होई जां । अऊं जित्थे लोक जग्ग करदे न, तपस्या करदे न, उत्थे जन्नां । मिगी पता लग्गा जे संसारै इच प्रसिद्ध ते मन्ने प्रमन्ने दे युधिष्ठिर महाराज जग्ग करा करदे न । में सोचेया ऐ जग्ग बड़ा बड्डा होग । ते मेरा बाकी हिस्सा बी सुन्ने दा होई जाग । पर ए गल्ल नई बनी । इस करी में आखेया—जे तुन्दा अश्वमेध जग्ग उस ब्राह्मणे दे आटे दे दाने थमां बड्डा नई होआ । बरोवरी बी नई करी सकेया ।

ए आखियै न्योला दुरदा होआ ।

युधिष्ठिर हुन्दा राज

मनुक्ख अपने मनै दी इच्छेया पूरी करने गितौ पागल होइयै कम्म करदा ऐ। जिसल ओ प्राप्त होई जन्दी ऐ तां फी नमियां हीखियां बज्जालदा ऐ ते उनें गी पूरा करने गितै नमें दुख स्हेड़दा ऐ। उसी शान्ति नई थोन्दी।

शत्रुएं कन्ने लड़ना ते उनें गी मारना क्षत्रियें दा धर्म ऐ पर अपने भायें, रिश्तेदारें ते नाते साकें गी कत्ल करियै ते दुख देइयै उस ताकत ते पदवी कोला सुख थोड़ा प्राप्त हुन्दा ऐ ?

इऐ गल्ल अर्जुन जुद्ध गुरु होने थमां पहलें कृष्ण जी गी आखी ही। पर कृष्ण होर कर्म सिद्धान्त ते मनुक्खे दे कर्तव्यें दा उपदेश दिन्दे रे। पर अर्जुन दे प्रश्न बी बजनदार बड़े हे। उन्दे इच बी बड़ी सचाई ही। भायें उपपरा इत्नी नई ही लबदी।

पाण्डवें कौरवें गी हराया ते इक छत्तर राज करन लगे। ओ धर्म अनुसार राज काज चलान लगे। पर उनें मसूस कीता जे जित्तियै बी उनें गी ओ खुशी नई होई जेदी उनें गी मेद ही।

महाराज जनमेजय नै बैशम्पायन होरें गी जेड़े उसी महाभारत दी कथा सना करदे हे पुच्छेया—पाण्डवें राज प्रापत करने बाद धृतराष्ट्र हुन्दे कन्ने कनेआ बर्ता कीता ? बैशम्पायन होर सनान लगे - धृतराष्ट्र होर शोक सागरें इच डुब्बी गेदे हे । पाण्डव उन्दी मानता करदे हे । ओ उनें गी प्रसन्न रखने दी कोशश करदे हे । ओ कोई नेई गल्ल नईं हे करदे जिस कशा उनेंगी सङ्कोच होऐ । युधिष्ठिर होर कोई आज्ञा उनें गी पुच्छे बिना नईं हे कडदे । गान्धारी दे सौ पुत्तर इयां छपन होई गेदे हे जियां सुखने दा सुत्ता । कुन्ती देवी गान्धारी दी भैतू आङ् सेवा करदी ही ते द्रोपदी उनें दौनें दी सेवा करदी ही । युधिष्ठिर होरें धृतराष्ट्र दा मैहल खूब सजाई दित्ता हा । खूब आसन, बिस्तरे ते साज सजावट दा सम्यान किट्टा कीता दा हा ।

उन्दी हर इक जरूरत पूरी करदे हे । ओ राजमहला चा सुन्दर भोजन बनवाइयै उन्दे गित्तै भेजदे हे । कृपाचार्य होर धृतराष्ट्र हुन्दे कन्ने गै रौन्दे हे । ब्यास होर पिछले समें दियां, शिक्षा देने आलियां कहानियां सनान्दे रौन्दे हे जे उन्दा दुख हल्का होऐ । राजकाज दे मामलें इच युधिष्ठिर होर सदा धृतराष्ट्र हुन्दी सलाह लैन्दे हे ते इयां बर्ता करदे हे आखो राज धृतराष्ट्र होर करदे न ते युधिष्ठिर उन्दा प्रतिनिधि ऐ । बैसे बी धृतराष्ट्र होर गै कुलै इच सारें कशा बड्डे हे । उन्दी गै सारे मन्नदे हे । युधिष्ठिर होर बड़े सावधान होइयै शब्द कड्डे हे जे कुसै गल्लै थमां बचारे बृद्ध ते दुखी धृतराष्ट्र होरें गी कोई कष्ट नईं पुज्जै । दुनियां दे बाकी हिस्सैं थमां जेड़े राजे हस्तनापुर औन्दे हे ओ धृतराष्ट्र उन्दी ऊंआं गै मानता करदे हे आखो जे हुन बी ऊऐ सम्राट न । नौकरानियां बी गान्धारी गी कदें मसूस नईं हियां होन दिन्दिया जे उन्दी पदवी घटी गई ऐ ।

युधिष्ठिर होरें अपने भ्रायें गी सख्त आज्ञा दित्ती दी ही जे कोई नेई गल्ल नईं करनी जिस कन्ने धृतराष्ट्र होरें गी क्लेश होऐ । उन्दे बचारें दे सौ दे सौ पुत्तर गै मरी गे दे हे । भीमसैन दे सिवा बाकी सारे भ्रा इसदा पालन करदे हे । धृतराष्ट्र बी पाण्डवें कन्ने प्यार

करदा हा । ओ बी उन्दा बुरा नईं चेतदा की जे ओ उसी कोई क्लेश नईं हे होन दिन्दे ।

पाण्डवें अपने ताये दे प्रति बड़ा गै चंगा बर्ता रखेया । कदें भीमसैन कोई चुभदी गल्ल करी ओड़दा हा । ओ कदें कदें बृद्ध धृतराष्ट्र हुन्दा आखा टाली ओड़दा हा । कदें कदें ओ इयां गल्ल करदा जे धृतराष्ट्र गी सनोची जा—साढ़े कौरव भ्रा बड़े कुबुद्धि हे । बचारे अपना नास कराई लेया । भीमसैन, दुर्योधन, कर्ण जां दुशासन गी कदें नईं हा भुलदा ते न गै माफ करदा हा । गान्धारी भीमसैन दे शब्द जेड़े धृतराष्ट्र होरें गी कष्ट पजान्दे हे, सुनियै दुखी हुन्दी ही । पर ओ बड़ी सती ते महान देवी इस्त्री ही । जिसलै ओ भीमसैन दे पीड़ पजाने आले शब्द सुनदी तां ओ कुन्ती पासं दिखदी । उसी किश सन्दोख हुन्दा । कुन्ती धर्म दी मूरत ही ते दूए उसी दिक्खियै बड़ा धीरज करदे हे । इयां पन्द्रां बरे बीती गे ।

०००

धृतराष्ट्र

पन्द्रां बरे बीती गे । धृतराष्ट्र होर युधिष्ठिर दे राजै इच रौन्दे हे । आखर उनें गी दुख जरना कठन होई गया । भीमसेन दे तान्ने मीने सुनियै उनें गी युधिष्ठिर दियां मिट्टियां गल्लां, ते खातरां चंगियां नईं हियां बभोन्दियां । पाण्डवे गी दस्से बगैर ओ बर्त रक्खन लगे ते तपस्या करन लगे । गान्धारी नै बड़ी बर्त रक्खे ते अपने आपै गी सकाई ओढ़ेया । इक दिन धृतराष्ट्र नै युधिष्ठिर गी सहेया ते उसी आखेया—बेटा, तेरा कल्याण होऐ । में थुआड़े कोल रहियै पन्द्रां बरे गजारी ओढ़े न । तूं मेरा बड़े मानै ते प्रेम कन्ने सत्कार कीता ऐ । में पितरें गी स्नाध तर्पण करिए बड़ा प्रसन्न कीता ऐ । ते अपनियां सारियां हीखियां पूरियां करी लैतियां न । गान्धारी बड़ी दुखी ऐ पर उस मेरी शारीरिक जरूरतें दा बड़ा ख्याल रखेया ऐ । मेरे जालम पुत्तरें जिनें द्रौपदी दे सारे पुत्तर मारियै घोर अपराध कीता ऐ ते कोई बालीबारस नईं रौन दित्ता, अपने पापें करी गै मरी भुरी गे । पर ओ बहादरें आडू लड़े ते जुद्ध क्षेत्र

इच मोए । ओ ते वीर पुरुषें आस्तै जेड़ा सुगं हुन्दा ऐ उत्थें गे न । हुण समां आई गेया ऐ जे में गान्धारी गी कन्ने लेइयै परलोक साद्धने दा किश जतन करां । तुसैं गी पता ऐ शास्तर के आखदे न । मिगी बनै इच जाना उठी चाही दा ऐ । ए पशाकां तुआरिऐ हुण बूटें दी शाल ते फट्टे पराने टल्ले लाने लोड़चदे न । बानप्रस्थ आश्रम अपनाना चाही दा ऐ । मेरी मरजी ऐ में बनै इच उठी जां ते थुआड़े कल्याण गित्तो प्रार्थना करदा रवां । मिगी जाने दी जाजत देओ । असैं गी अपने बजुगें आडू गै दुरना चाही दा ऐ । तूं सम्राट एं । मेरी तपस्या दा लाभ तुगी बी होग ।

युधिष्ठिर होरें गी बड़ा धक्का लग्गा जिसलै उनें धृतराष्ट्र गी दिक्खेया ते इयां ग्लान्दे सुनेया । युधिष्ठिर होर आखन लगे—मिगी नईं पता लग्गा जे तुस बर्त करदे रे ते भुजा सौन्दे रे । इयां अपने आप गी कष्ट दिन्दे रे । मेरे भ्रायें बी इस गल्ला दा पता नईं लैता । में धोखे इच रेआ जे तुन्दी दिक्ख भाल ठीक होआ करदी ऐ । तुसैं गी ते नेआ गम ऐ जेदा कोई इलाज नईं । मिगी राजै जां खुशियां मनाने इच कोई दिलचस्पी नईं रेई । अऊं पापी आं । इच्छा ते लालचै नै मिगी इत्थें पजाया ऐ । तुन्दे पुत्तर युयुत्सु गी राजा बनाई ओड़ने आं । जां जिसी तुस आखो उसी राजा बनाई ओड़ने आं । जे तुस मन्नो तां तुस गै राजकाज सम्हालो ते लोकें दी रक्षा करो । में बनै गी जन्नां । मिगी ए गल्लिएं दा ध्या समापत करन देओ । मिगी हुण होर शमिन्दा नईं करो । अऊं शमें कन्ने मरा करनां । अऊं राजा नईं तुस्सैं राजा ओ । तुस मिगी जाने आस्तै पुछ्छदे ओ । अऊं तुसैं गी कियां जाजत देई सकनां जां ठाकी सकनां । दुर्योधनै प्रति मेरा रोह परानी चीज होई गेदी ऐ । मिगी कोई रोह नईं । रोहै दा तां निशान गै नईं । ए भागें दी गल्ल ही । अस दुविधा इच पेई गे । ए गल्लां होई बीतियां । साढ़ा इन्दे उप्पर कोई बस्स नईं हा । अस तुन्दे बच्चे आं । जियां दुर्योधन ते ओदे भ्रा हे । गान्धारी ते कुन्ती मेरियां मावां न । दमैं मिगी पुत्तर समझिये प्यार करदियां न, जे तुस बनै गी जागेओ तां

अम्मी तुन्दे कन्ने जाड । ते तुन्दी सेवा करड । जे तुस मिगी छोड़ियै बनै इच उठी जागेओ । तां मिगी राज करने दा के सुख होना ऐ ? अऊं तुन्दे अग्गे साष्टांग प्रणाम करनां ते माफी मंगना जे मेरियां गलतियां ते अपराध माफ करो । तुन्दी सेवा करियै मिगी सच्चा सुख थोग । ते मानसिक शान्ति प्राप्त होग । मिगी सेवा करने दा मौका देओ । ते इज्जत बक्शो । मिगी इयां नईं छोड़ी जाओ ।

धृतराष्ट्र गी बड़ा क्यास आया । पर आखन लगा—हे युधिष्ठिर ! में बनैगी जाने ते तपस्या करने दा पक्का निश्चा करी लेया ऐ । हुन मिगी होर कुतै शान्ति नईं थोन लगी । में थुआड़े कछ किन्ने बरे रेआं । तुसें बड़ी श्रद्धा कन्ने मेरी सेवा कीती ऐ । तुस मिगी अपनी इच्छा पूरी करन देओ ते जान देओ ।

उनें युधिष्ठिर गी इयां आखेया । युधिष्ठिर होर हत्थ जौले करिए खड़ोते दे हे ते मानसिक स्थिति करी कम्बा करदे हे । धृतराष्ट्र होर कृपाचार्य ते बिदुर होरें गी आखन लगे—अऊं तुसें गी प्रार्थना करनां जे महाराज युधिष्ठिर गी मेरे पासेया आखो । में बनै गी जरूर जानां ऐ । मेरे कशा होर नईं बोलन हुन्दा । मेरा संघा मुक्की गया ऐ । खबरै, ए उमरी करिये ए गल्ल ऐ ? में बड़ियां गल्लां कीतियां न । अऊं हुट्टी गेयां । ए आखियै ओ गान्धारी पासै भुके ते उने गी गशा आई गई ।

युधिष्ठिर होरें धृतराष्ट्र हुन्दी ए दशा नईं दिक्खन होई । ए ऊऐ धृतराष्ट्र हे जिन्दा डीलडौल हाथी आडू हा ते जिन्दा बल इन्ना हा जे भीम दी लोहे दी मूरत जपफी पाइये त्रोड़ी ओड़ी ही । हुण किन्ने खीन होई गे न । किन्ने लिस्से होई गे न । हड्डियां निकली आइयां न । बचारें किन्ने पराधीन होइयै गान्धारी दा सहारा लेता ऐ ।

युधिष्ठिर होर अपने आपै गी कोसन लगे—ए सब किश मेरे करियै होआ ऐ । अऊं बड़ा नकम्मा आं । मिगी कक्ख धर्म नईं ओन्दा । मिगी किश बुद्धि नईं । मेरी विद्वत्ता दा कोई लाभ

नईं । उस धृतराष्ट्र हुन्दे मुंहै उप्पर पानी त्रौंकेया ते बल्लें २ हत्थें कन्ने मालश करन लगा । जिसलै धृतराष्ट्र गी होश आई । उस युधिष्ठिरै गी जप्पफी पाइये गलै कन्ने लाया । आखन लगा—वेटा, तेरा स्पर्श किन्ना प्यारा ऐ । अऊं बड़ा खुश आं ।

उसलै ब्यास होर आई गे । उनें गी सारी गल्लै दा पता लगा ते ओ युधिष्ठिर गी आखन लगे—जियां कुरुवंश दे बड़ें-बड़े धृतराष्ट्र आखदे न ऊंआं गै करो । उनें गी बन जान देओ । ओ वृद्ध होई गेदे न । उन्दे सारे पुत्तर पहलें टुरी गेदे न । उन्दे कोला ए गम होर नईं बर्दाश्त होई सकदा । गान्धारी बड़ी समझदार ऐ । उस ए दुःख बड़ी हिम्मत ते धीरजै कन्ने जरेया ऐ । उन्दी इच्छया इच भान्नी नईं पाओ । इनें गी इत्थें चुड़ी चुड़िऐ नईं मरन देओ । इनें गी बनें इच खुल्ली बाऊ इच फिरन देओ ते फुल्लें दी सुगन्धी लैन देओ । दुनियां दे भंजटै चा निकलन देओ । राजें दा धर्म इऐ जे जुद्ध क्षेत्रै इच मरन जां बनें इच रमानै कन्ने रौन । धृतराष्ट्र होरें राज भोगी लेया, जगग करी ले । जिन्ना चिर तेरां बरे तुस बनवासै इच रे इन्ना चिर अपने पुतरें दी सहायता कन्ने खूब राज भोगेया ते खूब दान पुत्र कीते । तुसें इन्नी सेवा कीती जे हुण कोई इच्छा गै नईं रेई दी । हुण उन्दी तपस्या दा समां ऐ ।

तुस उनें गी अपनी मरजी कन्ने जाजत देओ मनै इच कोई रोह नईं रवै ।

युधिष्ठिर होर आखन लगे—जियां तुस आखदे ओ ऊंआं गै सेई ।

ब्यास होर अपनी कुटिया गी परतोई गे ।

०००

त्रौन्नं बुड्डं दा सुर्गवास

आखरकार जिसलै युधिष्ठिर होरें धृतराष्ट्र जी गी बन जाने दी जाजत देई ओड़ी उसलै धृतराष्ट्र ते गान्धारी अपने मैह्ला इच गे ते बर्त पुआरेया । कुन्ती बी गान्धारी कन्ने बैठी ते उस बी किट्टे रुट्टी खादी । धृतराष्ट्र होरें युधिष्ठिर जी गी कोल ब्हालेया ते खीरी शीर्वादित्ता । फी गान्धारी दे मूण्डे उप्पर हत्थ रक्खियै शहरै चा बाहर बनै गी टुरो गे । अपने पति दे अन्ने होने करी गान्धारी नै बी अक्खीं दा प्रयोग बन्द करी ओड़े दा हा । ओ हर बेल्लै अपनी अक्खीं उप्पर रमाल बन्नी रखदी ही । ओ कुन्ती दे मूण्डे पर हत्थ रक्खियै चला दी ही ।

कुन्ती नै बी गान्धारी कन्ने बन जाने दा निश्चा कीता दा हा । जिसलै ओ चलन लगी तां युधिष्ठिर जी आखन लगी—“सहदेव कन्ने कदें रोहें होईऐ नईं बोलेयां । कर्ण गी हमेशा चेतौ रखेयां । ओ बड़ी बीरता कन्ने जुद्ध भूमि इच मोआ हा । ओ मेरा पुत्तर हा । पर में पाप कीता जे तुगी ए भेत नईं दस्सेया । द्रोपदी दी रक्षा करो बड़ी नम्मरता ते प्यार कन्ने । भीम, अर्जुन नकुल ते सहदेव दा दिल कदें नईं दखाना । हमेशां ख्याल रखो जे टब्बरै दा भार हुण सारा तेरे उप्पर ऐ ।

युधिष्ठिर होर समझा करदे हे जे कुन्ती गान्धारी गी किश दूर छोड़न आई ऐ। जिसलै उनें ए किश सुनेया तां उनें गी बड़ा धक्का लगा। ते किश चिर ओदे कशा बोलन गै नईं होआ। जिसलै किश सम्भलेया तां आखन लगा मां—इयां नईं। तूं असें गी जुद्धै इच जाने दा शीर्वाद दित्ता। हुण असें गी इयां छोड़ियें की जान लगी ए? युधिष्ठिर हुन्दी कोई गल्ल नईं मनोई। कुन्ती अपनी गल्लै उप्पर डटी रेई। में हुण अपने स्वामी ते पति कन्ने जाई मिलना ऐ भायें ओ कुतै होइन। अऊं गान्धारी कन्ने चली आं। अऊं तपस्या करड ते बनै दा जीवन गजारड ते थुआड़े पिता कन्ने जाई मिलड। तूं क्षुब्ध नईं हो। बापस जा उठी। शहरै गी जाओ परमात्मा करै थुआड़ा मन पक्का रखै ते धर्म उप्पर दृढ़ रखै। कुन्ती नै इयां अपने योग्य पुतरै गी शीर्वाद दित्ता ते उठी गई।

युधिष्ठिर बचारा चुपचाप खड़ोता रेआ। कुन्ती अपनी रस्तै चलदी गई। कदें कदें परतिए अपने पुतरें गी दिक्खी लैन्दी ही। इक दूए दे मूण्डे उप्पर हत्थ रखे दे त्रैवै जने जाकरदे हे। अपने पुतरें गी पिच्छें छोड़िए। एदा वर्णन व्यास जी ने इयां कीता दा ऐ जे इसी पढ़िए इयें सेई हुन्दा ऐ जे ए घटना साढ़े घर गं होई ऐ।

धृतराष्ट्र, गान्धारी ते कुन्ती नै त्रै बरे बनै इच गजारे। सञ्जय बी उन्दे कन्ने हा। इक दिन धृतराष्ट्र होर जिसलै तर्पण करियै अपनी कुटिया गी परतोए तां बनै गी अग्न लगी गेदी ही। बा चलन लगी ते अग्न फैलन लगी। हरण ते जंगली सूर नस्सन लगे। तां तुआं नस्सन ते मानुएं पासै द्रौड़न। धृतराष्ट्र सञ्जय गी आखन लगे इस अग्नी नै असें गी लपेटी लैना ऐ। तूं अपना आप बचाई लै। ए आखिये धृतराष्ट्र, गान्धारी ते कुन्ती चढ़दे पासै मुंह करिए ते योग समाधी लाइए रमानै कन्ने बेई गे ते अग्नी इच भस्म होई गे। सञ्जय जेड़ा धृतराष्ट्र कन्ने २ रेआ, जेड़ा धृतराष्ट्र दी लो हा ते उसी जिन्दू थमां प्यारा हा, हिमालय इच टुरी गया ते आखरी दिन सन्यासी बनियै गजारी ओड़े।

कृष्ण होर वी बैकुण्ठ धाम गे

महाभारत दे जुद्ध परैन्त कृष्ण होर छती बरे द्वारका इच राज करदे रे । वृष्णी, भोज, ते यादवें दियां दूआं शाखां जिन्दा कृष्ण जी दे कुलै कन्ने सर्वन्ध हा ए सारे ऐशपरस्ती इच पेई गे । उन्दे इच कोई अनुशासन नई रेआ । कोई लज्जा नई रेई ।

इक बारी किश ऋषि द्वारका आये । घमण्डी ते मूर्ख यादवें उन्दे कन्ने मखौल कीता । उनें इक जागतै गी कुड़ी बनाया ते इक ऋषि कोल लेई गे ते पुच्छन लगे—महात्मा जी ! “इस इस्त्री दे जागत होग जां कुड़ी ?”

ऋषि होर इस अपमान करने आलै मखौलै करी बड़े नराज होए ते आखन लगे—ए व्यक्ति न कोई जागत जम्मग ते न कुड़ी । ए इक नेआ गुर्ज जम्मग जेड़ा तुन्दे कुलै आस्ते जमराज सिद्ध होग । ते तुन्दा सारे दा सर्वनाश करी देग । ऋषि होर श्राप देइयै दुरी गे । मूर्ख यादव घबराये । उनें मखौल कीता हा पर एदा नतीजा ते बड़ा भयानक होआ ऐ । दूए दिन उनें गी चक्कर आई गया जिसलै उनें

दिक्खेया जे ओ नौजवान साम्ब जेड़ा जनानी बनेया हा उसी सच्चे-मुच्चे गर्भ दी पीड़ गुरु होई गई ते उस इक गुर्ज जम्मेया । यादव घबराये ते डरन लगे जे ऋषियें दा श्राप सच्च होन लगा ऐ ते उन्दा अन्त समां आई गेया ऐ । उनें बड़ा चिर बचार कीता ते फी उस गुर्जे गी त्रोटिए पीह्ता ते समुन्दरै इच रोढ़ी ओढ़ेया । उनें समझेया जे खतरा दूर करी ओढ़ेया ऐ । किश देर ते किश नईं होआ । मौसम बीतदे गे । वसति आई ते जित्थें उनें गुर्जे दी सुआह रोढ़ी ही—उत्थें बड़ियां भाड़ियां जम्मियां । जिसलै यादवें ए भाड़ियां दिक्खियां तां बड़े हरान होए ते खुश होन लगे उनें गी ऋषियें दा श्राप भुल्ली गेदा हा । इक दिन यादव समुन्दर कण्डे गे ते सारा दिन नचदे रे शराब पीन्दे रे ते नन्द मनान्दे रे । शराब दा असर होन लगा । पहले ते मजे करदे रे, फी भगड़न लगे, बोलने इच कोई संजम नेई रेआ । पराने भगड़े चेतै करन लगे ने लौकी २ गल्ले उप्पर लड़न लगे ।

यादवें चा कृतवर्मा कौरवें पासै लड़ेया हा ते सात्यकि पाण्डव पासेया ।

सात्यकि कृतवर्मा गी तान्ना मारिये आखन लगा—कोई क्षत्रिय सुत्तो दे बीरें उप्पर बी हमला करिए उनें गी कत्ल करदा ऐ ? तू ते साढ़े वंश गी कलंक लाया ऐ । किश यादव जिनें खूब पीती दी ही आखन लगे कृतवर्मा नै बड़ा कलंक लाया ऐ । कृतवर्मा कोला ए बेज्जती नईं बर्दाश्त होई । ‘तू इक कसाई आडू भूरिश्रवा गी बड्डी ओढ़ेया । जिसलै उन्दी बांह बढोई गई ही ते ओ समाधी इच हे । बुजदिला तू मिकी तान्ना मारनां ए ? किश शराबी ओदा साथ देन लगे ते आखन लगे—सात्यकि नै बड़ा बुरा कम्म कीता ऐ ?

भट्ट गै यादवें दे दो धड़े बनी गे ते लड़न लगे । लड़ाई जुद्ध बनी गई । सात्यकि तलवार लेइयै झपटेया ते उस कृतवर्मा दी मुण्डी बड्डी ओढ़ी । ते आखन लगा ‘जिस सुत्तो दे बीरें गी कत्ल कीता ओदा ए फल उसी थोआ ऐ ।

बाकी अपने प्याले, बर्तन ते जे किश हत्थै इच आया लेइए सात्यकि उप्पर त्रुट्टी पे । कृष्ण जी दा पुत्तर प्रद्युम्न सात्यकि गी बचान आया पर उस लड़ाई इच सात्यकि ते प्रद्युम्न दमै मरोई गे । कृष्ण जी गी सेई होई गया जे अन्त समां आई गया ऐ । उनें लम्मा २ घा सूट पुट्टिए ओदे कन्ने गै बरोधियें गी मारना शुरू कीता । हर इक यादव इऐ करन लगा । खूब कत्ले आम होआ । ऋषियें दा श्राप पूरा होआ ।

ए घा ते सूट उस्से गुर्जे दी सुग्राई थमां जम्मे दा हा । ओदा इक इक तीला गुर्जे बनी गया ते सारे यादव इक दूए उप्पर हमला करदे मरोई गे । शराबियें दी लड़ाई दा ए बुरा नतीजा निकलेया ।

बलराम होर ए सब किश दिक्खा करदे हे उनेंगी बड़ी शर्म आई । ओ बचारे भुजा गडोई गे । उनें समाधी लाई ते लोई दी रेखा बनिये समुन्दरै इच छपन होई गे । ईयां बभोआ जियां उन्दे मत्थे चा चान्दी दा सप्प निकलेया ऐ ।

ईयां बलराम जी जेड़े नारायण दा अवतार हे समाप्त होई गे ।

कृष्ण होरें दिक्खेया जे सब लोक जियां भागें लिखेदा हा आपू लड़िये सम्भी गे न । जिसलै उनें बलराम जी गी लोप हुन्दे दिक्खेया ओ बनें इच ध्यान मग्न होइयै अवतार दी समाप्ति उप्पर बचार करन लगे । मेरा अन्त समां बी आई गया ऐ । उनें ए आखेया ते भुजा सेई गे ।

इक शकारी जंगलै इच फिरै करदा हा उस कृष्ण जी गी भाड़ी इच लेटे दे दिक्खेया । उस सोचेया जे कोई जंगली जानवर बसां करा करदा ऐ । उस तीर चलाया—जेड़ा उन्दे पैरै इच लगा ते सारे शरीरै बिचा निकली गया ।

ईयां कृष्ण जी दी जीवन लीला समाप्त होई ।

युधिष्ठिर हुन्दी आखरी परीक्षा

कृष्ण जी दी मृत्यु ते यादवें दे सर्वनाश दी खबर हस्तनापुर पुज्जी । जिसलै पाण्डवें ए समाचार सुनेया तां उन्दा जिन्दगी बारे इच्च बिल्कुल मोह नई रेआ । उनें अभिमन्यु दे पुत्तर परीक्षित गी राज गद्दी सौंपी । आपू पञ्जै आ ते द्रोपदी हस्तनापुर दा चले ते तीर्थ जात्रा करदे करदे हिमालय पुज्जी गे । इक कुत्ता पता नई कियां उन्दे कन्ने कन्ने होई गया ते ओ सत्त जने पहाड़ें उप्पर चढ़न लगे । ए उन्दी आखरी जात्रा ही । जियां जियां उप्पर उप्पर चढ़दे गे ऊंआं इक्क इक्क हुट्टियै डिगदा गया ते मरदा गया ।

सारें कशा लौका पहलें ढट्टा ।

ओदे पिछुआं द्रोपदी, सहदेव ते नकुल इक दूए पिछुआं मरदे गे । फी अर्जुन ते भीम बी गे । युधिष्ठिर होरें इनें सारे प्यारें गी डिगदे दिक्खेया । ओ गम्भीरता कन्ने अग्रे टुरदे गे गे । ओ गमे इच्च नई फसे । उन्दे सामने सचाई दी लो जगा करदी ही । उनें

गी पता हा जे असली गल्ल के ऐ ते भूठी गल्ल के ऐ । कुत्ता फी बी आवे करदा हा । ब्यास होर कुत्ते दी कया थमां ए दस्सना चान्दे न जे धर्म इक ऐसा साथी ऐ जेड़ा तोड़ तोड़ी कन्ने जन्दा ऐ । ए कुत्ता नई हा, धर्म हा जेड़ा उस भयंकर रस्तै इच बी युधिष्ठिर कन्ने कन्ने रेआ । उन्दे आ ते धर्मपत्नी बी उनें गी इक्कला छोड़ी गे ।

आखर जिसलै बड़ी चढ़ाई उपपर पुज्जे तां इन्द्र रथ लइयै सामने आया ।

आखन लगा—‘तुन्दे आ ते द्रोपदी तुन्दे कशा पहलें पुज्जी गे न । तुस पिच्छे रई गे । तुसें गी शरीरै दा भार हा । रथै उपपर चढ़ो तुसें गी इससै शरीरै समेत कन्ने लई चलड । अऊं तुसें गी लैन आयां ।

पर जिसलै युधिष्ठिर होर रथै इच बैठे तां कुत्ता बी चढ़ी गया ।

इन्द्र आखन लगा—सुर्गे इच कुत्तें जोगा थार ऐ नई । उनें कुत्ते गी बाहर कड़ी ओइया ।

युधिष्ठिर होर आखन लगे—तां मेरे आस्तै बी जगह ऐ नई । में कुत्ते गी छोड़ियै सुर्ग नई जाना । उनें रथै उपपर चढ़ने थमां इनकार करी दित्ता ।

धर्म होर अपने पुत्ररै दी दृढ़ता ते चरित्तर दी परीक्षा करन आये हे । उनें गी बड़ी प्रसन्नता होई । कुत्ता छपन होई गया ।

युधिष्ठिर होर सुर्ग पुज्जे । उत्थे उनें दिक्खेया दुर्योधन इक सिंहासनै उपपर बैठा दा ऐ ते ओ सूर्जे आडू चमका करदा ए ते ओदे कोल बीरता दी देवी ते होर देवते खड़ोते दे न । उनें गी अपने आ जां होर कोई नई लब्बा ।

युधिष्ठिर होरें सुर्गे दे वासियें गी पुच्छेया—मेरे आ कुत्थे न ? ए लालची ते अदूरदर्शी इत्थे बैठा दा ऐ । में अपना समां इत्थे नई गजारना चान्दा । इसनै साढ़े इच ईर्ष्या पैदा कीती । ते साढ़े कशा

मित्तर ते रितेदार मरवाये । अस धर्मे दे बद्धे किश नईं करी सके । साढ़ी अक्खीं सामनै इस द्रोपदी गी दर्बारै इच घसीटेया ते वेज्जती कीती । में इसी दिक्खना नईं चान्दा । मिगी दस्सो मेरे भ्रा कुत्थे न । जित्थे ओ न उत्थे मिगी लई चलो । ए आखियै युधिष्ठिर होरें अपनी अक्खीं जतां दुर्योधन बैठा दा तुआईं दा परताईं लैतियां ।

नारद ऋषि होर जिनें गी सब किशै दा ज्ञान ऐ किश मुस्कराये, उनें गी युधिष्ठिर हुन्दी गल्ल चंगी नईं बभोई ते आखन लगे—हे महाराज ! ए ठीक नईं । सुगें इच ईर्ष्या द्वेष नईं रखदे दुर्योधन दे बारे इच इयां नईं आखो । दुर्योधन इस स्थिति इच क्षत्रिय धर्म दी बदौलत पुज्जा ऐ । इस लै धरती दियां गल्लां रौन देओ ते बुराई नईं चेतो । धर्मे दा पालन करो ते दुर्योधनै कन्ने रवौ । सुगें इच नफरत गित्तै स्थान नईं । तुस मनुक्ख शरीरें समेत इत्थे आईं गे ओ । इस करी तुन्दे अनुचित बचार न । इनें गी छोड़ो ।

युधिष्ठिर होर आखन लगे—हे ऋषि जी ! दुर्योधन गी उचित ते अनुचित दा ज्ञान नईं । ओ पापी ऐ । उस नेक आदमियें गी कष्ट दित्ता । उस बेशमार लोकें दी मौत कराई सुट्टी ऐ । ओ बीर लोकें दे सुगें इच आईं गया ऐ । एदे कोला बड्डा लोका केड़ा ऐ जित्थे मेरे बीर भ्रा ते द्रोपदी होडन । में उनेंगी दिक्खने गी काह्ला पेदां । में कर्ण गी दिक्खना चाह्नां । दूए मित्तरें गी दिक्खना चाह्नां जिनें मेरे गित्तै जान्नां दित्तियां । ओ मिगी इत्थे लबदे गें नईं । में बिराट, द्रुपद, धृष्टकेतु ते शिखण्डी गी मिलना चाह्नां । में द्रोपदी दे पुत्तर ते अभिमन्यु गी दिक्खना चाह्नां । मिगी ओ इत्थे लब्दे गै नईं । जिनें मेरे गित्तै लड़ाई कीती, अपने प्राण घ्यो आडू अगगी इच सुट्टी दित्ते ओ कुत्थे न ? मिगी नईं लब्दे । मिगी उन्दे इच लई चलो । जुद्ध दे खात्मे उप्पर मेरी माता कुन्ती नै कर्ण गित्तै तिलाञ्जलि देने गी आखेया ।

जिसलै मिगी कर्ण दा बचार औन्दा ऐ तां बड़ा दुख हुन्दा ऐ ।

ओ मेरा भ्रा हा । में अनजाने गै उसी कतल कराई ओड़ेया । मिगी उसी मिलने दा चा ऐ । भीम जेड़ा मिगी जिन्दु थमां प्यारा हा, अर्जुन जेड़ा आपूँ गै इन्द्र आडूँ ऐ, नकुल सहदेव ते पतिव्रता द्रोपदी, ए सारे कुत्थे न । में उन्नें गी दिक्खना चाह्नां ते उन्दे इच रौना चाह्नां । में सुर्ग नईं जाना चाह्न्दा । अपने भायें कोल दूर इत्थें में के लैना ऐ ? जित्थे ओ न उऐ मेरे गित्तै सुर्ग ऐ । में इत्थें नईं रौह्नां ।

देवते सुनियै आखन लगे—हे युधिष्ठिर जी ! जे तुस जरूर गै जाना चाह्न्दे ओ तां बड़ी खुशी कन्ने ठुरी जाओ । इत्थे चिर करने दी कोई लोड़ नईं । उन्नें सेवक गी आखेया—युधिष्ठिर होरें गी लई जाओ । दूत अगगें अगगें चलेया पिच्छे पिच्छे युधिष्ठिर होर चले । जिसलै ओ अगगे गे तां न्हेरा आई गेया । उस न्हेरे इच नेइयां चीजा लब्बन लगियां जिनें गी दिक्खियै कैंक आई जा । लहू ते गन्दगी दे चिक्कड़ै बिच्चा उन्नें गी लंघना पेया ।

रस्ते इच हड्डियां ते पिञ्जर पेदे हे । मुर्दे दे बाल पेदे हे । हर जगह कीड़े कुलबुल २ करा करदे हे । ते बाऊ इच इक बड़ी दर्कन्न ही । हर पासै बढोए दे शरीर लब्बे । युधिष्ठिर होर बड़े डरे ते दुविधा इच पई गे । हजारां बचार उन्नें गी परेशान करन लगे । ओ बधदे गे पर बड़े दुखी होए ।

ए रस्ता होर किन्ना चलना ऐ ? मेरे भ्रा कुत्थे न ? उने दूतै गी पुच्छेया । उन्नें गी बड़ी बेदना होआ करदी ही ,

दूत हौली नेई बोलेया—आखो तां वापस चली पौचै । दर्कन्न इन्नी ही जे युधिष्ठिर हुन्दा मन होआ जे परतोई चलचै । पर ओदे मनै दे बचार समझिऐ किश जानियां पछानियां बाजां जोरेयां आखन लगियां—

“हे युधिष्ठिर जी, वापस नईं जाओ । किश मिण्ट ते जरूर ठहरो । तुन्दे औने करी असैं गी इस जातना कशा रमान थोआ ऐ । तुन्दे औने करी ताजी बाऊ दा फनाका आया ऐ ते असैं गी इस जातना इच किश सुख बभोआं ऐ । तुन्दे दर्शनै कन्ने गै साढ़ा दुख

दर्द मिटन लगा ऐ । थोड़े चिरै आस्तै गै सई, ठहरी जाओ । वापस नई जाओ । जिन्ना चिर तुस इत्थे ओ असें दुःखै इच रमानै दा साह औन लगा ऐ । इयां बाजां आखन लगियां ।

सारे पासेया—जोरें जोरेयां बाजां औन लगियां । युधिष्ठिर होर बड़े दुखी होए ते दुविधा इच फसे ।

उन्दे मनै गी बड़ा किश होआ—उनेंगी बाजां किश पनशोदियां सेई होन लगियां । उने पुच्छेया—तुस कुन रूहां ओ ? तुस की कल्पा करदे ओ ? तुस इत्थे की ओ ?

इक बाज आई—अऊं कर्ण आं ।

दूई बाज आई—अऊं भीमसैन आं ।

त्री बाज आई—अऊं अर्जुन आं ।

फो इक होर दुखी बाज आई—अऊं द्रोपदी आं ।

में नकुल आं ।

अऊं सहदेव आं ।

अस द्रोपदी दे पुत्तर आं ।”

इयां सारे पासेया दुखी बाजां औन लगियां इन्नां दुख दर्द किट्ठा होआ जे युधिष्ठिर हुन्दे कोला जरोआ नई ।

इनें बचारें के जुर्म कीता ऐ ? धृतराष्ट्र दे पुत्तर दुर्योधन के कम्म कीते न जे ओ इन्द्र वनियै सिंहासनै उपपर बैठा दा ऐ ? ते ए बचारे नरकै इच पेदे न । में सुखना दिक्खा करनां जा जागै करनां ? मेरा दमाग ते नई खराब होई गया ? में पागल ते नई होई गया ?

युधिष्ठिर होरें गी बड़ा रोह चढ़ेया । उनें देवतें गी कोसेया । धम गी फटकार दिती । उनें देव दूत गी आखेया—तू अपने मालकै कोल उठी जा । में इत्थे गै रौहूड जित्थे मेरे प्यारे आ न । इन्दा बचारें दा इऐ दोष ऐ जे ओ मेरे इच श्रद्धा रखदे न । इनें गी इस्सै करी नरकै इच सुट्टेदा ऐ ? में इत्थे गै रौड ।

देवदूत वापस गया ते जे किश युधिष्ठिर होरें आखेया हा इन्द्र गी सनाई दिता । इयां दिनै दा त्रीया हिस्सा बीतेया हा ।

इन्द्र ते यमराज दोऐ युधिष्ठिर हुन्दे कोल आये । युधिष्ठिर होर बड़े दुखी हे, परेशान हे ।

जिसलै ओ आये न्हेरा दूर होई गया । भयंकर नजारे छपन होई गे । कोई पापी नई रेआ । सुगन्धी आली बा चलन लगी । यमराज युधिष्ठिर गी दिक्खियै मुस्करान लगे ।

‘हे बुद्धिमान युधिष्ठिर ! ए तेरी त्री बार परीक्षा लई ऐ । तू अपने भ्रायें कन्ने नरकै इच रौना मन्जूर कीता । ए जरूरी ऐ जे राजें ते शासकें गी थोड़ा चिर गै सई नरक भोगना गै पौन्दा ऐ तुगी बी दिनै दा त्रीया हिस्सा ए नरकै दियां जातनां दिक्खनियां हियां । न अर्जुन ते न गै भीम नरकै इच न । न गै न्यां करने आला कर्ण जां होर कोई जेड़ा तूं समझेया नरकै इच ऐ ।

ए इक माया जाल हा तुगी सिद्ध करने गित्तै । ए नरक नई, सुर्ग ऐ । ए नारद होर न जेड़ै त्रैन्नें लोके इच फिरदे रौन्दे न । तूं दुखी नई हो ।

यमराज होरें युधिष्ठिर गी इयां समझाया । फी उन्दा शरीर दिब्ब शरीर बनाई ओड़ेया । उन्दी मनुक्ख देह खत्म होई गई । ओ देवता बनी गे । मनुक्ख शरीर खत्म हुन्दे गै रोह, ईर्ष्या नफरत सब मुक्की गे । फी युधिष्ठिर होर कर्ण गी मिले, सारे भ्रायें गी मिले । धृतराष्ट्र दे पुतरें गी मिले । हुण कोई रोह नई हा । सारे देवता बनी गेदे हे । इयां फी मिलन होने करी युधिष्ठिर होरें गी शान्ति ते सुख प्राप्त होआ ।

❀ समाप्तम् ❀

SPS

294.5 R 14 M



28603

San Pratap Singh

Library

Sanskrit

GH